









DE
C O D I C E
S A N C T I
E U A N G E L I I ,

*Atque servatis in ejus lectione,
& usu vario ritibus,*

L I B R I I I I ,

*Præcipua rei Liturgicæ, atque Ecclesiasticæ Disciplinæ,
tum Orientalis, tum Occidentalis,
capita complectentes.*

AD SANCTISSIMUM PATREM.
CLEMENTEM XII.
PONTIFICEM MAXIMUM

AUCTORE JOSEPHO CATALANO PRESBYTERO.



ROME, Ex Typographia Antonii de Rubcis. MDCCCLXIII.
SUPERIORUM PERMISSU.

THE UNIVERSITY OF CHICAGO

PHYSICS DEPARTMENT

PHYSICS 354

LECTURE 1

1.1.1

1.1.2

BEATISSIME PATER.



*Ærenti mihi, BEA-
TISSIME PATER,
cui nam hosce de Codice Sancti
a 2 Euan-*

*Euangelii , atque servatis in
ejus lectione , ac usu vario Ri-
tibus libros dedicarem, occurrit
statim SANCTITAS TUA, ad
quam utpote Summi Hierarchæ
dignitate præstantem sacræ res
quammaxime pertinent. Neque
enim fas erat opus alii commen-
dari, quam supremo Catholicæ
Ecclesiæ Antistiti, atque ei in
primis Antistiti, qui Majorum
Suorum virtutis, ac generis hæ-
res curam, studium, & ope-
ram ponere numquam desinit in
divino cultu instaurando, Re-
ligione constituenda, atque Ec-
clesiæ juribus vindicandis. Qui-
que*

que ita sapienter , provideque
omnia moderatur , ut tria il-
la , quæ in eximiis quibusque
Principibus Romana quondam
Respublica desiderabat , Sancti-
tas domi , foris fortitudo , utro-
bique prudentia , in excelsò ani-
mo ipsius certare videantur . Sed
ut interim sileam insignem SAN-
CTITATIS TUÆ erga literas , ac
literatos homines benevolentiam ,
in quorum gratiam , præstan-
tem Bibliothecam veteres Ptole-
mæos imitatus , congregans de re-
gionibus libros , construxisti ; Ego
ut tuo hoc opus immortalī No-
mine exornarem , insignia tua
effe-

effecerunt beneficia, quibus nostram Brutiorum gentem cumulaſti. In his potiffimâ dignum memoriâ eſt egregium in Calabria pro Italogræcis Adoleſcentibus Religione, ac bonis artibus erudiendis Collegium erectum. Cui munificentiae quum parem gratiam referre nequaquam poſſim, conſentaneum duxi publicam aliquam grati animi relinquere teſtificationem; omnibuſque palam facere univerſam Brutiorum gentem eximiae SANCTITATIS TUÆ liberalitati ſe maximopere obſtrictam profiteri; hæſuramque perpetuo
in

*in animis nostris illorum memo-
riam. Accipe igitur BEATISSIME
PATER gratanti animo hoc Opu-
sculum, quod tibi veluti obsides
propensissimas omnium nostrum
voluntates totius Provinciæ no-
mine æternum dicat, monimen-
tumque ponit apud nos ære pe-
rennius. Licet autem Romanos
aliquando Pontifices Euangelii
Codice auro, gemmisque coru-
scante Viri Principes donare con-
sueverint: Quum id Ego præ-
stare nequaquam valeam, Sa-
crum Euangelium priscis am-
plissimi decoris monumentis, au-
reisque Ecclesiæ tum Orientalis,
tum*

*tum Occidentalis Ritibus exor-
natum SANCTITATI TUÆ conse-
cro: quam Deus Optimus Ma-
ximus Ecclesiæ universæ diu ser-
vet incolumem.*

Humillimus Servus
Joseph Catalanus.

1M-

IMPRIMATUR,

Si videbitur Reverendiss. P. Mag. Sac. Pal. Apost.

N. Baccarius Ep. Bojan. Vicesgerens.



A P P R O B A T I O.

Demandante Reverendissimo P. Joanne Benedicto Zuanelli Sacri Apostolici Palatii Magistro attente perlegi librum, cui sequens titulus præfixus est, *De Codice S. Evangelii, atque servatis in ejus lectione, ac usu vario Ritibus &c.* Auctore Josepho Catalano Presbytero; & illum comperi non solum Catholicæ Fidei Dogmatibus, ac Christianæ Disciplinæ Regulis respondentem, quinimmo in eo pervolvendo suspexi Ritus, Cæremonias, & antiquos Christianorum mores, ita eruditè recensitos, vetustiorum Patrum, Sacrorum Conciliorum testimoniis, aliisque præscis monumentis ita comprobatos, ut ex illius editione magnam Reipublicæ literariæ utilitatem, & clarissimo Auctori laudem sperari posse confidam; quapropter eum dignissimum censeo, ut prælo tradatur, & publici juris fiat. Datum Romæ ex ædibus S. Silvestri in Quirinali hac die xvi. Decembris anni MDCCXXXII.

*D. Cajetanus Maria Merati Cl. Reg. & Sac. Rituum
Congregationis Consultor.*

QUum ex mandato Reverendissimi P. Joannis Benedicti Zuanelli Sacri Apost. Palatii Magistri Librum *De Codice S. Evangelii, atque servatis in ejus lectione, ac usu vario Ritibus*: a Reverendo Josepho Catalano Presbytero elucubratum diligenter expenderim, nihilque vel Fidei, vel bonis moribus absconum repererim, immo omnia adeo pie, solide, ac docte pertractata, ut magnam lucem asserant tum sacris Ritibus, tum veteri, ac novæ Ecclesiæ disciplinæ; publici juris fieri posse censeo. In quorum fidem &c. Romæ pridie nonas Decembris MDCCXXXII.

*Franciscus Marianus Vaticana Bibliotheca
Scriptor Græcus.*



IMPRIMATUR.

Fr. Jo. Benedictus Zuanelli Ord. Præd. Sac. Pal. Apost. Mag.



IN

INDEX CAPITUM,

Quæ in hoc Opere continentur.

LIBER PRIMUS.

O Peris scribendi occasio, argumentum, & finis.	pag. 1
<i>Euangelii Erymon, & definitio. Caput I.</i>	3
<i>De Euangeliorum numero. Caput II.</i>	6
<i>De Euangeliorum Auctoribus. Caput III.</i>	7
<i>Cur Christus Euangelium ipse non scripserit? Caput IV.</i>	9
<i>Cur non unus Euangelii scriptor, sed plures? Caput V.</i>	10
<i>De peculiaribus Euangelii scribendi causis. Caput VI.</i>	12
<i>Qua lingua scripta sint Euangelia. Caput VII.</i>	13
<i>De Locis, atque temporibus quibus Euangelia sunt scripta. Caput VIII.</i>	15
<i>De Ordine Euangelistarum. Caput IX.</i>	16
<i>De Euangelistarum Symbolis. Caput X.</i>	17
<i>De Euangelio S. Joannis ceteris præcellenti. Caput XI.</i>	18
<i>De præminencia Euangelii supra ceteros sacros libros. Caput XII.</i>	20
<i>De Scriptorum Concordiæ Evangelicæ, ac sacris Euangeliorum Interpretibus. Caput XIII.</i>	21

LIBER SECUNDUS.

Q uo primum tempore Euangelium in Missa legi cæptum. Caput I.	23
<i>Euangelium qua lingua lectum in Missa. Caput II.</i>	31
<i>Euangelium qui olim in missa legerent. Caput III.</i>	34
<i>Euangelii lectio sollemnis Imperatoribus concessa. Caput IV.</i>	37
<i>Euangelii lectio in missa faminis vetita. Caput V.</i>	39
<i>Euangelium in qua olim Ecclesie parte legeretur? Caput VI.</i>	42
<i>Diaconus quibus ornatus vestibus Euangelium legeret? Caput VII.</i>	50
<i>De Sandaliis. Caput VIII.</i>	54
<i>De Amictu, Alba, & Cingulo. Caput IX.</i>	55
b 2	De

De Manipulo, & Stola. Caput X.	58
De Dalmatica, & Casula. Caput XI.	63
De ritu deferendi Euangelium ad Altare, benedictionis petende, ac procedendi ad lectionem Euangelii. Caput XII.	66
De usu Thuris, Cereorum, Crucis, & Pulvinaris ad lectionem Euangelii. Caput XIII.	71
De ritu indicendi silentium quum Euangelium legitur. Caput XIV.	77
De ritibus a Diacono servandis quum Euangelium nuntiat, ac pri- mum de salutatione, Dominus Vobiscum. Caput XV.	81
De ritu exprimendi Crucis signaculum, quando Euangelium nun- tiatur. Caput XVI.	83
De ritibus a Clero, & populo in Euangelii lectione servandis, ac primum de verbis Et cum spiritu tuo. Caput XVII.	84
De verbis Gloria tibi Domine, ac de Crucis signo a populo ex- presso ad lectionem Euangelii. Caput XVIII.	86
De ritu ponendi baculos, dum Euangelium legeretur. Caput XIX.	88
De ritu nudandi enses ad lectionem S. Euangelii. Caput XX.	93
De ritu standi quo tempore Euangelium nuntiatur; ac de Pallio, & Mitra Episcopi ad ejusdem lectionem depositis. Caput XXI.	94
An etiam faminis standum, quando Euangelium pronuntiatur? Ac de iis qui genuflexi, vel sedentes ipsum auscultant. Caput XXII.	102
De standi ritu ad tria Euangelii cantica, ac toto divini officii tem- pore juxta veterem Ecclesie morem. Caput XXIII.	106
De ritu aperiendi caput ad lectionem Euangelii. Cap. XXIV.	110
De ritibus post Euangelii lectionem servatis, ac primum de accla- mationibus Amen, Deo gratias, & aliis. Cap. XXV.	119
De ritu exprimendi versus Crucis signum. Caput XXVI.	120
De ritu Osculandi Euangelium. Caput XXVII.	121
De ritu sigillo obsignandi Euangelium post ejus lectionem. Caput XXVIII.	125
De ritu concionandi proxime post Euangelii lectionem. Caput XXIX.	128
De ritibus ab Episcopo in concionando servatis. Caput XXX.	130
Euangelium predicandi proprium Episcoporum manus. Caput XXXI.	132
	LI.

LIBER TERTIUS.

E uangelio super Altari locato æqualis honor, ac Christi Craci delatus. Caput I.	134
<i>Euangelium in Processionibus delatum, præcipue Dominica Palmarum. Caput II.</i>	137
<i>Euangelii textus una cum Christi Corpore in Sepulcro asservatus, quod feria v. Hebdomada sancta, in ipsius memoriam quotannis fieri solet. Caput III.</i>	140
<i>De ritu Euangelium legendi ad pedum lotionem, quam vocant Mandatum, feria quinta Cæne Domini. Caput IV.</i>	144
<i>De ritu deferendi Euangelium in Processione matutina die Paschæ; ac de ipsius usu apud Græcos in salutatione per fraternum osculum eadem die. Caput V.</i>	147
<i>De ritu recitandi Euangelium in Litanis; alicubi ad præcipuos Civitatis Portas. Caput VI.</i>	152
<i>De ritu legendi Euangelium ad Aquæ benedictionem, quæ fit in pervigilio Epiphaniæ. Caput VII.</i>	155
<i>Euangelium in aris campani benedictione lectum. Cap. VIII.</i>	159
<i>Euangelii usus in exorcismis ad Dæmones ab Energumenis expellendos. Caput IX.</i>	164
<i>In Conciliis tum Generalibus, tum particularibus Sacri Euangelii codex in præcipuo, atque honorificentissimo collocatus Throno. Caput X.</i>	167
<i>Euangelium in Iudiciis profanis pro Tribunali positum. Caput XI.</i>	170
<i>Sacri Euangelii usus in purgatione Canonica. Caput XII.</i>	171
<i>Ad Euangelium iuramenta edita, eodemque res gravissimæ confirmatæ. Pæna a legibus in perjuros constituta. Cap. XIII.</i>	174
<i>In electionibus Episcoporum, Abbatum, & Regum Euangelium addibitum. Caput XIV.</i>	176
<i>Codex Euangelii supra Caput Episcopi consecrandi impositus, & cur? Caput XV.</i>	177
<i>Euangelium aureis literis conscriptum, ac gemmis pretiosissimis ornatum. Caput XVI.</i>	179
<i>Euangelii liber auro gemmisque ornatus a Viris Principibus donatus Pontificibus Maximis, vel Episcopis. Parte item Euangelii pretiosi inclusa thecis a Summis Pontificibus donati Viri Principes. Caput XVII.</i>	181
<i>Euangelii</i>	

<i>Euangelium loti monibus atrestatum; aperto capite, stardo, ac lumine adhibito lectum. Caput XVIII.</i>	183
<i>Euangelico scribendo codici homines delecti. Idem vetustate detritus in sacrarium conditur. Caput XIX.</i>	184
<i>Euangelium præcipua Clericorum supellex, a plerisque tamen neglectum. Caput XX.</i>	188
<i>Euangelium Domi servatum diabolus arcet. Ejus lectio utilis omnibus, ac necessaria; a pueritia olim usitata. Caput XXI.</i>	191
<i>Euangelia initia Catechumenis olim exposita. Caput XXII.</i>	194
<i>Euangelium sorte apertum, lectumque, vel auditum ad indagandam Dei voluntatem, bonumque futurum, vel malum prænosendum. Caput XXIII.</i>	196
<i>Per delectum codicis Euangelici in Martyrio constantia noscitur. Caput XXIV.</i>	200
<i>Per Euangelici Codicis delectum inter pretiosa monilia & armillas explorata puellæ Virginis futura Sanctitas. Caput XXV.</i>	202
<i>Euangelii lectio atque explicatio ad discernendum spiritum aliquando præcepta. Caput XXVI.</i>	203
<i>Euangelii Codex e lectis Christianorum suspensus. Caput XXVII.</i>	204
<i>Sacra Euangelii pagina e collis Christi-fidelium suspensa. Caput XXVIII.</i>	205
<i>Euangelium a Christianis gestatum Martyres facit, a naufragio liberat, Virginitatem servat, luxuriam domat. Caput XXIX.</i>	208
<i>Euangelium ignem extinguit, & barbaros ad Christum convertit. Caput XXX.</i>	211
<i>Euangelium corporis morbos, & animi languores pellit. Caput XXXI.</i>	212
<i>Lectio Patri Euangelio filius cecus visum recipit. Caput XXXII.</i>	214
<i>Euangelicus Codex aquis demersus nulla litera violatus pulchrior educitur. Caput XXXIII.</i>	215
<i>Euangelium discordias sedat; Tyrannorum impetus comprimit. Caput XXXIV.</i>	216
<i>Septem Euangelia a totidem Sacerdotibus apud Græcos recitata in Officio S. Olei, quod pro conferenda ægrotanti extrema unctio-</i>	

*ne domi, vel in Ecclesia celebratur. Codex Euangelii super
ungendi caput primus impositus, ipsi deinde osculandus por-
rigitur. Caput XXXV.* 217

Euangelium morientibus lectum. Caput XXXVI. 219

*Viri Sancti Euangelii Codicem tenentes, eoque fidem profitentes
vita sancti. Caput XXXVII.* 221

Sacer Euangelii liber vita sanctis consecutus. Caput XXXVIII. 223

*Frustra ab Ethnicis Imperatoribus, Sacris Euangelii Codicibus
bellum indictum. Christianorum in illis retinendis & occul-
tandis constantia. Traditores qui? Caput XXXIX.* 224

*Euangelium adulterantes qui? Illius Prædicatores decet quamma-
xime, ut a temporali quæstu sint immunes. Caput XL.* 227

*Euangelica historia in Christianorum Templis, ac Cæmeteriis pi-
etæ. Inter sacra Ecclesiæ ornamenta expressa. Abusus in rebus
divino ministerio additis profana insignia collocandi refelli-
tur. Caput XLI.* 232

*Mulierum abusus, quæ sacras Euangelii historias profanis vestibus
intexebant, adpingebantque refellitur. Caput XLII.* 237



In defensionem Euangelii positus sum .

Ad Philippenfes cap. I. verfu xvi.

*Scire autem vos volo Fratres , quia quæ
circa me sunt , magis ad profectum
venerunt Euangelii .*

Ibid. verfu xii.

*Omnia autem facio propter Euangelium,
ut particeps ejus efficiar .*

i. ad Cor. cap. ix. verfu xxiii.



DE CODICE SANCTI EUANGELII

ATQUE SERVATIS IN EJUS LECTIONE,
ET USU VARIO RITIBUS

LIBER I.

*Operis scribendi occasio, argumentum,
& finis.*



Um non ita pridem in lecta doctorum virorum corona, de nonnullis Catholicæ Ecclesiæ ritibus sacris haberetur sermo, ac multa ultro citroque proponerentur, quæ ad ingerendas, vel discutiendas difficultates objectas videbantur conducere, quædam de sacro etiam Euangelii Codice, debitaque illi reverentia, præsertim cum publice in Ecclesia adstanti populo legitur, dicta sunt. Ubi autem suam singuli asseruere sententiam; & quæ potior solidiorque ex his merito esset habenda, disquiritur, non pauca ab iis qui aderant doctæ, quædam gravibus difficultatibus obnoxia, nonnulla etiam absurde pronuntiantur.

tur. Quæ tamen, ut fieri solet, dum quisque pro partium studio mordicus tuetur, vel exagitat, ut labefactatæ, vel assertæ veritati esset pondus gravius, dictorumque fides validis undecumque instructa rationibus, atque momentis fulciretur, optimum factu duxi quæ uno tenuis ore disserueram, auctis deinde studio, & operâ scripto excipere. Id autem dum exequor, ita paulatim labor excrevit, ut sensim ad justam libri molem pervenerit.

Huic ut certus esset ordo, constitutosque fines haberet pertractata materia, *De Codice Sancti Evangelii, atque servatis in ejus lectione, & usu vario ritibus*, titulum præfixi. Pauca subinde veluti argumento confectaria, de Evangelii etymologia, definitione, aliisque scitu dignis quæstionibus, quæ rem universam illustrarent, adjeci. Quod eo item consilio factum est, ne legentium, animus huc illucque distraheretur, si nullis coercita limitibus vagaretur oratio. Nihil siquidem magis ad pertractatæ rei exactam notitiam ducit, quam dictorum, methodus, ac certa differendi ratio: libenterque illa discimus, nec facile modo, verum etiam constantissime retinemus, quæ opportunis sectionibus, riteque disposita, & illustrata doctrina tradi solent. Aequissimum, sectanti propositum validiores stimulos suscepti operis finis addidit. Quum enim qualicumque labore nostro divinæ gloriæ incrementum, & venerationis erga sacrum Evangelii Codicem, atque divinæ ipsius doctrinæ studium magis magisque promovendum, unice a nobis spectatum sit, vehementiora ad id suppetere incitamenta, non poterant.



Euangelii Etymon, & definitio.

CAPUT I.

Euangelium græce, bonum sive lætum nuntium significat, ab *eu*, quod est *bene* seu *feliciter*, & *aggelia*: quod idem est ac nuntius. Jure autem meritoque Christiani Jesu Christi sermonem, atque doctrinam Euangelium appellarunt: quod inde passim felicitas æterna, mortalibus nuntiatur; ut probe sentit Tertullianus. l. iv. contra Marcion. cap. iii. Hinc S. Augustinus l. iii. contra Faustum cap. vi. *Omnes, inquit, qui græce vel tenuiter noverunt, Euangelium bonum nuntium, aut bonam annuntiationem interpretantur.* Quid autem gratius, aut melius, quam gratiæ per Christum factæ annuntiatio? Euangelia Græcis ipsis dicta sunt sacrificia, & supplicationes, quæ pro læto jucundoque nuntio decerni consueverunt, vel etiam merces hujusmodi allati nuntii: *O suaves*, ait Cicero ad Atticum lib. iii. epist. xii. *Epistolas, quibus Euangelia deberi fateor.* Non desunt tamen qui ab hebraica voce *עֵבֶר* *Even*, idest *Petra*, & *גִּבְלִין* *Ghilion*, idest *manifesta* etymologiam ducunt, quia in Euangelio generi humano verus missus manifestatur, qui est angularis lapis a perfida Synagoga reprobatus. Joannes Baptista Jona in procemio Euangeliorum, quæ hebraice reddidit, eam nomini significationem asserit adversus Rhabbinum improbum, qui Euangelion, idest manifestam offensam fraudolenter, atque calumniose fuerat interpretatus. Videtur itaque Euangelium non absurde dici posse bona nuntiatio instinctu Spiritus Sancti conscripta, tractans peculiariter de adventu, & mysteriis Jesu Christi, tradens cælestem ejus doctrinam, quæ homines ducit ad vitam æternam.

Quæ autem bona Euangelio nuntientur, fusc, at-

que elegantissime ostendit S. Joannes Chrysostomus homilia prima in Matthæum, cujus verba digna profecto sunt quæ hic describantur: „Euangelium (inquit) poenarum sublationem, veniam peccatorum, sanctificationem, atque iustitiam, redemptionem, adoptionem, etiam filiorum, & Cælorum hæreditatem, & cum Dei Filio fraternitatem omnibus, tum inimicis, tum improbis, & in tenebris sedentibus nuntiavit. Numquid possit esse æquale his tam bonis nuntiis? Deus in terris, homo in Cælo: facta est omnium una permixtio: Angeli cum hominibus jungebant choro; homines choris addebantur Angelicis, atque cælestibus aliis, supernisque virtutibus. Erat cernere antiquum repente prælium dissolutum; Deum hominibus reconciliatum; Diabolum vero confusum; Dæmones cum tremore fugientes, mortem peremptam, Paradisum apertum, maledictionem, remotam, peccatum de medio sublatum, exagitatum errorem, veritatem reversam, pietatis sermonem ubique seminatum, ubique crescentem; cælestem conversationem in terræ regione plantatam; virtutes supernas familiariter nobiscum loquentes, & ad terras sæpe Angelos ventitantes; exque his spem firmam futurorum, „ Ita S. Joannes Chrysostomus.

Opportune hoc loco refellendus est error Brentii semilutherani, qui (ut refert Petrus Annatus) cum Buce-ro, Melancthone, suoque duce Luthero, & aliis Evangelium legem esse inficiatur, eâ potissimum de causa, quod Evangelium nihil prorsus præcipiat nobis, sed solum annuntiet, nihilque sit aliud, quam lætum ac bonum de Jesu Christo Dei Filio nuntium, qui solus suæ passionis merito est peccatorum nostrorum expiator, animarumque nostrarum Servator unicus. Atque hac via perditionis ejus sectæ homines ab omni se bonorum operum obligatione liberos contendunt: in hoc sibi non constantes, quum nul-

lum

lum esse discrimen asserunt inter consilium, & præceptum; nec ullum esse in Euangelio consilium, sed omnia quæ nobis commendantur, esse præcepta. Deus bone! Quis non videt quam ineptè garriant, eorumque dicta inter se mirifice pugnent? Quomodo enim sine contradictione dici potest, nihil præcipere nobis Euangelium, seu nullum in Euangelio præceptum esse, & tamen omnia nobis in Euangelio commendata, non consilia, sed præcepta esse? Licet autem Euangelium, bonum ac lætum de Christo nuntium dicatur, non tamen sequitur legem dici nequaquam posse; nam, ut sapienter notat Annatus, Euangelium multipliciter sumi potest, & re ipsa in multiplici sensu sumi solet in Scriptura divina. Primo enim accipitur pro re ipsa bona, ac læta, quæ nuntiatur, ut dum Matthæi cap. iv. dicitur: *Circuibat Iesus totam Galilæam, docens & prædicans Euangelium Regni*. II. pro ipsa Christi doctrina, seu verbo, quemadmodum Matthæi cap. xxiv. *Prædicabitur hoc Euangelium Regni in universo Orbe*. III. pro ipsa prædicatione; & sæpe hoc sensu ab Apostolo usurpatur, ut exempli causa in prima Corinthiorum cap. iv. *In Christo Iesu per Euangelium Ego vos genui*. IV. Denique pro historia adventus, & vitæ Christi, ut Marci cap. i. *Initium Evangelii Iesu Christi*. Quando autem Euangelium Christi legem esse dicimus, Euangelii nomen usurpamus pro Christi doctrina, pro Christi verbo, in quo est lex Christi, lex nova, lex Gratia, lex vera, de qua recte dici potest illud Psalmi cxviii. *Lex tua veritas*.



De Evangeliorum numero.

CAPUT II.

QUatuor esse Evangelia, nec plura, nec pauciora, catholica tenet Ecclesia, nempe Matthæi, Marci, Luca, Joannis. Reliqua pseudoeuangelia ab hæreticis conficta, aut a pseudoeuangelistis evulgata, quæcumque illa sint, veluti apocrypha, falsa, nulliusque auctoritatis haberi decernit S. Gelasius Papa in Synodo LXX. Episcoporum Romæ habita, recitata a Gratiano in canone: *Sancta Romana*. distinctione XV. Ibi post vera atque germana, multa pseudoeuangelia enumerat, quæ numquam ab Ecclesia fuere recepta. Alii alia, ac multo etiam plura id genus mercis falsæ recensent. Non defuerunt tamen hæretici, qui omnia Evangelia repudiarent, veluti Manichæi, qui ea ab impostoribus scripta mentiti sunt. Alii ab Apostolis quidem, sed præter veritatem, composita, ideoque parvæ fidei dixerunt. Cerinthus Matthæi dumtaxat; nonnulli Marci; Valentiniani, quorum sectator Lutherus exitit, solum Joannis Evangelium agnoverunt. Lutherus enim, præfatione in novum testamentum, ut sui jactant, quinti Evangelii auctor, tribus prioribus Evangeliiis Pauli epistolas præfert, unicum vero Joannis pulchrum, verum, & præcipuum decernit. Sed quatuor, ut monuimus vera, atque germana esse Jesu Christi Evangelia, ab initio semper Ecclesia docuit; cujus etiam quaternarii numeri mysticas rationes varii Sancti Patres reddiderunt. S. Augustinus lib. I. de consensu Evangelistarum cap. II. id factum esse ait ob quatuor mundi plagas, quibus prædicandum erat Evangelium. Huc alii Patres referunt quatuor flumina Paradisi. Genesis cap. II. quatuor rotas in quadriga Domini. lib. III. Regum cap. VII. qua-

quatuorque illas quadrigas, de quibus loquitur Zacharias, cap. vi. quatuor tandem animalia plena oculis visa ab Ezechiele, & Joanne, trahentia currum, cui majestas divina insidet; idest Euangelium, in quo maxime illa elucet. Alii alias non dissimiles causas referunt, easque ad viginti recenset Joannes de Haye in tractatu, De Euangelio.

De Euangeliorum Auctoribus.

C A P U T III.

Euangeliorum Auctor primus, atque præcipuus est Deus Optimus Maximus, quemadmodum & cæterarum sanctarum Scripturarum, quæ summam ab eo auctoritatem, ac fidei pondus sumunt. Instrumentales vero auctores, ut loquuntur, sunt homines, quorum opera, & manu ad Bibliorum scriptionem Deus usus est; illis enim non modo sensum, sed etiam verba, sententias; ordinemque dictavit. Unde Paulus epistola II. ad Timotheum cap. III. *Omnis, inquit, scriptura divinitus inspirata*. Et Apostolorum Princeps epistola II. capite I. *Non voluntate humana allata est aliquando prophetia, sed Spiritu Sancto inspirati locuti sunt sancti Dei homines*. Locuti non tantum voce, sed etiam scripto. Atque ut de Euangelis potissimum disseramus, placet luculentum Sancti Ambrosii testimonium afferre sic agentis præmio in Lucam: *Matthæus, Marcus, Lucas; Joannes non conati sunt, sed divino Spiritu ubertatem dictorum, rerumque omnium ministrante, sine ullo molimine impleverunt*. Unde patet Euangelistas nihil de suo ad Euangelii descriptionem contulisse, sed divinum Spiritum ipsis sine ulla fere industria omnia, quæ scribebant, uberime subministrasse. *Nihil, inquit S. Joannes Chrysostomus,*

mus, temere in scripturis positum est, quippe quæ Spiritu Sancto prolata sunt. Quod & vox illa titulo Evangeliorum præfixa, exempli gratia: *secundum Matthæum*, insinuare videtur; significat enim, ut recte observat Cornelius a Lapide in Evangelium S. Matthæi, primum, & primum Evangelii hujus Auctorem esse Spiritum Sanctum; secundarium vero Sanctum Evangelistam, qui fuit quasi organum, instrumentum, & calamus Spiritus Sancti, scribens ea quæ Spiritus Sanctus dictabat; juxta illud Psalmi xlii. *Lingua mea calamus scribæ velociter scribens*. At hic opportune quæri potest, quis auctor sit ejus tituli, qui cuique Evangelii libro præfigitur, nimirum *secundum Matthæum*. Nonnulli putant eum fuisse ab Ecclesia additum: alii contendunt indicem esse ipsius Evangelistæ. Quæ sententia videtur mihi longe probabilior, tum quia & Prophetæ suum prophetis libris nomen præfixere, ut *visio Isaia*, *verba Jeremiæ* &c. tum etiam quia nec apud Judæos, vel Gentiles meritam habuissent auctoritatem ea volumina, quæ scriptoris sui nomine caruissent.

Ut autem sciamus, exempli gratia, Evangelium vere adscribi S. Matthæo, illudque vere esse scripturam a Spiritu Sancto dictatam, opus est Ecclesiæ judicio, ac definitione, quæ librum canonicum esse decernat. Quapropter sapienter S. Augustinus libro contra epistolam Manichæi, quam vocat fundamenti cap. iv. *Evangelio*, ait, *non crederem, nisi me Ecclesiæ Catholicæ commoveret auctoritas*. Non quod dignior, aut major sit Ecclesiæ auctoritas, quam sacra scripturæ, cum hæc sit verbum & oraculum Dei ipsius, sed quod Ecclesiæ sit veram sacram Scripturam a falsa & supposititia segregare, & judicare; ejusque genuinam mentem, & sensum explanare. (Cum ergo dicimus, ait quidam gravis Auctor apud Cornelium a Lapide in Matthæum, Evangelistas & ceteros Scriptores

res sacros eo modo, quo dictum est, ab Ecclesia Catholica auctoritatem habere, nullus offendi merito debet, quasi Deo Ecclesiam anteponamus. Sic enim dicimus Ecclesiam scripturis auctoritatem dare, quod eas a Deo datas esse declaret, & ab ipso dictatas esse confirmet. An domino servum præponunt, qui vulgo dicunt literas regias a Nonophylace, qui sigillum adhibuit, auctoritatem habere? Ecclesia profecto Dei sigillum habet, illum ipsum Spiritum, qui Ecclesiæ promissus, & datus est, ut cum illa maneret in æternum, quique suam manum, scripturamque recognoscit. Hic est, qui quatuor hæc Evangelia primum dictavit: deinde nobis eadem a se dictata fuisse per Ecclesiam declaravit.

*Cur Christus Euangelium ipse non
scripserit?*

C A P U T IV.

QUum autem quæritur, quare Christus Euangelium, quod, ut Tridentini Concilii Patres Sessione IV. loquuntur, proprio ore primum promulgavit, propria ipse manu non scripserit, contentus uno tenus ore, sive pro concione, sive privatis colloquiis instituisse populos? causa esse potest, eum maluisse in tabulis cordis carnalibus, quam in lapideis, vel libris Euangelium conscribere, juxta illud Jeremiæ vaticinium, capite XXXVII. *cujus non semel meminit Apostolus, epistola ad Hebræos capite x. Dabo legem meam in visceribus eorum, & in corde eorum scribam illam.* Vel dicendum, peculiari id Dei providentia accidisse, ne in errorem minoris faciendi, parvique æstimandi cætera Prophetarum, ac Apostolorum scripta laberemur. Cæterum Evangelia, quæ Evangelistæ exararunt, tamquam Jesu Christi opera, digi-

digito Dei, idest divino Spiritu dictante scripta nos suscipere, & venerari debere, disertis verbis docet S. Augustinus libro 1. de consensu Evangelistarum, capite ultimo. „ Omnibus autem discipulis suis per hominem, quem assumpsit, tamquam membrum sui corporis caput est. Itaque cum illi scripserunt, quæ ille ostendit, & dixit, nequaquam dicendum est, quod ipse non scripserit, quandoquidem membra ejus id operata sunt, quod distante capite cognoverunt. Quidquid enim ille de suis factis, & dictis nos legere voluit, hoc scribendum illis tamquam suis manibus imperavit. Hoc unitatis consortium, & in divinis officiis concordium membrorum sub uno capite ministerium quisquis intellexerit, non aliter accipiet, quod narrantibus discipulis Christi, in Evangelio legerit, quam si ipsam manum Dei, quam in proprio corpore gestabat, scribentem conspexerit. Sic ille.

Cur non unus Evangelii scriptor, sed plures?

C A P U T V.

Quid autem necesse fuit quatuor Evangelistarum opera, quatuor scribi Evangelia, an non sufficiebat ab uno scriptore cuncta memorari? Satis quidem erat, inquit S. Joannes Chrysostomus homilia prima in Evangelium Sancti Matthæi; sed quum quatuor sint, qui Evangelia conscribebant, nec iisdem certe temporibus, nec iisdem locis, neque pariter congregati, neque mutuo colloquentes, & quasi uno ore omnia pronuntiantes, fit hoc sine dubio veritatis grande documentum. At inquis, contra accidit, in multis enim diversi inveniuntur, ac diffoni: Imo hoc ipsum, subdit laudatus Chrysostomus, maximum est testimonium veritatis; si enim ex toto, & in

in omnibus consonarent, nimiaque diligentia, & cura, itemque ad tempora, & loca omnia, ad singula denique æqualiter verba concurrerent, facile inimici credidissent illos communi ad decipiendum consilio congregatos, ex humana quadam conspiratione Euangelium condidisse: nec simplicitatis, & integritatis validum argumentum, spectata in singulis concordia judicarent: nunc autem quæ videtur in rebus exiguis dissonantia, ab omni illos suspitione liberat, satisque perspicue scriptionum integerrimam scriptionem, fidem, & nomen tuetur. Si vero aliquid de temporibus, ac locis varie dixerunt, nihil quidem dictorum officit veritati; sed tamen, prout donavit Deus, progredientes etiam ista declarare tentabimus. Ita Chrysostomus, qui præterea monet, ut diligenter notemus, præcipuis illis capitibus, in quibus vita nostra, & prædicationis summa consistit, nusquam Evangelistarum aliquem vel in minimo dissidere. Itaque licet quatuor sint Euangelia, si numerus eorum, qui scripserunt, inspicitur, unicum tamen ex iis, quæ scripta sunt, dicitur Euangelium. Quum enim eadem loquantur omnes, nec alter alteri repugnet, sicut unus est Christus, una Fides, una Ecclesia, sic apud omnes nationes unum & idem est Euangelium, licet a pluribus Evangelistis conscriptum. Id passim docent veteres Ecclesiæ Patres, divinarumque scripturarum Interpretes. Quos inter S. Remigius in Matthæi Euangelium hæc habet. „Sicut una Fides, & unum Baptisma, ita unum Euangelium; quia una est doctrina, & quod ipse Dominus manifestat, cum dicit: *Ite, prædicate Euangelium omni creature.* Et nos quotiescumque plurali numero dicimus Evangelia, nec doctrinam dividimus, sed libros distinguimus.



De peculiaribus Evangelii scribendi
causis.

CAPUT VI.

QUamquam vero in maximum veritatis testimonium quatuor Evangelia a Matthæo, Marco, Luca, atque Joanne sint conscripta; adhuc tamen singuli peculiarem scribendi causam habuerunt. Quæ Matthæo literis Evangelium consignandi occasio fuerit, prodit Auctor operis imperfecti, præmio in Matthæum, sic in-
 quiens, „Cum facta fuisset in Palæstina persecutio gravis, ut periclitarentur dispergi omnes, ut carentes forte doctoribus fidei, non carerent doctrina, rogarunt Matthæum, ut omnium verborum, & operum Christi conscriberet eis historiam, ut ubicumque essent futuri, secum haberent fidei statum. Quæ ratio multo magis viguit, ut animadvertit Nicephorus libro II. historiae capite xlv. quo tempore Apostolus ad gentes promulgandi Evangelii causa properavit: ab se enim scriptum, Hebræis relinquens Evangelium, hujusmodi fidissimo christianæ doctrinæ pignore, suam veluti absentiam compensavit. *Marcus vero*, ait S. Hieronymus, de scriptoribus Ecclesiasticis, in Marco, *discipulus, & interpres Petri, juxta quod Petrum referentem audierat, rogatus Romæ a Fratribus breve scripsit Evangelium, quod cum Petrus audisset, probavit, & Ecclesie legendum sua auctoritate dedit*. Lucam quoque permotum ad scribendum, Evangelium, occasione pseudoapostolorum, qui in Græciæ regionibus circumvagantes, fabulas quasdam, atque genealogias perniciosas, & quæstiones disseminabant, conjicit magnus Annalium parens Baronius anno lviij. ex Pauli epistola ad Titum, & ex altera ad Corinthios; profe-

perfecto quod improbaret quæ ab aliis narrata essent, se ideo descriptionem instituisse, ipse Lucas in præfatione ad Theophilum significat: ubi pseudoapostolos, ac pseudoscriptores sugillat, quos Cerinthum, & Merinthum, aliosque ejusdem farinae homines fuisse tradit S. Epiphanius hæresi 21. Quod tandem ad causam pertinet, quæ S. Joanni Apostolum ad scribendum impulit, duplicem affert S. Hieronymus, de scriptoribus Ecclesiasticis, in Joanne, & proœmio in Matthæum; alteram nimirum ut confutaret Cerinthum, Ebionem, & alios Christi divinitatem negantes (quam etiam tradunt omnes fere Patres) alteram, quod cum legisset Matthæi, Marci, ac Lucæ volumina, eosdemque reperisset, unius tantum anni, in quo & passus est, post carcerem Joannis Baptistæ historiam texuisse, ipse prætermisso illo anno, cujus acta a tribus exposita fuerant, superioris temporis, antequam S. Præcursor clauderetur in carcerem, gesta narrare voluerit.

Qua lingua scripta sint Evangelia.

C A P U T VII.

Matthæi Evangelium hebraico sermone fuisse conscriptum, reliqua vero tria græco, constanter affirmant eximii Ecclesiæ doctores Hieronymus, & Augustinus: improbanda proinde, ac refellenda est opinio Cæjetani Cardinalis, itemque Anabaptistarum, qui audacter asserunt Matthæum græce Evangelium scripsisse. Enimvero præter memoratos Patres, quorum mox testimonia proferemus, cæteri quoque omnes uno ore affirmant S. Matthæum scripsisse hebraice, utpote rogatum a Judæis, ut quæ ore prædicaverat, scripto relinqueret. De Marco græce, an latine scripserit, a multis dubita-

bitatum est; ea de re Paganinus Gaudentius Pisanus præcipuam dissertationem adornavit, magno Etruriæ duci inscriptam, qua contendit S. Marcum primum latine, Evangelium Romæ exarasse, deinde græce Aquilejæ. Sed ut verum fatear, validiora meo iudicio videntur illorum argumenta, qui græce eum scripsisse propugnant: quod diserte narrat S. Hieronymus præfatione in Evangelistas ad Damasum Pontificem maximum, his verbis: *De novo nunc loquor Testamento, quod græcum esse non dubium est, excepto Apostolo Matthæo, qui primus in Judea Evangelium Christi hebraicis literis edidit*; additque se hac de causa jussu Damasii veterem vulgatam versionem latinam novi Testamenti, ac subinde Evangelii S. Marci correxisse, secundum græcum autographum. Idem aperte docet S. Augustinus libro 1. de consensu Evangelistarum capite secundo: *Matthæus hebræo descripsisse perhibetur eloquio, ceteri græco*. Non me latet plures contendere Marcum, utpote Romæ a Romanis rogatum, latine, non græce Evangelium edidisse; sed tantam argumento vim non esse, facile deprehendemus, si animadvertamus magnum tunc Romæ fuisse usum linguæ græcæ; tum, quod passim Senatores, alique diversi Ordinis viri illam discerent, tum etiam quod multi Græci in urbem confluerent. Unde gravissima illa querela Satyrici, Satyr.

III. vers. LX.

..... Non possum ferre Quirites
*Græcam Urbem, quamvis quota portio sacis Achææ
 Jam pridem Syrus in Tyberim defluxit Orontes.*
 At non viri modo, sed & femina primo Christi sæculo
 græcæ linguæ notitiam Romæ, & alibi in Italia affectabant, eodem teste Juvenale Satyr. VI. v. CLXXXV.
*Nam quid rancidius, quam quod se non putat ulla
 Formosam, nisi quæ de Thusca Græcula facta est?
 De Sulmonensi mera Cecropis, omnia Græce,*

Cum

Cum sit turpe magis nostris nescire Latine .

Hoc sermone pavent , hoc iram , gaudia , curas

Hoc cuncta effundunt animi secreta .

Utraque tamen sententia conciliari facile potest , si dicatur cum Alberto Magno, Marcum tum Græco , tum Latino sermone scripsisse , quod in Italia utriusque linguæ homines periti degerent .

*De Locis , atque temporibus quibus
Euangelia sunt scripta .*

CAPUT VIII.

Nunc de locis , atque temporibus , ubi , & quibus primum Euangelia sunt scriptis , mandata breviter dicam. Matthæum Hierosolymis in Judæa scripsisse , tradit Eusebius , anno , ut Cornelius a Lapide supputat , ab ortu Salvatoris , septimo atque tricesimo . De Marci Evangelio Romæ edito , præter unum , aut alterum , qui volunt in Ægypto scripsisse , cæteri omnes consentiunt ; & quidem anno quinto & quadragésimo . Lucam in Achaja volumen suum literis consignasse docet S. Hieronymus , post annum quinquagesimum primum , juxta Cornelium a Lapide . Joannem vero Apostolum , circa annum nonagesimum nonum Ephesi id præstitisse constans fere Scriptorum omnium est sententia . Quamvis nonnulli memorent in Insula Pathmos id accidisse : quod narrat & Simeon cognomento Metaphrastes , qui etiam addit Joannem pristinæ libertati redditum , rogatum ab incolis Insulæ , ut prius quam inde discederet , Euangelium in ipsorum usum , atque doctrinam scriberet ; cumque indicto universis jejunio , montis verticem ascendisset , & jam opus esset aggressurus , tonitrua , fulgura , atque terrores esse factos , sicut olim cum Moyse in vertice Sina montis legem accepit , ac demum tonitrua in vocem expref-

expressa resonasse : IN PRINCIPIO ERAT VERBUM . Ne quis vero putet hæc contemnenda , quod ab Auctore non adeo antiquo , dubiæque interdum fidei , vel quod apud Prochorum Scriptorem apocryphum eadem fere scripta narrantur, expendendum monet Baronius anno xcix. testimonium S. Hieronymi , qui ex antiqua ; veraque historia Ecclesiastica memorat , Joannem coactum ab omnibus tunc Asiæ Episcopis , & multarum Ecclesiarum legationibus , de divinitate Salvatoris altius scribere , ita facturum se respondisse , si indicto jejunio in commune omnes Deum deprecarentur ; eo vero expleto revelatione saturatum , illud procemium e Cælo veniens eructasse : IN PRINCIPIO ERAT VERBUM . Quod insuper idem Joannes a Domino dictus sit filius tonitruï , S. Epiphanius id respectu Evangelii , quod ab ipso scribi aliquando deberet , dictum putavit .

De Ordine Euangelistarum .

C A P U T IX.

JAm quod ad tempus attinet , primus Evangelium scripsit S. Matthæus , deinde S. Marcus , postea S. Lucas , postremo S. Joannes . Quamobrem mirum fortasse cuique videri poterit inter Evangelii Scriptores , extremo Apostolos , medio autem loco discipulos collocari . Id tamen divina ordinatione factum esse docet S. Augustinus lib. 1. de consensu Euangelistarum capite II. , ut scilicet Marcus , & Lucas tamquam filii in loco medio constituti , ex utroque latere a Matthæo , & Joanne munirentur : quam rationem elegantissimis verbis S. Petrus Damiani sic explicat , sermone de S. Matthæo : , Notandum est quia summus Architectus , videlicet Omnipotens , dum hujus spiritualis mundi , hoc est S. Universalis Ecclesiæ fabricam

bricam super quatuor Euangelistas, quasi super columnas totidem constituit, duas potiores, & egregias extrinsecus ordinat, quibus scilicet omnis surgentis machinæ pondus incumbat, duas minores in medio statuit, sicque cælestis fabricæ pulchritudinem alterna varietate distinguit, ut pluralitas ad fundamentum, diversitas pertineat ad ornatum, & divinum opus sic a robore permaneat inconcussum, ut sit etiam varietate conspicuum. Matthæus itaque primum obtinet locum, Joannes ultimum; qui nimirum in Apostolico sunt culmine constituti, & in iis quæ scripserunt, non auditu dumtaxat, sed visu potius, atque contactu sunt præsentialiter informati; sicut unus eorum dicit: *Quod audivimus, quod vidimus oculis nostris, annuntiamus vobis.* Marcus autem, & Lucas, qui Euangelici catalogi meditullium fortiuntur, non quidem Apostoli, verumtamen præcipuorum Apostolorum, unus Petri, alter Pauli relationibus sunt edocti. Omnes nihilominus Sancti Euangelistæ sunt unius auctoritatis, unius fidei, nec in aliquo dispares in texenda sincerissima linea veritatis; ac per omnem suæ descriptionis articulum, inexpugnabile simul erigunt propugnaculum, adversus omnium quarumlibet hæreseon jacula præmunitum. Hactenus S. Petrus Damiani.

De Euangelistarum Symbolis.

C A P U T X.

Mirificum Euangelistarum Symbolum Ezechieli divinitus patefactum viso illo quatuor animalium, quæ etiam S. Joanni in Insula Pathmos exulanti fuere exhibita, Sancti Patres, divinorumque librorum Interpretes unanimi consensu testantur, quamvis non omnes exponendo conveniunt. Communior ea videtur sententia,

ria, quæ faciem Hominis Matthæo, Leonis Marco, Bovis Lucæ, Aquilæ vero Joanni tribuit. Hæc igitur, inquit S. Hieronymus proœmio in Matthæum, quatuor Evangelia multo ante prædicta, Ezechielis quoque volumen probat, in quo prima visio ita contextitur: *Et in medio sicut similitudo quatuor animalium, & vultus eorum, facies Hominis, & facies Leonis, & facies Vituli, & facies Aquilæ.* Prima Hominis facies Matthæum significat, qui quasi de homine exortus est scribere: *Liber generationis Jesu Christi filii David, filii Abraham.* Secunda Marcum, in qua vox Leonis in Eremita rugientis auditur: *Vox clamantis in deserto: parate viam Domini; rectas facite semitas ejus.* Tertia Vituli, quæ Evangelistam Lucam a Zacharia Sacerdote sumpsisse initium præfigurat. Quarta Joannem Evangelistam, qui assumptis pennis Aquilæ ad altiora festinans, de verbo Dei disputat. Elegantissima sunt in rem ipsam Sedulii carmina ita canentis:

Hoc Matthæus agens Hominem generaliter implet:

Marcus ut alta fremit vox per deserta Leonis:

Jura Sacerdotii Lucas tenet ore Juvenci:

More volans Aquilæ verbo petit astra Joannes.

De Evangelio S. Joannis cateris præcellenti.

CAPUT XI.

TAmetsi unumquodque Evangelium opus divinum est, & quilibet e quatuor Evangelistis inscribendo actus est Spiritu Sancto; constanter tamen Patres asserunt Evangelium S. Joannis longe aliis antecellere; & quidem ratione gravi, atque multiplici. Nam ut egregie tradit S. Augustinus tractatu lvi. in Joannem: „In quatuor Evangeliiis, vel potius quatuor libris unius Evangelii

gellii, S. Joannes Apostolus, non immerito secundum intelligentiam spiritalem Aquilæ comparatus, alius multoque sublimius aliis tribus erexit prædicationem suam, & in ejus erectione etiam corda nostra erigi voluit : Nam cæteri tres Euangelistæ tamquam cum homine Domino in terra ambulant, & de divinitate ejus pauca dixerunt; istum autem quasi piguerit in terra ambulare, sicut ipso exordio sui sermonis intonuit, erexit se non solum super terram, & omnem ambitum aeris, & Cæli, sed super omnem etiam exercitum Angelorum, omnemque constitutionem invisibilium potestatum, & pervenit ad eum, per quem facta sunt omnia, dicendo : *In Principio erat Verbum, & Verbum erat apud Deum, & Deus erat Verbum*. Huic tantæ sublimitati principii etiam cætera congrua prædicavit; & de Domini divinitate quomodo nullus alius, est locutus, hoc ructabat quod biberat. Non enim sine causa de illo in isto ipso Euangelio narratur, quia & in convivio supra pectus Domini discumbebat : de illo ergo pectore in secreto biberat; sed quod in secreto bibit, in manifesto eructavit, ut perveniat ad omnes gentes non solum incarnatio Filii Dei, passio, & resurrectio, sed etiam quod erat ante incarnationem unicus Patri, Verbum Patris, coæternus generanti, æqualis ei, a quo missus est. Hæc Augustinus.

Quod vero est admirabile, quidam Platonici initium hujus Sancti Euangelii tanti faciebat, ut sicut a Sancto Simpliciano Mediolanensi Episcopo idem Augustinus audire solebat, aureis literis conscribendum, & per omnes Ecclesias in locis eminentissimis proponendum esse dictitaret. Porro potiora fidei christianæ mysteria S. Joannes tam admirabili brevitate complexus est, ut propterea ex præcepto S. Pii V. hoc fidei breviarium legatur in fine Missæ, quod olim multi religiose audire, quotidie avebant, curabantque. Piam tamen consuetu-

dinem in superstitionem aliquando labentem Concilium Salegustadicense anno mxxi. celebratum, canone x. reprehendit. Credebant enim quidam pravi homines semori non posse sine poenitentia, quo die lectioni designata Evangelii S. Joannis interfuerant; vel, ut docent alii apud eruditissimum Emmanuelem Gonzalez, in capite *quidam, de celebratione missarum*, quia optabant futura prædicere, & credebant audito Evangelio se id certo assequuturos. Mirum quot ejusmodi superstitionibus, nostra hac tempestate in suam animarum perniciem christiani quidam homines capiantur, ut in ludo fortis, quem *lotto di Genova* vulgus appellat, lucrum insigne adipiscantur; utinam non *luctum gehennæ æternum*, & inconsolabilem!

*De præminentia Evangelii supra ceteros
sacros libros.*

C A P U T. XII.

INter omnes divinas auctoritates, quæ sacris literis continentur, ait S. Augustinus, libro i. de consensu Evangelistarum capite i. Evangelium merito excellit. Quod enim lex & Prophetæ futurum prænuñtiaverunt, hoc redditum & completum in Evangelio demonstratur. Sane fuisse legem veluti umbram, Evangelium autem, veritatem per legis typum adumbratam liquet ex iis quæ in prima Corinthiorum epistola, capite x. scripsit Apostolus: *Patres nostri omnes sub nube fuerunt, & omnes in Moyse baptizati sunt in nube, & in mari, & omnes eandem escam spiritalem manducaverunt, & omnes eundem potum spiritalem biberunt, bibebant autem de spiritali, conseqente eos petra; petra autem erat Christus.* Et post pauca, *Hæc omnia in figura contingebant illis.*

Appo-

Apposite sane scribit Cornelius a Lapide proœmio in Matthæum: „ Tot Patriarcharum gesta, tot Prophetarum oracula, tot visionum symbola, tot hostiarum sacrificia, tot baptismatum & cæremoniarum sacramenta, tot legum decreta sanguine animalium sancita, erant umbræ, figuræ, & typi, quæ Christo præluderent, eumque quasi in ænigmate, & sub velamine, rudi populo repræsentarent: Euangelium autem manifeste nobis Christum, ejusque mysteria, & sacramenta exhibet. Unde idem Apostolus in altera epistola ad Corinthios capite III. *Nos vero omnes, inquit, revelata facie gloriam Domini speculantes in eandem imaginem transformamur, tanquam a Domini spiritu.* Et ad Romanos scribens, ita epistolam suam orditur: *Paulus servus Jesu Christi vocatus Apostolus, segregatus in Euangelium, quod ante promiserat per Prophetas suos in scripturis sanctis de filio suo.* Alia, & multa quidem Euangelii, ac legis discrimina passim Sancti Patres enuntiant: quæ in præcipuum volumen congestit Joannes Haye e societate Jesu. Quare ne longior sim, digitum ad fontem intendisse sufficiat.

*De Scriptoribus Concordia Euangelica, ac
sacris Euangeliorum Interpretibus.*

C A P U T XIII.

FUIT antiquorum scriptorum studium quatuor S. Euangelii libros ita in unum conjungere, ut ex universis unum pulchra harmonia efficerent. Id primum omnium præstitisse Theophilum Antiochenæ Ecclesiæ Episcopum testatur S. Hieronymus epistola ad Algasiam, quæstione VI. Id ipsum curavit, sed mala fide Tatianus hæreticorum Encratitarum parens. Id etiam egit Ammonius Alexandrinus, quem, ut ait idem S. Hieronymus præfatione



tione in quatuor Euangelia ad Damasum Papam, secutus est Eusebius Episcopus Cæsariensis. Recentiores multi eandem diligentiam imitati sunt, sed magna præ cæteris laude vir clarissimus, atque religiosissimus Cornelius Jansenius Episcopus Gandavensis. Quod vero ad sacros attinet Euangeliorum Interpretes, innumeri fere tum priscis temporibus, cum recentioribus commentarios in Euangelia scripsere. Præclarum est quod de venerabili Beda legitur; qui pæne animam agens, ut commentarium in Joannem absolveret, accito scriba: *Accipe*, inquit, & *festinanter scribe*. Et tandem, *Consummatum est*; occinensque, Gloria Patri, & Filio, & Spiritui Sancto, placidissime spiritum emisit, pro fide ac labore, Dei visione beandum, anno dccxxxı.





DE CODICE
SANCTI EUANGELII

ATQUE SERVATIS IN EJUS LECTIONE,
ET USU VARIO RITIBUS

LIBER II.

*Quo primum tempore Euangelium in Missa
legi cœptum.*

CAPUT I:



AB ipsis Ecclesiæ primordiis divinos
libros lectos esse in missarum solem-
niis Apostolorum canone decimo
comprobatur: Omnes fideles qui in-
grediuntur Ecclesiam & scripturas
audiunt, non autem perseverant in
oratione, nec sanctam communionem
percipiunt, velut inquietudines Ec-
clesiarum commoveantes convenit a communione privari.
Hunc autem morem servatum fuisse ab Apostolis, ut sci-
licet sacras scripturas legerent, cum fideles ad synaxim
conveniebant, ipsemet Paulus epistola prima ad Corin-
thios

thios asserit, cap. xiv. *Cum convenitis, unusquisque vestrum, psalmum habet, doctrinam habet, apocalypsim habet, linguam habet, interpretationem habet: omnia ad ædificationem fiant.* Quæ verba ritum innuunt, & ordinem Sacrorum, quæ in Ecclesia primæva fieri solebant in sacris christianorum conventibus; ut ex Justino martyre, *in apologia secunda*, Junio Plinio, *in epistola ad Triganum*, Tertulliano *in apologetico*, cap. xxxix. aliisque licet addiscere. Ea hoc fere pacto instituebantur. Primo canebant Psalmos etiam populus. II. legebatur Sacra Scriptura. III. Episcopus prædicabat. IV. fiebat sacrificium. V. omnes communicabant. VI. quidam psalmos, & hymnos in laudem Dei variis linguis, quasi afflati Spiritu dictabant, & canebant. VII. alii prophetabant, alii more judæorum, Sacras scripturas interpretabantur, vel exhortabantur, iique duo, vel tres præsertim Prophetæ, aut viri spirituales; alii audiebant, & subinde interrogabant; etiam foeminæ (sed per abusum, quem Paulus in laudata epistola corrigit) aliquid circa id quod dicebatur; cumque aliquid boni, aut pii pulchre diceretur, simul inclamabant: Amen, Amen. VIII. claudebat omnia agape, sive convivium omnibus commune, in symbolum charitatis, post quod rursum succedebant hymni, & orationes. Ita Cornelius a Lapide, gravissimos Justini, & Tertulliani locos ad verbum referens.

Quod ad Evangelium spectat, Ævi Apostolici ritum esse illud in Ecclesia publice legi, quo præsertim tempore divinum sacrificium perageretur, patet ex eo, quod de Lucæ Evangelio perhibet Apostolus in altera sua quam ad Corinthios scripsit epistola, cap. vii i. Illum enim memorans suæ peregrinationis comitem: *Cujus laus*, inquit, *est in Evangelio per omnes Ecclesias*; quod profecto non de Barnaba, & Sila, ut quidam putant, sed revera

vera de Luca intelligendum esse Sancti Hieronymus, & Anselmus testantur. Clemens item, atque Papias Episcopus Hierapolytanus, Apostolorum sæculo proximi, apud Eusebium lib. II. histor. cap. xxv. referunt, Euangelium Marci, a S. Petro Apostolorum Principe comprobatum, publice in Ecclesia lectum esse. Quod de Euangelii quoque Matthæi, & Joannis, statim ac scripta fuerunt, minime nobis inficiari licet: quum etiam, ut recte notat Marcellus de Cavaleriis, *in statera missæ cap. de Euangelio*, synagogæ exemplum ob oculos esset, ubi populo congregato ritum legendi quæ tunc ad legem spectabant, a Moyse inductum, Exod. xxiv., atque præceptum, Deuter. xxxi. Christus ipse impleverit. Tandem ut Sanctos Patres, sacrosque Canones omittam, qui, ut infra patebit, de eadem re fidem luculentissimam faciunt, liturgia quoque S. Marci Evangelistæ ex pervetusto codice illustris monasterii S. Basilii Rossanensis, ex quo sapientissimus Cardinalis Gulielmus Sirletus eam describi curavit, Evangelicæ lectionis in missa mentionem facit.

Nec obstat, quod S. Gregorius lib. vii. epistola cxi. ad Joannem Syracusanum scribat, morem Apostolorum fuisse sola oratione dominica oblationis hostiam consecrare, ex quo infert Morinus, multorum annorum decursu Euangelium in missa lectum non esse. Ut enim scite differit, ac sentit doctissimus Cardinalis Bona lib. i. *Rerum liturgicarum*, id omnino de illis annis intelligi debet, cum Euangelium non dum erat scriptum; alioquin mendacii arguerentur Sancti Patres, potissimum vero Clemens, & Papias, Apostolorum sæculo proximi, qui, ut vidimus, referente Eusebio, testati sunt Euangelium Marci a Principe Apostolorum approbatum, publice in Ecclesia lectum fuisse. Cæterum esto Apostoli ab initio brevissimum liturgiæ ritum adhibuerint, ita

exigente primæ Christianitatis inter procellas adversantium nascentis conditione, eosdem tamen crescente fidelium numero lectiones, preces, cæremonias addidisse, quibus & sacrificii dignitas elucesceret, & major ipsi veneratio conciliaretur, auctoritate Sanctorum Procli, & Joannis Chrysostomi comprobatur, qui duobus fere sæculis magnum Gregorium præcesserunt: *Cum sacras*, inquit Chrysostomus, homil. xxviii. in I. Corinthiorum *illas cænas accipiebant Apostoli, quid tum faciebant? nonne in preces. convertebantur, & hymnos? nonne in sanctas vigilas? nonne in longam illam doctrinam, & multæ philosophiæ plenam?* Proclus vero in *liello, de traditione divinæ liturgiæ*, sic loquitur, „Salvatore nostro in Calis. assumpto, Apostoli antequam per omnem terrarum orbem dispergerentur, conspirantibus animis convenientes ad integram orandum diem convertebantur; & cum multam consolationem in mystico illo dominici corporis sacrificio positam reperissent, fufissime, longoque verborum ambitu missam decantabant; id enim pariter, ac docendi institutum cæteris rebus omnibus tamquam præstantius anteponendum existimabant: maxima sane cum alacritate, plurimoque gaudio huic divino sacrificio tempus insumentes, instabant impense, jugiter memores illorum verborum Domini, dicentis: *Hoc est corpus meum, & Hoc facite in meam commemorationem, & Qui manducat meam carnem, & bibit meum sanguinem, in me manet, & ego in eo.* Quocirca, & contrito spiritu multas preces decantabant, impense divinum implorantes Numen.

In qua autem missæ parte Euangelium olim legere-
retur, edicit Concilium Valentinum can. i. constituens:
Ut Sacrosancta Euangelia, ante munus illationem,
in missa catechumenorum, in ordine lectionum post
Apostolum legantur; quatenus salutaria præcepta Jesu
Chri-

Christi Domini nostri, vel sermones Sacerdotis, non solum fideles, sed etiam catechumeni, ac poenitentes, & omnes qui ex adverso sunt, audire licitum habeant. Varias rationes, quare post Apostolum legatur Euangelium, adducunt Scriptores, de divinis officiis. Simeon Thessalonicensis in libro *de mysteriis missæ* cap. xxi. enarrans morem hac in parte nedum Latinorum, sed & Græcorum, ait quod Deus non fecit simul omnem potentiam, & bonitatis suæ manifestationem, sed minorem prius, & postea majorem; quæ autem per se locutus est, quæ in Euangelio continentur, perfectiorem manifestationem continent, quam quæ per Apostolos locutus est. Addit Nicolaus Cabasilas in *expositione liturgiæ*, cap. xxi. Quia non repente, & uno simul tempore apparuit hominibus Dominus quanto erat robore, & quanta bonitate; hoc enim est secundi ejus adventus: sed vix procedens ab eo, quod est minus apertum, ad id quod est manifestius processit. Ea de causa eos qui ejus ostensionem paullatim fuisse factam volunt ostendere, Apostolica legere ante Euangelia est consentaneum.

Illud quoque vetustissima Ecclesiæ Catholicæ consuetudine receptum fuit, ut certo ac distincto ordine, Euangelia, Lectiones, atque Epistolæ singulis diebus per anni circulum in missæ sacrificio legerentur. Cujus moris S. Augustinus non uno in loco luculentum exhibet testimonium. Initio expositionis in epistolam S. Joannis: *Meminit*, inquit, *sanctitas vestra Euangelium secundum Joannem, ex ordine lectionum nos solere tractare; sed quia nunc interposita est solemnitas sanctorum dierum, quibus certas ex Euangelio lectiones oportet in Ecclesia recitari, quæ ita sunt annuæ, ut aliæ esse non possint: Ordo ille, quem susceperamus, necessitate paullum intermissus est, non omissus*. Et infra, *tractatu nono ejusdem expositionis*, Intercesserunt, ut intermitteremus tex-

tum hujus epistolæ, quædam pro diebus festis solemnia lectionum, quæ non potuerunt nisi legi, & ipsa tractari. Item S. Leo hujus nominis primus, Pontifex maximus, ferm. III. de Epiphan. *Quamvis sciam dilectissimi, quod sanctitatem vestram hodiernæ festivitatis causa non lateat, eamque secundum consuetudinem Euangelicus vobis sermo referavit.* In Ecclesia Romana Damasus Papa ordinem illum servari præcepit, quem S. Hieronymus præscripsit, in libro qui *lectionarius*, vel *comes S. Hieronymi* inscribitur. Quod communi fere Liturgicorum sententia comprobatur.

In Græcorum Ecclesiis non idem servatur Euangeliorum ordo, qualem disposuit S. Hieronymus in Ecclesia Occidentali; sed continuo totius anni spatio, totus quatuor Euangeliorum textus in Ecclesia palam legitur: quod diserte his verbis edisserit doctissimus Leo. Allatius dissertatione 1. *de libris, & rebus Ecclesiasticis*, pagina xxxv 1., Exceptis magnis solemnitatibus, quæ peculiare sibi poscunt, *Euangelium* in reliquis anni diebus ita dispertiuntur Græci, ut unius prius Evangelistæ textum in themata dividant, & diebus applicent, donec finiat; postmodum alterius continent, donec omnia ad exitum perduxerint, & diebus dominicis a scriptore, Euangelii nomen imponant: dicunt enim, Prima dominica Matthæi, II. Matthæi, & sic de aliis. Id ut melius comprehendas, velim advertas Joannis Euangelii textum universum septem integris hebdomadibus legi, quæ a magna Paschæ dominica, tribus diebus exceptis, numerantur. Matthæi a feria secunda post dominicam Pentecostes ad subsequenter Parasceven Exaltationis diem festum; absolviturque hebdomadibus septem, & decem. Harum undecim, singulis diebus Matthæi lectionem continuant; a duodecima, quinque tantum diebus Marci lectio assumitur; Sabbatis, & Dominicis
Mat-

Matthæi lectio restituitur, usque ad hebdomadam decimam, & septimam, dummodo hæc postrema inter tempus Paschale occurrat; sin minus, non legitur. Lucæ Evangelium a feria secunda, quæ Dominicam post Exaltationem excipit; & integris hebdomadibus duodecim continuatur; ab initio decimæ tertiæ, Marci percurritur in reliquis diebus, sed Sabbatis, & Dominicis Lucæ assumitur. Marci tandem inter Matthæi, & Lucæ absimitur; quod vero supererit, Sabbatis, & Dominicis Quadragesimæ absolvitur. Hæc ille.

Euangelia Dominicarum apud Latinos adeo sunt iis diebus affixa, ut quamvis eo tempore festum, ut vocant, duplex occurrat, adhuc in fine missæ Evangelium Dominicæ legitur; præterquam in missis, ut ajunt, votivis, quæ licet Dominica celebrentur, ut Romæ passim contingit in expositione xl. horarum, tamen semper ultimum Evangelium est S. Joannis. Refert autem Macrus in *Hierolexic. verbo Missa votiva*, id minime servatum fuisse anno mdcxlv. Dominica die iv. Augusti tunc occurrente; qua, quum Alexander VII. Pontifex Maximus in Templo S. Mariæ de Anima pro gratiarum actione, obrelatam ab Augusto Cæsare de Turcis victoriam, missam votivam celebraret, ei oblatum fuit legendum in fine missæ Evangelium Dominicæ.

Ac nequid prætermittamus ex iis, quæ huc apte revocari possunt, sciendum est non unam esse causam, propter quam hoc potius Evangelium, quam illud in tali, ac tali missa recitetur. Ut enim observarunt Gulielmus Durandus, & Joannes Belethus, aliquando legitur secundum historiam, ut illud in die Resurrectionis Dominicæ: *Maria Magdalena, & Maria Jacobi, & Salome*; atque illud etiam quod in Natali Domini ad secundam missam cantatur, *de Pastoribus*. Nonnunquam secundum allegoriam; cujusmodi est, quod in Assumptione,
B. Vir,

B. Virginis legi consuevit de Maria Magdalena, & de
 ejus sorore Martha: *Intravit Iesus in quoddam castellum*
&c. quia quum per Magdalenam vita contemplativa,
 per Martham vero, quæ ministrabat, activa significetur;
 hoc Evangelio indicatur, in B. Virgine utriusque
 vitæ fuisse consummationem, contemplativæ scilicet, &
 activæ. Interdum secundum personam canitur Euangelium,
 ut in festo S. Thomæ Apostoli, quo dicitur;
Thomas unus de duodecim &c. Quandoque secundum partem;
 ut in festo Sanctæ Crucis: tunc enim illud recitatur,
 quod est de Nicodemo, propter ejus extremam particulam:
Sicut Moyses exaltavit serpentem in deserto, ita exaltari oportet filium hominis: quibus verbis Christus
 suam passionem, sui que corporis in Cruce exaltationem
 indicavit. Denique secundum totum, prout est exiguum
 illud, quod in Circumcisione Domini licet animadvertere.
Postquam consummati sunt dies octo, ut circumcideretur puer.

Optimum factu esset hic præcipuo capite de methodo,
 qua Evangelia olim publice in Ecclesia recitabantur,
 differere; sed ea est in rem ipsam, locorum ac temporum,
 Clericorum ac Monachorum, græci ac latini ritus
 varietas, ut vix integro volumine explicari possit.
 Minime vero prætermittam, Evangelium aliquando ex
 tribus, interdum ex cunctis contextum Evangelistis in
 Ecclesia legi consuevisse, velut in die Parasceve, ac festo
 Resurrectionis Dominicæ, quo ut prodit S. Augustinus,
 Evangelium secundum quatuor Evangelistas recitabatur.
 Die vero solemnæ Epiphaniæ ex tribus constabat Evangelistis,
 propter tres Christi apparitiones, seu mysteria,
 quæ eodem die recoluntur: adoratio scilicet ejus per
 Magos, Baptismus, & primum miraculum, quod factum
 est in nuptiis apud Canam Galilææ. Sane quamvis
 in Orientali Ecclesia, Christi potissimum baptismus recola-

colatur, triplicem tamen illius manifestationem semper hac die latinam recoluisse Ecclesiam patet tum ex hymno Prudentii veteris ac celeberrimi Poetæ Christiani, quem inter divina officia recitamus, cum ex S. Paulino carmine ix. de S. Felice, Isidoro lib. II. de officiis cap. xxvi. Gregorio Turonensi libro II. de miraculis S. Martini cap. xxvi. & aliis.

Euangelium qua lingua lectum in missa.

CAPUT II.

QUamquam hæretici oblatrent, Sacras Scripturas, atque divina officia in linguam vernaculam transferri debere; Orthodoxi tamen acerrime propugnant id Ecclesiæ nullatenus expedire. Sane, licet olim Romani Pontifices non semel Moravis concessissent divina officia, & missam slavonica lingua celebrare, ut patet ex epistola ccxlviii. Joannis VIII. Pontificis Maximi ad Szentopulchrum Moraviæ comitem data anno mcccclxxx. eandem tamen licentiam celebrandi officii divini lingua slavonica Uratislao Bohemiæ Duci Summus Pontifex S. Gregorius VII. omnino denegavit. *Quia nobilitas tua, inquit, postulavit, quod saltem slavonica lingua apud vos divinum celebrari annueremus officium, scias nos huic petitioni tuæ nequaquam posse favere. Ex hoc nempe sæpe volventibus liquet non immerito Sacram Scripturam omnipotenti Deo placuisse quibusdam locis esse occultam; ne si ad liquidum cunctis pateret, sorte vilesceret, & subjaceret despectui, aut prave intellecta a mediocribus, in errorem induceret. Neque enim ad excusationem juvat, quod quidam Religiosi viri hoc, quod simpliciter populus querit, patienter tulerunt, seu incorrectum dimiserunt, cum primitiva Ecclesia multa dissimulaverit,*
quæ

qua a Sanctis Patribus postmodum firmata Christianitate, & Religione crescente, subtili examinatione correctæ sunt. Unde ne id fiat, quod a vestris imprudenter exposcitur, auctoritate Beati Petri inhibemus. Idem vetuisse Alexandri II. Summi Pontificis Legatum, qui Synodum coegit omnium Prælatorum Dalmatiæ, & Croatiæ, in qua statutum est, ne quis de cætero in lingua sclavonica præsumeret divina mysteria celebrare, nisi tantum in latina, & græca, prodit Thomas Archidiaconus Spalatenfis in *Historia Episcoporum Salonitanorum*, edita a Joanne Lucio, capite xvi. Denique cum quidam sanctarum Scripturarum libros gallice translatos, passim laicis, & mulieribus legendos permitterent, testatur Innocentius III. Pontifex Maximus, gravissima inde incommoda evenisse; nam translationi eidem usque adeo insistebant, ut se nec Episcopo, nec Metropolitano suo, nec ipsi Summo Pontifici assererent parituros, si eam abolendam decrevisset: præterea occulta conventicula celebrabant, simplicitatem Sacerdotum despiciebant, eorumque confortia, qui translationem ipsam non reciperent aspernabantur. At quid in hac re diutius immoror? Unum nobis adnotare sufficiat, tribus potissimum linguis, hebraica, græca, latina tum legem scribi divinam, tum tradi sacra, & divina officia, Apostolos, & eorum discipulos voluisse; ut pluribus argumentis, validisque rationibus probat Jacobus Ledesima Societatis Jesu Theologus in tractatu *De divinis scripturis quavis lingua non legendis*.

Quod vero hic prætermitti non debet, ritus est antiquissimus, ut in missa Papali Summo Pontifici sacra facienti duo diaconi inserviant, quorum alter Græcus græca lingua, Latinus alter, lingua latina Evangelium canit. Quod olim & in Constantinopolitana Ecclesia usurpatum fuisse liquet ex Nicolai Papæ I. epistola ad Michae-

Michaelem Imperatorem , qui latinam linguam ex contemptu barbaram appellabat. In Regno Neapolitano eundem ritum nonnullæ Ecclesiæ aliquando habuere; hodieque servat ac retinet Neritina , ut prodit vir magnæ eruditionis Sebastianus Pauli *de ritu Ecclesiæ Neritina* parte II. num. v. Quæ illustris in Japygia Ecclesiæ licet latinum ritum ab origine acceptum numquam dimiserit ; quia tamen partim latino , partim græco constabat populo , variaque olim græci ritus oppida intra dioccesim complectebatur , materni ejus officii fuit hos quoque sinu fovere , & se se quandoque piis eorum usibus accommodare . Alienum enim (subdit laudatus Auctor) a Christiana Religione erat , ut confluentes in primis anni solemnitatibus ad Ecclesiam Græci fideles , nil ibidem suspicerent , quod eorum pietatem aleret , pietatisque fervorem frequentia sacrorum mysteriorum roboraret . Hæc ipsa peculiari dissertatione , jam pridem illustravit clarissimus Abbas Petrus Pollidorus , amicus noster , vir excellentis in re literaria facultatis , cujus lectissima eruditio non uno in loco facem prætulit memorato Auctori , gratumque ipse in eo opere testatus est animum . Sed eo unde digressi sumus revertamur . Semel in anno Dominica Palmarum Brundusii in Sallentinis , Epistolam item , & Euangelium græca lingua , ex prisca , & immemorabili ejusdem latinæ Ecclesiæ consuetudine recitari consuevisse narrat Andreas de Monacha *Historiarum Brundusinarum* libro v. capite xi. & ultimo .

At nedum græce , & latine , sed & hebraice Sacri Evangelii lectionem publice in Ecclesiâ apud Italos recitatam fuisse , certis etiam constat monumentis historiæ . Ut alia vero sileam exempla : In solemnî Alexandri Papæ V. inauguratione , celebrata in Concilio Pisano , Epistola , & Euangelium tribus linguis pronunciatum esse , nimirum græce , hebraice , ac latine , testantur

acta ejusdem Concilii apud Dacherium tomo VI. Spicilegii pag. cccxxxiv. Evangelium quoque, sicuti & cætera divina officia, fuisse aliquando in missa, slavonica lingua recitatum constat ex supracitata epistola Joannis VIII. Pontificis Maximi, in qua tamen statuit, ut in omnibus Ecclesiis Terræ Moravorum, propter majorem honorificentiam Evangelium latine legeretur, & postmodum slavonica lingua translatum in auribus populi latina verba non intelligentis annuntietur, sicut in quibusdam Ecclesiis fieri videtur.

Evangelium qui olim in missa legerent.

C A P U T III.

A Pud nonnullas Gentes Evangelii lectioni, ob diaconorum raritatem, ut putat doctissimus Hallerius, destinatum aliquando fuisse Ordinem lectorum, ad quos spectabat divinas scripturas in Ecclesia recitare, patet ex S. Cypriano, qui Aurelianum, & Celerinum Confessores, ad lectoratum, ut Evangelium legerent, evexerat. In Hispania vero id quandoque subdiaconos præstitisse, constat ex Concilio I. Toletani, anno cccci. celebrati, canone IV. *Subdiaconus defuncta uxore si uxorem aliam duxerit, ab officio, in quo ordinatus fuerat, removeatur, & habeatur inter Ostiarios, vel lectores, ita ut Evangelium, vel Apostolum. (alibi Epistolam) non legat.* Certum quidem est morem, qui nunc viget solemnibus lectionis per diaconum inter missarum solemnia faciendæ, ab antiquissimis temporibus in Ecclesia, tum Græca, quum Latina ubique fere terrarum invaluisse. In Liturgia S. Marci Evangelistæ a Sirleto edita, Evangelii lectio in missa diacono expresse tribuitur: *Diaconus Evangelium recitaturus dicit: Domine benedicito &c.* Pervetustus Auctor constitutionum Apostolicarum, post-

postquam lectiones veteris Testamenti, & Apostolicas lectori assignasset, Evangelii lectionem diserte attribuit non soli Diacono, sed Diacono, vel Presbytero. In Oriente, & in Africa, eo munere functos esse diaconos, docent Sancti Hieronymus, & Augustinus. Ille ad Sabinianum scribens, *Evangelium*, inquit, *Christi quasi diaconus leſtitabas*. Hic de S. Stephano loquens sermon. IV. *Diaconus erat, Evangelia legebat, quæ legis, vel audis & tu*. S. Isidorus Hispalensis libro II. *de divinis officiis* cap. VIII. postquam diaconorum officia retulit, *Ipsi etiam*, inquit, *ut aures habeamus ad Dominum, clamant: ipsi quoque Evangelizant: sine ipsis Sacerdos nomen habet, officium non habet*. Concilium insuper Vafense, nomine II. reipsa vero III. anno DXXIX. coactum can. II. hæc habet: „Si Presbyter aliqua infirmitate prohibente per se ipsum non potuit prædicare, Sanctorum Patrum homiliæ a Diaconibus recitentur. Si enim digni sunt Diaconi quæ Christus in Evangelio locutus est legere, quare indigni judicentur Sanctorum Patrum expositiones publice recitare?

Ratio solemnis istius lectionis diacono tributæ probabilis Morino videtur, in libr. *de Sacr. ordinat.*, quod universæ Ecclesiæ mos fuit Evangelii lectionem magno cum apparatu, atque celebritate peragere; cumque alius mos in universa Ecclesia invaluiſſet, ut lectores admodum juvenes, & pueruli eligerentur, indecorum sane fuisset, & Ecclesiasticæ gravitati parum consentaneum, pueris hujusmodi tam sublimem, atque solemnem lectionem committere, & tantæ pompæ duces declarare. Quamobrem, addit laudatus auctor, Ecclesiæ merito consueverunt viros graves, & honoratos eligere, qui tam solemnem facerent lectionem, non lectorem, qui clericatus apud Græcos initium est, & primus gradus, apud Latinos secundus; sed diaconum Sacerdo-

ti auctoritate, & dignitate proximum. Certe Sozomenus lib. VII. histor. Sacrum codicem Evangeliorum, Alexandria a solo Archidiacono, apud alios a diaconis, & in multis Ecclesiis a solis Sacerdotibus, atque diebus solemnibus, ab Episcopis legi testatur.

Quamquam hæc quæ prodit Morinus, vir procul dubio doctissimus, plurimum mihi arrideant, causa tamen probabilior, propter quam Evangelii lectio diaconis tribuatur, oriri mihi videtur ex vi ordinationis suæ, in qua præter manuum impositionem, liber etiam Evangeliorum illis porrigitur, per cujus traditionem, sacrum diaconatus ordinem conferri, manifeste docet Eugenius Papa IV. in decreto unionis cum Armenis; & Pontificale Romanum his verbis: *Accipe potestatem Evangelium legendi in Ecclesia Dei, tam pro vivis, quam pro defunctis in nomine Domini*. Dicam itaque cum sapientissimo Hallierio de sac. ordinat. §. xv. de mater. diacon. n. xlii. præcipuum, vel certe ex præcipuis diaconi muneribus, quod per materiam ordinationis diaconi significari satis est, esse tum Evangelii recitationem, tum ejusdem simplicem expositionem, utramque autem codice Evangeliorum tradito explicari. Quæ quidem officia licet forsan primis Ecclesiæ temporibus, ex potioribus non essent, imo nec penitus tunc essent, quum Apostoli primos diaconos instituerunt, quo tempore nullum adhuc erat Evangelium scriptum; erat tamen aliquid æquivalens, quia tunc temporis diaconi Evangelii prædicationi cum cæteris dabant operam, ut patet exemplo Sanctorum Stephani, & Philippi, ex primis diaconis; semperque postea purgandis doctrina populis incubuerunt; propter quod diaconorum ordo a S. Dionysio, de Eccl. Hier. cap. v. dictus est purgativus. Unde libro Evangeliorum, qui divinum est scriptum, cujus conditione fideles purgantur, egregie hoc officium declaratur: ex eo enim nota

stra instructio sumenda, ex eo Christianæ catecheses, exhortationes, consolationes depromendæ.

Pluribus de hoc argumento, formaque ordinis diaconatus differere, diutiusque immorari in dissertationibus, quæ Theologorum mentes fatigarunt, supervacaneum existimo. Id solum monendum duco, ut quis molestioribus se se expediat difficultatibus, inhærere tuto sciteque posse sententiæ viri consummatæ doctrinæ, ac Theologiæ dogmaticæ principis, Roberti Cardinalis Bellarmini, cujus verba hæc sunt, tom. III. *de Sacram. Ordin.* cap. IX. n. xxv l. Credibile autem est Dominum, instituisse istas omnes materias Ordinum, non quidem in particulari sed generatim, monendo Apostolos, ut ordinem conferrent per cæremoniam instrumentorum, quibus significaretur eorum potestas. Hoc modo facile erit respondere objectionibus, quæ fieri possunt, circa præsentas mutationes materiæ, & formæ singulorum ordinum, & circa diversam consuetudinem Ecclesiæ Græcæ.

Euangelii lectio sollemnis Imperatoribus concessa.

C A P U T IV.

Solemnam Euangelii lectionem, quæ ut diximus ex vi ordinationis suæ ad Diaconos pertinet, Imperatoribus etiam quandoque fuisse concessam, patet ex veteri cæremoniali gallice manuscripto, ubi in capite: *Quomodo Imperator creatur*, hæc latinitati donata verba leguntur: *Papa debet cantare missam; & Rex Francia potest interesse, & Epistolam legere: & ipso absente Rex Sicilia ejus vices supplere potest; Imperator autem debet legere Evangelium, & coronatur in Ecclesia S. Petri Romæ.*

nae. Huic ritui mirifice suffragantur duo inter cætera, Imperatorum exempla illustria, Sigismundi, & Caroli IV. De primo sic habet ejus historia: *Mane venit Imperator ad missam Romæ in S. Petro, quam Papa cantavit, & Imperator legit Evangelium in habitu diaconi*. De altero testatur Albertus Argentoratensis his verbis: *In die quoque Sancto Nativitatis Domini Rex communicatus fuit, legitque in missa in galli cantu alta voce, habens in manu evaginatum gladium, Evangelium*, Exiit edictum a Cæsare Augusto.

Neque vero in missa solum, sed in matutino etiam Nativitatis Domini, quando occurrit gladium una cum pileo a Summo Pontifice benedici, Imperator si præsens fuerit, superpelliceo indutus, gladio cinctus, ac pluviali albo contextus, pileum scutiferis in manu gerentibus, ad canendam lectionem octavam accedit: *Exiit edictum a Cæsare Augusto*; associatus duobus Cardinalibus diaconis: sed antequam incipiat, & solitam benedictionem postulet, gladium evaginabit, quo ter percutiet terram, terque vibrabit in aerem, & super sinistro brachio illo deterso, in vaginam reponet; & finita lectione memoratis indumentis exiit. Atque ita actum fuisse Paulo II. Pontifice Maximo, ab Imperatore Friderico III. anno Domini mccccxviii. auctor est Dominicus Macrus in Hierolexic. verbo *lectio*, ubi ritum ipsum describit; additque quod si Imperator noluerit integram lectionem canere, sufficit ut usque ad homiliam proferat, quam subinde unus ex duobus Cardinalibus perficiet. Quo ritu Carolus V. Imperator, die Natalis Domini anno ab ejusdem ortu mxxxix. divinum Evangelium inter missarum solemnias a Clemente VII. Pontifice Maximo celebrata, populo nuntiaverit, fuse diligenterque narrat in suis diariis Pontificii Sacelli Sacrarum, Caremoniarum Magister, qui præsens interfuit; cujus

jus verba describemus , quum de ritu nudandi enses agetur .

Hæc dura, aut nova fortasse videbuntur nescientibus ritum , qui in coronandis Imperatoribus, Regibusque ea de causa ad Urbem venientibus servari solet . Hos quidem post Imperii , sive Regni diadema in Basilica Vaticana susceptum , continuo ejusdem Ecclesiæ Canonicos fuisse renuntiatos , scribit Achilles , & ipse Vaticanæ Basilicæ Canonicus , quem refert Turrigius in secunda parte tractatus *de cryptis Vaticanis* secundæ editionis ; asserens Carolum Magnum suscepta per manus Leonis III. Summi Pontificis Imperii corona , primum Imperatorem fuisse , qui memoratæ inclytæ Ecclesiæ Canonicus fuerit . Cæremoniale Christophori Marcelli Archiepiscopi Corcyrensis lib. I. sect. 1. cap. 111. ritum describens quò Imperator Romæ a Pontifice Maximo coronatur , hæc habet : *Indutus superpelliceo , & almutia recipitur a Canonicis S. Petri in Canonicum , & in fratrem &c.* De Gallorum Regibus testatur Fulgosius lib. I. cap. 1. eos quum in multis Regni sui Templis Canonicorum ordinariorum , ut vocant , numero sint adscripti , si quando ad ejusmodi Tempia accedunt , depositis Regiis ornamentis lineam vestem Sacerdotali more cum aliis Canonicorum insignibus sumere , ac sua ibi cum aliis Canonicis obire munia .

Euangelii lectio in missa fæminis vetita.

C A P U T V.

Quod hujus capituli titulo designavimus , vix sane memorandum ; quippe satis constat non licuisse unquam mulieri Euangelium in Ecclesia legere , atque diaconi munus usurpare , tum quod , ut admonet S. Basilus,

filius, lib. de vera virginit. *vox muliebris plena est illecebrarum*, tum quia celsus ac editus locus, in quem conscendendum legenti erat, ut ab omnibus conspiceretur; quemadmodum S. Cyprianus agens de Sanctis Celerino, & Aureliano indicat, omnino dedecet foeminam; quam velari ac tegi in Ecclesia par est, non vultum ostentare; tum insuper, quod Apostolus præcipiat, mulierem in Ecclesia tacere: Non me latet aliquot non defuisse auctores, qui inter alia diaconissarum munera, eas etiam in Ecclesia legisse scribant, eamque lectionem non solis sanctam mulieribus memorent; contra tamen sentiendum est: auctor siquidem Apostolicarum constitutionum antiquissimus lectorem communiter viris, ac mulieribus seorsim dispositis legisse testatur: quod etiam liquet ex S. Cyrillo Hierosolymitano sic ajente *præfat. in catecheses*. „ Sit conclusa Ecclesia, & vos omnes intus: Hæc tamen separentur, viri ut sint cum viris, mulieres cum mulieribus, ne studium salutis sit perditionis occasio. *Et post pauca*: Tum vero assidentes viri librum aliquem utilem habeant, & alius quidem legat, alius vero audiat: Si autem desit liber, alter oret, alter boni aliquid dicat. Conventus porro Virginalis sic congregetur, ut vel psallat; vel oret, vel legat; ita ut labia quidem loquantur, vox autem ad alienas aures non perveniat: mulierem, enim loqui in Ecclesia non permitto. Et nupta quoque similiter agat, & oret labia movendo, ut nascatur Samuel, ut sterilis anima tua pariat exaudientis Dei salutem. Ita S. Pater; cujus verba expendens doctissimus Theophilus Raynaudus, *De sobria alterius sexus frequentatione* c. viii. Hic, inquit, S. Cyrillus lectionem in suum personale bonum, atque adeo mutam, & tacitam concedit mulieribus, vetat autem eas ab aliis audiri.

Multo minus fas erat mulieri Evangelium in Ecclesia
legere.

legere. Unde quum S. Aurea virgo Parisiensis monasterii Præposita, inter missæ solemniam diacono Euangelium adeo inepte legenti, ut absurda pronuntiatione omnium aures vulneret, audientesque in indecorum risum impelleret, factum indigne ferens pia virgo, stolam e collo ejus eripiens, suoque apponens, publice in Ecclesia Euangelium legere ausa esset; ab Angelo Domini graviter correctæ est, quod Sacri Ordinis ritum evertisset. Quo factum est, ut culpæ pœnitens se se præfectura abdicaverit; cellamque perangustam subiens, in ea septennii spatio asperrimum vitæ genus duxerit. Enimvero cathedram inibi sibi confici curavit, clavis peracutis circumquaque instructam, quibus quotidie per vices insidens, integrum recitabat Psalterium, non sine magno cruciatu. Addidit & quotidiana jejunia, noctiumque vigiliis, quo crimen temeraria, ac præpostera Sancti Euangelii lectione contractum expiaret. Narrant hæc Petrus Equilinus Episcopus, lib. ix. cap. xxii. & Andreas Saussayus in martyrologio Gallicano, IV. nonas Octobris.

Non solum culpa, sed turpi quoque scelere cumulatam fuit ausum quarundam Abbatissarum Burgensis, & Palentinæ dioeceseos; quæ eo temeritatis devenerunt, ut non modo Euangelium publice legerent, ac prædicarent, verum etiam monialibus suis benedicerent, ipsarumque confessiones peccatorum exciperent. Quod permoleste accipiens Innocentius III. Pontifex Max. ad Burgensem, & Palentinum Episcopos, itemque ad Abbatem Morimundi datis literis, ne audaces talia in posterum audere pergerent, Apostolica auctoritate vetuit. Sane in gradibus, vel muneribus Clericorum nullum jus foeminis quovis nomine esse potest; nam ut recte docet Tertullianus libro *De velandis virginibus* cap. ix. & illum describens S. Isidorus Hispalensis, *neque permittitur eis in Ecclesia loqui, vel docere; sed nec tingere, nec offerre;*

nec ullius virilis muneris, aut sacerdotalis officii sortem, sibi vindicare. Dolebat tamen aliquando S. Joanni Chrysostomo tantum dominatum in Ecclesia mulieres usurpasse, ut multi non nisi ipsarum gratia ad Episcopatus eveherentur. Et nostris, avorumque temporibus memoratus Raynaudus cap. XI I I. in fine, ferre non poterat, quod quisquis Oratorum sacrorum, in Gallis nobile quodpiam suggestum ambiret, ubi dominici Adventus, vel Quadragesimæ tempore, divinum Evangelium populis nuntiaret, commatidorem, ac feliciorem aditum non haberet favore matronarum; quem proinde humilibus obsequiis aucupari, & blanda familiaritate parare, aut retinere erat necesse. At, subdit scriptor ingenuus, generoso incoctum pectus honesto malit supra piscem elingue esse, & nunquam ad populum verba facere, quam per eas familiaritates emergari ubilibet concionandi potestatem.

*Evangelium in qua olim Ecclesia parte
legeretur.*

C A P U T VI.

QUoniam in edita, atque sublimi Ecclesiæ parte Sacrum Jesu Christi Evangelium antiquitus, & nunc etiam alicubi legi consuevit, operæ pretium duco aliqua de illa differere, quibus novi capituli argumentum illustrem. Locus ipse *Suggestus*, *Pulpitum*, *Tribunal*, & *Ambon* est appellatus. Suggestus dicebatur, quod inde populo suggeratur quod in rem ejus esse possit. Reliqua tria vocabula vir clarissimus Bernardinus Ferrarius libro tertio, *De ritu sacrarum Ecclesiæ veteris concionum*, cap. III. exponit his verbis: *Pulpitum* quidem, ut scri-

scriptum reliquit Walfridus Strabo, in libro *De rebus Ecclesiasticis* capite sexto, quod sit locus ille in publico statutus, ut qui in eo consistunt, ab omnibus videri possint. *Tribunal*, quod quemadmodum tribunal, ut præclare conjicit vir doctus Jacobus Pamelius ad S. Cypriani Epistolam xxxiv. locus erat excelsus, ex quo jus Tribubus reddebatur: ita concionum locus in sublimi positus erat, ut commodius ex eo Evangelica lex populo traderetur. *Ambon* vero, quasi ascensus, seu locus editus, a verbo *ambone* hoc est ascendo, quod gradibus ad eum ascendeбatur: quamquam scio Ambonis etymon ab aliis aliunde deduci. Ejus loci situs fuit olim haud dubie, qui nunc est, scilicet extra Sanctuarium, muro, & cancellis ab Ecclesiæ navi discretum. Ad ambonem duplex patebat ascensus, & in illius superiori parte bini erant gradus; alter altior, in quo Evangelium legebatur; inferior alter, in quo Epistola, ut constat ex Ordine Romano ita monente: *Subdiaconus, qui lecturus est, ascendit in Ambonem, ut legat, non tamen in superiorem gradum, quem solet ascendere, qui Evangelium lecturus est*. In Ambone jam a primis Christianæ Religionis sæculis solemniter in sacra missa, Evangelium decantari consuevisse testatur S. Cyprianus, Epistola xxxiv. qui loquens de Celerino Lectore ordinato, hæc ait: „Hunc ad nos fratres dilectissimi cum tanta Domini dignatione venientem testimonio, & miraculo ejus ipsius, qui se persecutus fuerat illustrem, quid aliud quam super pulpitem, idest super Tribunal Ecclesiæ oportebat imponi, ut loci altioris celsitate subnixus, & plebi universæ pro honoris sui claritate conspicuus legat præcepta, & Evangelium Domini, quæ fortiter, ac fideliter sequitur?

Rationes propter quas in altiori loco Evangelium legeretur, multæ a scriptoribus referuntur. Binas indicat Innocentius Romanus Pontifex ejus nominis III. Pri-

ma est, ut significaretur debere legem Evangelicam palam ante oculos omnium enuntiari, non autem in latibulis occultorum locorum, ut faciunt hæretici; altera ad commemorationem ascensus Domini ad montem, ut turbas doceret. Innocentii verba hæc sunt lib. III. *De myst. missæ.* cap. xl. i. i. „Diaconus in Ambonem ascendit, ut annuntiet Euangelium, secundum illud Propheticum Isaia cap. xl. *Supra montem excelsum ascende tu, qui Evangelizas Sion. Exalta in fortitudine vocem tuam.* Et Dominus inquit in Euangelio: Matthæi cap. x. *Quod dico vobis in tenebris, dicite in lumine, quod in aure auditis, prædicate super tecta*; nam, & ipse Dominus ascendit in montem, ut Euangelium prædicaret. Matthæi cap. v. Amalarius Fortunatus Episcopus Trevirensis, lib. III. *De divin. officiis* cap. xv. i. i. ob id potissimum ex altiori loco Euangelium legi commemorat, ut scilicet Evangelicæ prædicationis excellentia, & auctoritas designetur: *Excellentior, inquit, locus, in quo Euangelium legitur eminentissimam doctrinam Evangelicæ prædicationis, atque manifestissimam auctoritatem judicandi signat.*

Neque tantum in Ambonibus Evangelia, verum, orationes etiam, seu sermones ad populum recitabantur, ut nimirum concionator facilius posset ac commodius ab omnibus audiri. Socrates quidem hanc rei causam affert *In historia Ecclesiastica*, lib. VI. cap. v. loquens de S. Joanne Chrysostomo: *Joannes Episcopus, cum Eutropius ad basim altaris procumberet, & præ metu conser-natus esset, sedens in suggestu, unde antea quo facilius audiretur concionari solebat, orationem in reprehensionem ejus habuit: Quæ verba a Socrate accipiens Nicephorus sic ait, libro XIII. histor. cap. iv. Tum Joannes absurdum Eutropii conatum arguens, luculentam habuit orationem in ambone, seu suggestu, qui mos ejus erat, cum populum doceret, ut omnes vocem ejus exciperent.* Sozomenus

menus etiam de eodem agens Chrysostomo, idipsum confirmat : *Tanta vero frequentia eorum erat , qui concionibus illius inhiabant , ac satiari non poterant , ut quoniam illi ex mutuo compulsu , atque obtritu periclitarentur , dum singuli prorsum nituntur semper , ut propius adstantes dicentem certius audiant , ipse medium se omnibus exponens e suggestu lectorum docuerit .* Et ne quis dubitet quin aliis quoque fuerit consuetudo , habendi scilicet sermones ad populum in Ambone . Iso magister *De miraculis S. Othimari Abbatis* cap. iv. sequens item profert testimonium : *Quendam Archipresbyterum Ambonem conscendere , ac vice sui sermonem ad populum facere iussit .*

Tandem ut paucis varios Ambonis usus aperiam : ex illo clerici Ordinum inferiorum psallebant , juxta Laodicensi , can. XV. Carthaginensis IV. can. X. & Romani Concilii, Gregorio Magno Summo Pontifice, anno dxcvi. habiti , præscriptum . Ibi Lectores clerici sacros libros ad plebem legebant ; ibi coronati Imperatores , ut testantur Theophanes , & Codinus *De offic. Palat.* cap. xvi. ibi recitata ex diptychis fidelium , tum viventium , tum defunctorum nomina : ibi Episcoporum edicta , iussa , atque censuræ publicabantur ; ibi etiam alii libelli , formulæ , monita , quæ fieri nota populo congruens erat , Episcopi jussu a Subdiacono , vel a Lectore promulgabantur . Ibi insuper Summi Pontifices coram universo populo , Evangelium portantes , invocato Trinitatis nomine , de objectis criminibus se purgare consueverunt , quemadmodum de Pelagio Papa , atque aliis refert Anastasius Bibliothecarius .

Ambonum usum ubique fere obsoletum restituere studuit , juxta veterem Ecclesiæ disciplinam S. Carolus Borromæus , cujus verba in actis Ecclesiæ Mediolanensis hæc sunt . „ Habenda est quoque in Ecclesiis insignioribus , ac præsertim in Basilicis cathedralibus ratio Ambonum : quos

quos & magnos, & ornate confectos, & tabulis marmoreis ornatos extitisse, in Basilicis Romanis perspicui licet, & alibi etiam, aeneis calato Sacrarum Imaginum opere expressis. Item duo pro Ecclesiarum magnitudine constitui possunt; unus altius extructus, de quo Evangelium, alter de quo Epistola, lectione Sacrae Scripturae in maioribus solemnitatibus pronuntietur; hicque paullo depressior sit, quam ille unde Evangelium legitur. Unus etiam ambo, ut in multis Ecclesiis cernitur, esse potest, qui & Evangelii, & Epistolae simul lectioni usui sit, ita tamen, ut in eo locus, unde Evangelium recitatur, aliquanto eminentior sit, pars vero unde Epistola, aliquo gradu inferior sit. In Ambone, ubi potest, constituantur duo graduum ordines, unus quo sit ascensus ad Orientem versus, alter Occidentem spectans, quo fiat descensus. Si unus tantum ambo in Ecclesia constitutus sit, is a latere Evangelii statuatur. Si duo, unus unde scilicet Epistola legitur, a latere Epistolae, alter vero qui est Evangelii, ab Evangelii latere constituatur, ita ut diaconus inde Evangelium legens, ad meridiionalem Ecclesiae partem vertatur, ad quam viri convenient. Atque ii quidem (concludit S. Carolus) Ambones, e marmore, lapideve alio confici debebunt, & ornari praeterea aliquo pia sculpturae opere, aut e lateritio lapide exaedificari possunt; exornari tamen eos decet laminis marmoreis, lapideisve ornate elaboratis, aut aeneis, iisque inauratis, quales hodie etiam visuntur.

Cum autem, ut dictum est, in Ambone Evangelium praecipue legeretur, mirum videri non debet, si Religiosissimi Ecclesiarum Praesules in illum auro, argento, picturis, aliisque id genus, exornandum studia sua conferebant. Produnt id passim Ecclesiasticae historiae, ac potissimum vitae veterum Romanorum Pontificum. Praetiri tamen hoc loco non debet ille ritus, quo olim divinus Euan-

Euangeliorum liber, quum diaconus sacram lectionem caneret, supra dorsum Aquilæ lapideæ locari consuevit. Cujus rei indicia adhuc in quibusdam Urbis Ambonibus licet agnoscere. Facile vero mihi persuasum est, fuisse hunc ritum in aliis Christiani orbis Templis servatum; quandoquidem antiqui scriptores Gulielmus Durandus, & Baufridus Boussardus, aliique complures, ejusdem veluti communiter recepti non sine mysterio meminere. *Legitur etiam*, ait Durandus, *In Rationali divinarum officiorum* lib. IV. cap. xxiv. *de more Euangelium super Aquilam*, Boussardus vero: *Legitur Euangelium communiter super aquilam; quæ significat Joannem Principem Euangelistarum*. Uterque etiam in asserendo conveniunt, solitum fuisse aquilæ dorsum aliquo panno laneo, sericove cooperiri; ad significandum, inquit, molliem cordium Christianorum; & quod Euangelium corda gentilium emollivit. Dominicus Macrus Melitensis, qui scripsit elapso sæculo collabente, testatur in Ecclesia Conventuali Urbis Melitæ ritum adhuc vigere. *Canitur enim*, inquit, *Euangelium super æneam aquilam mira pulchritudine fabrefactam*.

Supereſt modo ut videamus quorsum antiquitus in Ecclesia Sacra Euangelii lectio haberetur, dextrorsumne, ubi erant viri, an vero laevorsum, ubi mulieres constabant? Antequam id explicemus, juvabit scire priscos fideles solitos fuisse in Ecclesiam convenire, servato sexus, & ordinis discrimine: nam viri a mulieribus, virgines a nuptis, Clerici a secularibus seungebantur. Id quidem testatur in primis pervetustus Auctor Apostolicarum constitutionum lib. II. cap. xxi. Ait enim Ecclesiam construendam solitam longo situ instar navis, in cujus medio, quod gremium appellamus, Episcopus una cum clero ad utrumque latus posito sedeat: ex altera Ecclesiæ parte viri, ex altera vero magerent mulieres; & sicut loco
invi-

invicem distincti erant, eodem quoque modo portæ; ut qua viri ingrederentur, discreta esset ab ea, quæ fœminis tantum pateret; & sicut virorum portæ Ostiarius præerat, ita Diaconissæ demandata erat cura portæ mulierum. Hæc omnia inquit Auctor, ac subdit: *Adolescentula rursum, si sit locus seorsum maneat; ceteroqui, post mulieres stent. Nuptæ, & quæ jam liberos habent, seorsum maneat.* S. Cyrillus Hierosolymitanus christianos erudiens, egregium huic rei affert suffragium, *Præfatione in catecheses*; loquens enim de Ecclesia sic ait: *Hic tamen separentur viri, ut sint cum viris, mulieres cum mulieribus, ne studium salutis sit perditionis occasio.* Sed non solum, dum essent in Ecclesia, verum dum irent etiam, hæc virorum, & mulierum distinctio servabatur. *Constituunt*, inquit S. Augustinus, libro II. *De Civitate Dei, cap. xxviii.* *Populi ad Ecclesias, honesta utriusque sexus discretione.* *Erat enim in illis, (ut sapienter scribit Tertullianus, De præscriptionibus adversus hæreticos) gravitas honesta, apparitio devota, & processio modesta.* Meminit ejusdem disciplinæ S. Joannes Chrysostomus; qui tamen corruptos sui temporis mores hisce redarguit verbis, homilia lxxiv. in cap. Matt. xxi i i. *Oportebat quidem anteriore pariete a mulieribus disseparari; verum quoniam non vultis, necessarium esse Patres nostri putaverunt saltem his ligneis parietibus vos disseparare. Audivi autem Ego a senioribus non fuisse hos parietes ab initio; In Christo enim Jesu non est mas, neque femina. Apostolorum etenim tempore una viri, & mulieres orabant, & mulieres vere mulieres, & viri similiter viri erant. Nunc vero e contrario mulieres quidem meretricum mores assumpserunt; viri autem furorem equorum imitantur.* Eundem morem ab Ordine Romano, *De officio missæ* apud Hitorpium, aliisque posterioris ævi Scriptoribus memoratum, deinde vero defuetum Clericos

Regu-

Regulares , quos Theatinos vocant , primos omnium in sacris ædibus ad Ecclesiæ decorem , honestatemque revocasse constanter asserit Eruditissimus Antonius Caracciolus , Clericus & ipse Regularis , *In notis ad constitutiones sui Ordinis* , probatque ms. testimonio Galeoti . Nostro hoc seculo Joseph Maria Cardinalis Tomasius ejusdem instituti , dignitate , doctrina , ac virtute Eminentissimus in suo titulo Equitii , appellaturque vulgo S. Martini ad Montes , summo studio tabularum parietes hinc inde constituit , quo viri a mulieribus , juxta veterem , atque laudabilem Ecclesiæ morem separantur ; verum non multo post sapientissimi Cardinalis obitum tabulatio omnino sublata est .

His jam congrue prænotatis , respondendum nobis est ad quæstionem propositam . Dicimus itaque quod olim quum Euangelium in Ambone legeretur , essentque in Templis pro viris , & mulieribus loca distincta , Diaconus vertebat se versus meridiem , ad partem scilicet viro- rum , nunc vero ad aquilonem vertitur ; ejusque mutationis causam , & originem ex missis privatis processisse , in quibus Sacerdos non in Ambone , sed in altari versus septentrionem legit Euangelium , docet his verbis Micrologus , *De Ecclesiasticis observation. cap. ix.* , Quod ad legendum Euangelium non se ad meridiem vertunt , hoc ideo inolevisse credimus , quia nec Ordo illis injunxit , ut in ambonem ad legendum sicut Diacones ascenderent , ubi necessario ad masculos potius , quam ad foeminas se vertere deberent . Nam juxta Ecclesiasticam consuetudinem ad Altare legunt , ubi nulla diversitas auditorum approximatur , quæ legentes magis in hanc partem , quam in aliam converti exigat . Nusquam ibi foeminae , sed soli Religiosi ad dexteram , & ad sinistram permittuntur stare . Ad sinistrum vero cornu altaris habent librum cum legunt Euangelium , vel cum sacrificant , ut in

dextera parte sint expeditiores ad suscipiendas oblationes, sive ad conficienda Altaris sacramenta. Unde ad aquilonem magis quam ad meridiem versi videntur, cum annuntiant Evangelium. Hinc itaque illa usurpatio emeruisse videtur, ut etiam Diacones in ambone contra Romanum Ordinem se vertant ad aquilonem, potiusque se ad partem foeminarum, quam masculorum vertere non vereantur. Quæ usurpatio jam adeo inolevit, ut apud plerosque quasi pro Ordine teneatur. Sed quia certissime contra Ordinem est, a diligentioribus Ordinis servatoribus merito refutatur. Sic ille. Hinc apparet quam verum sit quod a doctissimo Cardinali Bona in tractatu *Rerum liturgicarum* sæpe numero inculcatur, multa hodie pro lege haberi in his, quæ pertinent ad Ecclesiasticas observationes, quæ sensim ex abusu irrepsérunt; quorum originem cum Recentiores ignorent, varias conantur congruentias, & mysticas rationes invenire, ut ea sapienter instituta vulgo persuadeant. Porro isti, ut scite S. Hieronymus de Origene dixit, ingenii sui adinventiones faciunt Ecclesiæ Sacramenta.

*Diaconus quibus ornatus vestibus
Evangelium legeret?*

C A P U T VII.

INter hæreticos, qui Ecclesiam Catholicam perturbant, scelestissimi procul dubio fuere recentiores, qui a Diabolo acti, usum quoque sacrarum vestium irridere non erubescunt, quem pia mater Ecclesia divino ducta Spiritu, ab ipsis Apostolis acceptum ad nostram usque transmisit ætatem. Joannes Calvinus pestilentissimo libello, quem indicem reliquiarum appellat, Casulam

S. Pe-

S. Petri, quam Romæ dicit ostendi, ludibrio afficiens, sic tandem effutit : *Quæd casulam ejus spectat, est quod Papistarum inscitiam merito deploremus: hos dicere non pudet Petrum gessasse casulam, quia scilicet mores ætatis Apostolica prorsus ignorant; tempus sane nondum advenerat, ut ministri Ecclesiæ divina larvati celebrarent, mimicisque ludis, ut postmodum factum est, fitque nunc usque in sacris, lascivirentur.* At hic, ut doctissimus notat Saussayus, *Panopliæ Sacerdotalis* parte 1. libro VI. *de casula* cap. VI. crassa ejus ignorantia perspicue se prodit. Si enim primæ antiquitatis legit Scripturas, qui sit ut nesciat Jacobum Apostolum, cognomento fratrem Domini, primum Hierosolymorum Antistitem potdere indutum, seu linea tunica talari Sacerdotali sacris operatum? Testatur apud Eusebium Egesippus vicinus apostolicorum temporum; ipseque Eusebius libro VII. *Historiæ Ecclesiasticæ*, cap. XVIII. Addit S. Epiphanius *heresi* LXXVIII. etiam bracteam in fronte gessasse, seu laminam auream, quæ insigne erat Pontificalis dignitatis; quaque in indicium ejusdem Pontificalis honoris cæteros Apostolos uti consuevisse par est credere, inquit magnus Annalium parens Baronius, ad annum xxxiv. Nam & si hæc de singulis non scribantur, satis tamen ad demonstrandam rei veritatem esse videtur, quod non modo Jacobus, sed & Joannes Evangelista eo usus capitis ornamento perhibetur; id enim Policrates, & ipse Ephesiorum Episcopus in ea, quam ad Victorem Romanum Pontificem scripsit Epistola, apud Eusebium libro V. *historiæ* cap. xxiii., & S. Hieronymum, *de Scriptoribus Ecclesiasticis*, in *Policrate*, disertis verbis testatur. Cæterum Planeta S. Petri ab Antiochia Parisios delatæ, & in Templo S. Genovesæ collocatæ meminit in vita S. Hugonis Cluniacensis alter Hugo ejusdem Monasterii Monachus, apud Surium ad diem xxix. Aprilis. Atque ut fiteam de penu-

la S. Pauli Troade relicta, quam casulam fuisse plerique viri docti arbitrati sunt, refert Joannes Diaconus sacram S. Joannis Evangelistæ vestem S. Gregorio fuisse transmissam. Itaque evidentissime constat, quam ignarus Calvinus fuerit sacræ antiquitatis, & quam inepte garriat, temereque cum suis asseclis effutiat vestes sacras in divinis officiis numquam Apostolos usurpasse.

Mirum illud est quod non solum hæretici, sed & Catholici quidam persuasum habeant nec Apostolos, nec eorum successores in vestibus sacris celebrasse, sed tantum quotidianis usos esse. Audacter id asserit Honorius Augustudonenſis, statimque addit: *Sed Clemens tradente Petro usum sacrarum vestium ex lege sumpsit, & Stephanus Papa missas in sacris vestibus celebrari constituit.* Quæ verba quis non videt, quam inconsiderate protulerit, quamque hæc ipsa inter se mirifice pugnent. Si enim tradente Petro Clemens usum sacrarum vestium sumpsit, quomodo Apostoli, eorumque successores, Apostolorum Principis traditionem neglexerunt? An tradidit Petrus, quod ipse non servabat? Vel Clemens ejus successor non fuit? In eo autem quod de Stephano effatur, quis est vel parum in Ecclesiastica historia versatus, qui facile non advertat quantopere Honorius hallucinetur? Nam Stephanus Pontifex tantummodo instituit, *ut Sacerdotes, & Diaconi numquam sacris vestibus, nisi in Ecclesia uterentur.*

Non minus levia videntur esse, quæ alii proferunt, qui ut probent Apostolos profanis indutos vestibus divina officia peregrisse, nascentem Ecclesiam summa rerum inopia laborasse, & pecunia caruisse obtendunt, quæ vestes peculiaries ad usum sacrificii compararet: tum inquirunt, gentiles id nequaquam permissuros, quorum persecutioni se palam exposuissent, si diversa e communi- bus vestimenta adhibuissent. Sed & hæc ipsa futilia
obje-

objecta egregie diluit Joannes Cardinalis Bona libro I. *Rerum liturgicarum* cap.v. Primum auctoritate actuum Apostolorum, ubi constat eos, qui ad Christum convertebantur prædia vendidisse, eorumque pretium Apostolis obtulisse, quo abunde poterant, & egenorum necessitatibus providere, & vestes ac reliqua emere, quæ ad sacrificii usum requirebantur. Alterum vero de gentilibus ita refellit. Non enim, inquit, publice sacris operabantur Apostoli, sed in locis ab infidelium notitia remotis, servata ab omnibus inviolabilis silentii fide; Unde est illud Tertulliani in *Apologetico* cap. vii. *Si semper latemus, quando proditum est quod admittimus? Imo a quibus prodi potuit? Ab ipsis enim reis; non utique, cum vel ex forma, omnibus mysteriis silentii fides debeatur. Si ergo non ipsi proditores sui, sequitur ut extranei. Et unde extraneis notitia? Cum semper etiam pia initiationes arceant profanos, & arbitris careant.* Nihil igitur obstat Apostolos sacris vestibus uti potuisse, imo consentaneus Apostolicæ pietati, & reverentiæ erga divina mysteria peculiaris vestimenti usus videtur. Nam cum in veteri Testamento præceperit Dominus, ut faceret Aaron Sacerdoti, & filiis suis vestes sanctas in gloriam, & decorem, ut non nisi loti, vestibus sacris induti Sacerdotio fungerentur *Exodi* cap. xxviii. & xxxi. In sacrificiis tandem, quæ tantum ad emundationem carnis faciebant; quanto magis iste vestimentorum ritus erat Apostolis observandus in consecratione Corporis, & Sanguinis Domini, in quibus consistit emundatio carnis, & spiritus? Cæterum dicant recentiores eruditi quid velint. Malo ego quam illis, Concilio Tridentino assentiri, a quo inter cætera, quæ pia mater Ecclesia sacrificio adhibet ex Apostolica disciplina, & traditione, sacræ vestes recensentur. *Sess. xxi. cap. v.*

De Sandaliis.

CAPUT VIII.

HIs ita primum disputatis, tempus est ut propria Diaconorum vestimenta explicemus, quibus in ministerio divino, & consequenter ad Sacram Evangelii lectionem uterentur. In primis, Sandaliorum usum, fuisse illis antiquitus æque ac Episcopis, & Presbyteris, aliisque ministris familiarem, testis est locupletissimus Amalarius Fortunatus libro II. *De Ecclesiasticis officiis*, cap. xxiii., qui etiam varia Clericorum Sandalia, eorumque differentiam, ac mysticos sensus apprime exprimit. Formam vero Sandaliorum ita describit Auctor nomine Alcuini, *De divinis officiis* cap. *Quid significant vestimenta*: Sandalia dicuntur soleæ. Est autem genus calceamenti, quo induuntur ministri Ecclesiæ; subterius quidem solea muniens pedes a terra, superius vero nil operimenti habens patet; quo jussi sunt Apostoli a Domino indui. Significat autem ministrum verbi Dei non debere terrenis incumbere, sed potius cælestibus inhiare, & prædicationem suam nulli occultare. Sic ille.

Erat vetustior Sandaliorum usus, sicut modo a Religiosis Discalceatis deferuntur, nimirum ex superiori parte aperta, inferiori vero tecta; habetque mysticam significationem, ait Rabanus Maurus lib. I. *De institutione Clericorum* cap. II., *ut pes neque tectus sit, neque nudus ad terram, idest ut neque occultetur Evangelium, nec terrenis commodis innitatur*. Has autem Diaconi quoque esse muneris partes, ipsa verba quibus etiamnum cum alloquitur, ac instruit Episcopus dum ordinat, perspicue docent, quæ itidem ad Sandaliorum significationem, ut notat Saussayus, libro VII. *Panopliæ Episcopalis*, cap. viii. apposite accommodantur. Sic enim ordinandos Diaconos

nos compellat Episcopus ex Pontificalis Romani præscripto : *Curate ut quibus Euangelium ore annuntiatis , vivis operibus exponatis ; ut de vobis dicatur : Beati pedes Evangelizantium pacem , Evangelizantium bona : habete pedes vestros calceatos Sanctorum exemplis in preparatione Evangelii pacis , quod vobis Dominus concedat per gratiam suam .* Atque hæc de Sandaliis sufficiant , quæ licet multo ab hinc tempore , quantum ad Presbyteros , & Diaconos , ac cæteros inferioris ordinis ministros pertinet , in desuetudinem abierint , placuit tamen de illis differere , ut nihil sacræ antiquitatis ignoraretur , quod rem nostram propius attingeret .

De Amictu , Alba , & Cingulo .

C A P U T IX.

Post Sandalia in Ecclesiæ vestimentis sequitur Superhumera , quod fit ex lino purissimo , inquit Antiquus Scriptor de divinis officiis , Albini Flacci Alcuini nomine editus : quibus verbis amictum voluisse significare , quem primum sacra facturî capiti imponimus , humerisque injicimus , certius est quam ut inficias iri queat . Ambrosiani super Albam Amictum induunt ; quod olim etiam Græci faciebant . Quamvis enim hodie ejusmodi indumento non utantur , satis tamen colligitur ex quadam Soletinorum Archidiaconi Epistola ad Majoranum Molphestensium Episcopum missa , in qua singulatim Græcorum vestimenta recensentur ; inter quæ mentio fit etiam de Amictu a Græcis Sacerdotibus olim adhibito . Quantum ad mysticas Amictus significationes pertinet , Gabriel Biel , super Can. missæ , lect. II. Gulielmus Durandus libro III. *Rationalis divinarum officiorum* cap. II. , ac alii plerique existimant denotare velamen seu op-

operimentum, quo perfidi Judæi velabant faciem Christi, dicentes: *Prophetiza nobis Christe, quis est qui te percussit?* At amictu caput Sacerdotis, non facies velatur. Quamobrem præ cæteris mihi verior videtur expositio Amalarii Fortunati sic agentis: *Amictus est primum vestimentum nostrum, quo collum undique cingimus; in collo est namque vox; ideoque per collum loquendi usus exprimitur; per Amictum intelligimus custodiam vocis.* Consentit Pontificale Romanum, ubi in traditione amictus, habetur hæc formula: *Accipe Amictum per quem designatur castigatio vocis, In nomine Patris; & Filii, & Spiritus Sancti.*

Nec quidquam officit respectu Diaconorum nullam hujus vestis mentionem fieri à Scriptoribus præcis. Enim vero Josepho Vicecomiti, Saussayo, aliisque viris doctis probabile videtur, illum à Diaconis indutum fuisse; quandoquidem alba numquam adhibita fuit sine amictu. Hinc phrasis illa frequens in Romano Rituali, Titulo *De benedictionibus: Sacerdos indutus Amictu, Alba, Cingulo &c.* Fuisse præterea Albam certum in divino ministerio Diaconi habitum, disertis verbis testari videtur Concilium Carthaginense IV. decernens: *Ut Diaconus tempore oblationis tantum, vel lectionis Alba utatur.* Ejusdem ritus mentio ad rem ipsam, de qua agimus valde pertinens habetur in Concilio Narbonensi, quo statuitur, *Ut Diaconus, aut Subdiaconus, vel lector antequam missa consummetur, Alba se non præsumat exuere.*

Est autem Alba sacrum indumentum, vocaturque etiam camisia, ac poderis. Unde Isidorus libro XIX. *Originum* cap. XXI. *Poderis est tunica Sacerdotalis linea corpori adstricta usque ad pedes descendens, hæc vulgo camisia vocatur.* Item græce *αχις* dicitur, cujus meminit liturgia S. Joannis Chrysostomi, ac sæpe numero S. Philotheus Patriarcha in libro, qui *Ordo instituendi Diaconum*

nam inscribitur. Simeon vero Thessalonicensis, *Sticharium*, inquit, *lucidi vestitus Angelorum imitamen induit; saepe enim in veste fulgenti Angelos apparuisse novimus, ut & illum in monumento Salvatoris coopertum stola candida*. Quamobrem satis liquet, quantus sit Græcorum abusus Albam variorum colorum induentium; non tamen contemnendus videtur eorundem ritus, quo, ut scribit Demetrius Chomatenus, Episcopi, & Diaconi in quadagesimali, & mæstitiæ tempore debent deferre sticharium coloris rubri; quia color hic apud eos est mæroris index. Id etiam noscere licet in Pontifice Maximo, qui tempore Dominici Adventus, & Quadagesimæ capam, vel pluviale rubrum induit in Pontificio sacello. De Alba nigri coloris in die Parasceves adhibita testatur Sacerdotale Alberti Castellani his verbis: *Parantur etiam quatuor Sacerdotes, vel duo ad minus induti Camisiis nigris cum Amictu, & Cingulo ejusdem coloris*.

Quoad varia ejus mysteria pertinet, Alba vestem illam indicat qua Herodes illudit Christum, si Gulielmo Durando credimus. Item gloriam Dominicæ Resurrectionis, quam nuntiantes Angeli apparuerunt in vestibus albis, ut sentit Stephanus Eduensis Episcopus. Præterea sua longitudine perseverantiam in bona actione significat: *Hæc ad talos usque descendit*, ait Robanus Maurus, *quia usque ad finem vitæ hujus, bonis operibus insistere debet Sacerdos*. Quæ ratio æque militat in Diaconis, quos etiam Sacerdotum nomine, usitato a præcis Scriptoribus dicendi genere intelligi consuevisse, Ecclesiasticarum rerum peritos minime præterit. Sane S. Optatus Milevitanus libro primo *De schismate adversus Donatistas*, Sacerdotium tribus veluti gradibus dividit: in quorum primo Episcopos, in secundo Presbyteros, in tertio denique Diaconos collocat.

Tandem Alba ne defluat, gressumque impediat;

H

Cin-

Cingulo coercetur, quod in veteri lege baltheus, a Græcis vero ζώνη dicitur. Hoc Cingulo volunt nonnulli Auctores funes, ac flagella, quibus in passione sua Christus Dominus ligatus, & cæsus fuit, repræsentari. Alii docent castitatem notari, quæ circa lumbos debet accingi, ut restringat concupiscentiam carnis. Quamvis enim ad universos Christianos pertineat, sacros tamen Ecclesiæ ministros præcipue spectat illud Christi monitum, Lucæ xii. *Sint lumbi vestri præcincti, & lucernæ ardentes in manibus vestris*. Hanc quidem significationem exprimit oratio illa, quam pronuntiamus: *Præcinge me Domine Cingulo puritatis, & extingue in lumbis meis fomitem ardentis libidinis, ut maneat in me virtus continentia, & castitatis*. Atque ut ea, quæ hætenus de Amictu, Alba, & Cingulo disserui, paucis cum S. Bernardo concludam: *Tria sunt ministris Dei communia vestimenta: Cælestis sapientia, quæ est ephod, & caput operit; perseverans iustitia, quæ poderis est, & totum corpus induit; carnalis continentia, quæ lumbos cingit*.

De Manipulo, & Stola.

C A P U T X.

Induit præterea Diaconus, divina obiturus officia, Manipulum, & Stolam. Manipulus erat olim mappula, sive sudarium brachio sinistro alligatum, quo sudor, & sordes abstergebantur. Amalarius Fortunatus, *Sudarium*, inquit, *ad hoc portamus, ut detergamus sudorem; in manu sinistra portatur, ut ostendatur in temporalis vita tedium nos pati superflui humoris*. Durasse autem hunc mappulæ, sive sudarii lintei usum, donec in locum ejus manipulus, non ad tergendas sordes, sed ad orna-

ornatum fuffectus est ejusdem materiæ, & texturæ, ex qua Stola, ac reliqui habitus fieri solent, docet Cardinalis Bona, libro I. *Rerum liturgicarum* cap. xxiv. additque hanc mutationem sæculo decimo factam, ex eo quod in veteri Missa, ex Codice Rotaldi Abbatis Corbejenfis, qui vixit anno dcccclxxx. Manipuli mentio fiat. Quantum ad recentes ritus, ex Cæremoniali Episcoporum libro I. cap. xix. Diaconus, & Subdiaconus in vestiendo sacris vestibus Episcopum, non debent habere Manipulos in brachiis, sed postquam ille indutus fuerit. Imo ætate Davantriæ, Diaconus non sumebat Manipulum, nisi quando cantaturus erat Euangelium, ut in ejusdem ms. Cæremoniali habetur. Græci, & Maronitæ duos Manipulos, quibus utrumque ornant brachium gestant. Romæ in Capella Pontificia Diaconus, & Subdiaconus juxta veterem ritum, præter Manipulum deferunt in Albæ manicis frustilla coloris currentis festi expansa. Significat tandem Manipulus vigilantiam, qua Sacri Ministri torporem animi excutere debent, ad bona opera jugiter incumbendo, ex Innocentio Papa III. *De Myster. Missæ* cap. xix. Item cordis compunctionem, quam ad Altare deferre debent, ut monet Stephanus Eduensis. Consonat illa oratio, quæ dici solet, dum Manipulum brachio imponimus: *Merear Domine portare Manipulum fectus, & doloris, ut cum exultatione recipiam mercedem laboris.*

Stola, de cujus vario usu multa congerunt Eruditi Scriptores de re vestiaria, Baysius, Ferrarius, ac Saussayus in *Panoplia Sacerdotali*, & novissime Joannes Baptistæ Thyers in singulari, atque eruditissima disceptatione, *De Stola in Archidiaconorum visitationibus gestanda a Paræcis*; ex Græco verbo *σχι* talarem vestem significat; cujus formæ fuisse videtur Stola illa sacra ex aureis filis contexta, quam, ut Theodoretus scribit; libro II. *Historia* cap. xxvii. Constantinus Imperator ad Ecclesiam

Hierosolymitanam cohonestandam, Macario Episcopo dono dederat, ut ea amictus sacrosancti Baptismatis Sacramentum impertiret; quam deinde mercatus Thymelicus quidam Saltator, eaque in scena indutus, inter saltandum cecidit, ac contritus interiit. Hodie forma Stola, qua Sacerdotes ubique utuntur, non est oblonga vestis totum corpus ambiens, sed veluti torques a collo per humeros ad pectus pendens, & usque ad genua protensus, cujus initium deducit Vir doctissimus Joseph Vicecomes libro I. *De ritibus Missæ*, cap. V. a Sancto Silvestro Papa; ait enim de illo liber Pontificalis Damaso adscriptus: *Hic constituit, ut Diaconi Dalmaticis, & palla linoſtima læva eorum tegetetur*. Nomen hujus pallæ nihil commodius intelligi docent viri docti, quam Stola Diaconalem. Linoſtima, seu potius, ut scribit Isidorus, libro XIX. *Originum* cap. XXII. linoſtēma nuncupatur, quod ex lana, linoquo sit contexta, habeatque in stramine linum, in trama vero lanam, ut recte notavit laudatus Thyers, cap. XVI. Atque hujus nomenclaturæ meminit S. Carolus in actis Ecclesiæ Mediolanensis. In humero autem sinistro a Diaconis deferitur, ad discrimen Sacerdotalis a collo ante pectus pendentis.

Erat itaque palla hæc linoſtima, Stola, quam Græci pariter, ac Latini Patres *Orarium* dixerunt. Ejus non semel meminit S. Joannis Chrysostomi liturgia, ac Synodus Laodicensis, S. Silvestro Pontifice Maximo coacta, ubi Subdiaconis, & lectoribus, ne utantur Orariis prohibetur. Quum autem variis temporibus varii etiam exoriantur abusus, sicut Bracarenſis I. Concilii tempore, anno DLXIII. celebrati, Can. XXVII. pudebat Diaconos patenter Orarium gestare, atque ideo sub tunicam abscondebant; ita ex adverso, tempore Concilii Toletani IV. anno DCXXXIII. Can. XXXIX. adeo intumuerunt, ut

ut bina Oraria deferre ambirent, quod ne amplius fieret, vetitum est. Concilii verba hæc sunt: *Si Orarii duo nec Episcopo induere quidem licet, nec Presbytero; utique multo minus Diacono, qui minister eorum est. Unum ergo Orarium oportet levitam gestare in sinistro humero, propter quod orat, idest prædicat: dexteram autem oportet habere liberam, ut expeditius ad ministerium Sacerdotale discurrat; caveant ergo amodo levitæ gemino uti Orario, sed uno tantum, & puro, nec ullis coloribus, aut auro ornato.*

Orarii etymon unde deductum sit, magna inter Scriptores concertatio est. Creditus Alcuinus, *De divinis officiis*, cap. *Quid significant vestimenta*, Orarium, inquit, *stola dicitur, eo quod Oratoribus, seu prædicatoribus concedatur.* Petrus Blesensis Serm. xli. aliter derivat: *Orarium dicitur, quia propter offensas populi sui cum humili genuflexione debes supplicare.* Balsamon in Canonem XXII. Concilii Laodicensi existimat a verbo Græco *ὀρᾶ*, idest *observo*, derivari, sic inquit: „Orarium ferre est tantum Diaconorum; hi enim eis, qui celebrant assistentes, & sanctarum orationum mysteria, & Presbyterorum prolationes observantes eis, qui sunt in suggestu Diaconis per orarium significant quando debeat fieri pronuntiatio, seu prolatio precationum Catechumenorum, & reliquorum: & appellatum est orarium *ὀρᾶ τῷ ὁρᾶ*, quod est *observo*. Simeon Thessalonicensis putat deduci ab *ora*, quæ Hesychio est pulchritudo, seu venustas, quia Diaconum gratiæ venustate ornat, & divino decore illustrem reddit. Alii aliter sentiunt; sed iis prætermisissis audiamus Petrum Arcudiam libro VI. cap. X. Horarium ab hora, sive tempore derivantem, quia Diaconus, ait, accepta extremitate stolæ tribus digitis, invitat populum ad orandum, Cantores ad psallendum; ostenditque horas, & tempus, quo aliquid est faci-

ciendum : quæ consuetudo etiamnum viget in Græcia . Quamvis autem Orarium cominune sit Diacono , & Presbyteris , a græcis tamen Diacono proprie tribuitur . Stolam vero Sacerdotalem *Epitrachelion* vocant , quod latius est Orario , nec ullis literarum notis exaratum , sicut Orarium Diaconorum , cui ter inscriptum est verbum : *Agios* , idest *Sanctus* .

At vero abs re non erit hoc loco quærere , an olim etiam extra Ecclesiam , atque divina officia , Presbyteri atque Diaconi cum Orario , seu Stola incederent ? Nonnulli merito id affirmant , quibus nos libenti animo adhaeremus . Aperte enim vetera de hac re Concilia , ac prisci Scriptores passim loquuntur . Synodus Moguntina , Leone III. Pontifice Maximo celebrata , anno dcccxiii. Can. xxviii. edicit , *ut Presbyteri sine intermissione utantur Orariis , propter differentiam Sacerdotii dignitatis* . Id ipsum expressius cautum est Canone , quem Gratianus Can. xxi. causa xvii. quaestione iv. & Ivo Carnotensis Episcopus parte x. cap. cxxxix. Triburiensi Concilio tribuunt , ubi minor poena infligitur illi , qui injuriam irrogat Presbytero sine Stola ambulanti . Verba Canonis hæc sunt : *Ut Presbyteri non vadant , nisi Stola , aut Orario induti ; & si in itinere spoliantur , aut vulnerantur , vel occiduntur non Stola vestiti , simplici emendatione absolvantur ; si autem cum Stola , triplici* . Joannes Bona Cardinalis libro I. *Rerum liturgicarum* cap. xxiv. num. vi. putat his locis Orarium vel Stolam improprie sumi debere scilicet pro veste talari , quam re vera sine intermissione deferre tenentur Sacerdotes . Sed dixerim pace tanti Viri , an & hæc explicatio locum habere possit in Canone Concilii Bracarensis I. anno dliiii. coacti , Joanne III. Summo Pontifice , ubi manifestissime patet Orarium vel Stolam omnino a veste talari distingui ; sic enim ait : Canone IX. *Item placuit ut quia in aliquan-*

*quantis hujus Provinciae Ecclesiis Diacones absconsis infra tunicam utuntur Orariis, ita ut nihil differre a Subdiacono videantur; de cetero superposito scapulae, sicut de-
cet, utantur Orario.*

Præterea quis melior legum interpret esse potest quam mos illorum temporum; quibus ipsæ promulgatae sunt leges? Varia nobis ejus rei exempla suppeditant Ecclesiasticæ historiæ. De S. Mauro Abbate, qui sabente sexto Ecclesiæ sæculo florebat, testatur ipsius vitæ Auctor Faustus Monachus, illum recepto sæculi sui more, Diaconalem Stolum primo ordinationis suæ anno extra rem facram detulisse. Verba vitæ sunt ista apud Clarissimos viros Lucam Dacherium, & Joannem Mabillonium in sæculi I. Actorum Sanctorum Ordinis S. Benedicti, pagina cclxxx. numero xv. ubi de claudi, & muti cujusdam sanatione legitur: *At Maurus ut erat piissimus, lacrymis perfusus, atque in oratione prostratus, postquam diutissime oravit, Stolum, cum qua eodem anno jubente beato magistro suo, ordinatus ad ministerium fuerat leviticum, & quam juxta morem, sanctitatis gratia primo indefinenter ferebat anno, de collo suo protulit, & super caput infirmi signum Crucis ficiens posuit &c.* Qui ritus si ab aliis Diaconis usurpabatur, certe non alio consilio, alio-
re fine, inquit Eruditissimus Thyers, quam ut ordinis sui dignitatem in oculis haberent semper, atque a Subdiaconis discriminarentur, quemadmodum liquet ex laudato Bracarensi I. Concilio.

Fortasse hæc mihi dicenti quis objectaverit decretum Stephani Papæ I. qui, ut alibi dictum est, instituit, *ut Sacerdotes, & Diaconi nusquam sacris vestibus nisi in Ecclesia uterentur.* Item Origenis testimonium agentis Homilia XI. in cap. XX. Levitici: *Vestimenta, quæ sancta nominantur, non jubentur intra domum usus deservire Pontificum, sed in Templo esse, & inde omnino nunquam ef-
ferri;*

ferri; sed ad hoc tantum esse, ut eis Deo ministrans Pontifex induatur, & sint semper in Templo; ad ceteros vero usus communes utatur communibus indumentis. Tandem S. Hieronymi effatum ita loquentis in cap. xliv. Ezechielis: Porro Religio divina alterum habet habitum in ministerio, alterum in usu, vitæque communi. Sed hæc argumenta, quamvis non sint contemnenda, videntur tamen habere locum, quoties Episcopus, Presbyter, vel Diaconus cunctis vestibus ordini suo congruentibus indutus procederet; nequaquam vero si una sola in signum suæ dignitatis sine intermissione uteretur, quemadmodum de Presbyteris, & Diaconis supramemorati Canonæ præscripserunt; quibus addi potest constitutum Ratherii Veronensis Episcopi *In Epistola Synodica ad Presbyteros*, & *ordines ceteros forinsecus*, idest per universam Dioecesim constitutos, quæ tomo secundo spicilegii Dacheriani refertur: *Nullus sine Stola in itinere incedat*. Præ cæteris autem, Episcopi olim sine ulla prope modum intermissione Stolam gestabant. Narrat de S. Thoma Cantuariensi Archiepiscopo, in ejus vita ms. Joannes Saresberienfis, Episcopus Carnotensis, *Beatissimum illum martyrem Stolam, jugum Christi suave circa collum diebus, ac noctibus habuisse*. Hodie solus Romanus Pontifex, propter ejus singularem præstantiam sacra Stola decoratus incedit. Quamobrem in Urbe Roma ob Papæ reverentiam sacri Oratores, Sacerdotes scilicet, quos Sæculares vocant, itemque Regulares, qui superpellicii utuntur; sine Stola concionantur, quam alias in sacris concionibus sibi apponere tenerentur: imo ex præscripto Sancti Caroli Borromæi, in Actis Ecclesiæ Mediolanensis, parte iv. *De ritu concionandi*, pagina cccclxxxr. Diaconus si quando ex facultate permissa concionatur, superpellicio etiam uti debet, & Stola in transversum ducta.

De Dalmatica, & Casula :

CAPUT XI.

Aliud Diaconorum indumentum est Dalmatica, genus vestimenti, sic dictum, ait Isidorus libro ix. *Originum* cap. xxii. quod primum in Dalmatia texta fit. Successit hæc vestis, teste credito Alcuino, in locum colobii, quod genus erat indumenti sine manicis; non quod prorsus manicis careret, sed quia vix ad cubitorum ima pertingeret. Cum ergo, inquit Alcuinus, nuditas brachiorum culparetur, a Beato Silvestro Dalmaticarum usus Diaconis primum Romanæ Ecclesiæ fuit assignatus, deinde vero ex indulto Romanorum Pontificum ad alias etiam Ecclesias extensus. Imo licet olim inter Dalmaticam Diaconi, & tunicam Subdiaconi magnum esset discrimen, hodie nullum reperitur, nisi quod hujus manicæ strictiores, & breviores sunt; quod item discrimen sæpe negligitur.

Dalmatica, & Tunicella utuntur Diaconus, & Subdiaconus in Missa: item in Processionibus, ac benedictionibus, cum Sacerdoti ministrant. Diebus vero jejuniorum, poenitentiae, ac mærori destinatis, secundum rituales regulas Missalis Romani, planetas plicatas ante pectus gestant, ad discrimen Casulæ Sacerdotalis, quas tamen, exuunt lecturi Epistolam, vel Euangelium; manifeste profitentes, inquit Rupertus Abbas Tuitiensis, lib. III. *De divinis officiis* cap. II. illam suam non esse vestem, nec propter suum ordinem sibi debitam, sed commodatam se accipere a Sacerdote, cui ministrant. Præcipiunt autem eadem rituales regulæ (quod olim etiam servatum tradunt antiqui Scriptores) ut Diaconus iis diebus Euangelium cantaturus, vel super sinistrum humerum Casulam plicet super stolam, aut ponat in locum Casulæ aliud genus stolæ latioris.

Porro Dalmatica, ut etiam mysteria designemus, præfert Crucis formam; monetque, Auctore Alcuino, cap. *Quid significant vestimenta*, illum qui ea induitur crucifixum esse debere mundo, juxta Apostolum: *Mibi mundus crucifixus est, & ego mundo*. Hæc vestis, inquit Robanus Maurus, libro I. *De institutione Clericorum*, cap. xx. in modum est Crucis facta, & Passionis Domini indicium est. Significat etiam Dalmatica, ait Ivo Carnotensis Episcopus, *De significatione indumentorum*, lætitiā, & curam proximorum; tribuitur autem Diacono, cui ex vi ordinationis suæ committitur cura dispensandi sanguinem Christi, & thesauros Ecclesiæ, ut patet in S. Levita Laurentio. Ob id forte concludit Innocentius Papa. III. specialiter Diaconi utuntur Dalmaticis, quia præcipue electi erant ab Apostolis, ut mens ex officio ministrarent.

*De ritu deferendi Evangelium ad Altare,
benedictionis petendæ, ac procedendi
ad lectionem Evangelii.*

C A P U T XII.

MOs olim fuit ut sacer Evangeliorum Codex, teste Amalario, libro III. *De Ecclesiasticis officiis* cap. v. ad initium Missæ magna cum pompa ad Altare deferretur. Aliquando sacrificaturi solemniter ipsi Pontifices Evangelium a domo in Ecclesiam ferebant, sacris ornati vestibus, & multis luminibus, atque fuffitibus circumsepti, ut liquet ex S. Clemente Episcopo Ancyrano, apud Surium, die vigesimatertia Januarii. In Ecclesia Rhemenſi, referente Macro, verbo *Evangelium*, Subdiaconus in principio Missæ exhibet Evangeliorum librum.

brum Archiepiscopo celebranti, ut osculetur, dicens: *Hæc est lex sancta, Pater*. Et Archiepiscopus respondet: *Credo, & confiteor*. Antiquitus item quum Diaconus esset Euangelium solemni ritu anuntiaturus, ad præscriptum Ordinis Romani, osculabatur pedes Pontificis; & accepta ab eo hac benedictione: *Dominus sit in corde tuo, ac labiis tuis*, veniebat ante Altare, osculatisque Euangeliiis, Codicem in manibus suis levabat. Hodie Euangeliorum librum defert Diaconus ad Altare, ibique genuflexus orationem dicit: *Munda cor meum*; ad significandum verba Sancti Euangelii debere nos puro corde concipere, & impollutis proferre labiis; ait enim Propheta: *Peccatori autem dixit Deus: quare tu enarras justitias meas, & assumis testamentum meum per os tuum?* Accipiens postea librum ex Altari, petit a celebrante benedictionem: qui ritus generalis quidem est, & ubique receptus, licet quoad modum, & formam non unus ubique fuerit usus. In liturgia S. Marci, Diaconus Euangelium recitaturus dicit: *Domine benedicito*. Sacerdos vero: *Dominus benedicat, & fortificet, & auditores nos faciat Sancti sui Euangelii, qui est benedictus Dominus nunc, & semper, & in sæcula sæculorum. Amen*. In liturgia S. Joannis Chrysostomi. Diaconus ait: *Benedic præconem S. Apostoli, & Evangelistæ*. Sacerdos vero Cruce illum signans, respondet: *Deus per intercessionem S. Gloriosi Apostoli, & Evangelistæ det tibi Evangelizanti verbum, ad virtute multa euangelizandum*. In Ordine Romano, Diacono benedictionem petenti Pontifex tacite dicit: *Dominus sit in corde tuo, & in labiis tuis*. Varias ejusmodi benedictionis formulas a Monachis servari solitas recenset Edmundus Martene, opere *De antiquis Monachorum ritibus*, libro II. cap. IV. §. II.

Juxta rubricas Missalis Romani, Diaconus dicit:

Jube domne benedicere : ubi notandum est discrimen inter celebrantem , ejusque ministrum ; ille enim ad Deum univerforum Dominum suas dirigens preces ait : *Jube Domine benedicere* ; Diaconus vero , qui a Sacerdote , qui homo est , & I dempta litera , domnus dicitur , cum petit benedictionem , non *Domine* , sed *Domne* , dicere debet ; quemadmodum recte docent Castaldus , & Quartus ; addentes titulum ipsum primo atque potissime competere Summo Pontifici , qui per antonomasiam *Domnus* appellatur . Si quis autem rogaverit , cur Diaconus utatur potius his verbis : *Jube domne benedicere* , quam illis : *Domne benedicito* ? Respondebit S. Petrus Damiani in tractatu *De Dominus vobiscum* cap. II. quod *lecturus magnæ humilitatis gratia , non a Sacerdote , sed ab eo , cui Sacerdos jusserit se postulat benedici , dicens : Jube Domne benedicere . Sacerdos autem , ut tantæ humilitatis vicem reddat , non subiecto cuiquam benedicendi delegat officium , non per semetipsum benedictionem dare , præsumit , sed potius a Deo , qui est super omnia benedictus prærogetur , exposcit* . Rursus cur Diacono Evangelium cantaturo detur benedictio , non autem Subdiacono , qui Epistolam est lecturus , rationem discriminis designat Rupertus Abbas Tuitiensis libro I. *De divinis officiis* cap. XXXVI. quod *Deus legem , & Prophetas invisibilis invisibiliter misit ; Apostolos vero , & Evangelistas , quorum in hoc saltem enuntiandi Evangelii munere Diaconus personam gerit , visibilis factus , & Sanctam Ecclesiam Sponsam videlicet suam osculatus osculo oris sui , visibiliter misit , & docuit* . Tandem benedictionem petit Diaconus , quia nemo nisi missus officium prædicandi usurpare debet . *Quomodo enim prædicabunt , ait Apostolus , nisi mittantur ?* Dicit autem Sacerdos : *Dominus sit in corde tuo , ac labiis tuis* ; quod intendat diligenter Diaconus , ait Amalarius libro III. De

De Ecclesiasticis officiis cap. xvi. ut cor ejus cum dominicis verbis vadat, & non sit infructuosa oratio Sacerdotis; Dominum in mente teneat, quem suscipit per benedictionem Sacerdotis; & ut non exhalent verba imposita, neve introeant nociva, signo Crucis facto manu Sacerdotis super caput ipsius, munitur.

Accepta benedictione procedit Diaconus juxta veterem ritum ad Ambonem, præcedente Cruce, thuribulo, ac cereorum luminibus, aliisque, de quibus suo loco habebitur sermo. Apud Græcos solemnior est hujusmodi processio, quæ introitus Sancti Evangelii appellatur. Sacerdos enim Evangelium tollens de Altari tradit illud Diacono; & ambo e sacratio exeuntes, per portam septentrionalem veniunt ad locum consuetum, ubi Sacerdos dicit orationem ingressus; cujus ritus mentem aperit S. Germanus Archidiaconus Constantinopolitanus, in theoria rerum Ecclesiasticarum, his verbis: *Introitus Evangelii adventum indicat filii Dei, & ingressum ejus in hunc mundum, ut ait Apostolus; cum induxerit nimirum Deus, & Pater Primogenitum, & Unigenitum suum in Orbem Terrarum ait, Et adorent eum omnes Angeli ejus.* Hinc omnes genibus advoluti Evangelio per Ecclesiam delato reverentiam exhibent; ad quam excitandam *καμπὸν ποῦ* lectores decantant, *Venite adoremus, & procidamus Christo.* Accedit deinde Diaconus ad Episcopum, sive ad Sacerdotem, eique porrigit librum osculandum. Tum absoluto quodam modulo levat, & ostendit S. Evangelium, dicens: *Sapientia Recti.* Quorum verborum sensus ab Auctore Græco Nicolao Cabasila egregie exponitur. Ait enim *In expositione liturgie cap. XXI.* sapientiam illam, quam Sacerdos rogat ad digne auscultandam divinam Evangelii lectionem, esse cogitationes mysterio convenientes, cum quibus oportet audire, & videre ea, quæ fiunt, & dicuntur eos qui fide

fide pleni sunt, qui nihil habent humani: hæc est enim Christianorum sapientia. Paullo post alteram vocem explicans: Hæc quoque, inquit, acclamatio *Recti*, habet adhortationem. Quæ est autem adhortatio? Vult nos esse certamini intentos qui ad Deum, & divina mysteria accedimus, & non socorditer, sed cum studio, & diligentia, omnique reverentia in eis versari, sive videre, sive dicere, sive audire aliquid ex sacris oportebit; & hoc primum signum ostendere hujus studii, & reverentiæ, corporis erectionem, ut non sedentes, sed recti hoc agamus. Talis est enim habitus, & figura supplicum, talis habitus servorum, qui ad nutum Dominorum, omnem mentem erectam habent, ut statim ad ministerium, postquam jussu arripuerint recta currant. Nos autem sumus Deo de maximis supplices, & omni servitutis genere servi. Et horum quidem verborum hæc est ratio. Hactenus Cabasilas.

Sed prosequamur ordinem sacri ritus, quem ex liturgiis S. Marci, & S. Joannis Chrysostomi, ex Euchologio, aliisque ritualibus Græcorum libris excerptimus, ejusque meminit in tractatu *De Processionibus Ecclesiasticis* vir clarissimus Clandius Eveillon, Episcopus Andegavensis, capite *De Processione ad Evangelium*. Postquam Sacerdos dicit: *Sapientia Recti*, Evangelium deponit in Altari, deinde cantato Trisagio, & aliis orationibus, ac benedictionibus completis, & ipsa demum lectione Apostolica, quam nos Epistolam dicimus; idem Diaconus postquam quinquies per intervalla orationum ante ostium sacrarii inclamavit: *Attenti sumus*, incensato Altari, & omni sacrario, atque insuper ipso velo, quod obtenditur sacris donis, accedens ad Sacerdotem ante Altare, suscepto libro Evangelii, prono capite petit benedictionem; qua accepta egressus e sacrario, præcedentibus lampadibus, & thure accedit ad Ambonem.

Sacer-

Sacerdos vero ante sacrum Altare consistens, converso vultu ad occidentem solem, alta voce ait : *Sapientia, Recti audiamus S. Euangelium*. Cum Diaconus dixerit, *Letitio Sancti Evangelii*, Chorus respondet, *Gloria tibi Domine* : & rursus ait Sacerdos, *Attendamus*. Lecto autem Euangelio, Diaconus revertitur ad fores sacrarii, librumque reddit Sacerdoti, qui ei pacem precatur, dicens : *Pax tibi*.

In Missa Æthiopum, refert laudatus Claudius, quod similiter ante recitationem Euangelii Diaconus circuit Ecclesiam clamando : *Surgite, audite Euangelium Sanctum, & bonam annuntiationem Domini nostri, & Salvatoris nostri Jesu Christi*. Sacerdos autem accipiendo Euangelium versus populum, illud ter incensat, & facta solemnī precatione ad benedictionem introitus in Ecclesiam, ipse cantat Euangelium accensis luminaribus, & alio omni apparatu ex more adhibito.

De usu Thuris, Cereorum, Crucis, & Pulveris ad lectionem Euangelii.

C A P U T XIII.

Solemne fuit Christianæ Ecclesiæ ab Apostolorum ævo thus, & lumina in divinis officiis adhibere, nam, præterquam quod eorum meminerint Canones Apostolici, ac antiquissimæ liturgiæ, veteres etiam Patres non semel illa commemorant; unde non mirum si Tridentina Synodus Sess. xx. l. cap. v. inter cæremonias in sacrificio ex Apostolica disciplina, & traditione adhibendas, *Lumina* quoque, & *Thymiamata* recenset. Verum hæretici non desuere præsertim postremis hisce sæculis, qui thuris usum, & candelarum in sacris irriderent, respiciendumque contenderent. Qua tamen in re quam late,
ac

ac turpiter errent, quisque facile deprehendet. Negotium vero nullum facessunt, quæ in medium afferunt, ut pervetustos, ac venerabiles hujusmodi ritus evertant. In primis contra thurificationem, Dei oraculum objiciunt, dicentis apud Isaïam, cap. i. *Incensum est abominatio mihi*; tum Arnobii auctoritatem lib. vii. *Adversus gentes*, qui pluribus thuris usum in re sacra novum, & vanum docet; tum denique Athenagoræ effatum proferunt, in legatione pro Christianis: *Opifex ille, & Pater universorum non sanguine eget, non nidore, non floribus, & suffumentis flagrantibus, cum ipse sit odor longe suavissimus, cum nulla re indigeat, nihil extra se desideret*. Sed hæc levia sunt; non enim Deus apud Isaïam absolute thuris incensum aspernatur, sed quum ab impiis indigne effertur; nam apud populum Dei antiquissimus est thuris usus in sacrificio divino, ut ex libro Exodi satis liquet cap. xxv. v. xxix., & cap. xxx. v. xxxiv. & seq. Arnobius vero, & Athenagoras usum thuris in honorem, cultumque Deorum improbant, quod illis nullo modo debetur; vel quum illud credimus sine interno cultu veræ Religionis sufficere; non autem quum vero Numini pura mente, pieque, ac religiose adolemus. *Thus quidem incendimus*, ait Tertullianus de corona militis, cap. x. *sed non eodem ritu, nec eodem habitu, nec eodem apparatu, quo agitur apud Idola*.

Adversus cereorum usum in Ecclesia, inter alia objiciunt nobis Lactantium sic agentem libro VI. Institutionum divinarum cap. II. *Num igitur mentis suæ compos putandus est, qui Auctori, & datori luminis candelas, ac cereorum lumen offert pro munere?* Item S. Hieronymum, qui scribens adversus Vigilantium, confitetur ingenue pro honore Martyrum cereos accendere pertinere ad imperitiam, & simplicitatem sæcularium hominum, & Religiosarum sceminarum, quæ quidem zelum ha-

habent, sed non secundum scientiam. Sed hæc etiam levissimi sunt momenti. Lactantius siquidem solos Ethnicos reprehendit, qui ea mente lumen Deo offerrent, quasi in tenebris degeret, luceque indigeret. Et Hieronymus de iis loquitur, qui cereos accendebant, credentes inde Martyres illustrari. Cæterum eodem libro Sanctus Doctor plurimum commendat pium morem accendendi cereos in honorem Martyrum; & ut mox patebit, ad lectionem Euangelii, non quidem ad fugandas tenebras, sed ad signum lætitiæ demonstrandum.

His opportune delibatis, propius nunc lectionem Euangelii attingamus. Præcipit in primis Ordo Romanus incensum semper deferri ante illud, sive ad Altare, sive ad Ambonem procedatur. Idipsum de cereis præscribunt omnes liturgici; qui ut ad Euangelii lectionem accenderentur, jam ante S. Hieronymi tempora usus invaluerat; ita enim ipse scribit contra Vigilantium ad lumina. hæc cæcutientem, & dormitantem. *Per totas Orientis Ecclesias, quando legendum est Evangelium, accenduntur luminaria jam sole rutilante, non utique ad fugandas tenebras, sed ad signum lætitiæ demonstrandum. Unde & Virgines illæ Evangelicæ semper habent accensas lampadas suas; & ad Apostolos dicitur: Sint lumbi vestri præcincti, & lucernæ ardentes in manibus vestris; & de Joanne Baptista: Ille erat lucerna ardens, & lucens; ut sub typo luminis corporalis, illa lux ostendatur, de qua in Psalterio: Lucerna pedibus meis verbum tuum. Domine, & lumen semitis meis. Morem ipsum etiam Romæ servatum fuisse, patet ex Leone Papa III. qui teste Anastasio, fecit lucernas fusiles duas ex argento purissimo; & hoc constituit, ut Dominicorum dies, vel in sanctis solemnitatibus, hinc inde, juxta lectorium consisterent, & ad legendum sacras lectiones luminis splendore resfulgerent. Acolythorum autem officium esse scribit S. Isidorus Hi-*

spalensis Episcopus. libro VII. *Etymologiarum* cap. XI. I. cereos deferre ante Diaconum, quando legitur Euangelium in Ecclesia, non ad effugandas tenebras, cum sol in die rutillet, sed ad demonstrandum, quod de tenebris infidelitatis venimus ad lucem fidei; & ut sit signum lætitiæ, quatenus sub typo corporalis luminis lux illa in memoria habeatur, de qua dicitur: *Erat lux vera, quæ illuminat omnem hominem venientem in hunc mundum.* Apud Græcos lumina accensa ferebntes *Deputati* vocantur. Unde Joannes Episcopus Citri *In responsis*, sic ait: *Deputati vero mandyis induti antecedunt cum lampadibus Euangelium, quando lectionis causa fertur ad suggestum; iidem munus idem obeunt in ingressu ad sacram Mensam, quando sacra dona circumferuntur, & ad Prothesim referuntur.* In Missa solenni Summi Pontificis, præter quam Epistola, & Euangelium græce, & latine leguntur; Diaconi etiam Latino, qui Cardinalis est, præcedunt septem Acolythi cum septem candelabris, & cereis accensis, eidemque Euangelium legenti assunt, & post ipsum Græco Diacono eandem sacram lectionem græce recitant.

Myfici usus cereorum ac thuris ad Evangelii lectionem fusius explicantur a rerum liturgicarum Scriptioribus; pro quibus omnibus unus sufficiat Innocentius III. Pontifex Maximus libro II. *De mysteriis Missæ* cap. IV. Diaconus præmittit Ceroferarios cum faculis, & incenso, quia Prædicator debet ex se odorem bonæ opinionis emitte secundum illud Apostoli: Christi bonus odor sumus Deo in omni loco. Vel per hoc quod Sacerdos præmittit duos Acolythos ante Diaconum, qui lecturus est Euangelium portantes cereos. & incensum, notatur quod Christus præmittebat binos ante faciem suam in omnem Civitatem & locum, quo erat ipse venturus, præferentes coruscationes miraculorum, & odo-

odorem virtutum. Rursus ideo librum Euangelicum præcedunt thuribulum & candelabrum, quia doctrinam Christi virtus & fama præibat, Euangelista (Luc. iv.) testante: *Regressus est Iesus in virtute spiritus in Galileam, & fama exiit in universam regionem de illo, & ipse docebat in Synagogis eorum.* Hæc ille. Adolemus autem thus ad Euangelium, in reverentiam Christi ibi præsentis, ac nobiscum loquentis, quem Deum; & summum Sacerdotem profitemur; & ad significandum effectum gratiæ, quam ipse variis Euangelii sui auditoribus communicat. Quod vero ministris Altaris, ac circumstantibus etiam laicis thuris suffitus præberi solent, non ad dignitatis prærogativam, ait Cardinalis Bona libro I. *Rerum liturgicarum* cap. xxv. num. ix., ut per abusum irrepsit; sed ad Religionem pertinet, ut nimirum excitet ad orationem, & effectum divinæ gratiæ representet. Unde in Apocalypsi incensa sunt *Orationes sanctorum*; & in Psalmo canimus: *Dirigatur Domine oratio mea sicut incensum in conspectu tuo.*

Crucem quoque præcessisse ad Euangelii lectionem non sine mysterio tradit Gulielmus Durandus, libro IV. *Rationalis divinorum officiorum* cap. xxiv. quem morem adhuc servant Fratres Ordinis Prædicatorum; retinentque Ecclesiæ nonnullæ in Regno Neapolitano. Hoc ritu uti etiam Æthiopes, patet ex Missa illa, quæ, ut testatur Demochares, *de observ. Missæ celeb.* cap. xiv. ex lingua Chaldæa sive Æthiopica in Latinam conversa, & Romæ typis excusa habetur; ibi namque Diaconus accipiens Crucem dicit: *Orate ut digni efficiamur audire Euangelium.* Prorsus tamen obsolevit ille ritus, ab Ordine Romano, aliisque relatus, ut scilicet Diaconum Subdiaconus præcederet portans pulvinar, quod Euangelii libro supponeret; ad denotandum, Auctore Durando, *suave esse jugum Domini illud portare volentibus.*

Hodie nescio qua de caussa factum est, ut loco pulvinarium lignea legilia in Altari ad sustentationem sacrorum Codicum adhibeantur: abusus profecto a venerabili antiquitate alienus, a recentioribus Religiosis, pariter ac doctis Ecclesiarum Præfectis minime acceptus; atque iccirco ab omnibus eliminandus; quemadmodum ille longe absurdior pulvinaria Missalium ufui addicta, ad profanum usum adhibendi; quæ ne Episcopi quidem, nedum alterius cujusquam genibus, cubitisve ullo loco in Ecclesia supponerentur, S. Carolus in Concilio Mediolanensi V. edixit, capite *De Ecclesiis earumque suppellectile*.

Apud Romanos pulvinaria lectuli erant, qui diis sterni solebant in Templis: Quare Tullius oratione II. in Catilinam. *Quamobrem Quirites quoniam ad omnia pulvinaria supplicatio decreta est, celebratote illos dies cum conjugibus, & liberis vestris*. Plinius quoque in panegyrico ad Imperatorem Trajanum cap. VIII. *Itaque, inquit, non tuo in cubiculo, sed in Templo, non ante genialem thorum, ante pulvinar Jovis optimi Maximi adoptio precata est*. Et eruditissimus Alexander ab Alexandro libro V. *Dierum genialium* cap. XXVI. pulvinaria apparatus lecticas vocat Divorum, in quibus Numina pro majestate juxta aras sublimia extabant, Sed paulatim humana ambitio adeo excrevit, ut (quemadmodum notat Auctor observationum Eugeniologicarum) quod olim deorum proprium fuit, ad se transmitti vel jusserit, vel permiserit. Hinc holoserica auro intexta pulvinaria luxu adinvenit, quibus illustriores Matronæ, & Principum virorum conjuges in Divorum Templis incumbunt, ut hoc etiam irreligiosæ levitatis argumento languescentem pietatem, ac imminutum Christiani spiritus fervorem in locis sacris coram Deo, & hominibus ostentarent.

*De ritu indicendi silentium quum
Euangelium legitur.*

C A P U T XIV.

L Audatissimus apud Judæos mos viguit, ut Levitæ, quibus nostros successisse Diaconos, fere omnes sentiunt, ante sacram divinæ legis lectionem silentium juberent, quemadmodum perspicuis verbis Esdras demonstrat, libro II. cap. viii. cum ait: *Et aperuit Esdras librum coram omni populo; super universum quippe populum eminebat; & cum aperuisset eum, stetit omnis populus, & benedixit Esdras Domino Deo magno; & respondit omnis populus Amen, Amen, elevans manus suas, & incurvati sunt, & adoraverunt Deum proni in terram. Porro Josue, & Bani, & Serebia, Jamin, Accub, Septbai, Odiu, Maasia, Celita, Azarias, Jozabed, Hanan, Phalaja levitæ silentium faciebant in populo ad audiendam legem.* Quod autem Levitæ in Synagoga, id in Christi Ecclesia Diaconi præstiterunt; ipsos enim ante Euangelium, seu quamlibet aliam Sacræ Scripturæ recitationem silentium imperare consuevisse, non semel indicant liturgiæ vetustissimæ, sæpius vero luculentæ Sanctorum Patrum testimonia manifestant, quæ recensentur a doctis viris Stephano Duranti, libro III. *De ritibus Ecclesiæ* cap. xvi. Bernardino Ferrario, libro I. *De ritu Sacrarum Ecclesiæ veteris concionum* cap. xii. & aliis. Auctor Apostolicarum Constitutionum de re ipsa scribit, libro II. cap. lvii. *Diaconus populum speculetur, ne quis murmure abstrepet, dormitet, aut nutus faciat; oportet enim stare in Ecclesia sapienter, & vigilantius auribus ad verbum Domini intentis.* Ejus ritus haud obscure meminerunt eximii Ecclesiæ Doctores Ambrosius,

sius, & Augustinus, quorum prior *præf. in Ps.* scribit: *Quantum laboratur in Ecclesia, ut fiat silentium, cum lectiones leguntur.* Alter vero sic loquitur, libro XXII. *De Civit. Dei* cap. VIII. *facto tandem silentio, Scripturarum sunt lecta divina solemnia.* Sed apertius hanc consuetudinem, expresserunt Sancti Joannes Chrysostomus, & Isidorus Episcopus Hispalensis. Ille multis quidem locis; at in secundam ad Thessalonicenses epistolam homilia III. perspicue ita pronuntiat. *Non attendunt, non cogitant huc ad Deum se ingressos, Deum cum ipsis sermocinari; quando enim qui lecturus est surgens dicit: Hæc dicit Dominus: Et Diaconus stans omnes indito silentio compefcit.* Isidorus autem in hanc rem sic loquitur libro I. *De Ecclesiasticis officiis* cap. x. *Ideo Diaconus clara voce silentium admonet, ut siue dum psallitur, siue dum lectio pronuntiatur, ab omnibus unitas conservetur, & quod omnibus prædicatur, æqualiter ab omnibus audiatur.* Idem alibi. *Ipsi (Diaconi) clara voce in modum præconis admonent cunctos siue in orando, siue in flectendo genua, siue in psallendo, siue in lectionibus audiendis; ipsi etiam, ut aures habeamus ad Dominum clamant.* Quid plura? Laudatus refert Ferrarius Ecclesiam Mediolanensem, juxta ritum Ambrosianum morem hunc indicendi ante lectionem sacram silentii semel acceptum constanter adhuc retinere: siquidem in Missis, quas Pontificales vocant, ante Evangelii recitationem silentiū in populo de suggestu alta voce ter in hanc formulam indicitur: *Parcite fabulis, silentium habete, habete silentium.*

At non modo ad Evangelii lectionem sed perpetuo in Ecclesia servandum silentium sexcenties Sancti Patres, & ac Sacri Canones inculcarunt. *Nihil,* inquit S. Chrysostomus, homil. XXVIII. ad populum, *Ecclesia tam congruum, quam silentium, & tranquillitas; theatris convenit tumultus, & balneis, & pompis, &*
jō-

foris. Isidorus Pelusiota epistola xlv. Templis, ait, *omne silentium debetur*. S. Augustinus multus est in vetando verbosari, ut ipse loquitur, in Ecclesia. *Nolite*, inquit sermone de tempore ccl. *in vicem in Ecclesia verbosari, sed quieti estote; sunt enim plerique, & precipue pleraque mulieres, quæ ita in Ecclesia garrunt, ita verbosantur, ut lectiones divinas nec ipsæ audiant, nec alios audire permittant*. Et sermone cxv. de tempore. *In Ecclesia stantes nolite verbosari, sed lectiones divinas patienter audite. Qui enim in Ecclesia verbosari voluerit, & pro se, & pro aliis redditurus est rationem*. Frequens est in eodem argumento & Magnus Basilii, qui inter cætera diserte hæc ait in Psalmum xxviii. *Homines miserabiles relictis ædibus suis ad Templum concurrant, quasi emolumentum quidquam inde laturo; cum tamen nec accommodent aures verbis Dei, nec peccati quopiam præoccupati mærore afficiantur, nullo corripiuntur divino iudicii metu, adeo ut sibi aridentes, suasque pressantes dextras, domum orationis in locum vertant effusissimæ loquacitatis*. Sed prætermittis brevitatis causa, aliorum Patrum oraculis, audiamus S. Ambrosium lib. III. de virgin. qui in loquaces ob rei indignitatem acerbè invecus merito exclamat: *An quidquam indignius quam oracula divina circumstrepere ne audiantur, ne credantur, ne revelentur; circumsonari confusis vocibus, ut impediatur oratio pro salute deprompta omnium; cum gentiles idolis suis reverentiam tacendo deferunt? Unde illud proditur, Alexandro sacrificante Macedonum Rege, puerulum barbarum, qui ei lumen accenderet, excepisse ignem brachio, atque adusto corpore mansisse immobilem; nec dolorem prodidisse gemitu: tanta in puero barbaro fuit disciplina reverentia, ut naturam vinceret*. Refert deinde Sanctus Doctor aliud exemplum, ranarum scilicet obstrepentium, quæ jussu Sacerdotis subito conticue-

runt;

runt; tandemque concludit: *Silent igitur paludes, homines non silebunt?*

Quæ cum ita se habeant; quis non videt quam perniciosus sit abusus alter quidem pudendus quammaxime, gravique cum animarum detrimento conjunctus, abusus inquam quorundam sacrorum hominum, qui in sacra confessionali sede ante Deum, & divina mysteria, longa colloquia familiariter cum mulieribus instituunt, tanta libertate, atque licentia, quanta domestici parietes, ac profana loca cuilibet e populo vix tribuerent. Proh dolor! Liceat cum S. Gregorio Magno homilia XVII. in Evangelia, non sine lacrymis queri: *Nullum puto ab aliis majus præjudicium, quam a Sacerdotibus tolerat Deus, quando eos, quos ad aliorum correctionem posuit, dare de se exempla pravitatis cernit; quando ipsi peccamus, qui compescere peccata debuimus.* Ex veteri olim instituto quidam ex Diaconis Tempia inambulabant, circumspiciebantque simul, atque cavebant ne quis in domo Dei strepitus fieret, neque quis nutus faceret, vel mullaret. Hodie, dolenter referimus quod aliquando vicem suorum temporum dolens agebat S. Chrysostomus, *Nonnulli securius quam in foro mulieres illic libidinis causa prosequuntur, obscenisque, & inhonestis verbis, & signis utuntur: Si quis, corrumpere matronam conatur, locum hunc maxime idoneum putat.* Ecclesiarum Præsides a Synodo Tridentina sessione xxii. decreto *De observandis, & vitandis*, jubentur, vana, & profana colloquia, deambulationes, & strepitus ab Ecclesiis arcere, ut domus Dei domus orationis videatur. Sed frustra. Ubique fere vincit Religionem scelus, pudorem audacia, auctoritatem indigna licentia. Dicit nequit quantum repetitis legibus Romani Pontifices, ac Sacra Concilia diligentiam adhibuerint, ut Christiani homines in domo Dei, præsertim divinorum officiorum,

tem-

tempore, debito cum silentio, ac religiose versarentur; uni Deo, & animarum saluti intenti; at vero aucto in dies malo, ita Deus violatione domus suæ videtur offensus, ut nostra hac tempestate, sacra potius Tempia alicubi recenti permiserit terramotu corruiere, quam profana ædificia.

De ritibus a Diacono servandis quum Evangelium nuntiat, ac primum de salutatione,
Dominus Vobiscum.

CAPUT XV.

Diaconus in Ambone consistens Populo Evangelium enuntiaturus, eum primo alta voce salutatur iis verbis: *Dominus vobiscum*: Quatenus, ait Auctor nomine Alcuini, de divinis officiis, cap. de celebratione Missæ, *corda illorum a mundanis cogitationibus Dominus emundet, & ad suscipienda verba salutifera aperire dignetur*. Est autem hæc salutatio adeo vetusta, ut eam a veteri Testamento in Christi Ecclesiam Apostolica traditione dimanasse ingenue fateatur Concilium Bracarense I. anno DLXIII. Can. III. *Placuit ut non aliter Episcopi, & aliter Presbyteri populum, sed uno modo salutent dicentes: Dominus sit vobiscum: sicut in libro Ruth legitur; & ut respondeatur a populo: Et cum spiritu tuo; sicut, & ab ipsis Apostolis traditum omnis retinet Oriens, & non sicut Priscillianæ pravitas permutavit*. Pro Oriens legendum Occidens, jam ante nos alii adverterunt; quandoquidem in Ecclesia Orientali alius profecto erat, & nunc est ritus salutandi populum hac formula: *Pax omnibus*, vel, *Pax vobis*; ut constat ex antiquissimis liturgiis Sanctorum Jacobi, ac Basilii, quibus addo Sanctum Joannem Chrysostomum, qui multis in locis, at

longe egregie in Epistolam Pauli ad Colossenses, ad rem ita differit: *Cum ingressus fuerit is, qui præest Ecclesiæ statim dicit: Pax omnibus; quando concionatur; Pax omnibus: quando benedicit, Pax omnibus: quando salutem optare jubet, Pax omnibus: quando sacrificium absolvitur, Pax omnibus.* Ita Chrysostomus. Quem etiam jam vita functum, cum corpus ejus a Proclo Patriarcha in throno collocatum esset, dixisse ad populum *Pax vobis*; idque Proclum, & adstantes omnes audivisse, Ecclesiastica Nicephori prodit historia lib. XIV. cap. XLII. Meminit quoque ejus formulæ in epistola ad Eustachium S. Athanasius, ubi quosdam Episcopos sugillat, qui cum initio sacrificii, & sermonis illud proferrent, *Pax vobis*; tragœdias tamen excitabant, & alios affligebant.

Porro in Ecclesia Latina hæc salutatio, *Dominus vobiscum* est propria Sacerdotum. Diaconi vero tantum in Evangelii lectione, & in benedictione Cerei Paschalis; quia ibi, inquit Durandus, libro IV. *Rationalis divinorum officiorum* cap. XIV., ex persona Christi loquitur, & eundem resuscitatum repræsentat. Præsules autem prima vice dicere solent, *Pax vobis*, quam ideo Episcopalem salutationem S. Petrus Damiani appellat opusculo, *De Dominus vobiscum*. Atque huic distinctioni Sacerdotis ab Episcopo minime refragatur laudata Synodus Bracarenensis; nam ut recte animadverterunt Viri docti Garzias Loaisa, & Ludovicus Bail in Notis ad hanc Synodum, Concilium arguit Priscillianum contendentem non semel tantum, ut moris est, sed semper ab Episcopis dicendum esse, *Pax vobis*. Cæterum etsi prima vice Episcopus salutat hac formula, *Pax vobis*; quoniam ut ait Innocentius Papa III. hæc fuit prima vox Christi ad Discipulos, postea tamen instar cæterorum Sacerdotum, utitur eadem salutatione, qua Presbyter: *Dominus vobiscum*.

Illud

Illud quoque recensere incongruum prorsus non erit, fuisse aliquando in Ecclesia disciplinam, nequis celebrare præsumeret, nisi præter Clericum ministrantem, unus saltem præsens adesset, ut vere posset celebrans pluribus dicere: *Dominus vobiscum*; & *Orate fratres*. Extat Canon apud Gratianum, *de consecrat.* dist. I. his verbis: *Hoc quoque statutum est, ut nullus Presbyterorum Missarum solemnia celebrare præsumat, nisi duobus præsentibus, sibi que respondentibus, ipse tertius habeatur; quia cum pluraliter ab eo dicitur: Dominus vobiscum; & illud in secretis, Orate pro me; apertissime convenit, ut ipsius respondeatur salutationi.* Sed hunc scrupulum, quo tunc temporis omnes fere agebantur, omnino sustulit Sanctus Petrus Damiani, integro, egregioque opusculo, cui titulum iccirco præfixit, *Dominus vobiscum*; ubi inter alia docet alienum a ratione videri non debere, quod quis solus dicat: *Dominus vobiscum*; nam his verbis salutatur Ecclesia, quæ est una in multis, & tota in singulis.

*De ritu exprimendi Crucis signaculum,
quando Euangelium nuntiatur.*

C A P U T XVI.

RItus est etiam antiquissimus ut Diaconus statim, post salutationem, pronuntians: *Sequentia Sancti Evangelii* signet primo librum Crucis signaculo, quasi dicat, ait Innocentius III. *Hic liber est Crucifixi*; deinde vero seipsum in fronte, in ore, in pectore. *In fronte*, videlicet, juxta S. Augustinum, *in sede ipsius verecundia*, ut eliminata omni verecundia, cum Apostolo non erubescat de Euangelio Christi; in ore, quia ut idem ait Apostolus, *predicamus Jesum Christum, & hunc cruci-*

crucifixum; in pectore tandem, ne aliqua suggestio diaboli eum impediat, quin puro corde Evangelium Dei annuntiare valeat. Hæc Innocentius. Alii multa in rem ipsam differunt; e quibus Hugo Cardinalis: *Legens*, inquit, *Evangelium signum facit in pectore, quasi dicat, Corde credo ad justitiam: In ore, quasi dicat, Quod credo, confiteor ad salutem: Et in fronte, quasi dicat: Non erubescio Evangelium.*

*De ritibus a Clero, & populo in Evangelii
lectione servandis, ac primum de verbis
Et cum spiritu tuo.*

C A P U T XVII.

S Alutante Diacono, congruit, ait Amalarius. Fortunatus libro. III. *De officiis Ecclesiasticis* cap. xvi. i. l., ut omnis populus ad eum conversus sit; & quod ante, non fecerat, cum Epistola legeretur, inquit Innocentius. III. libro II. *De mysteriis Missæ* cap. xlv. i. devotus, & attentus respondeat: *Et cum spiritu tuo*. Quæ verba accepta videntur ex secunda Pauli ad Timotheum Epistola cap. iv.: *Dominus Jesus Christus cum spiritu tuo*; eorumque meminere antiquæ liturgiæ, & prisce Patres Isidorus Pelusiota, & Sanctus Joannes Chrysostomus, præfatæ responsionis sensum mirifice explicantes. *Illud autem*, inquit Isidorus, lib. I. epistola cxxi. i. *quod a plebe respondetur*, Et cum spiritu tuo, *hanc habet sententiam: pacem quidem nobis tribuisti Domine, hoc est mutuam inter nos concordiam: pacem autem nobis da; hoc est ejusmodi tecum conjunctionem, quæ nullo modo divelli possit, ut cum spiritu tuo pacati, quem nobis in creationis initio indidisti, a tua charitate distrahi nequeamus.* Sanctus.

etus vero Chrysostomus sic loquitur homilia xviii. in secundam Corinthiorum Epistolam *In tremendis mysteriis ut Sacerdos pro plebe, ita plebs pro-Sacerdote, votum facit; hæc enim verba, Et cum spiritu tuo, nihil aliud, quam hoc significant.* Et homilia xxxvi. in primam Corinthiorum: *Verum hæc signa tantum sunt, & monumenta rerum, ubi agitur nos sapius loqui, Cum spiritu tuo plebs respondet.* Ecce, inquit doctissimus Durantus, lib. II. *De ritibus* cap. xv., nedum a Clero, sed, & plebe responderi, *Cum spiritu tuo.* Quod demum in Occidente a Concilio Aurelianensi constitutum fuerit, ut non solum Clerici sed omnis populus consona voce, *Et cum spiritu tuo* responderet, diserte prodit Micrologus *De officiis* cap. II.

Nec est quod hujusmodi disciplinam miremur; a primis enim Ecclesiæ sæculis promiscue olim una cum Clericis cantasse, & populum, simulque Sacerdoti solemniter celebranti respondere consuevisse testatur S. Cyprianus in libro, *De Oratione* hæc scribens: *Sacerdos parat fratrum mentes dicendo: Sursum corda; & dum respondet Plebs, habemus ad Dominum, admonentur nihil aliud se quam Dominum cogitare debere.* Similia ante Cyprianum prodidit S. Justinus, apologia secunda dicens *Præpositum preces fundere, & populum fauste acclamare Amen.* De promiscuo vero Populi, & Cleri cantu, non tanquam re nova sua ætate instituta, sed qui una cum Ecclesia coalescere cœperit, luculentissimum est illud S. Joannis Chrysostomi testimonium homilia xxxvi. in primam Corinthiorum: *Conveniebant olim omnes, & psallebant communiter; hoc nunc quoque facimus.* In Ecclesia Latina idipsum viguisse non obscure inquit S. Ambrosius lib. III. *In Hexameron* cap. v. dum ait: *Psalmorum cantu virorum, mulierum, virginum, parvulorum consonus undarum fragor resultat.*

De

*De verbis Gloria tibi Domine, ac de Crucis
signo a populo expresso ad lectionem
Euangelii.*

C A P U T XVIII.

Ritus alter olim a clero, & populo ad Euangelii lectionem servari solitus is erat. Audito *Euangelii* nomine, nempe *Sequentia Sancti Euangelii*: vertentes se ad Altare cum reverentia respondebant: *Gloria tibi Domine*: glorificantes Dominum, ait Innocentius III. libro III. *De mysteriis Missæ* cap. XLVI. quod miserit eis verbum salutis; vel quasi dicerent, inquit Durandus: Gloria tua, quæ nobis in Euangelio prædicatur, nobiscum sine fine permaneat, & semper crescat; atque hæc dicendo, signo Crucis in fronte, in ore, & in pectore se similiter contra diabolum muniunt, ne eos impediat in audiendo. In fronte, quia ibi est locus pudoris, & verecundiæ: unde per hoc quod Crucem fronti imprimunt, ostendunt se non erubescere credere Crucifixum, cuius liber legitur; & eum habere Deum, & Dominum: Per hoc quod in ore signant, significant Crucem Domini audacter prædicare: Per hoc quod in pectore, ostendunt se libenter compati pro nomine Christi; qua etiam ratione, quando Euangelium legitur, cum utroque pollice ante pectus signum Crucis figurant. Rursus nos in ore signamus, ad designandum, quod de verbis Euangelii debet esse locutio nostra. In pectore vero, ad designandum quod verba Euangelii debent nos percutere in pectore, & in mente. Hæc Durandus. Ordo tamen Romanus qui multis sæculis illum præcessit, duplicis Crucis, in fronte, & pectore; simplicis vero tantum, in fronte scilicet, meminit Hildebertus Cenomanensis, *De mysteriis Missæ*, hoc carmine.

Neve

*Neve superveniens zizania seminet hostis ,
Frontibus imprimitur mystica forma Crucis .*

Alia ejus ritus mysteria velle hic enarrare, esset intemperanter abuti otio . Unum addo quod ante notavit magnus Annalium parens Baronius , Apostolica traditione fluxisse in Ecclesiam , ut fideles ad excolendam Crucis Christi memoriam tam in sacris , quam in cæteris rebus signum Crucis adhiberent . Tertullianus non ut de re recenter inventa , sed cujus nullum antiquitatis inveniat exordium , luculentissimum suggerit testimonium *De corona militis* , cap. III. *Ad omnem progressum , atque promotum , ad omnem aditum , & exitum , ad vestitum , & calceatum , ad lavacra , ad mensas , ad lumina , & cubilia , ad sedilia quacumque nos conversatio exerceat , frontem Crucis signaculo terimus .* Id ipsum indicat S. Cyrillus Hierosolymitanus. *cateches.* cap. XIII. aliique Patres . Nec solum Crucis signaculo in omnibus actionibus se se Christifideles munire , sed & materialem ipsius figuram in locis decentibus pingere vel insculpere consueverunt . Quod tamen ne fieret in terra , sub gravissimis pœnis Imperatores , Patres , Concilia , Summiq; Pontifices vetuere . De Tiberio II. Imperatore narrat historia , quum delere jussisset tres Cruces in terra positas , thesaurum invenisse . Hodie in nostris Templis non sine abusu passim videmus cum sacrorum hominum insignibus Sacratissimam Crucis effigiem pavimento insculptam , quam pedibus inviti calcamus . Utinam hic abusus tollatur ; multo magis alius , quo ut me jentes arceant , in domorum angulis Crucem pingunt .

Præter memoratos ritus accedunt alii in reverentia argumentum ad Evangelii lectionem adhiberi soliti . Ritus scilicet ponendi baculos , nudandi enses , standi , & caput aperiendi . De omnibus figillatim .

De ritu ponendi baculos, dum
Euangelium legeretur.

CAPUT XIX.

QUantum ad baculorum depositionem pertinet, operæ pretium me facturum puto, si una cum ejusmodi depositionis mysteriis causas etiam explicavero, cur fideles in Ecclesiis baculos introduxerint. Prima esse potest, quam innuit Honorius Augustodunensis, *De antiquo ritu missarum* apud Hitorpium cap. xviii. voluisse nimirum Christifideles in esu novi Agni, videlicet Sacratissimæ Eucharistiæ imitari Hebræos, qui in esu antiqui Agni Paschalis, juxta Domini præceptum Exodi xii. baculos manu gerebant. Alteram causam doctissimus Joannes Ciampinus *Veterum monumentorum* capite xv. ex eo conjicit, quod cum baculus Crucis sit symbolum, ut docet S. Augustinus *sermone* cvii. *de tempore*, ideo fideles baculo in memoriam nostræ redemptionis utebantur; cui interpretationi favet usus Maronitarum Montis Libani, qui teste Marchety *in vita pii viri Francisci Gallaupii solitarii ejusdem montis gallice descripta* cap. xv. ut coram Deo Crucifixi videantur, sperantesque se in suis precibus esse exaudiendos, statim ac intrant Ecclesiam, baculis Crucis figuram exprimentibus innituntur, quos tamen, dum Euangelium legitur, & dum Sacra Hostia elevatur, protinus deponunt.

Potissima vero illa meo judicio causa videtur, quam etiam nunquam satis laudatus Ciampinus commemorat, nimirum: quum christiani in Ecclesiis olim orantes starent, ut fusius infra dicetur, sacræque functiones in longum plurium horarum spatium, quemadmodum innuit S. Gregorius lib. viii. epist. xxxv. protraherentur (mos enim erat Sacrum Mysterium, homiliarum recitatione,

tione, atque ex instituto Cælestini Papæ, divina psalmodia celebrare) ideo fideles, præsertim senes, ac debiles ita fatigabantur, ut baculis, se sustentare cogerentur: quod non obscure mihi videtur indicasse Episcopus Trevirensis Amalarius Fortunatus, quum ait lib. III. cap. XVII. *Usque ad istud officium baculis sustentabamur.* Item expositio Missæ ex vetusto Codice apud Hitorpium, his verbis: *Non est baculus necessarius, idest humanum auxilium, dum ipsum Christum præsto habentes, ejus vocem audimus; cum autem humano utimur auxilio, ante, vel post Evangelium baculos in manibus tenemus: accedente igitur ipso Christo, idest Euangelio, baculos dimittimus, quia humano auxilio non egemus.* Præterea ut nostræ huic opinioni plus roboris afferatur, refert Edmundus Martene *De antiqua Ecclesiæ disciplina in divinis officiis celebrandis* cap. III. n. XIII. fragmentum vitæ manuscriptæ S. Victorii Cenomanensis Episcopi, cui *Martinus dedit baculum, seu sustentaculum, super quod solent Sacerdotes fufis orationibus sustentari.* Quare non inepte videmur opinari Christifideles usos olim ad levamentum fuisse baculis, ne divinatorum officiorum prolixitate lassarentur.

Cur autem eo levamine, quod baculi fulcimentum afferebat, pii Christifideles libenter carere voluerint, dum Evangelium audirent in Ecclesia, multæ congruentes judicio nostro fuere causæ. Primo, quia Dei filium in Euangelio loquentem audientes, ipsam esse virtutem suam profitebantur. II. Quia æternis intenti, propriæ infirmitatis oblivisci significabant. III. Quia propter Dominum omnia incommoda liberalissime perferebant. Denique, quia ubi de divina suscipienda institutione agebatur ad animæ salutem comparandam, quasumque corporis molestias alacriter contemnebant. Amalario nihilominus longe alia mens est: debuisse siquidem Christifideles ad Evangelii lectionem ponere baculos scribit, tum

M

ut

ut a Judæis dissentirent, qui caput Christi arundine percutiebant; tum etiam ut tanquam servi ante Dominum stare humiliter viderentur. Secundum vero Hildebertum Cenomanensem, Archiepiscopum Turonensem, *carmine de mysteriis Missæ*, ut denotarent christianæ esse virtutis acceptas injurias condonare.

Parcere, cum baculum projicis, instrueris.

Quæ ex designatis hactenus rationibus sit potior, doctus, ac prudens judicet lector.

Pertinet ad rem præsentem illud etiam admonere, quod licet olim Laici passim, ac Clerici potissimum baculis in divinis officiis uterentur; multis tamen ab hinc sæculis baculorum usus est intermissus, qui tamen hodie veluti quædam dignitatis insignia in nonnullis Ecclesiis a Cantoribus, iisque quos Præcentores vocant usurpantur. Ita testantur plurimum Ecclesiarum consuetudines, in quibus (ut notat Ciampinus veterum monumentorum cap. xv.) Cantor qui Dignitas post Decanatum appellatur, in solemnioribus Ecclesiæ muneribus baculo utitur, sive incedat, sive sacris ministret: vigetque mos iste non modo in Ecclesiis Gallicanis, in quibus Cantores, Dignitates videlicet, Præcentoresque, ii nempe Ministri, qui pluviali induti, per chorum, dum divina recitantur æquo gressu discurrent, baculos manibus gestant; verum etiam in Ecclesiis nostræ Italiæ, ac potissimum utriusque Sici-liæ. Porro in Ecclesia Metropolitana Messanensi Decanus, & Cantor præcipuis diebus utuntur baculis aureo pomo supernè insignitis. Atque ut de cæteris Regni Neapolitani Ecclesiis sileam, in Rheginensi ejusmodi ritus diligentissime custoditur, quem quum circa medium elapsum sæculum, annum scilicet MDCLXII. Archiepiscopus ejus inclytæ Ecclesiæ abolere conaretur; Cantor qui ab immemorabili prærogativa ferendi baculum potiebatur, ita Romæ jus suum totis viribus propugnavit, ut Sacro-
rum

rum Rituum Congregatio iterum, atque iterum, ne Archiepiscopus audiretur amplius, decreverit.

Siquis autem roget cur Episcopus in latina Ecclesia, quo tempore Euangelium in solemni Missa a Diacono recitatur, juxta Episcoporum Cæremonialis regulam, *baculum inter ambas manus retinet*, quum alias cæteri deponere teneantur? Ratio est, ni fallor, baculorum discrimen; illi enim, quibus alii sustentantur, non sunt nisi humanum fulcimentum, quo variis de causis supra allatis, Christifideles Dei filium in Euangelio loquentem audientes, libenter carere debent: Episcopi vero baculus est insigne ipsius auctoritatis, sollicitudinis, atque correctionis; *ut ejus indicio*, ait Isidorus de Ecclesiasticis officiis lib. II. cap. I. *subditam plebem vel regat, vel corrigat*. Hinc a Patribus VIII. Synodi conclamatum est in Photium: *Tollite baculum de manu ejus; signum est enim dignitatis pastoralis, quod hic habere nullatenus debet, quia lupus est, non pastor*. Si vero quis iterum urgeat, cautum esse sacris Canonibus: *ut nullus Episcopus, Presbyter, aut Diaconus ad solemnia Missarum celebranda præsumat cum baculo introire*. Can. Nullus, de consecratione, distinct. I. Pro solutione dicendum puto, in eo textu non agi de baculo pastoralis, sed de baculo communi, cum quo licet aliquando ob infirmitatem permissum fuerit in choro horas canonicas recitare, ut patet ex Concilio Aquisgranensi sub Ludovico Pio, cap. cxxx. Missæ tamen sacrificium cum ipso peragere, omnino interdictum est; ut recte docet Vir in Sacra Theologia apprime doctus Gabriel de Henao tomo II. de Sacrificio Missæ, disputat. xxvii. sect. III.

Neque officit quod Græci Episcopi, dum a Diacono legitur Euangelium, absque baculo illud audiant; mirum enim videri non debet ejus, vel alterius ritus discrimen inter Ecclesiam Orientalem, & Occidentalem.

Nam, ut recte admonet Fulbertus Carnotensis Episcopus epistola II. ad Finardum: *Plura sunt in Ecclesiasticis officiis, in quibus Orientales Ecclesiae, & nostrae communis observatione sibi respondent. Sunt vero alia, in quibus alias ab aliis cultu dispari, & varia observatione audivimus dissonare. Nec enim nos offendit observantiae diversitas, ubi fidei non scinditur unitas.* Sane cum in Concilio Florentino Graeci Latinorum in fidei Dogmatis sententiae adhæssissent, nil obsuit varietas rituum, quin pristina Orientalis, & Occidentalis Ecclesiae unio redintegretur. Una fides (inquit eruditissimus Sebastianus Pauli dissertatione *De ritu Ecclesiae Neritinae* pag. clxxv.) fuit utriusque gentis, mens una, caput unum in terris Pontifex: licet Graeci in fermentatis, in azymis Latini Sacerdotes consecrarent; jejunia statis quibusdam diebus illi observarent, cum his nullum erat piaculum carnibus vesci, & e converso: sub utraque specie illorum populi, horum sub una tantum communicarent; ac perplura, Graecis permitterentur, quae Latinis prohibebantur. Neque enim aliud sentire in ritibus Ecclesiarum scindit, sed diversa Dogmata ea sunt, ut mox diximus, quae Ecclesiam separant, & commune Ecclesiasticae Societatis vinculum, concordisque fidelium animos dividunt. *Multa* aiebat Firmilianus ad Cyprianum, *pro locorum, & nominum diversitate variantur*; nec tamen propter hoc ab Ecclesiae Catholicae pace, & unitate discessum est.

*De ritu nudandi enses ad lectionem
S. Evangelii.*

CAPUT XX.

VErum non solum baculos, sed enses quoque, uti nunc fieri solet, quum ad Tribunal poenitentiae, vel

vel ad Sacram mensam accedunt , accincti olim ad Euangelii lectionem deponebant ; in signum quod juxta doctrinam Evangelicam parati sunt fideles non armis , sed patientia se defendere , ut inquit Nicolaus Plove, qui claruit anno mccccxxxiv. Contra qui equestris erant Ordinis, quique votum dimicandi pro Euangelii defensione, ac christianæ Religionis nuncupaverant , dum illud cantaretur enssem stringebant : qui mos apud Polonos inolevit , teste Guagnino in Vit. Reg. Polon. sub Miecislao I. illorum Principe, qui expurgato ab Idolis Regno, ad evidencium argumentum Christianitatis , instituit ut inter officium Missæ, dum Euangelium legeretur, singuli virorum medios gladios e vaginis depromerent , quo testarentur se propter Euangelium ad mortem usque certare paratos esse . Hodie hujusmodi ritus , quod sciam , ubique fere locorum obsolevit . Prodit tamen Macrus , magnum Magistrum Equitum Hierosolymitanorum ad Euangelium Missæ Nativitatis Beatæ Mariæ Virginis, Dei Genitricis , gladium , & pugionem tenere denudatos ; additque rem scitu dignam , in quadam nimirum collegiata Ecclesia Castri cujusdam Territorii Forolivienfis, Diaconum die Epiphaniæ canere Euangelium capite galcato , manuque stringente evaginatum enssem , ad indicium meri , & mixti Ecclesiæ Imperii . De Carolo item IV. Imperatore narrat Albertus Argentoratenfis Basileæ in nocte Nativitatis Domini , post susceptum Eucharistiæ Sacramentum , in Missa alta voce legisse Euangelium , *Exiit edictum a Cesare Augusto* , stringentem manu nudatum gladium .

Ut ritus ipse clarius illustretur, placet hic ad verbum describere quæ de Carolo V. Imperatore scripsit Pontificiæ Capellæ Sacrarum cæremoniæ Magister , auctorque coævus , & oculatus testis . Anno Christi mxxxix. die Natali Domini inter Missarum solemniam Carolus V.

Im-

Imperator deposito indumento quotidiano Imperatorio, assumptaque veste de raso cremesino, usque ad talos ferre a suis camerariis porrecta, & per duos Cardinales super pelliceo desuper imposito ense accinctus, pileum armigero ante Cæsarem ferente, quod cum sit insigne ducale, non debebat Imperator portare. Ultimo pluviali albo indutus a parte anteriori aperto, prout a Prælati deferretur, ac Imperatores utuntur, medius inter duos Cardinales Diaconum, & Episcopum, factaque altari, & Papæ (is erat Clemens VII.) reverentia, evaginavit ensē, caremoniarum Magistro adjuvante, terque illum ante Pontificem vibravit, & inde tersum super brachio, in vaginam eodem adjuvante reponit, venitque usque ad legile præparatum. Papa, *Pater noster*, & successive, absolutione cantata, Cæsar factis reverentiis Altari, & Papæ, submissa voce dixit: *Iube Domne benedicere*. Pontifex voce resumpta benedixit. Cæsar legit Evangelium tantum, videlicet: *Exiit editum a Cæsare Augusto*.

De ritu standi quo tempore Evangelium nuntiatur; ac de Pallio, & Mitra Episcopi ad ejusdem lectionem depositis.

C A P U T XXI.

INitio nascentis Ecclesiæ id moris fuit, ut Sacramentum Evangelii lectionem Clerici perinde ac Laici non sedentes, sed stantes audirent, eique summo silentio, ac religioso studio venerationem exhiberent. Testatur id quidem perspicue in primis pervetustus Auctor Apostolicarum constitutionum, lib. II. cap. LXI. his verbis: *Cum Evangelium legitur, omnes Presbyteri, & Diaconi, ac Laici assurgant cum magno silentio: scriptum est enim*:
Tace,

Tace, & audi Israel, & rursum: Tu vero hic sta, & audies. Insequente tempore, quum in nonnullis Ecclesiis Sacerdotes quidam sacrorum rituum, ac cæremoniæ violatores, ex pravo abusu, quem consuetudinem appellabant, ad Euangelii lectionem sedere non erubescerent, Summus Pontifex S. Anastasius I. saluberrimo decreto ad omnes Burgundiæ, & Germaniæ Episcopos eorum audaciam, atque temeritatem ita compescuit: *Apostolica auctoritate mandamus, dum Sacra Evangelia in Ecclesia recitantur, Sacerdotes, & ceteri omnes præsentés, non sedentes, sed venerabiliter curvi in conspectu Sancti Evangelii stantes, Dominica verba intente audiant, & fideliter adorent.* Idem Anastasii constitutum laudant Anastasius Bibliothecarius in ejus vita, Micrologus de Ecclesiasticis observationibus cap. ix. recensetque Gratianus in suo decreto, can. 21. distinct. II. quamvis non me lateat Marianum Scotum in chronico illud tribuisse Syricio Pontifici Maximo, nullo fultum antiquo teste, aut valido momento. Porro de S. Anastasio Papa ita scribit liber Pontificalis. *Hic constituit, ut quotiescumque Evangelia Sancta recitantur, Sacerdotes non sedentes, sed curvi starent.* Huic decreto Cardinalis Baronius ad annum ccccii. putat occasionem dedisse contentionem, quæ his temporibus Romæ Presbyteros inter & Diaconos oborta erat: hi enim ministrantes res Ecclesiæ, supercilio elati Presbyteros spernebant; Presbyteri autem in eosdem insurrexere, atque ex consuetudinis Ecclesiæ Romanæ præscripto, ipsis sedentibus eos stare debere contendebant. Sed eo usque contentio progressa est, ut etiam cum stantes Diaconi coram populo legerent Euangelium, Presbyteri tamen assurgere non dignarentur ad majorem Diaconorum humiliationem: quod ut enorme factum Anastasius Pontifex Maximus emendavit.

Theo-

Theophilus quoque Indus, referente Nicephoro Callisto, libro ix. *Historiæ* capite xviii. quum fuisset ab Imperatore missus in Orientem ad constituendam, & propagandam Religionem, & reperisset alicubi sedere populum, quum Euangelium proponeretur, sapienter correxuit, & ad communem Ecclesiæ pietatem revocavit. Id ipsum de Theophilo narrat Philostorgius lib. III. *Histor. Ecclesiast.* sect. v. Eam reverentiam citatus paullo ante Micrologus memorat non Evangelicæ dumtaxat lectioni fuisse delatam apud Græcos, verum etiam Apostolicæ. Jure proinde, meritoque Sozomenus lib. VII. *Histor.* cap. xix. abusum damnat Ecclesiæ Alexandrinæ, in qua Episcopus præter communem morem non assurgebat, dum Euangelium legeretur: *Novum*, inquit, & illud apud eosdem Alexandrinos est, quod Episcopus, dum recitatur Euangelium, non assurgat: quod apud alios nusquam fieri, equidem neque comperi, neque audiui.

Certe apud Græcos, qui majori, quam cæteri honore prosequerentur Evangelicam lectionem, non solum assurgebat Episcopus, sed etiam Omophorion deponebat; quam cæremoniam in memoriam ovis amissæ, de qua in Evangelio sermo est, a Græcis fieri consuevisse testatur Isidorus Pelusiota lib. I. epist. cxxxvi. sic inquit: *Cum verus Pastor per adorandorum Evangeliorum assertionem accedit, tum demum Episcopus assurgit, atque imitationis habitum (idest pallium) deponit, hinc nimirum Dominum ipsum pastoralis artis ducem, & herum adesse significans.* Hunc antiquissimum ejusdem Orientalis Ecclesiæ ritum describit Simeon Thessalonicensis Episcopus in tractatu De Mystagogia, sive de Misa, his verbis. *Dum Euangelium legitur Episcopus Omophorion deponit, servitutem, ac subjectionem suam, erga Dominum demonstrans. Quoniam cum ille per Euangelium loqui*

loqui cognoscitur, & tanquam coram adest, ipse tunc monumentum incarnationis ejus gestare non audet, sed ab humeris ablatum Diacono tradit, qui illud dextra complicatum retinet, ipsi Episcopo adstans, & sacra dona præcedens.

Est autem Omophorion juxta ejusdem Auctoris sententiam in libro *De Templo*, genus indumenti, quod ex lana confectum in orbem humeros ante, & retro convestit. Hoc genus indumenti sine dubitatione a Verbo carnem ex Virgine propter nos susceptam, humanæque naturæ assumptionem declarat. Ideo enim ex lana quoque textitur, quoniam erraticam ovem, hoc est naturam nostram signat, & quoniam ipse quoque Agnus pro nobis occisus vocatus est. Ipsa item verba, quæ humeris eo tegendis profert, sententiæ huic suffragantur; ait enim: *Sublata in humeros Christe natura, quæ erraverat, assumptus Deo, & Patri illam obtulisti.* Ita Theſſalonicensis. Hoc idipsum jamjam adnotaverat præcitatus Isidorus lib. I. epistola cxxxvi. his verbis, Id amiculum, quod Sacerdos humeris gestat, atque ex lana, non ex lino contextum est, ovis illius, quam Dominus aberrantem quæſivit, inventamque humeris suis sustulit, pellem designat; Episcopus enim, qui Christi typum gerit, ipsius munere fungitur; atque ipso etiam habitu illud omnibus ostendit, se boni illius, ac magni Pastoris imitorem esse, qui gregis infirmitates sibi ferendas proposuit.

Pallii origo in utraque Ecclesia, Orientis, & Occidentis antiquissima est. Rupertus Abbas Tuitiensis *De divinis officiis* lib. I. cap. xxvii. ab Apostolis ipsis illam repetit. Eusebius Cæsariensis a Lino Summo Pontifice; sic enim ait in sermone *De Epiphania*, apud Christophorum Marcellum, sacrarum cæremoniarum lib. I. sectione x. cap. v. *Nihil antiquius veste illa Sacerdotali Præsulis*

nostrum, quæ illi vesti de veteri Testamento successit bysso auroque contextæ, quæ in signum plenissima potestatis primus Linus amictus est, cui & typum dedit, & nomen, ut a veteribus accepimus Scriptoribus, quam appellavit & pallium. Consentit S. Maximus in homilia De veste Sacerdotali apud eundem Marcellum his verbis. In lege gratiæ antiquum etiam est illud Ephod, idest Pallium, quod nostri Patriarchæ arbitrantur a Lina post Petrum II. Romano Pontifice institutum, & in singulare potestatis privilegium nostris Deo plenius Præsulibus datum. Alii Pallii auctorem faciunt S. Marcum Romanum Pontificem, S. Silvestri successorem, qui, teste Anastasio in ejus vita, Episcopo Ostiensi, a quo Summi Pontifices consecrantur, Pallii usum primus concessit.

Quidquid sit de ejus origine. Pallium est fascia lanea candida, tribus circiter digitis lata, & in modum circuli contexta, quæ super humeros imponitur; ex quo circulo alia similis fascia ante pectus, alia deorsum ex opposito pendet, duæ super humeros dimittuntur: quæ fasciæ purpureis Crucibus sunt insignitæ. Ipsum autem Pallium tribus aciculis, sive spinulis aureis alligatur: fit ex lana agnorum candidorum sine macula, qui ut refert Christophorus Marcellus Archiepiscopus Corcyrensis loco citato, die S. Agnetis, in ejusdem Ecclesia via Nomentana singulis annis offerri, & benedici solent, ac Subdiaconis Apostolicis consignari, & in aliquo Monasterio Sanctimonialium nutriri, donec veniat tempus ipsos tendendi. Ex eorundem lana contextuntur Pallia, quæ in Basilicam Vaticanam delata, super corpora Sanctorum Apostolorum Petri, & Pauli ponuntur in vigilia Natalis ipsorum, ibique tota nocte dimittuntur, ac die sequenti deputatis custodienda traduntur.

Pallio semper utitur Romanus Pontifex, cujus est per omnes Ecclesias summum jus, ac plenaria potestas;
reli-

reliqui eo uti non possunt, nisi intra Ecclesiam certis, quibusdam, & designatis diebus, quum Missarum solemnia celebrant; idque ex antiqua consuetudine, quam indicat S. Gregorius Magnus, Pontifex Maximus, Joanni Episcopo Ravennatenſi sic scribens lib. II. epist. l. iv. *Illud frater charissime tibi non putavimus ignotum, quod pene de nullo Metropolitano, in quibuslibet Mundi partibus sit auditum, extra Missarum tempus, usum tibi Pallii vendicasse.* Neque, (ut scite admonet Cardinalis Joannes Bona lib. I. *Rerum liturgicarum* cap. xxiv.) omnibus Archiepiscopis Pallii honor tribuebatur, sed iis solummodo, qui inter ipsos præcipui erant. Nam in Gallia soli Arelatenſi mittebatur; de qua re extant epistolæ Vigiliî ad Auxanium, Pelagii I. ad Sapaudum, & Gregorii Magni ad Childebertum Regem Francorum. In Hispania soli Hispalenſi. In Dalmatia Salonitano. In Italia Ravennati. In Sicilia Syracusano. In Sardinia Calaritano, ut ex epistolis S. Gregorii liquet: sive hoc fieret intuitu Ecclesiarum, seu Civitatum præ cæteris eminentium; sive ob Vicariatum Apostolicæ Sedis illis Archiepiscopis tributum; quo titulo constat Pallio item a Summis Pontificibus insignitos fuisse Archiepiscopos Corinthi, Theſſalonicæ, & primæ Justinianæ. Nonnullos quoque Episcopos interdum hoc honore decorarunt Summi Pontifices, vel intuitu meritorum, vel alia justa de causa; quia nimirum ejus concessio omnino pendet ab ipsorum auctoritate; a quibus etiam constituta fuit forma juramenti, quod Archiepiscopi antequam illud accipiant, præstare tenentur.

Pallium Græci Omophorion, & Epomadon vocant, ut Theodorus Balsamon docet in *responsis ad quæst. Marci Alexandrini*. Differentia tamen ingens est, ait Eminentissimus Bona inter Pallium Latinorum, & Græcorum Omophorion, sive humerale, ut Latini Interpre-

tes vertunt; nam Latinum jam supra descripsimus. Græcorum vero est longa fascia, ejusdem cum Latino, aut paullo majoris latitudinis, collum primitus involvens, tum a collo per medium pectus infra genua descendens, Crucibus itidem intexta. Olim usque ad pedes protendebatur; nam Zonarus *in vita Constantini Copronymi*, ait Anastasium insistentem vestigiis Germani Patriarchæ, Omophorion ejus calcasse, ut sic eum moneret, ne properaret. Aliud etiam discrimen inter utrumque reperitur, quod Latinum solis Archiepiscopis tribuitur; Græcum omnibus Episcopis commune est, qui illud deponunt, quum Euangelium legendum est; & reassumunt paullo ante communionem, ut docet Simeon Thessalonicensis libro *De Templo, & Missa*. Porro abusus Pallii inter Græcos dupliciter notatur. Primo quod solent ex serico illud contexere, cum ex lana fieri deberet, ut græcusmet Auctor Simeon Thessalonicensis fatetur, dum ait: *Ideo enim ex lana quoque textitur, quoniam erraticam ovem, hoc est naturam nostram signat*. Secundo, quod omnes, ut dixi, Episcopi illud deferant: qui mos antiquæ eorum Ecclesiæ omnino adversatur; Illorum enim Patriarcha, quotiescumque cessabat schisma, tunc semper Pallium a Romano Pontifice poscebat. Quocirca Luitprandus *in sua legatione* inquit: *Vidimus Constantinopolitanum Episcopum pallio non uti, nisi Sancti Patris nostri permissu*. Subdit Auctor abusum cœpisse, quo tempore Theophilactus Eunuchus, & Constantinopolitanus Patriarcha violenter a Pontifice Romano pro se, & successoribus ferendi Pallium, sine Sedis Apostolica licentia, indultum extorsere. Ex quo, ait, *turpi commercio vituperandus mos inolevit, ut non solum Patriarchæ, sed etiam Episcopi totius Græciæ Palliis utantur*. Indultum fuit Joannis XI. quem ut narrat Baronius ad annum MCCCXXXIV. pro hac concessione Albericus

cus Romæ Tyrannus violenter coegit, dum in carcere illum inclusum arctaverat. Atque hæc obiter de Pallio dicta sufficiant, de quo plura ac erudita scribunt inter alios doctissimus Emmanuel Gonzalez, & Franciscus Florens ad titulum Decretalium, *De usu, & auctoritate Pallii*.

Illud quoque Cæremoniali Episcoporum libro præscriptum est, ut, quum Diaconus dicit, *Initium*, vel *Sequentia Sancti Evangelii*, in magnæ reverentiæ indicium, Mitram deponant. Non enim decet, ut fuscus infra probabimus, operto capite Dei Filium in Evangelio loquentem audire. Interim, quod spectat ad Mitræ usum, duæ sunt Eruditorum sententiæ. Quidam existimant recentem adinventionem esse, quæ circa annum Christi millesimum incœperit. Alii e diverso usum Mitræ putant ab Apostolis fluxisse, idque variis rationibus, & testimoniis suadent, agentes contrariam sententiam levibus dumtaxat niti argutiis, atque omni solido fundamento destitui. Propugnat acriter hanc Mitræ antiquitatem vir doctissimus Andreas Saussayus lib. I. *Panopliæ Episcopalis*. Joannes Cardinalis Bona libro I. *Rerum liturgicarum* cap. xxiv. putat utramque conciliari sententiam, si dixerimus Mitram quidem, qualis est hodie nuperum ornatum esse, qui ante millesimum Christi annum vix fuerit in Ecclesia, negari tamen non posse, quin a temporibus Apostolorum, aliquod fuerit capitis ornamentum, quo peculiariter, si non omnes, aliqui saltem Episcopi usi sint; at cujusnam formæ fuerit antiquum capitis operimentum ab Episcopis usu habitum, ante decimum sæculum, ignotum nobis asserit eruditissimus Bocquillot *in sua historica liturgia*, lib. I. cap. vii. Sed ut verum fatear, usum Mitræ non solum in Orientali, verum, & in Occidentali Ecclesia, longe ante annum millesimum obtinuisse certissimum est;

tum

tum ex antiqua effigie S. Petri ante annos mille erecta, ad portam Ecclesiæ Corbejensis Monasterii; tum ex tabellis, & imaginibus Summorum Pontificum, quas ex antiquis Romanæ Urbis monumentis, æri incisas repræsentant Bollandiani in propileo mensis Maji, ubi post S. Silvestrum, maxima illorum pars cum Mitra oblonga, & rotunda, ut in lapidea S. Petri Corbejensis effigie, cernitur, tum denique ex Theodulphi Aurelianensis Episcopi carmine, qui floruit anno, (ut docet Belarminus de Scriptoribus Ecclesiasticis) dcccxxxv. Sic enim ille de Pontificis ornamentis canit lib. v. carmine III.

Illius ergo caput resplendens Mitra tegebat.

An etiam fœminis standum, quando Euangelium pronuntiatur? Ac de iis qui genuflexi, vel sedentes ipsum auscultant.

C A P U T XXII.

QUærendum modo est an etiam fœminæ ad sacram Euangelii lectionem assurgere deberent? Profecto si veterem disciplinam spectemus, maribus juxta ac fœminis hanc assurgendi consuetudinem fuisse præsertim in Italia, non obscure suadet exemplum comitis Mathildis, quæ ut legitur in vita S. Anselmi Lucensis Episcopi, vehementi observandi ritus ardore, virium gracilitate post morbum laborans, solemnibus Missarum assistens, enixa dum legebatur Euangelium recta sistere, deliquium perpeffa, procubuit. Quæ consuetudo audiendi Euangelium stando a fœminis servata, mirifice etiam a cœlesti oraculo comprobata est, ex vita ms. S. Willelmi Abbatis Monasterii Eskilensis in-

Da-

Dania, jam ante annos fere sexcentos ab Eskilenſi Monacho compoſita, ubi de quadam muliere narratur, quod auſcultans contracta Euangelii lectionem, audierit vocem ſic increpantem: *Mulier ſurge, non decet Chriſtianos ad Euangelium ſedere, ſed cum reverentia ſtare, & auſcultare quod legitur.* Cæterum debere fœminas, quo tempore Euangelium in miſſa recitatur aſſurgere, vel ſaltem non ſedere, ſapienter expreſſit; providaque ſanctione conſtituit magnus ille Eccleſiaſtica diſciplinæ colapſæ reſtitutor S. Carolus Borromeus, qui in Inſubria toti præluxit Orbi. Sic enim ait in Concilio Mediolanenſi IV. *Miſſa ita fideles interſint, ut in omni ejus parte genibus flexis ſint, niſi cum Euangelium pronuntiatur; quo tempore ſtent omnes; ac ne mulieribus etiam tum ſedere liceat.*

Neque, ut ingenue fatear, illorum arridet ritus a Doctore Seraphico S. Bonaventura, aliisque merito improbatus, qui nimiam probitatem præſeferentes, genuflexi Euangelii lectionem auſcultant; & quod æque videtur reprehendendum, pios interea libellos legunt, vel Beatæ Dei Genitricis Roſarium recitant. *Male faciunt* (inquit S. Doctor in expoſitione Miſſæ cap. II.) *qui eo tempore genua ſteſſunt, vel in oratione procumbunt.* Porro non ſine myſterio Majores noſtri, ut recti ſiſteremus conſtituere, ut ſcilicet tanquam ſervi ante Dominum promptos nos, & paratos oſtendamus ad exequenda mandata Dei, quæ in Euangelio promulgantur: *Dum ſancta* (inquit S. Joannes Chryſoſtomus, in illud Attendite ne eleemoſynam veſtram &c. tom. VI. edit. Antwerp.) *leguntur Euangelia, non temere, neque perſuſorie auſcultamus, ſed ſtantes; & attenti magno cum timore mandata excipientes, non animo concidentēs, non corporibus ſedentes, non proximi narrationibus operam dantes ea prætermittere audemus, non dives, non pauper;*
non

non serous, non liber; non viri, non feminae; non principes, non subditi; quin etiam ille ipse, qui regio diademate redimitus est, cum primum leguntur Evangelia, stat summo cum timore, summoque studio, ac ne diademate quidem redimitum esse caput suum permittit, sed Deum in Evangeliiis loquentem inflexa cervice veneratur. Ita S. Chrysostomus. Quare non mirum si Eusebius Monachus cum semel, ut Theodoretus refert *In historia SS. PP.* cap. IV. ab auditione lectionis Evangelicæ, aspectu quorundam agricolarum, qui in subiecto campo terram excolebant, distraheretur; ita seipsum punivit, ut per quadraginta annos, & eo amplius quibus postea vixit, nec agrum aspiceret, nec in cœlum, & astra oculos attolleret, sed semper injecto ad collum ferreo circulo cernuus incederet. Mirum certe videri debet hodie tot Christianos inveniri, qui dum Evangelium in Ecclesiâ legitur, dum Christus scilicet nobiscum loquitur, ipsi oculos suos in puellas conjiciunt, illas nutu, & signis affantur; eodemque insidentes scamno, verbis etiam, amatoriiis, tanta est nostrorum temporum iniquitas, culpam onerant.

Quoniam vero res magni momenti est de quâ agimus, nec segnes studium adhibemus, ut qua decet veneratione, & cura saluberrima Jesu Christi præcepta, ac monita in Evangelio audiamus, quum multæ, eademque gravissimæ rationes sint; quamobrem a stantibus lectionem Evangelicam Sancti Patres, atque Doctores Ecclesiæ audiendam suadent: placet hic eas summatim recensere, quo magis magisque enarrati ritus sanctitas pateat, & propagetur. Stamus itaque dum legitur Evangelium. I. Quia Deum in illo loquentem audimus, servi nimirum Dominum, creatura Creatorem. II. Ut Discipuli audientes, docente atque præsentem Magistro, cujus typum Evangelium exhibet. III. Ad Christianæ

do-

doctrinæ venerationem patefaciendam, & reverentiam. Tanto enim nobilior, atque præstantior est doctrina, quanto Magister est excellentior. Nihil autem Dei Filio nobilius, nihil tanto Doctore præstantius. IV. Ad ostendendum, quod re ipsa prompti, & expediti sumus ad illius obsequium, sequelam, & observantiam. V. Ut eo indicio palam faciamus nos animos habere erectos ad divina, atque cælestia documenta, quæ nobis per Evangelium promulgantur. VI. Quod parati sumus pro evangelica doctrina defendenda tuendaque, usque ad sanguinis effusionem certare. VII. Postremo ad denotandum, quod viribus totis contendimus ad ea, quæ per Evangelium promittuntur, bona æterna, atque perpetua.

Quamvis autem turpe sit ad Evangelii lectionem non assurgere; longe turpius est sedere dum illa salutifera verba proferuntur ex Evangelio S. Joannis: *Et Verbum Caro factum est*; vetus enim est atque laudabilis in Ecclesia caremonia, miraculis etiam comprobata, ut tunc Christiani homines omnes genuflecterent. Ferunt Ecclesiastici Scriptores quendam Monachum, in choro genuflectere negligentem, dum *Verbum Caro factum est* in Missa legeretur, a dæmone post alapæ percussione, sic fuisse increpatum: *Flecte miser, & insensate genua; quia si sicut dicitur: Verbum caro factum est; diceretur, Verbum Dæmon factum est, nos a genuflexione numquam cessaremus*. Eo siquidem capite sublimium, atque innarrabilem mysteriorum feracissimo, veluti per anacephalæosim, immensa Dei omnipotentis charitas in humanum genus manifestatur, qui ut illud e diaboli laqueis, & æterna morte eriperet; divinæque gratiæ, qua per peccatum exciderat, restitueret, & Cælo donaret, Filium suum Unigenitum, Hominem fieri tribuit; mortemque ipse amarissimam subire ultro libensque voluit in ara Crucis pro nobis Sacerdos factus, & sacrificium.

*De standi ritu ad tria Evangelii Cantica,
ac toto divini officii tempore juxta
veterem Ecclesia morem.*

CAPUT XXIII.

Hoc etiam ad Evangelii honorem referendum videtur, quod omnes in choro detecto capite stare solent, dum tria illa ex Evangelio Cantica recitantur: *Benedictus* ad Laudes. *Magnificat* ad Vesperas. Et ad Completorium, *Nunc dimittis*. Verum si primam Ecclesiæ ætatem studiosè intueamur, non solum Clerici, sed ipsi quoque Laici toto divinorum officiorum tempore stabant, pie feliciterque Christo Domino obsequentes, qui in Evangelio dicit Marci II. *Cum stabitis ad orandum.* &c. Unde æque erat Tertulliani querimonia adversus quosdam delicatulos sui temporis, quos in libro *De oratione*, cap. XII. ita insectabatur: *Siquidem irreverens est assidere sub conspectu, contraque conspectum ejus, quem maxime reverearis, quanto magis sub conspectu Dei vivi, Angelo adhuc orationis adstante, factum istud irreligiosissimum est?* Alludit nimirum ad locum Lucæ cap. I. qui loquens de Zacharia Patre S. Joannis Baptistæ sic ait: *Apparuit illi Angelus stans a dextris Altaris incensi.* Ad quem locum S. Ambrosius: *Non dubites, inquit, assistere Angelum, quando Christus assistit, quando Christus immolatur.* Eodem argumenti genere utitur S. Petrus Damiani scribens Archiepiscopo Bisuntino, & reprehendens Clericos sedentes tempore divini officii: *Quæ presumptionis audacia (verba sunt Cardinalis Sanctissimi) sedere præsumimus? Dicit Daniel: Millia millium ministrabant ei, & decies millies centena millia assistebant ei. Ecce dum innumerabilium Angelorum alii Deo ministra-*
re,

re, alii dicuntur affligere, nullus eorum hic reperitur in subseilio residere: Cui ergo virtutes Angelicæ tremantes assistunt, terreni, & corruptibiles homines adflare despicunt? Paulo post addit ex Apocalypsi cap. vii., Omnes Angeli stabant in circuitu Throni; & Seraphim stabant, quos vidit Isaias, Sanctus, Sanctus, Sanctus alternis ingeminantes. Ecce ubi Seraphim sedere non audent, sedet homo luteus, & tanquam pannus menstruatus luridus, & immundus? Ubi virtutes Cælorum sibi sedilia non usurpant, illic homo tanquam communi, ac domestico perfruitur otio, qui se pulverem esse, & cinerem non ignorat?

Silere hic loci opportunitas minime patitur rationem aliam Tertulliani, qua persuadere nititur non nisi stando orandum esse ab homine Christiano: *Ne scilicet* inquit, in libro *De oratione*, cap. xii. *sedendo exprobre-*mus Deo, quod nos oratio fatigaverit. Quamobrem de Palæstina, Syriæque Monachis scribit Nicephorus ad standum a Deo robur accepisse. Horum, inquit, opus est frequentes genuum inclinationes, & graves rursus stationes, desiderio solo corpora eorum sustinente, & voluntariam imbecillitatem recreante. Cum enim egregium virtutis opus peragendum, & preces ad Deum fundendæ sunt, tum robur novum, & corpus mirifice vividum cernas, etiamsi senio id jam confectum, & exoletum admodum sit. Morem sui temporis non sine speciosa ratione, quam nos tamen paullo ante non omnino reticimus, describit Amalarius Fortunatus lib. iv. *De officiis* cap. III. *Quando cantamus Psalmos, solemus stare, ut ex statu corporis demonstremus effectum nostræ mentis, hoc est paratos nos esse ad opera bona.* Non itaque mirum, si Aquisgranensis Concilii Patres Can. cxxx. vix debilibus baculos concesserunt, ut illis inter psallendum inniterentur, cæteris vero omnino denegarunt: *Nec cum baculis,*

inquiunt, *in choro, exceptis debilibus, sed religiosissima illis standum, & psallendum est. Sunt etenim quidam Clericorum, qui in secularibus negotiis, & disceptationibus pene totum infatigabiliter deducunt diem, & mox ut Ecclesiam ad divinum officium peragendum intraverint, ita fatigati videntur, ut nec orationi vacare, nec ad psallendum stare queant. Multo minus mirari debemus, si S. Petrus Damiani adversus sedentes tempore divini officii Clericos, & Laicos zelum, & stilum tantopere exaceruerit, ut præcipuum adversus hujusmodi abusum opusculum scripserit, quod Bisuntino Archiepiscopo, cujus in Ecclesia illum deprehenderat, nuncupavit; præfixitque titulum: *Contra sedentes tempore divini officii.**

In hac opella postquam ordinem, & disciplinam ejusdem Ecclesiæ commendavit; ipsumque præterea Archiepiscopum, quod adhuc in vivis agens sepulcrum, sibi parare curasset, sic tandem de re nostra cum illo loquitur: *Unum præterea torporis, ac desidii signum in Ecclesia tua vidi, quod, & tunc prout expeditionis dictabat hora, corripui, & nunc apicibus tradere non superfluum duco. Plerique siquidem ibi Clericorum resident; dum vel canonica horarum celebrantur officia, vel etiam ipsa Missarum offeruntur terribilia Sacramenta. Cujus corporis ignaviam per Galliarum partes nonnullis inesse, etiam Monachis deprehendi: quod profecto prave consuetudinis vitium, & correctione dignum, & de studio militantis Ecclesiæ in his, qui incolumes sunt constat penitus eradendum. Postquam autem variis Sacrarum Scripturarum testimoniis, & nervosis rationibus comprobavit Clericos divinis laudibus celebrandis occupatos stare debere; sic adversus Laicos homines scribit: *Nunc autem sufficit mihi Sanctitati vestræ suggerere, ut hoc ignobilis negligentiae vitium in tua prorsus Ecclesia corrigat, deinde per cæterarum palmites, tanquam falcem salutiferam**

correctionis extendat : distribte quippe prohibendum est non modo Clericis , sed & Laicis utriusque sexus , ut nisi , sicut mos est , inter nocturni lectiones officii , alias dum divinis hymnis insistitur , nemo sedeat , nisi corporis eum valetudo compellat . Plerosque nempe vidimus , non modo sacri , sed & secularis Ordinis viros , qui sic inter qualibet Ecclesiastica synaxis officia status sui viribus sunt contenti , ut nec podio , nec adjacenti prorsus ulli materiae dignentur inniti . Qui nimirum quo laboriosius in conspectu supernae majestatis se conspicientis assistunt ; & suaviorem dulcedinem intimae quietis acquirunt ; quantoque difficilius sui corporis gravedinem tolerant , tanto copiosius eos ad Deum meritum levat . Ac tandem post multa sic concludit : Tu autem dilectissime , qui in Occidentis partibus inter Sacerdotes insignis es , ac celebris fama , ubique in quantum potes , & hoc ignominiosae sessionis opprobrium destruas , & cetera quae villicatui Sacerdotalis officii competunt , non segniter implere contende .

Ex tota hac satis prolixa Sancti Petri Damiani oratione duo colligo . Primum in Italia Clericos omnes , & Laicos divinis officiis stantes interfuisse ; alioquin sedendi consuetudinem tanquam Gallis propriam non redarguisset . Alterum apud nonnullos etiam Monachos pravam sedendi consuetudinem irrepsisse , quam vir Sanctissimus emendatam optabat . Erat enim Damianus ipse Sacrorum Rituum suo saeculo siquis alius peritissimus ; legatione pro Apostolica Sede functus in Galliis , & alibi ; itemque Monachus Benedictinae addictus Regulae ex Ordine S. Crucis Fontis Avellanae : qui cum aliquot in Italia saeculis viguisset , demum ob collapsam monasticam disciplinam , a S. Pio V. Pontifice Maximo deletus est . Non hic tamen mens ea mihi est , ut velim item hanc sanctissimam in Ecclesia disciplinam revocare , quae Clerici perinde ac Laici , non ad Evangelii dumtaxat le-

ctio-

tionem, verum etiam toto divinorum officiorum tempore recti consistant; sed ut viventium ignaviam, improbamque licentiam pio majorum fervore, ac Religione refellam. Quamquam ita omnino & nunc, quemadmodum illi olim exequabantur, ab ætatis nostræ Christi fidelibus fieri debere quampluribus antiquorum Scriptorum testimoniis, gravibusque rationum momentis ostendit vir Ecclesiasticarum rerum peritissimus Antonius Caracciolus Clericus Regularis *In synopsi veterum Religiosorum rituum, sive Notis ad Constitutiones Clericorum Regularium*. Quandoquidem vero tantum obtinere non licet; id ego saltim exopto, ut quemadmodum Clerici Regulares, ac alii complures Religiosi Ordinis Viri totis divinis officiis, stantes assistant, cæteri saltē id agerent, quo tempore, divinissimæ Eucharistiæ Sacramento publicæ venerationi exposito, sacros in choro recitant Psalmos.

*De ritu aperiendi caput ad lectionem
Evangelii.*

CAPUT XXIV.

Secundum inveteratam, atque hætenus religiose servatam Ecclesiæ disciplinam, si paucos Sacrorum Rituum violatores excipias, apud omnes semper persuasum fuit decere quammaxime ut sacrosanctum Jesu Christi Evangelium nonnisi aperto capite audiretur. Hunc ritum nos in præsentia cogimur paullo fusius pertractare, non quod res adeo manifesta, & nota omnibus longiori orationis ambitu indigeat, sed quia sacri quidam homines perfricta fronte ita agendum esse denegarunt; neque contenti sanctissimam ipsi cæremoniam floccipendere; alios

alios etiam, quis crederet, ad contemnendum præcepto etiam imposito compulerunt. Liceat mihi S. Hieronymi uti verbis, & expostulari: *Ubi mare illud eloquentiæ Tullianæ, ubi torrens fluvius Demosthenis? Nunc profecto muti essetis ambo, & vestra lingua torpesceret. Inventa est res quam nulla eloquentia explicare queat; repperitum est facinus, quod nec mimus fingere, nec scurra ludere, nec Atellanus possit effari.* At quam male illi turpi facto de Religione merentur, turpique errore errant, illustribus Sanctorum Patrum testimoniis fiet clarius; qui tantam adeoque excellentissimam de Euangelio opinionem habuerunt, ut illud Jesu Christi Corpori exequare non dubitaverint. Adeo ut vel inde conjicere quis possit, quam decens, justum, ac necessarium sit, dum divinißimam Jesu Christi doctrinam ex Euangelio audimus, quæcumque capitis operimenta removere, ad debitæ reverentiæ, ac venerationis indicium.

Mirabile S. Ignatii Episcopi Antiocheni, ac invictissimi Christi Martyris videtur oraculum, Epistola ad Philadelphios: *Ad Euangelium tamquam ad Corpus Jesu Christi confugio.* Non minoris est ponderis Etheri, & Beati sententia sic agentium lib. vii. De Incarnatione: *Corpus Christi quod manducatur, non solum panis, & vinum, qui super Altare offertur, sed etiam ipsum Euangelium Corpus Christi est; & cum Euangelium legimus, & intelligimus, filii in circuitu mensæ in una conlatione sedemus, & panem cælestem manducamus.* Origenes vero, & Augustinus toti sunt in asserendo non minorem præstari debere ab auditoribus Euangelio reverentiam, quam præstari soleat augustissimæ Eucharistiæ Sacramento: *Nostis, inquit Origenes, homilia xlii. in Exodum, qui divinis mysteriis interesse consuevistis, quomodo cum suscipitis Corpus Domini, cum omni cautela, & veneratione servatis, ne ex eo parum quid decidat, ne consecrati maneris*

neris aliquid dilabatur; reos enim vos esse creditis, si quid inde per negligentiam decadat: quod si circa corpus ejus conservandum tantâ utimini cautela; & merito utimini, quomodo putatis minoris esse piaculi, Verbum Dei neglexisse, quam Corpus ejus? Ita Origenes, cujus vestigiis fortasse insitens S. Augustinus, scriptum reliquit Homilia xxvi. lib. 1. Homiliarum: Rogo vos fratres, vel sorores dicite mihi; quid vobis plus esse videtur, Verbum Dei, an Corpus Christi? Si verum vultis respondere, hoc utique dicere debetis, quod non sit minus Verbum Dei, quam Corpus Christi. Et post pauca. Non minus reus erit qui Verbum Dei negligenter audierit, quam ille qui Corpus Christi in terram cadere negligentia sua permiserit. Adde totius Ecclesiæ consensum, quæ sacro Evangelii codici æquè ac divinissimæ Eucharistiæ thus, & lumina a primis usque temporibus adhibere consuevit. Cum itaque par Evangelio, ac Eucharistiæ reverentia statuatur, non inepte inferimus pari quoque Evangelium, ac Eucharistiam capitis detectione honorari debere.

Id ipsum gravissimo etiam testimonio S. Augustini comprobatur docentis Christum in Evangelio adesse, ac nobiscum in Evangelio fermocinari; sic enim ait Homilia xxxiv. ex 1. *Semper ante te habes quem sequaris, Dominus exemplum in terra posuit, cum Evangelium tibi reliquit: in Evangelio tecum est; non enim mentitus est dicens: Ecce Ego vobiscum sum omnibus diebus usque ad consummationem sæculi.* Et tractatu xxx. in Joann. cap. I. *Nos itaque sic audiamus Evangelium, quasi præsentem Dominum.* Neque minorem rei nostræ lucem affert alius ejusdem locus, sermone de temp. ccv. quo docet: *Os Christi Evangelium est: In cælo sedet, sed in terra loqui non cessat.* Omitto cæteros Patres eadem asserentes, & in hunc modum dissero: Si coram Rege, & Romano Pontifice, ac ipsis etiam Cardinalibus caput adeo nudandum est,

est, ut ne pileolus quidem, quo tegatur superfit, præcipue quando ipsi nobiscum loquuntur; quanto magis coram Rege Regum, Domino dominantium, ac Principe Pastorum Jesu Christo, cujus vox est Euangelium, & qui adesse in Euangelio censetur; quemadmodum Majores nostri perpetuo testati sunt, qui velut Christum præsentem, Euangelium secum gestabant; in supplicationibus deferabant; in Throno decentissime exornato locabant; summisque honoribus prosequabantur, ut suis locis videbimus. Unum ego hic addiderim, ipsummet Christum Dominum tanti fecisse Euangelium, ut piam, atque religiosam ejus auditionem, possessioni etiam corporis sui præposuerit: Quum enim, ut refert S. Lucas cap. XI. extollens vocem quædam mulier de turba illi dixisset: *Beatus venter, qui te portavit, & ubera quæ suxisti*; Ille, ipso Evangelista testante, statim respondit: *Quinimo beati qui audiunt Verbum Dei, & custodiunt illud.*

Sed videamus quæso quid in rem, de qua agimus sit judicium Romani Pontificis. Flagitavere olim ab Apostolica Sede sub Innocentio Papa IV. Cantuarienses Monachi, ut cum ex præscripta formula divino officio, nudo capite interesse tenerentur, unde plures gravissimis morbis erant impliciti, ipsorum valetudini imposterum confuleretur. Annuit quidem Innocentius, ea tamen constituta lege, ut ad Evangelii lectionem, & quum Jesu Christi Corpus attollitur in divinæ Missæ sacrificio, ritus aperiendi caput omnino servaretur. Extat diploma apud Odericum Raynaldum ad annum MCCXLIII. in quo sic legimus: *Vestris supplicationibus inclinati, vobis utendi pileis vestro Ordini congruentibus, cum divinis intersueritis officiis, concedimus liberam facultatem; ita tamen quod in lectione Evangelica, & elevatione Corporis Domini nostri Jesu Christi, & in aliis debita reverentia*

rentia observetur . Anagni xii. Kal. Septembris anno primo . Quid clarius dici possit plane non video .

Ad majorem nihilominus ejusdem ritus comprobationem , insignes etiam Theologiæ Doctores , Sacrorum Canonum Interpretes , præterea veteres , recentestque rerum liturgicarum Scriptores in medium afferam ; qui una atque constanti inter se congruenti sententia , aperiendum omnino caput ad Evangelii lectionem significant . Agmen ducat Seraphicus Ecclesiæ Doctor , & Cardinalis S. Bonaventura opusculo de expositione Missæ sic iniquens : *Debent etiam verba S. Evangelii stando , & denudato capite ab omnibus , & sine baculo , vel reclinatorio cum reverentia , & tremore audiri* . S. Bonaventuræ adjungimus doctissimum Præceptorem ejus Alexandrum de Hales , Minorum Ordinis fydus alterum , ac nobile ornamentum *In summa Theologiæ par. iv. quæst. x. de Missa §. viii. Nudato capite , & corpore erecto audiendum est Evangelium* . Joannes Cardinalis de Turrecremata ex Ordine Prædicatorum , illustris Theologus , & juris sacri consultissimus in can. *Apostolica* , de consecr. dist. I. expendens circumstantias reverentiæ debitæ lectioni Sancti Evangelii , contentas in decreto S. Anastasii Papæ , cujus nos alibi meminimus , scribit : *Secunda est quod cum reverentia fiet , quod notatur , cum dicitur , venerabiliter , scilicet capite non velato* . Silvester Prior ejusdem Ordinis Theologus , sacrorum Canonum peritus , & Sacri Apostolici Pal. Magister in summa verbo Evangelium : *Evangelium* , inquit , *non sedendo , vel genuflexo audiendum est , sed stando , & venerabiliter adorando , scilicet capite discooperto* . Consentit Bartholomæus Fumus ejusdem familiæ Theologus , in summa , verbo Evangelium : *Evangelium audiendum est in Missa non sedendo , vel genuflexo , sed stando capite discooperto quoad viros tantum* . Nec aliter docet Baufridus Bouffardus Cenomanus , Doctor ,

ctor, Theologus, Cancellarius Parisiensis, *De sacrificio Missæ* cap.III. quum scribit: *Secundum Anastasium stantes curvi manere debemus, ut humilitatem, quæ in Evangelio docetur, & reverentiam nos ad lecturam habere etiam corpore demonstremus; ob quam etiam caussam capite nudato Evangelium audimus.*

Missos facio alios plures doctrina, atque eruditione præstantes, ne propositæ brevitatis limites supervacaneo labore, atque conatu præteriisse videar. Utrosque rerum liturgicarum Scriptores proferam, quorum suffragia ritum ipsum longe vetustissimum eximie illustrant, & comprobant. Ordo Romanus apud Hitorpium, describens morem audiendi Evangelium sic ait: *Dum canitur Evangelium, neque corona, neque operimentum super capita habeatur.* Expositio Missæ ex vetusto codice apud eundem: *Capita insuper nostra, dum Evangelium audimus, ab omni velamine detegimus.* Gulielmus Durandus Episcopus Mimatensis, in Rationali divinorum officiorum, lib.IV. cap.xxiv. *Auditor Evangelium nudo capite.* Hugo de S.Victore in speculo de mysteriis Ecclesiæ, cap. vii. *Nunc considera quod plebs hic (in lectione Evangelii) baculos deponit, reclinatoria relinquit, caput detegit.* Gemma animæ de antiquo ritu Missarum, Auctore Honorio Augustodunensi: *Dum Evangelium legitur tunc etiam velamina capitis auferuntur.* Hilbertus Cenomanensis, Archiepiscopus Turonensis in laudato carmine de mysteriis Missæ.

Inde sinistrorsum Domini sacra verba leguntur.

Plebs baculos ponit, stat, retegique caput.

Joannes Beletus Doctor Academiæ Parisiensis, in explicatione divinorum officiorum, cap.xxxix. necessarium, esse docet aperire caput dum legitur, auditurque Evangelium. *Necessarium etiam plane est, ut dum legitur Evangelium, velamina capitis deponantur.* Et paullo post.

Viri itaque aperto capite Euangelium audire debent; mulieres vero debent audire Euangelium tecto, ac velato capite, etiamsi sit Virgo, propter pomum vetitum; & si eveniat ut virgo capite sit aperto, & velamen non habeat, necesse est ut mater, aut quævis alia mulier capiti ejus pannum, vel simile quippiam imponat. Joannes Baptista Rubeus lib.II. de officiis cap.xxxvii. *Auditur Euangelium capite discooperto.* Bartholomæus Gavantus in thesauro sacrorum rituum par.I. tit. xxii. *Ad Euangelium capita nudabantur in Ordine Romano. Quod & hodie observatur.* Stephanus Durantus vir consummata eruditionis, in opere doctissimo de ritibus Ecclesiæ lib.II. cap. xxiii. *Nunc (dum legitur Euangelium) omnes viri nudo, & aperto capite stantes esse debent.* Quibus verbis satis perspicue docet non esse ritum, de quo agimus perfunctorium, sed Euangelio, non uno quidem nomine, omnino debitum.

Præterea Franciscus de Nigro Ordinis Minimorum Theologus in additione ad Ordinem celebrandi Missam Petri Ruiz par.III. §.v. fol. cxv. *Ad Euangelii,* inquit, *lecturam assurgunt fideles, ut indicent se attentos esse, & nudatis capitibus cum reverentia suscipere, atque ad executionem illorum, quæ audierunt promptos esse.* Cæremoniale divini officii secundum Ordinem Carmelitarum, Patris Sebastiani Fantoni Generalis Præsidis jussu editum, lib. I. rubr. xxv. decernit, *Fratres discooperto capite stare debere ad omnia Euangelia tam in Missa, quam extra, & tam in choro, vel Ecclesia, quam extra.* Cæremoniale Sacri Ordinis Prædicatorum, Auctore Fratре Ignatio Ciantes lib. I. cap. ix. *Discooperiant etiam caput, illud inclinando, dum inchoatur in Missa, Gloria in Excelsis Deo, & quoties legitur Euangelium in ea, vel in choro.* Claudat demum Agmen tot tantorumque illustrum Scriptorum Alphonsus Tostatus Episcopus Abulensis,

lenſis , de quo illud merito fertur elogium : *Hic ſtupor eſt Mundi qui ſcibile diſcutit omne*. Is poſtquam præſatione in Euangelia cap. xxxi i. nervoſis rationibus rem comprobaffet , vix tandem ſibi temperare potuit , quin ſcriptum relinqueret , *inhoneſtum eſſe , & irreligioſum* cooperto capite Euangelium audire .

Atque ut res omni probationum genere teſtata redatur ; quæ hæcenus ex Sanctis Patribus , Summis Pontificibus , Theologis , ſacri juris Conſultis , & rerum liturgicarum Scriptoribus comprobata eſt , conſentaneum videtur aliquibus etiam illuſtrari exemplis . Enimvero conſueviſſe olim Imperatores ſubmoto Imperiali diademate ſtare ad Euangelii lectionem , perſpicuis verbis teſtatur S. Joannes Chryſoſtomus , in illud Attendite ne eleemoſynam veſtram &c. : *Etiam ille ipſe qui regia diademate redimitus eſt , cum primum leguntur Euangelia ſtat ſummo cum timore , ac ne diademate quidem redimitum eſſe caput ſuum permittit , ſed Deum in Euangeliiſ loquentem inſſexa cervice veneratur* . Alterum exemplum quo recentius , eo item validius , ac venerabilius eſt : ſpectat enim Jeſu Chriſti in terris Vicarium Benedictum XIII. Pontificem Maximum , qui inter alia quibus vitam ſanctiſſimam illuſtravit ; tametiſi calvus , & ſenio conſectus , hyemiſque ſæviret acerbitas , perpetuo deſpecto capite Euangelium auſcultabat ; malens ſalutis ſubire periculum , quam a ſacris ritibus vel latum unguem diſcedere ; adeo erat Eccleſiaſtica diſciplinæ , quam probe callebat , tenax , ſervator , & cuſtos .

Sed cur ego ad coacervanda exempla progrediar ? Monere ſufficiat ritum ipſum diligentiffime , ac religioſe ſervare Clerum lectiſſimum Baſilicæ Lateranenſis , quæ *omnium Eccleſiarum totius Orbis Caput audit , & Mater* . Clerum item præſtantiſſimum Baſilicæ Vaticanæ , quæ a Nicolao III. *Eccleſiarum omnium ſpeculum* appel-

appellatur: eundem Monachos Ordinis S. Benedicti, Clericosque Barnabitas, Congregationis Apostolicæ Missionis, cæterosque pios omnes, religiososque Catholicos. Imo, quod etiam notatu dignum, sanctos ipsos una cum Christo regnantes in Cælis, coronis depositis stare ad Evangelii lectionem, beatæ Gerardescæ Pisanæ tertii Ordinis Camaldulensium visum mirificum manifestat, quod ejus vitæ auctor ita describit apud Bollandianos, ad diem xxix. mensis Maji: *In Ecclesia Sancti Savini in festo omnium Sanctorum, cum Evangelium diceretur, vidit Sancta Cælos apertos, & Sanctos stantes coronis depositis propter reverentiam Evangelii*. Statimque hæc subdit: *Ex tunc itaque Sancta perpendit, quod dum Evangelium in terra canitur, coronæ Sanctorum in Cælo cum reverentia deponuntur*. Hoc fortasse iis visum ridiculum videbitur, qui comœdis, ac lyricis scriptoribus delectantur; quique maledicis heterodoxorum libris studium suum impendentes, immissa a Deo Sanctorum mentibus lumina, piaque objecta visâ impie rident, ac ludibriis afficiunt. At malo ego cum viris sanctis irrideri, quam cum impiis sentire impie, solo nomine eruditionem profitentibus, & dictorum audacia.

Quamvis vero omnibus persuasum sit (quod & nos libentissime fatemur) nudationem capitis ad Evangelii lectionem fieri ob reverentiam Evangelio debitam; ejus tamen ritus aliæ quoque sunt causæ, quæ Christianos homines ad illum pie, utiliterque servandum inflammare poterunt. Prima est, quod Evangelica prædicatio omnia legis velamina removet, atque homines qui prius in ænigmate, quodammodo, & quasi per transfennam videbant, modo ipsam veritatem aperta legis cognitione intueri, & intelligere facit. Altera ut omnes sensus expediti, atque intenti sint ad audiendum. Tertia in argumentum obsequii, & reverentiæ. Atque hæc qui-

quidem potissima; quibus alias quoque addunt memorati Scriptores; nimirum quia Christus proprium suum caput pro nobis spinea corona velatum habuit. Ut inter caput audientium, & Deum nihil sit medium. Ad denotandum quod propter Euangelium debemus esse prompti omnia temporalia a nobis abjicere, & abdicare. Atque hæc est causa, inquit Tostatus, quare Clerici non solum habent capita discooperta, sed etiam rasa, ad significandum scilicet majorem abdicationem temporalium rerum, quam laici, cum minus Deo adhæreant quam Sacerdotes, & Pontifices; qui sunt medii inter Deum, & populum: & ista est causa, subdit laudatus Auctor, quare Monachi majores habeant tonsuras, quam Clerici Sæculares, scilicet quia illi magis a se omnia abjecerunt, cum nihil possideant.

*De ritibus post Euangelii lectionem servatis,
ac primum de acclamationibus Amen,
Deo gratias, & aliis.*

CAPUT XXV.

Videndum nunc quas olim Christiani cæremonias servabant post lectionem S. Euangelii. In primis sicut in veteri lege, Moyse mandata Dei promulgante jubetur omnis populus dicere *Amen*, ut in Deut. cap. XVII. ita prisca fideles ad Evangelicæ legis annuntiationem *Amen* quoque respondere consueverunt. Ad quem morem fortasse respexit S. Benedictus, quum Monachis suis in Regula cap. XI. præcepit, ut lecto Euangelio omnes responderent *Amen*. In Missa Mozarabum similiter in fine Euangelii respondetur *Amen*; idemque ad finem Epistolæ cujuscumque, & Prophetarum præscribitur respon-

spondendum. Inter fideles aliqui etiam dicebant: *Deo gratias*, sed monet Beletus in explicatione divinorum officiorum, capite xxxix. melius esse dicere, *Amen*. Alexander de Ales, quarta parte summa, *De officio Missæ*, utriusque ritus rationem aperit his verbis: *Perlecto Evangelio dicunt assistentes Amen, quasi dicant: faciat nos Deus perseverare in doctrina Evangelii. Alii dicunt: Deo gratias, in gratiarum actionem pro beneficio tantæ doctrinæ, & tam salutaris*. Gulielmus Durandus lib. iv. *Rationalis divinorum officiorum* cap. xxiv. addit quosdam literatos dicere consuevisse: *Benedictus qui venit in nomine Domini*. Nos hodie dicimus, *Laus tibi Christe*, etiam in fine illius partis Dominicæ Passionis, quæ legitur in tono Evangelii, præterquam in Parasceve, quia hæc dies, ut recte docet Paulus Maria Quartus Theatinus sacrorum rituum peritissimus, fuit Christo tempus improperii, non laudis. Sacerdotes Maronitæ in fine Evangelii, referente Joanne Cardinale Bona libro II. *Rerum liturgicarum* cap. vii. hæc habent: *Ipsi Jesu Christo sint laudes, & gratiarum actiones, & benedictiones propter verba sua, quæ sunt erga nos; & Patri ejus qui misit eam propter salutem nostram; & Spiritui ejus vivo, & sancto, nunc, & in sæcula sæculorum, Amen*. Nos Latini statim post recitatum Evangelium dicimus: *Per Evangelica dicta deleantur nostra delicta*.

De ritu exprimendi rursus Crucis signum.

C A P U T XXVI.

Praterea populum audito Evangelio iterum se Crucis signo munire consuevisse prodit Ordo Romanus: *Perlecto Evangelio iterum se signo Sanctæ Crucis populus munire festinat*. Consentit Auctor nomine Alcuini, eamque

que tradit rationem , ut quod ex divinis eloquiis ad salutem percepit , signatum sigillo Crucis , atque munitum permaneat , ne a mentibus eorum diabolica fraude evacuari valeat . Idipsum docet Durandus , ejusque ritus hanc causam recenset : *Signo Crucis se in pectore muniant contra Diabolum , ne semen verbi Dei suffocetur in eis , & ne sermonem Domini rapiat de pectoribus eorum ; quasi dicant : Deus nos faciat in doctrina Christi perseverare ; & ut significant se habere in corde quod exprimitur in ore .*

De ritu Osculandi Evangelium .

C A P U T XXVII.

Ritus est æque antiquissimus , ut expleta lectione Evangelii, nedum Diaconus , sed & Episcopus , ac Clerici omnes librum oscularentur in signum venerationis , & communionis cum Domino Jesu Christo , & doctrina ejus ; ut sapientissime docet Jonas Aurelianensis Episcopus præfatione libri II. de cultu Imaginum : *Sacra Religionis usus adhuc in Ecclesia servatur ; ut peracta sacra Evangelii lectione , ab Episcopo , vel Presbytero , cæterisque sacri Ordinis Religiosis codex , in quo Evangelii lectio recitata est , multiplicibus osculis veneretur : sed hoc cujus causa , nisi illius , cujus esse verba creduntur , agimus ?* Jacobus Eveillon Canonicus Ecclesiæ Andegavenfis libro *De Processionibus Ecclesiasticis* , quem aliqui citant nomine Claudii Episcopi Andegavenfis , diserte docet osculum istud Christo in Evangelio datum , significare actum fidei internum , quo assensum præbent omnes veritati Evangelicæ annuntiatae , eam acceptando : verba autem osculo superaddita , actum externum , quo eandem fidem palam profitentur juxta illud : *Corde creditur ad justitiam , ore autem confesso fit ad salutem .* Quam singulorum confessionem

nem statim subsequitur communis, & publica Ecclesiæ professio, omnibus uno ore canentibus symbolum. Quare sic differit S. Thomas Doctor Angelicus, III. parte, quæst. LXXXIII. artic. IV. *Perfekte autem populus instruitur per doctrinam Christi in Evangelio contentam, quæ a summis ministris legitur, scilicet a Diaconibus; & quia Christo credimus tanquam divinæ veritati, secundum illud Joannis VIII. Si veritatem dico vobis, quare non creditis mihi? lecto Evangelio symbolum fidei cantatur, in quo populus ostendit se per fidem Christi doctrinæ assentire.*

Quantum ad laicos, etiam ipsos ad Evangelium osculandum fuisse admissos testatur Ordo Romanus, & vetus Missæ expositio ex vetusto codice apud Hitorpium his verbis: *Descendente Diacono de Ambone, Subdiaconus qui in filo stat, recipit Evangelium, quod tenens ante petus suum super planetam, porrigit osculandum, primum Episcopo, aut Presbytero, deinde omnibus per ordinem graduum qui steterint, & universo Clero, nec non populo.* Rupertus Abbas Tuitiensis libro II. *De officiis* cap. I. scribit Evangelii librum, quem Subdiaconus clausum ad introitum portaverat, ab eodem apertum circumferri omnibus religioso osculo salutandum; & quidem non sine mysterio; quia, inquit, *post prædicationem Christi cepit lex credentibus, quam antea gestabat clausam, apertam ostendere fidem Evangelicam.* Honorius Augustodunensis, seu Gemma Animæ *De antiquo ritu Missarum* cap. XIX. apud Hitorpium tradit Evangelium cum incenso per chorum delatum, & singulis ad osculandum porrectum, ob hanc rationem, quia Apostoli Christum odorem vitæ per mundum prædicaverunt, & cunctis gentibus per verbum ejus, pacem æternam præbuerunt. Tandem Edmundus Martene libro II. *De Monachorum ritibus* cap. IV. ex consuetudinibus Cluniacensium Monachorum

chorum manuscriptis rem scitu dignam docet, nempe nocturnam illusionem passis Euangelium osculari non licuisse; quod sane peculiaris erga Christum Dominum reverentiæ, & venerationis argumentum est.

Quamvis autem antiquitus etiam populus ad Euangelii osculum admitteretur, Honorius tamen III. Pontifex Maximus literis ad Matthæum Patriarcham CP. lib.v. ep. cccclxxxix. missis, sub pœna excommunicationis cuicumque sæculari Principi Euangelii osculum præberi vetuit, nisi essent personæ oleo sacro inunctæ. Quamobrem quum quidam Episcopi, Polonorum Reginam, quod non dum sacro ritu corona regia esset redimita, ad Euangelii osculum admittere recusarent, scribit Oedericus Raynaldus ad annum m̃dxlix. num. xxvi. Paulum III. Pontificem Maximum precibus Regis permotum, indulgisse Reginæ ejus conjugi, ut inter divina mysteria Euangelium, & patena illi deosculanda porrigerentur, tametsi ritu sacro non dum esset regio insignita diademate. Ætate nostra juxta Missalis Romani cæremoniales regulas, quas vulgo rubricas appellant, Sacerdos finito Euangelio librum osculatur, præterquam in Missis Defunctorum, & nisi celebret coram Summo Pontifice, Cardinali, & Legato Sedis Apostolicæ, vel Patriarcha, Archiepiscopo, & Episcopo in eorum Diocesibus; quo casu cuilibet ipsorum liber osculandus defertur, Sacerdos vero celebrans consueto abstinet osculo, nec dicit, *Per Evangelica dicta*. Sic rubrica; cujus rei eam rationem indicat Paulus Maria Quartus, quia osculans librum sub verbis prædictis fungitur officio mediatoris inter Deum, & populum, cui pacem auguratur, & peccatorum remissionem loco Christi: quod pertinet ad dignitatem quandam; & idcirco digniori defertur osculandus liber, quia Christus unus est. Cæterum non defertur liber osculandus aliis Prælati Episcopo inferioribus ex

decreto Sac. Congregationis die xxii. , & xxviii. Augusti, anno mdcxxxix. apud Gavantum; Multo minus deferendus erit viro Principi laico. Quod si alicubi esset consuetudo in oppositum tolerata, deferendus est, ait Gavantus, alius liber, & Sacerdos tunc suum osculatur. Romæ id observatur, ut quum plures interfunt Cardinales, Evangelium nulli præbatur osculandum, juxta illam Cæremonialis Episcoporum regulam lib. I. cap. xxx. *Liber Evangelii dabitur osculandus semper majori, aut digniori omnium, vel si essent plures æquales, nulli.* Quæ tamen regula fefellisse videtur, quum ineundi fœderis gratia Ludovicus XIV. Galliæ Rex, & Philippus IV. Hispaniarum, ad proprii Regni fines accesserunt, ubi altari in collimitanea linea erecto, simul divinæ Missæ sacrificio adstiterunt, osculumque Evangelii, & pacis in Icone sacra duo Cappellani scorsim, & eodem tempore utrique præbuerunt.

Quid autem dicendum si Episcopus coram Cardinali sacris operaretur? Libere dicam non quod sit, sed quod esset faciendum attendi debere. Quicquid agant quidam cæremoniarum magistri parum curavero: clarissima est Cæremonialis Episcoporum dispositio ita præscribentis lib. I. cap. xxix. *Liber Evangelii celebrante Episcopo nulli etiam magno Principi, aut Prælato Missæ præsentanti datur osculandus post lectum Evangelium; sed si adesset aliquis maximus Princeps, vel S. R. E. Cardinalis, cui liber Evangelii osculandus esset, non utique liber Evangelii, quo utitur Episcopus, sed alius codex porrigatur.* Ex quo satis liquet, quæ sit illorum hallucinatio, seu potius fœda assentatio, qui sacrum Episcopo celebranti librum eripientes, Cardinali deosculandum præbent. Cujusmodi abusum solidissimis argumentis reprehendit vir notæ literaturæ Joannes Baptista Braschus Archiepiscopus Nisibenus in opusculo italice manuscripto,

pto, cui titulum præfixit : *Discursus cæremonialis, De præeminentia osculandi Euangelium debita Episcopo in Pontificalibus celebranti.*

Neque vero dissimulandus est abusus ille, qui in Ecclesiam S. Petri Oppidi Romarocomontis Tullenfis Dioceseos irrepfit; quique licet alias a Sacrorum Rituum Congregatione fuerit improbatus, adhuc tamen vigere noscitur. Nam præterquam quod Subdiáconus in Missis solemnibus memoratæ Ecclesiæ Virginum Præsidi Euangelium deosculandum defert, itemque sacram iconem ad pacem, & corporale; ipsi etiam sacri Ministri Diaconus, ac Subdiáconus sacris ornati vestibus inter sacra Missarum solemnía, relicto in Altari Sacerdote, ad ipsam ex sede sua suscipiendam pergunt; quam, ex utroque latere fimbrias illius pallii elevantes, ad offerendum in Altari comitantur; expleto autem offertorio ad propriam sedem quadraginta passibus distantem pari cæremonia prosequuntur. Quos tamen abusus iterum ad sacrorum rituum Congregationem delatos, ita omnes, ac singulos strenue, solideque confutavit Amicus noster Joseph Modius, Sacri Palatii Apostolici causarum Patronus, ut eadem, quæ ipse scripsit repetere, vel alia adjicere supervacaneum videatur.

*De ritu sigillo obsignandi Euangelium
post ejus lectionem.*

C A P U T XXVIII.

A Nimadvertit Eruditissimus Blanchinus *In Notis historicis ad Anastasii Papæ vitam* pervetustum fuisse morem literis etiam consignatum in Ordine Romano, ut Episcopi toties sigillo munirent Codicem S. Euangelii, quoties Diaconus cum ab Episcopo referatum, publice-

bliceque in Ambone lectum ad Episcopum referret: quem deinde per Subdiaconos regionarios acceptum, archivo condebant Apostolico. Sed cur sacra hæc volumina tam crebro in Ecclesia legenda sigillo semper obsignabantur; huic quæstioni quum causam nullam Auctores reponant, aliquot conjecturas Joannis Ciampini veterum monumentorum investigatoris eximii in medium afferam; quibus etiam meas qualescumque adjiciam, ut rei satis obscuræ lux affulgeat.

Prima est volumen Evangeliorum signantes veteres Patres illud profecto imitari voluisse, de quo in Apocalypsi cap. v. Joannes inquit: *Et vidi in dextera sedentis supra thronum librum scriptum signatum sigillis septem.* Quod visum primævi Christifideles etiam curabant, ut musivo opere ob oculos ponerent; sæpe enim viginti quatuor illos Seniores, quos cum phyalis, & coronis Joannes descripsit, effinxere; ut in Ecclesia S. Pauli, ac S. Praxedis, & Cæcilie; alibi quatuor animalia Evangelistarum symbola; nec non Iridem, Agnum, & alia quamplurima, inter quæ etiam volumen septem sigillis munitum; veluti supra solium gemmis conspicuum expressum est in arcu summo Basilicæ Liberianæ. Nec quicquam officit quod uno, non vero septem sigillis Evangelium obsignaretur; nam & septem fortasse in speciem aderant, licet uno tantum clauderetur ad tollendum, profecto tedium, & moram inopportunam tam in obsignando, quam in resignando necessario impendendam.

Præterea cum Sacræ Scripturæ puritas, ac veritas vel per ignorantiam Amanuensium, vel per dolum, improbitatemque hæreticorum in dies corrumperetur, ut huic malo occurreretur, Summi Pontifices decreverunt, ut singulæ Ecclesiæ sua volumina Evangeliorum juxta acceptissimum, ac genuinum sensum haberent, eaque post Evangelii lectionem continuo sigillo munirent, cujus præci-

præcipuus usus, ac munus est fidem humanis rebus, & auctoritatem præstare. Quod autem hæretici suopte velut ingenio, doloque malo ad suos comprobandos errores, divinos libros passim corrumpere, & adulterare, veteres Ecclesiæ Patres sæpe testantur. Id genus impietatis nostris etiam temporibus recentes hæretici nefarie sunt imitati; nam ut alios fileam, Zuinglius loco illorum verborum: *Hoc est Corpus meum*; contra omnium exemplarium græcorum, & latinorum fidem, in editione germanica apposuit: *Hoc significat Corpus meum*. Lutherus autem ut suam de justificatione per solam fidem constabili- ret sententiã, ubi Apostolus in Epistola ad Romanos cap. III. ait: *Arbitramur hominem justificari per fidem*, de suo ipse addidit *solam*: Cumque rogaretur cur id fecisset; homo effrons ac petulantissimus in hæc verba respondit. *Si tuus Papista morosum, & difficilem se præbere volet de voce, Sola, statim dic: Papista, & Asinus eadem res est: Sic volo, sic jubeo, sit pro ratione voluntas: Nolumus enim Papistarum esse Discipuli, sed præceptores. Semel enim superbiendo gloriabimur adversus hujusmodi Asinos*. Et infra. *Rogo te ne quid aliud hujusmodi asellis respondeas de voce, Sola, sed tantum dicas: Lutherus sic vult, ille Doctor est omnium Doctorum in Papatu &c.* En modestiam hujus pseudoprophetæ in fraude illa excusanda.

Speciare etiam potuit sacri voluminis obsignatio fidem nedum illius; verum etiam gemmarum, aliorumque ornamentorum, quibus magnifice renidebat, custodiam; ea siquidem adhibita cautela non ita facile auferri poterant. Quandoquidem instituti veteris fuit, ut sacra supellex divinis expletis officiis in loco sera munito recondideretur, sigilloque etiam aliquando vitandi cujuslibet detrimenti gratia obsignaretur, quemadmodum ex Burchardo, & Ordine Romano animadvertit vir clarissimus

simus Joseph Vicecomes . Potuit demum signari Evangelium , ne quod in Missa Episcopi adhibebant , alii divino ipso volumine uterentur . Sacris siquidem canonibus ob honorem Episcopo debitum sæpe cautum fuit , ne in Altari ubi Episcopus sacrificium obtulit , alii rem divinam operari præsumerent .

*De ritu concionandi proxime post Evangelii
lectionem .*

C A P U T XXIX.

IN primæva Ecclesia vetitum fuit ne quis Dei Verbum publice loqueretur , nisi esset qui interpretaretur . Quid enim quæso prodesset loqui , nisi intelligatur quod ore profertur ? Hinc laudabilis illa inolevit consuetudo , ut ex recitatis Scripturæ Sacræ lectionibus , maxime vero ex pronuntiato mox Evangelio veteres Ecclesiæ Patres suas ut plurimum exordiri consueverint conciones . Auctor Apostolicarum Constitutionum lib. II. cap. LVII . Missæ sacrificii ritum , ac ordinem perstringens , ipsam tum Presbyterorum , tum Episcopi concionem proxime post Evangelii lectionem statuit . *Acta* , inquit , *nostra legantur , item Epistolæ Pauli adjutoris nostri , quas Ecclesiis misit Spiritus Sancti instinctu dictatas .* Postea Diaconus , aut Presbyter Evangelia legat ; deinde hortentur populum Presbyteri non omnes simul , sed singulatim , & postremus omnium Episcopus , qui similis est gubernatori navis . Idem lib. VII . cap. V . Post lectionem legis , & Prophetarum , & epistolarum nostrarum , & Actorum , atque Evangeliorum salutet Ecclesiam ordinatus dicens : Gratia Domini nostri Jesu Christi , & caritas Dei Patris , & communicatio Spiritus Sancti cum omnibus vobis ; & omnes

omnes respondeant : Et cum spiritu tuo ; & post salutationem alloquatur populum sermone hortatorio .

Ejusdem ritus testimonia frequentissima sunt apud Origenem , Hilarium , Ambrosium , Augustinum , Gaudentium , Chrysostomum , Chrysologum , Leonem Primum Pontificem Maximum , Gregorium item Papam , cognomento Magnum , & alios quorum sermones habemus . Extant etiam in Conciliis sanctiones multæ huc spectantes . Sed & Valentini Synodi in Hispania Canone I. de hac eadem re ita Patres caverunt : *Antiquos canones relegentes , inter cetera hoc censuimus observandum , ut Sancta Evangelia ante munera oblationem in Missa Catechumenorum , in ordine lectionum post Apostolum legantur , quatenus salutaria præcepta Domini nostri Jesu Christi , vel sermonem Sacerdotis (Ecce concionem statim post lectum Evangelium) non solum fideles , sed & catechumeni , & penitentes , & omnes , qui ex adverso sunt , audire licitum habeant : sic enim Pontificum prædicatione audita , nonnullos ad fidem attractos evidenter scimus .* Quicquid demum pertinet ad hoc argumentum , summa cum eruditione tractavit Ambrosiani Collegii Doctor Bernardinus Ferrarius in opere *De ritu sacrarum Ecclesie veteris Concionum* . Morem capellæ Pontificiæ Ordo Romanus auctore Paride Crasso sacrarum caeremoniarum Præfecto ita describit ; Sermones intra rem divinam per totum annum ordinarii sunt numero decem , & novem ; ex quibus quatuor in totidem dominicis de Adventu ; & quinque in totidem aliis dominicis de Quadragesima , excepta die Palmarum . Qui omnes non nisi in capella , & per Regulares fiunt ; sed alii decem , tam per Regulares , quam per Sæculares arbitraliter fieri possunt , videlicet in die omnium Sanctorum , S. Stephani Protomartyris , S. Joannis Evangelistæ , Circumcisionis , Epiphaniæ , Cinerum , Parasceve , Ascensionis ,

400 IN

R

Pen-

Pentecostes, & Trinitatis. Et quoniam hi novendecim ordinarii in cantati. Evangelii currentis expositionem, & in Dei laudem aguntur, sacri vocantur: ideoque non nisi inter sacra Missarum solemnia, & post Evangelium cum petitione benedictionis, ac Angelicæ salutationis præfatione recitantur. Si qui vero extraordinarii, ut pro pacis, seu victoriæ significatione, sive alia causa; aut in laudem alicujus defuncti sunt; quia sacri non censentur, ideo post Missas, & absque benedictione, ac sine Angelicæ salutationis præfatione recitantur. Intra Missas aliorum Sanctorum Evangelistarum, aut Doctorum Ecclesiæ habendas sermo haberi potest; sed pro aliis Sanctis non solet. Et regulariter numquam una eademque die sermo, & processio concurrunt.

Tridentina Synodus *Sessio* XXI. & alibi, nihil antiquius habens, quam veterem disciplinam revocare, non semel mandat Pastoribus, aliisque animarum curam gerentibus, ut frequenter inter Missarum solemnia (utique post Evangelium, sicuti mos est) vel per se, vel per alios, ex iis quæ in Missa leguntur, aliquid exponant.

*De ritibus ab Episcopo in concionando
servatis.*

C A P U T XXX.

QUoniam vero non unus hac in parte viguit olim in Ecclesia ritus, e re fore ducimus hic discrimen breviter aperire; variumque illustrare morem. Jesu Christi legem veteres Patres interpretaturi; sæpe numero ipsum Sacri Evangelii codicem manu gestare consueverunt; ut suismet oculis percurrerent, & ore prænuntiarent quod interpretabantur. Præclarum in rem ipsam locum suppeditat S. Augustinus tractatu XV. in Euan-

Euangelium S. Joannis. *Hoc lectum est*, inquit, & hanc lectionem tractandam suscepimus: gestamus in manibus, quod Dominus Iesus ad puteum Jacob loquebatur cum Samaritana muliere. Et in tractatu xl. de Euangelio secundum Joannem: *Quod gestare vos videtis in manibus, jam multa auditur charitas vestra*. Alicubi sacrum Euangelii codicem inter Missarum solemnias coram Episcopo concionante apertum sustinebat Diaconus; quandoque minoris ordinis clerici; sæpe etiam divinæ legis volumen excipiebatur legivo decentissime exornato, ante Episcopum qui sermonem habebat, constituto. Quod diximus, non modo ex particularium Ecclesiarum libris ritualibus, verum etiam in nonnullis Italiæ, præsertim & Regni Neapolitani Dioecesibus hodieque ex præscrito more servatur. Argumentum fere ex consueta decurrentis diei lectione sumebatur; quandoque fortuita etiam libri Evangelici aperitio suppeditabat. De re ipsa loquens S. Augustinus sermone xliii. De verbis Domini in Euangelium S. Joannis hæc habet: *Euangelica lectio proposuit nobis unde loquamur ad charitatem vestram tamquam Domini imperio, & vere Domini imperio. Ab illo enim expectavit cor meum tamquam iussionem proferendi sermonis: ut hinc cum intelligerem me velle, quod recitari ipse iussisset*. Ipsum denique Sancti Evangelii interpretandi munus, quod ut sequenti capite demonstrabimus, Episcoporum præcipuum est, non solum ipsosmet Episcopos, atque Presbyteros, verum etiam Diaconos, gravi tamen urgente causa, antiquitus implevisse perspicuum est. Id erudite suo more ostendit Bernardinus Ferrarius, lib. II. cap. x. palam item faciens *Euangelistas* ab Apostolo in epistola secunda ad Ephesios cap. iv. appellatos fuisse illos Diaconos, qui Evangelii prædicandi munus obibant.

*Evangelium prædicandi proprium
Episcoporum munus.*

C A P U T XXXI.

EXplorata res est sacris divinæ Scripturæ, SS. Patrum, atque Conciliorum auctoritatibus facta conspicua, prædicationem Verbi Dei jure divino ad Episcopos pertinere; quod non uno in loco testata est Synodus Tridentina; sunt enim Episcopi veri Ecclesiæ, & Domini gregis Pastores, quibus incumbit ex munere commissum sibi populum pascere salutaris doctrinæ pabulo, & lupum instar canis latratu suo arcere, ne rapiat, & disperdat oves. Hinc S. Ambrosius lib. I. *De officiis* cap. I. agens de se ad Episcopatum compulso ait: *Jam effugere non possumus officium docendi, quod nobis refugientibus imposuit Sacerdotii necessitudo.* Hinc S. Cyprianus nihil antiquius habebat, quam Dei Verbum assidue prædicare; quippe qui soleret quotidie illud populo annuntiare, ut ipse in exordio libri de disciplina, & bono pudicitia tradit, dum inquit: *Semper enitor vel maxime quotidianis Evangeliorum tractatibus aliquando vobis fidei, & scientiæ per Dominum incrementa præstare;* imo teste Pontio ejus Diacono in vita ipsius, tantum ei erat Verbi Dei prædicandi desiderium, ut inter concionandum extremum diem claudere haberet in votis. Hinc tandem Christianus II. Archiepiscopus. Moguntinus percontanti Gulielmo Imperatori, num sibi in re quapiam militari consilio adesse vellet, prudentissime respondit: *Episcopi est docere Verbum Dei, non gladium stringere, quem Christus mandavit Petro mittere in vaginam.* Sed quid Patres, & exempla attexam? Ipse Apostolus sicut requirit Episcopum irreprehensibilem, ita etiam vult *Dilectorem,*

ctorem, & ut sit exemplum fidelium in verbo, & attendat lectioni, & exhortationi, & doctrina, utque sit potens exhortari in doctrina sana, & eos qui contradicunt arguere; ideoque vult Timotheum, quem Ephesiorum Episcopum constituerat, instare, & prædicare verbum opportune, importune, idest assidue & sine intermissione; in cuius rei symbolum, ut alibi dicitur, datur Episcopo in consecratione liber Euangeliorum. Qui liber adeo est Episcopi proprius, ut eum olim semper, potissimum vero in sacris concionibus præsentem haberet.

Sed audiamus fuitiles nonnullorum excusationes, quas tamen egregie refellit Cardinalis Bellarminus libro II. *De gemitu Columbæ* cap. v., Alii inquiunt, nunc sunt tempora, alii mores. Ita est, respondet laudatus Theologus, alia sunt tempora, alii mores, sed non alia obligatio. Cur enim in consecratione Episcoporum nunc etiam dicitur: *Accipe Euangelium, vade, prædica populo tibi commissio*? An non timere debent Episcopi sic ordinati, ne in iudicio audiant, cur prædicationis officium suscepisti, si illud adimplere volebas? Et si alia nunc esset obligatio, cur in ipso Concilio Generali (Tridentino) nostro tempore celebrato disertis verbis diceretur prædicationis munus præcipuum esse inter Episcopalia munera? Et cur adhuc in Ecclesiis Cathedra sublimis Episcopis erigitur, nisi ut ex edito loco populum doceant? Non dedimus, inquiunt, operam sacris literis, neque in prædicatione, sed in iudiciis versati sumus. At neque S. Ambrosius, neque S. Gregorius prædicationi operam dederunt, sed forensibus iudiciis; & tamen vocati ad præfecturam Ecclesiæ, continuo lectioni scripturarum, & prædicationi Verbi Dei operam dare coeperunt. Quod idem fecit nostro tempore S. Carolus Cardinalis, qui cum jurisprudentiæ operam dedisset, & usum concionandi non haberet, & linguæ quoque impedi-

dimentum pateretur ; omnes tamen difficultates Christi amore , & officii sui adimplendi desiderio superavit , & assidue uberrimo cum fructu usque ad mortem Euangelium prædicavit . Denique inquit : multi sunt hoc tempore prædicatores Verbi Dei ex Ordinibus religiosi . Verum est id quidem ; sed illi vocati sunt in adiutorium Episcoporum , non ut proprium munus ipsorum impediunt ; neque adjuvari dicitur qui nihil facit . Et Christus ipse Apostolos duodecim , & septuaginta duos discipulos misit ad prædicandum , ut se in eo munere , quodammodo juvarent ; & tamen non ideo intermisit ipse assidue prædicare , & de Pastore ait : *Vocem ejus audiunt & eum sequuntur* . Itaque si Episcopi Pastores sunt , ut omnino esse debent , id quoque eos præstare necesse est , ut oves vocem eorum audiant , ipsorumque vitam , & exempla sequantur . Hæc Bellarminus , quæ iccirco retulimus , ne nos parvi pretii homines , in corruptos quorundam Episcoporum mores censorem agere videremur .





DE CODICE SANCTI EUANGELII

ATQUE SERVATIS IN EJUS LECTIONE,
ET USU VARIO RITIBUS

LIBER III.

Explicatis superiori libro sacris ritibus, qui divinum Euangelii codicem, ejusque solemnem in Missa lectionem spectant; nostri instituti ratio postulat, ut sequentibus libri hujus capitibus de aliis disseramus, qui ad varium Euangelii usum, tum codicis, tum lectionis extra sacrificium pertinent.

*Euangelio super Altari locato aequalis honor,
at Christi Cruci delatus.*

CAPUT I.



Ritus Ecclesiae saeculis solemne fuit, ut non modo ad initium Missae sacratissimus Euangelii codex magna cum pompa ad Altare deferretur, sed perpetuo una cum Christi Cruce ibi maneret. Enim vero, quemadmodum Sanctos Patres statuisse ait Doctor Seraphicus S. Bonaventura, *ne quisquam Missas celebret, nisi in Altari adsit imago Crucifixi.*

fixi Domini nostri Jesu Christi; ita etiam ex sacris liquet Canonibus, ac vetere Ecclesiæ disciplina, ut in Altari, ubi sacra fiunt, Evangelia ponerentur. Id quidem præter alia Remense Concilium ab Ivone Carnotensi Episcopo relatum, observandum esse statuit his verbis. *Ut Mensa Christi, idest Altare, ubi corpus Dominicum consecratur, ubi sanguis ejus hauritur, ubi Sanctorum Reliquiæ reconduntur, ubi preces, & vota populi in conspectu Dei a Sacerdote offeruntur, cum omni veneratione honoretur, & mundissimis linteis, & palliis diligentissime cooperiatur, nihilque super eo ponatur, nisi capsæ cum Sanctorum Reliquiis, & quatuor Evangelia.* Ipsum ritum in Ecclesia Laudunensi adhuc vigere, testatur vir eruditissimus Antonius Bellotto, in observationibus ad ritus ejusdem Ecclesiæ pag. CCCXXI. ait enim ibi in Altari adstare Evangelium literis aureis exaratum.

De Religioso autem Evangelici codicis cultu nihil præclarius luculentiusque afferri potest Can. III. Concilii Œcumenici VIII. Constantinopolitani IV. quod sacris Evangeliiis honorem æqualem illi, qui Cruci Christi defertur, decernit. *Sacram Imaginem Domini nostri Jesu Christi, & omnium Salvatoris æquo honore cum libro Sanctorum Evangeliorum adorari decernimus.* Perspicua est sacri Concilii, idest mens Catholicæ Ecclesiæ, cui nec ipsi sacrarum Imaginum osiores Gallicani Episcopi in VII. Synodo adversabantur; qui alias hunc articulum improbabant: *Sicut divina Scripturæ libros, ita Imagines adoramus.* Sacræ namque Scripturæ præsertim Evangelii codices adoratione colendos nec ipse Leo Iſaurus ausus est inficari; imo ut in memorati Concilii ad Joannem VIII. Pontificem Maximum præfatione testatur Anastasius Bibliothecarius, Francorum quidam Episcopi Iconoclastæ, licet sacras Imagines impie contemnerent, ac lacerarent, divinum tamen Evangelii codicem quotidie

die osculantes adorabant. Quanta autem erga divinum volumen fuerit Catholicorum cultus, ac veneratio, præter ea quæ superioribus libris fusc demonstravimus, ex iis quæ passim dicemus, luculentius innotescet. Unum hic adscribam, quod olim notavit Lucas Tudenſis libro I. *De altera vita*, cap. xxi. *Quis tanta insania ducitur, qui sacram videns Scripturam non simpliciter veneretur, & Evangelium Dei non adoret, & osculetur?*

*Euangelium in Processionibus delatum,
præcipue Dominica Palmarum.*

C A P U T II.

Quemadmodum olim apud Hebræos arca fœderis, in qua erant tabulæ legis, ita apud veteres Christianos Euangelii codex, quo Christi lex atque doctrina continetur, summa cum pompa in Processionibus deferrebat. Perspicuum, & illustre est in rem ipsam Marci Diaconi testimonium, qui agens de Processione a S. Porphyrio Gazensium Episcopo instituta, sic inquit apud Surium die xxvi. Februarii: *Congregato populo in Ecclesia, quæ appellabatur Irene, jussit omnes psallentes simul proficisci in Marnium, quod olim fuerat, ipse vero sequebatur portans Sanctum Euangelium, & circa se habens pium clerum; revera imitans Christum cum Discipulis: præcedebat autem populum semper memorandus Barochas, veneranda Crucis portans effigiem.* Auctor vitæ, & actorum S. Liborii Episcopi Cenomanensis, loquens de ejus translatione, scribit: *Clerus omnis Sacerdotalibus, & Ecclesiasticis indumentis, elevatoque ferebro sanctorum pignorum in humeris Sacerdotum, sonantibus quoque signis omnium per Urbem Ecclesiarum, ac præcuntibus qui sanctæ, ac vivificæ Crucis vexilla San-*
S
torum

storum Evangeliorum libros, & sacras reliquias in aureis, argenteisque reconditoriis cum aromatibus prosequabantur; deducitur cum ingenti Cantorum veneratione, cum Psalmis, Hymnis, & Antiphonis in Oratorium Sancti Vincentii.

Idem ritus enuntiatur a Flodoardo Baptisimum Clodovei Regis, vetustamque Galliae pietatem sic illustrante: *Præcedentibus Sacrosanctis Evangeliiis, & Crucibus magna cum pompa Rex Clodoveus ducitur. ad baptisierium a S. Remigio, subsequente Regina, & populo.* Præterea ex actis S. Prernavardi Episcopi Ildesheemensis, ubi hæc habentur: *Feruntur ad solemnem Processionem in principis festis Evangelia, auro, & gemmis clarissima.* Item ex vita S. Udalrici Episcopi Augustani, de quo ejus auctor ait: *Præcepit ut matricularii in omni hebdomada die Sabathi, & in aliis solemnibus festivitatibus cum Evangelio, & cereis cum Dei laudibus reverenter visitarent.* Apud Andegaveses testatur Claudius Episcopus Andegavenfis, sive potius Jacobus Eveillon Andegavenfis Ecclesiae Canonicus, *De Processionibus Eccl. cap. III.* esse consuetudinem, ut in celebrioribus Processionibus Civitatis, non tantum Ecclesia Andegavenfis, sed singulae collegiatæ, ut propriam Crucem, ita & proprium Evangelium præferant. In Græcia eundem morem invaluisse, ut Evangelium magna Religionis pompa deferretur, ex eo patet quod inter officia magnæ Ecclesiae Constantinopolitanæ numeretur *Præfatus Evangelio*, qui nimirum illud ferret in supplicationibus, ut est apud Curopalatem, qui etiam monet id fieri ab Archidiacono in solemnibus supplicatione festi Palmarum.

Usum Græcorum præsertim in sacra Processione Palmarum ita describit Codinus in libro de officiis aulae Constantinopolitanæ cap. ix. num. v. *Prior in ambulacrum venit Lampadarius lampadem ferens, totumque festi*

festi proprium canticum decantans : Egredimini gentes, egredimini populi ; contemplamini hodie Regem Cælorum ; Christi enim figura Euangelium progreditur, & deinde Imperator, & filius ejus Imperatoris, si adsit, Imperatorem & Patrem suum prosequitur . Post quem ascendunt despotæ ; deinde Archidiaconus cum Euangelio, postea Patriarchæ si præsentés sint : post illos quatuor, vel quinque Sacerdotes portantes sacras imagines. Ritus ipsum illustrat doctissimus Jacobus Goar in notis ad orationem, qua palmæ distribuuntur Dominica ipsa Palmarum, Inter matutinas, inquit, laudes decantandas Palmarum gestatio, earumque celebritas perficitur a Græcis, cum ingressum Missæ imitati a Lampadario facem accensam gestante, & præeunte cantatur *iniquum* devotum opus ab impiissimo Principe Theophilo, ut Cedrenus refert, editum . Egredimini gentes, egredimini quoque populi ; respicite Cælorum Regem, loco enim Christi Euangelium procedit . Tum ad cantum hunc adimplendum, sequitur Diaconus, & Euangelium, Christi figuram gestat . Procedit deinde Pontifex, & tandem Sacerdotes sacras imagines manibus tenentes, & e populo quidam ultimum agmen claudunt ; eorumque Processio-
ne finita matutinarum precum residuum perfolvitur ; in quo *Antia*, idest palmæ nullatenus dimittuntur . Hic est apud Græcos solemnitatis Palmarum ritus, cujus & apud Latinos institutionis originem Ciacconius ad S. Gregorium Magnum, Pontificem Maximum, refert . Verum de Evangelii libro Christum Dominum referente in processione Palmarum solemnitate delato expresse meminerunt Ordo Romanus apud Hittorpium, & creditus Alcuinus in libro *De divinis officiis* inter alia, ubi hæc habet : *Hodie præparetur quoddam portatorium honestissime in quo intromittitur Sanctum Euangelium, quod intelligitur Christus, & statuitur in Ecclesia ante*
S 2 aram,

aram, unde clerus processurus est. Sacris vero diei palmarum designatis cæremoniis narrationem prosequitur: *Deinde suscipiunt Diaconi superscriptum portatorium cum Evangelio, bajulantes cum ingenti exultatione jugum Christi suave, & onus ejus leve: præcedente aqua benedictæ cum candelabris, atque thymiamateriis, cum aliis ornamentis.*

Hunc denique ritum in sacris Ecclesiis, & Monasteriis Germaniæ viguisse luculenter demonstrat Edmundus Martene *De antiqua disciplina* cap. xx. num. xi. additque in Anglia, & quibusdam aliis regionibus non solum in figura, sed in ipsa rei veritate Christo debitum honorem esse impensum; delata hac in processione, summa cum reverentia Sacrosancta Eucharistia; ita enim decernunt statuta Lanfranci Cantuariensis Archiepiscopi; ita describit Missale antiquum Ecclesiæ Sarisberien- sis; meminitque hujus ritus Matthæus Paris *De vitis* xxiiii. *Abbatum Monasterii S. Albani*; ubi describit vasculum, seu scrinium a Simone Abbate eleganter elaboratum ad portandum Corpus Domini in processione in ramis palmarum.

Evangelii textus una cum Christi Corpore in Sepulcro asservatus, quod feria v. Hebdomada sancta, in ipsius memoriam quotannis fieri solet.

C A P U T III.

I Nitio capitis tollendum est dubium, cur die Coenæ Domini, atque Eucharisticæ institutionis, memoria, & representatio sepulturæ pridie ab Ecclesia recolatur, quam Christus pateretur? Id enim contra ordinem temporis,

poris, & seriem mysteriorum videtur, quum Christus Crucifixus, mortuus, atque sepultus die sequenti Parasceve fuerit: non igitur feriæ quintæ, sicuti moris est, sepultura Christi memoria, sepulcrique erectio congruit. Respondet Gavantus locum illum, ubi Sacratissima Eucharistia feria quinta Hebdomadæ sanctæ asservari solet, *abuse* a vulgo dici *Sepulcrum*. Verum ego satis mirari nequeo, cur ipsa vox tanto scrupulo afficiat Gavantum; quum, ut recte notat Paulus Maria, Quartus in tractatu *De Processionibus speciatim*, puncto III. a viris etiam eruditissimis, ab Episcopis, a S. Carolo Borromæo in Concilio Mediolanensi IV. *Sepulcrum* appellitur; quo nomine etiam vocatur a Cornelio a Lapide, sacrarum literarum peritissimo, qui exponens Isaïæ vaticinium cap. xi. *Erit sepulcrum ejus gloriosum*; sic ait: *Sepulcrum Christi est etiam gloriosum annua representatione; & pompa, qua fideles multis in locis solent magnificum Christo passio, & mortuo sepulcrum excitare ejusque sepulturam gloriosam repræsentare.*

Dico itaque cum laudato Quarto repræsentari quidem hac die ab Ecclesia mysterium sepulturae Christi, sed per anticipationem; cujus ratio est quia sepulcrum Christi vere fuit, & est gloriosum juxta Isaïæ prophetiam, unde jure meritoque vult Ecclesia, ut cum gloria, ac pompa repræsentetur. Quia vero gloria hæc, & pompa, apparatusque festivus die Parasceve minime congruebat; tunc enim ubique in Ecclesia, ejusque Ministris apparet luctus, & mæror propter Christi Domini mortem, iccirco per anticipationem fit representatio gloriosi sepulcri feriæ quinta, cui magis congruit apparatus festivus, & pretiosus; nam in officio ejus dici lætitia cum luctu, gaudium cum mærore conjungitur, ob differentiam mysteriorum, ut notat Rupertus Abbas Tuitiensis lib.v. *De divinis officiis*, cap.xiv. Siquidem ob
insti-

institutionem Sacramenti Eucharistiæ, & propter convivium suavissimum nobis a Christo in ultima Cœna paratum sui pretiosissimi corporis, & sanguinis gaudet, & lætatur S. Mater Ecclesia, canitque in Missa hymnum lætitiæ *Gloria in excelsis Deo*, & *Credo*. Locus etiam ubi asservatur in crastinum Sacra Hostia dat pariter ex una parte causam gaudii, quatenus est Thronus magnificentissime exornatus Christi Regis, & Sacerdotis in Eucharistia contenti; ex altera vero causam mœroris, quatenus repræsentat sepulcrum exanimati ejus corporis; sed gloriosum sepulcrum, ob prodigia ibi a Deo patrata.

Quo ritu Eucharistia sacratissima reçonderetur, egregie explicat Edmundus Martene variis Ecclesiarum monumentis. Quod vero nostrum spectat ritum, quem titulo capitis posuimus; antiquum Rituale ms. Ecclesiæ Sveffionensis agens de feria sexta Parasceves inter alia hæc habet. *Dum tractus cantatur, Archidiaconus ascendat in pulpitu sic: Clericulus cum incenso nudis pedibus eum præcedat: Deinde Subdiaconus ferens temporalia, insula indutus, post illum Archidiaconus ferens Evangelium panno serico rubro involutum, insula sua plicata, & in modum stolæ super humerum imposita: finitoque tractu statim incipiat: Passio Domini nostri Jesu Christi secundum Joannem. Gloria tibi Domine non dicitur. Egressus Jesus &c. Et cum dicitur, Diviserunt sibi vestimenta mea &c. Duo Subdiaconi, qui primum tractum cantaverunt stantes in albis ad cornu Altaris rapiunt illas duas paulas, qui vestem Domini signant super quam milites miserunt sortem. Lumen non portatur ante Evangelium; lumen in tota Ecclesia hodie debet celari. Tenebræ enim factæ sunt super universam terram ab hora tertia usque in horam nonam, moriente vero illo qui ait: Ego sum lux mundi, sol obscuratus est, & luna non de-*
dit

dit lumèn suum. Finito Evangelio Sabdiaconas accipiat illud, & quasi in occulto sub insula sua, velut in sinu suo deferat ad sepulcrum, clericulo cum rhure præcedente, impositoque super Altare quod est in sepulcro, ambo revertuntur.

Notationem quoque merentur antiqui ritus Lugdunenses Monasterii S. Martini Athanacensis, qui feriat quinta Cœnæ Domini hæc præ aliis observanda præscribunt: *In his tribus diebus post perceptionem Eucharistiæ, habeat Sacrista paratam textum Evangeliorum cum scutellis argenteis ad hoc deputatis, & posito corpore Domini inter duas patenas, & ponantur dictæ patenæ inter scutellas prædictas, & dictæ scutellæ ponantur inter textum Evangeliorum, & cum incenso, & cereis deportetur cum multo honore: & dum Presbyter deferat Corpus Domini, teneant Ministri pannum sericum desuper ipsum & ponatur Corpus Domini ad locum ad hoc præparatum: & dum deferatur, totus condecens flectat genua, donec sit repositam, & ponatur cereus ante Corpus Domini, qui ardeat quandiu ibi fuerit, nisi ad Benedictus, & tunc extinguatur cum aliis, & iterum accendatur.*

Obiter hic observabis quod etiam notat Martène de antiqua Ecclesiæ disciplina in divinis officiis cap. xxii. §. vi. num. xiii. quam simplices scilicet fuerint veterum ritus in recondenda sacra Eucharistia. Nostriis vero temporibus pia fidelium devotio ad refarciendas aliquo modo illatas a nefandissimis hæreticis Sanctissimo Sacramento injurias, cum summa rituum pompa ad præparatum quam ornate fieri potest Oratorium illud deducit: Reconditam autem in sepulcro Eucharistiam clavè obferari jubet Missale Augustodunense: addit Missale Mozarabum, ut cum cera duobus sigillis obsignetur ad similitudinem: procul dubio sepulcri Dominici, quod Pilatus signari jussit cum custodibus.

De

De ritu Evangelium legendi ad pedum lotionem, quam vocant Mandatum, feria quinta Cœna Domini.

C A P U T IV.

Mandatum ita dici, quod Christus Dominus pedum lotionem Apostolis suis atque discipulis in perpetuum observandam mandavit, communis Scriptorum docet sententia. Superflua proinde est & vana ritus hujus institutoris inquisitio. Nec enim S. Gregorius Magnus, ut recte notat vir doctissimus Jacobus Goar ad *Græcorum Rituale*, vel quivis alius sequutus Pontifex, illius auctor haberi potest, cum peregrinorum Bethlehemiensis confluentium pedes lavisse S. Hieronymum, in ejus epistolis legamus, & S. Laurentius Confessoribus in carcere positis idem charitatis, & humilitatis officium præstiterit; & baptisma suscepturis, communionisque consortibus lavipedium, ut dicunt, multo ante S. Gregorii tempora, a S. Ambrosio *De Sacramentis*, & S. Augustino Epistola cxix. cap. xviii. receptum fuisse edoceamur. Potuit tamen fateor instituto jam, & commendato huic ritui, feriæ quintæ in Cœna Domini tempus assignare S. Gregorius, vel alius post ipsum Pontifex Maximus, ut quod Christus ea die edidit abjectionis opus, tota ubique Ecclesia imitaretur: prius enim illius celebrandi diem omnino incertum fuisse, ex laudata S. Augustini Epistola colligere licet.

De hoc mandato cum Evangelio Missæ hujus diei meminit Ordo Romanus apud Gavantium parte iv. titulo viii. ritus vero in Ecclesia latina ita præscribitur, „Post denudationem altarium hora competenti facto signo cum tabula conveniunt clerici ad faciendum mandatum: Prælati, seu Superior super amictu & alba induitur stola, & plu-

& pluviali violaceis, & in loco ad id deputato, ministrante Diacono, (qui paratus cum Subdiacono, ut in Missa paramentis albis ei assistit) imponit incensum in thuribulo. Deinde Diaconus librum Euangeliorum ante pectus tenens, genuflexus ante Superiorem petit benedictionem: qua accepta adstantibus duobus Acolythis cum candelabris accensis, & Subdiacono librum tenente, signat librum, & incensat, & cantat, ut moris est Euangelium: *Ante diem festum Pascha*, ut in Missa: quo finito Subdiaconus portat librum apertum osculandum Superiori, & Diaconus eum de more incensat. Postea Superior exuitur pluviali, & per Diaconum, & Subdiaconum præcingitur linteo, & sic præcinctus, assistentibus sibi iisdem Diacono, & Subdiacono accedit ad lotionem pedum, & per ordinem dispositis iis, qui lavandi sunt, clericis pelvim & aquam ministrantibus, Subdiacono singulorum pedem dextrum tenente, genuflectens singulis illorum pedem lavat, extergit, & osculatur, Diacono præbente linteum ad abstergendum.

Hæc omnia secundum mysticum sensum ex Euangelio, quod est caput officii pendere monent Rupertus Abbas Tuitiensis, & Gulielmus Durandus Episcopus Mimatensis: quorum alter in *Rationali divinorum officiorum* scribit, „Christus quidem cum discipulis coenans surrexit a coena, vestimenta deposuit; linteo se præcinxit, aquam in pelvim misit, & inter coenandum pedes illorum lavit, & ipsos lavare docuit, & post lotionem iterum recubuit. Nempe Christus a coena surgere, est ab accubitu Patris venire: vestimenta deponere, se exinanire, linteum præcingere, formam servi accipere: aquam in pelvim mittere, sanguinem suum effundere: pedes lavare, peccata remittere: linteo extergere, passionis fide mundare: vestimenta resumere est & a mortuis resurgere, & vestem gloriosæ carnis induere:

T

recum-

recumbere est & ascendere, & in dextera Dei sedere : discipulos docere, est eis Spiritum Sanctum mittere. Sic ille.

Apud Græcos officii ritus divini, & sacri ut dicunt *Lavipedii* ita se habet : Finitis quibusdam precibus, & post exclamationem, dicente Sacerdote : *Et ut digni fiamus*, in dispositis scamnis qui lavandi sunt sedent. Et Sacerdote primum lavipedii cantare incipiente Evangelium, stat superior; & prout narrat, vel continet Evangelium, exequitur. Cum itaque dicit, *Ponit vestimenta sua*, deponit & ipse mandyam, idest cappam. Cum vero profert : *Linteis accepto præcinxit se*, ipse quoque sabbano, longiori linteamine se succingit. Cum autem ait, *Mittit aquam in pelvim*, mittit & ipse aquam tepidam. Et rursus dicto, *Cæpit lavare pedes discipulorum*, ipse quoque lavare adoritur, facto initio ab Ostiario ad Œconomum usque, & Ecclesiæ Præfectum, qui est duodecimus : & uniuscujusque, postquam lotus est, pedes abstergit, & osculatur. Cum vero ad Œconomum pervenit, tunc Evangelii reliquum Sacerdos percurrit : *Venit ergo ad Simonem Petrum, & dicit ei ille*. Et deinceps Evangelium absolvit. *Et ut digni fiamus* : & incipit Evangelium quod est secundum Joannem : *In illo tempore. Sciens Jesus, quia omnia dedit ei Pater in manus &c.* usque ad verba illa : *Non estis mundi omnes*. Et post completum Evangelium dissolvit Præpositus syndonem, & mandyam resumit. Eoque in loco suo stante, exclamat Sacerdos : *Et ut digni simus Sanctum audire Evangelium*; & secundum Evangelium legit, quod est secundum Joannem : *In illo tempore. Postquam lavit Jesus pedes discipulorum*, usque ad verba, *Si hæc feceritis, beati eritis, si feceritis ea*. Dicto Evangelio Sacerdos quandam orationem recitat, deinde dividitur buccella panis, & fit dimissio.

De ritu

*De ritu deferendi Euangelium in Processione
matutina die Paschatis; ac de ipsius usu
apud Græcos in salutatione per fra-
ternum osculum eadem die.*

CAPUT V.

Duplicem die Paschatis peragi consuevisse Processionem, matutinam scilicet, ac vespertinam prodit Ordo Romanus apud Hittorpium. In priore expresse fit mentio ritus nostri, nimirum deferendi Codicem S. Euangelii, sic enim ait: *Die Sancto Pascha induti solemnissimis vestimentis omnes clerici convenientes ad stationem ad S. Mariam Majorem, primitus cantent Tertiam. Quæ finita respergi aqua Sancta, quæ pridie collecta est de fonte, tam ipsi, quam & omnis populus, procedunt cum omni decore, cum Crucibus, & thymiamate, præcedentibus etiam Sanctis Euangelis, cantantes antiphonas processionales &c.* De mysterio ejusdem Processionis egregie differit Rupertus Abbas Tuitiensis, *De divinis officiis* lib. VII. cap. xx., Cum Crucibus & vexillis, quæ sunt insignia victoriæ Christi, omnes albat & exultantes in laude Resurrectionis Sanctæ, procedimus cum tanta populi expectatione sexus utriusque, majorum pariter, & minorum, ut corporaliter quoque illud Propheticum in nobis impleri videatur, *Isaia LV. Cum jucunditate exhibitis, & cum gaudio deducemini, nam & montes, & colles exilient expectantes vos cum gaudio.* Ut autem processio ageretur (subdit laudatus auctor) ex mystica Euangelii auctoritate tractum est, scilicet ex eo quod Angeli mulieribus præcipiunt, dicentes: *Ite, dicite discipulis ejus, & Petro, quia præcedet vos in Galileam:* Et ipse Dominus occurrens illis

exeuntibus a monumento, cum tenuissent pedes ejus, & adqraissent eum, *Ite*, inquit, *nuntiate fratribus meis, ut eant in Galilæam, ibi me videbunt*. Concludit tandem Rupertus, & cap. xxiv. sic ait, Sicque fit, ut tota hæc Processio nihil aliud quam gratiarum actio sit; eo quod resurgens Dominus statim memor nostri, qui eramus absque Deo, discipulos suos in Galilæam ad hoc consilium evocavit, ut baptizarentur in nomine Patris, & Filii, & Spiritus Sancti. Unde locum quoque quo supremæ statione processionem terminamus, nos Galilæam nominamus.

Juxta Ordinis Romani præscriptum Statio est ad S. Mariam Majorem, & imitatione Ecclesiæ Romanæ, testatur Jacobus Eveillon de Processionibus cap. xv. in multis Ecclesiis matutinam hanc processionem ire primo ad altare seu ad Oratorium S. Mariæ, quod ei credatur Christus ante omnes apparuisse, sicut scribit S. Ambrosius lib. v. De Virginibus. *Vidit*, inquit, *Maria Resurrectionem Domini, & prima vidit, & credidit*: quamquam nonnulli contendant non de Maria Deipara, sed de altera Maria, quæ cum Maria Magdalena ivit ad monumentum, hæc Ambrosii verba esse intelligenda. Sed Græci id quidem diserte profitentur in Pentecostario hac die ita agentes: *Primum resurrectio Dei Matri manifestatur*. Hoc mysterium egregie observavit idem Rupertus ejusdem libri cap. xxv. „ Quid, inquit, Evangelicæ fidei convenientius Christiana sedulitas comminisci potuit? quid pulchrius, quid venerabilius, quam congratulari Matri Virgini super resurrectione Unigeniti jam non morituri, in cujus passione gladius animam ejus pertransivit? Perpendere gestit christiana devotio, quantus torrens gaudii repente inundans, locumque vulneris replens animam ejus ferro doloris confossam inebriavit, cum redivivus filius illi, ante omnes fortasse mortales, materno Virginem non defrau-

defraudans honore victoriam suam annuntiavit, & dulcia carnis suæ vulnera, quam illa veram de carne sua carnem conceptam peperit, deosculanda præbuit. Quid ergo? repugnare videbitur Euangelio referenti, quod surgens ergo Iesus primo Mariæ Magdalenæ apparuit? Absit. Sed omnibus Beatam Virginem Matrem excipimus testibus præordinatis, quos solos nominare ad Euangelistas pertinuit, vel quos Christi resurrectionem annuntiare decuit. Numquid illam nuntiare decebat, ut verba ejus tamquam deliramenta viderentur ante Apostolos? Si enim extranearum verba foeminarum visa sunt eis tamquam deliramenta, quomodo non magis Matrem amore filii delirare, crederent? Verissime ergo Matri filius resurgens apparuit: sed illa ut ab initio coeperat, ita & nunc conservabat omnia verba hæc conferens in corde suo. Quod si iccirco verum non videtur, quia nullus Evangelistarum scriptis hoc attestatur, consequens est quod nunquam post resurrectionem suam visus sit Matri, quia quando vel ubi apparuerit illi, nullus eorum nominatim edixit. Sed absit hoc ab illo, qui in lege sua Patrem, & Matrem honorare præcepit: absit inquam, ut Matrem propter se doloris gladio transverberatam, tam duræ negligentia talis filius inhonoraverit. *Et paullo inferius.* Igitur pulchre, & laudabiliter traditum est a nostris majoribus, ut in hodierna, cunctisque per annum processionibus B. Dei Genitricis memoriam prima statione visitemus eandem ob causam, quia in hodiernæ Missæ officio Statio ad S. Mariam præscribitur, ut eam principio lætitiæ nostræ proponamus. Hæc ille, quibus similiter feribit Durandus lib. iv. *Rationalis Divinorum officiorum* cap. vi.

Sed ut eo insuper unde digressi sumus revertamur, Euangelium in hac Processione deferretur, tum ut Christum Dominum Servatorem nostrum repræsentaret, tum etiam

etiā quia in statione legi debebat a Diacono Regionario; ut liquet ex codice Bibliothecæ Vaticanæ relato a Cardinale Francisco Maria Brancatio in dissertatione *De Optione sex Episcopatum* pag. ix. his verbis: *Est munus Diaconorum Regionariorum cantare Evangelium in Stationibus. Palatini cantant Evangelium in Ecclesia Lateranensi.* Apud Græcos vero alius quoque die Paschatis erat usus divini codicis, quippe quem in salutatione per fratrum osculum adhibebant. Nam ut ex Pentecostario scribit doctissimus Eveillon: *Accipit Sacerdos Sanctum Evangelium, & stat ante fores Sacrarii. Tum accedit Præpositus, & osculato primum Evangelio, deinde ipso Sacerdote, de ejus manu accipit Evangelium, & stat, illud tenens ad ejusdem dexteram. Tum ceteri ordine accedentes, singuli osculantur primum Evangelium, deinde Sacerdotem, & Præpositum: ac postremo omnes sibi invicem fraternæ charitatis osculum imperiunt.* Apud Codinum libro *De official. Aula Constantinopolit.* cap. xiv. in Processione Paschali Imperator lampadem gestat, procures vero aulici cereos arduos: & matutinis laudibus peractis, Protopapa, & Archidiacono in vestibulo sacrarii stantibus, altero Evangelium, altero Crucem portante, idem Imperator accedens osculatur primo Evangelium, deinde Protopapam, postea Crucem, & Archidiaconum.

Mos hic inter Christianos ab ipsis viguit Ecclesiæ primordiis, ut ad indicandum sincerum charitatis affectum osculis mutuis, seu advenientes, sive orantes, sive communicantes, sive alia mysteria celebrantes, alii alios consalutarent, dicendo: *Pax tibi*, seu *Pax vobis*. Testatur id quidem in primis Origenes his verbis: *Ex sermone Pauli, scilicet cum dicit: Salutate vos invicem osculo sancto: Mos in Ecclesia traditus est, ut post orationes osculo se invicem suscipiant fratres; Hoc autem osculum san-*

sanctum appellat Apostolus : quò nomine illud docet primum , ut casta sint oscula , quæ in Ecclesiis dantur ; deinde ut simulata non sint , sicut fuerunt Judæ . Osculum vero fidele primo castum sit , deinde pacem in se , simplicitatemque habeat in charitate non ficta . S. Augustinus sermone LXXXI I I . de diversis (qui est in die Paschæ) alloquens pueros pridie baptizatos : Ecce ubi est peracta sanctificatio , dicimus Orationem Dominicam , quam accepistis , & reddidistis . Post ipsam dicitur , Pax vobiscum : & osculantur se Christiani in osculo sancto , quod est signum pacis , si quod ostendunt labia , fiat in conscientia , idest quomodo labia tua ad labia fratris tui accedunt , sic cor tuum a corde ejus non recedat . Has ac alias complures Sanctorum Patrum auctoritates congerit magnus Annalium , Parens Cæsar Cardinalis Baronius ad annum Christi quadagesimum quintum . Fuit igitur , cum charitas fervebat , osculum inter Christianos commune symbolum , & pignus mutue dilectionis , & pacis : sed præcipue in festo Paschæ ; quò erat communicandum Corpori , & Sanguini Domini Jesu Christi , qui est pax nostra : ut odiis & simulatibus positis , animi invicem reconciliarentur ; & ut loquitur S. Augustinus , corde ad cor accedente , omnes unum fierent corpus , qui omnes de uno pano , & de uno calice erant participaturi .

Nec verò quis putet hæc ita promiscue tunc agi solita esse , ut viri , & foeminae sic indistincti se mutuo oscularentur . Nam (ut alibi diximus) in Ecclesia seorsim viros a mulieribus agere consuevisse , certissimum est . Verum quoniam , ea nihilominus adhibita cautela , adhuc inter se invicem osculantes , sive viros , sive foeminas aliqua fraus arte diaboli nonnumquam irrepsisse videretur , in pluribus Ecclesiis osculi sancti usus in osculum tabellæ , Cruce aut sacra Imagine insignitæ , honeste , ac laudabiliter mutatus est .

De

*De ritu recitandi Euangelium in Litanis ;
alicubi ad precipuas Civitatis Portas.*

CAPUT VI.

Notandum, ait Walafridus Strabo, de rebus Ecclesiasticis cap. xxviii. *litanias non tantum dici etiam recitationem nominum, qua Sancti in adiutorium vocantur, sed etiam cuncta, quæ in supplicationibus fiunt.* Litaniam, quæ definiri potest pia Cleri, vel Christiani populi precabundi cum certo ritu, ac caremonia progressio, Scriptores Ecclesiastici passim in Majorem, ac Minorem dividunt. Major illa dicitur, quæ instituitur vii. Kalendas Maji in festo S. Marci Evangelistæ: cujus Auctor fuit S. Gregorius Magnus Pontifex Maximus, teste Ruperto Abbate Tuitensi libro vii. *De divinis officiis* cap. v. Beda, & Adone in Martyrologio, imo S. Gregorius ipse lib. vii. Epistolarum appellat *Majorem*, & libro xi. *Septiformem*. Causam hujus Litanie S. Gregorio dedit horrenda lues, quam narrat Paulus Diaconus libro III. *De gestis Longobardorum*, & Gregorius Turonensis libro x. *Historie Francorum*. *Anno*, inquit, *quintodecimo Childerici Regis, Diaconus noster ab Urbe Roma Sanctorum cum pignoribus veniens sic retulit, quod anno superiore, mense nono, tanta inundatione Tyberis fluvius Urbem Romam obtexerit, ut ædes antiquæ diruerentur, horrea etiam Ecclesiæ sint, in quibus nonnulla millia modiorum tritici perire. Multitudo etiam serpentum cum magno dracone in modum trabis valide, per hujus fluvii abutem in mare descendit. Sed suffocate bestie inter falsos maris turbidi fluctus, littori ejectæ sunt. Subsecuta est e vestigio clades, quam inguinariam vocant; nam medio mense xi. adveniens primum omnium juxta illud quod in Ezechiele Propheta legitur: A sanctua-*
rio

rio meo incipite, *Pelagium Papam perculit: quo defuncto magna strages populi de hoc morbo facta est.* Tantis malis ut occurreret ejus successor S. Gregorius Magnus, anno *DLXXX.* indixit memoratam litaniam seu processionem, quæ *Major* est dicta, quod omnes totius anni supplicationes, & viæ longitudine, & precum prolixitate, & populi concursu superabat. Constat enim septem diversis procedentium & diversis locis hominum classibus; unde & *Septiformis* dicta est. Sermonem eo die a S. Gregorio habitum habes apud Gregorium Turonensem loco citato, & ipsum nostrum Gregorium lib. *XI. Epistolarum* cap. *II.* Accidit tunc teste eodem Turonensi, *unius horæ spatio dum voces plebs ad Dominum supplicationis emisit, octoginta homines ad terram corruisse, & spiritum exhalasse. Sed non desistit, inquit, Sacerdos tantus prædicare populo ne ab oratione cessarent.*

Minor litania appellatur, quæ triduo ante festum Ascensionis (qui dies jam dicuntur *Rogationum*) celebratur; cujus primus Auctor fertur S. Mamertus Vienneſis in Galliis Episcopus, anno circiter *ccccxii.* sed ut recte observat Cardinalis Baronius. *In Notis ad Romanum Martyrologium*, ad diem *xxv.* Aprilis S. Mamertus, restituit potius, & in meliorem formam reduxit sacras Rogationes. Enimvero satis id liquet ex Sidonio Appollinare Episcopo Arvernensi, qui epistola ad Aprum *xiv.* lib. *v.* hæc inter alia de pristina litaniarum observatione, jam negligentia torpescente, scribit. *Erant quidem prius (quod salvo fidei pace dubium sit) vagæ, tepentes, infrequentesque, & (ut sic dixerim) oscitabundæ supplicationes, quæ semper interpellantium prandiorum obicibus hebetabantur: ad quas, ut nihil amplius dicam, figulo pariter, & hortulano non oportuit convenire. In his autem quas suprafatus (Mamertus) Summus Sacerdos, & protulit pariter, & contulit,*

talit, jejunatur, oratur, psallitur, & fletur &c. Ex his quidem Sidonii verbis luculenter apparet quod monet Baronius, S. Mamertum Episcopum non tam instituisse, quam restituisse, & in meliorem formam sacras Rogationes reduxisse. Sane quidem S. Augustinus, qui tempore præcessit S. Mamertum de eisdem Rogationibus, quæ celebritatem Ascensionis Dominicæ præcedunt, non obscure meminit *Sermone cxxxiii.* de tempore in Vigilia Ascensionis tomo x. editionis Lovaniensis. Extat de Rogationibus Canon xxix. Concilii Aurelianensis I. anno. Reliqua videri possunt apud eos qui scripserunt *De divinis officiis.*

Ritus in hisce supplicationibus observandi præscripti sunt in Rituali Romano, quod notis nuper illustravit Vir clarissimus Hieronymus Baruffaldus. Verum præter consuetas preces, in plerisque Italiæ locis, Evangelia etiam tum intra, tum extrâ Civitatem recitari solent, illa scilicet ipsa, quæ in Missis Rogationum pronuntiantur. Processionale vero Ambrosianum in Litaniis Rogationum, agens de tribus ipsarum diebus inter alia hæc habet, „Sequuntur duodecim Stationes, in quibus singulis cantatur litania cum oratione, lectione ex veteri Testamento, & lectione ex Evangelio. Procedendo ab una statione ad aliam concinuntur Antiphonæ, & Psalmi. Post tertiam Stationem cantantur Prima, & Tertia, post sextam Stationem sexta, post septimam Nona. In octava vero Statione post recitatam S. Evangelii lectionem, canitur ab hebdomadario Canonico Metropolitana Ecclesiæ Missa solemniter; & habetur post Evangelium sermo ab Archiepiscopo de poenitentia, aut alio de genere, pro ratione temporum, & datur indulgentia. Post reditum processionis in Metropolitana Ecclesia cantantur vespere. Secundo die fiunt decem stationes: Post primam cantatur Prima, post secundam Tertia, post quartam Sexta, post quintam

No-

Nona . In Ecclesia septima , quæ est S. Nazarii , Diaconus ante lectionem Evangelii elata voce ait : *Parcite fabulis* . Custos etiam : *Silentium habete* . Alter vero respondit : *Habete silentium* , tum legitur Evangelium ex Luca . In octava Statione Missa celebratur , concioque habetur . In reditu vespere . In tertia vero statione neque litania , neque lectiones recitantur . Die tertio per Ecclesias undecim stationes totidem instituuntur , post primam dicitur Prima usque ad symbolum S. Athanasii ; post tertiam Tertia , & Sexta , post quartam Nona . In quinta quæ est ad S. Laurentium Diaconus dicit : *Parcite fabulis* . Reliqua ut supra , in eaque Missa celebratur . Hactenus processionale Ambrosianum . Ritum autem , quam maxime venerandum viguisse olim in Urbe Florentiæ , recitandi scilicet in sacra processione quatuor Evangeliorum lectiones ad totidem præcipuas ejus inclytæ Civitatis portas liquet ex quodam pervetusto Codice Evangeliorum ms. ante annos , ut creditur , dcc. qui Romæ in egregia nobilissimæ Barberinæ Gentis Bibliotheca asservatur num. mcccclxi r. quemque nobis demonstravit vir clarissimus , literarum bono natus Pompeus Abbas Compagnonus Patritius Maceratensis .

De ritu legendi Evangelium ad Aqua benedictionem , qua fit in pervigilio Epiphania .

C A P U T VII.

Ritum hunc Ecclesiæ antiquissimum alicubi obsoletum revocavit Religiosissimus Pontifex Maximus Benedictus XIII. quemadmodum & alios complures , qui penitus negligebantur , licet Romano Rituali præscripti essent . Sane cum ea sit utriusque Ecclesiæ Græcæ

ac Latine consensus Christum Dominum die Epiphaniæ fuisse baptizatum, ut patet ex hymnis, aliisque, quæ ad divina ejus diei officia recitamus, mirum videri non debet, si in memoriam Christi baptismatis celebrari hac die sacris cæremoniis solemnibus Aquæ benedictio consuevit, qua non solum homines in Ecclesia, eorumque domus a Sacerdotibus, faustis precationibus asperguntur, sed pleni etiam calices religiosissime ab omnibus asportantur. Meminit ejus ritus noster Lucas Archiepiscopus Consentianus, qui floruit ineunte Sæculo xiii. anno mcccii. illumque in libro, quem Ordinarium inscripsit, quique asservatur in Romano Cœnobio S. Isidori, confirmat his verbis. *Completis Laudibus, & pronunciato ex more martyrologio, mox Dominus, vel Sacerdos, qui laudes celebravit faciat solitum exorcismum salis, & aquæ, & circumstantes aspergat cum fasciculo hyssopi: Capellani quoque Civitatis aspergant inde fideles omnes die ipsa tam in Ecclesia, quam ubicumque possunt, in memoriam baptismi Dominici.* At vero quam sit vetustus ejusmodi ritus mirifice docet S. Joannes Chrysostomus, homilia *De Baptismo Christi*, testisque est egregius illius miraculi quo Aqua multis annis incorrupta permanebat. *In hac, inquit, solemnitate sub medium noctem cum omnes aquam acceperint, domum calices referunt, & recondunt, & per integrum annum conservant; utpote quod hodierna die sanctificatæ sint aquæ; fitque miraculum evidens, dum nihil temporis longinquitatē, aquarum illarum natura vitiat, sed integro anno, atque adeo biennio, & triennio sæpe quæ hodie fuit hausta, incorrupta, & recens permanet, ac post tantum temporis cum iis, quæ nuper fuerint fontibus eductæ certat.* Porro qui ad Jordanem olim habitabant populi in memoriam, & honorem Jesu Christi baptismatis, qui in eo hac die a Joanne tinctus est, in eundem fluvium descendere,

dere , ac se se ablueri solebant . *Cum dies sanctus Epiphaniarum advenisset* , inquit Gregorius Turonensis lib. I. De Gloria Martyrum cap. lxxxvii. & omnes in Jordanem descenderent abluere tam vulnera corporis , quam animæ cicatrices . Neque id in solo Jordane fieri consueverat , sed pluribus aliis in locis orientales populi fluviis , fonteive benedicebant , atque in eos se se immergebant , quasi proprium renovaturi , sive Christi imitaturi baptismum : id quod apud plerosque ad hanc usque diem perseverare , ex quibusdam illarum partium relationibus docet Martene De antiqua Ecclesiæ disciplina in divinis officiis celebrandis cap. xiv. num. II.

Aliud perinsigne miraculum refert S. Epiphanius , hæresi li. quod hac ipsa die suo tempore in pluribus Orbis locis contingere solebat , aquæ scilicet mutata in vinum . *Quapropter* , inquit , *etiam , in multis locis usque in hunc diem hoc fit , quod tunc factum est divinum signum in testimonium incredulis , veluti testantur in multis locis fontes ac fluvii in vinum conversi : hujusmodi ad Cibyram Carie Oppidum fons est , qui eadem illa hora quæ ministri aquam hauscrunt ac Salvator dixit , Date Architricino , in vinum vertitur ; idem & in Geraseno Arabie fonte contigit . Nos in Cibra illo fonte potavimus ; fratres nostri ex Geraseno , qui est in Martyrum Templo : plerique vero idem & de Nilo Egypti fluvio confirmant : quare in undecima Tybi idest die vi. Januarii apud Egyptios omnes hauriunt aquam , & reponunt , tum in ipsa Egypto tum in multis regionibus .* Hæc Epiphanius . Simile prodigium in Andro una ex Cycladum insulis nectum a recentioribus scriptoribus narratur , quod scilicet sit ibi fons qui hac die Epiphaniæ vini saporem acquirit ; sed & Plinius etiam similis rei egregius videtur assertor , licet unius tantum diei spatio discrepet a prædictis ; dum ait *Mutiano ter Consule Auctore in Andro Insula*
No-

Nonis Januarii fontem aquæ vini saporem habentem fluere consuevisse. Quare non immerito nonnullæ idem Ecclesiæ triplex in festo Epiphaniæ Euangelium decantabant, in trium Christi apparitionum, totidemque prodigiorum memoriam. Imo quod ad rem attinet nostram, in veteri Rituali Burdigalensi habetur benedictio aquæ in vigilia Epiphaniæ, in qua tria leguntur Euangelia.

In compluribus Regni Neapolitani locis, præsertim nostræ Calabriæ ad solemnem aquarum benedictionem, quæ in Epiphania quotannis celebratur, præter exorcismos, ac pias quasdam preces bina Euangelia pronuntiantur. Primum ex S. Joanne cap. vii. *In illo tempore. In novissimo autem die magno festivitatis stabat Jesus, & clamabat dicens, si quis sitit, veniat ad me, & bibat. Qui credit in me, sicut dicit Scriptura, flumina de ventre ejus fluent aquæ vivæ, hoc autem dixit de spiritu, quem accepturi erant credentes in eum.* Alterum Euangelium desumitur ex eo quod est secundum Lucam cap. iii. *Factum est autem cum baptizaretur omnis populus, & Jesu baptizato, & orante apertum est Cælum &c.* usque ad illa verba: *Jesus autem plenus Spiritu Sancto regressus est a Jordane.* Memorat ipsa hæc Euangelia vetus Ecclesiæ Neritonensis ritus solemnibus aquarum benedictionis die Epiphaniæ Domini in Cathedrali Templo a Protopapa, & Sacerdotibus Græcis peractæ, editus, ac præstantissimis notis illustratus a Viro clarissimo Sebastiano Pauli Congregationis Matris Dei, qui hoc anno Quadragesimæ tempore, summo doctorum virorum plausu, in S. Laurentii Basilica, dicta in Damaso concionatur. Eadem Euangelia in Pontificali ritu cernere licet, quem Benedictus XIII. Pont. Max. anno MDCCXXVII. edidit; ubi iis etiam, qui in pervigilio Epiphaniæ solemnibus Aquæ benedictioni devote interfuerint centum Indulgentiæ dies perpetuo est elargitus.

Euan-

*Euangelium in aris campani benedictione
lectum.*

C A P U T VIII.

Vetus est Ecclesiæ ritus campanas consecrandi, quem nonnulli auctores a Summo Pontifice Joanne XIII. sive ut alii dicunt XIV. originem duxisse autumant; sed multo antiquiorem ex ritualibus libris, ante memoratum Pontificem conscriptis, in quibus formula benedicendi campanas reperitur, vir doctissimus Angelus Rocca testatur commentario *De Campanis* cap. v. quem deinde sequuti sunt Joannes Bona Cardinalis, rerum liturgicarum libro I. cap. xxii. Franciscus Pagi Breviario Romanorum Pontificum sæculi x. in Joanne XIII. Edmundus Martene, ac cæteri recentiores eruditi. Sane in capitulari Caroli Magni, ducentis fere annis ante Joannem jubetur, *Ut Cloccæ* (idest campanæ) *non baptizentur*. In ordine Romano apud Hittorpium, omnium judicio antiquissimo tota forma benedicendi, seu consecrandi campanas præscripta legitur. Edmundus Martene, libro II. *De antiquis Ecclesiæ ritibus* capite, xxi. asserit antiquos Codices manuscriptos, & Egeberti præsertim Pontificale, & Gellonense Caroli Magni tempore exaratum referre ritus, & preces benedictionis, sed nullos veteres codices ritualium testari nomen alicujus Sancti campanis benedictis impositum fuisse; verum Auctor vetustus nomine Alcuini de hoc ritu ita inquit: *Neque novum videri debet campanas benedicere, & ungere, eisque nomen imponere*. Magnus annalium parens Baronius utriusque meminit ritus, quum campanam Basilicæ Lateranensis primariam a Joanne XIII. sub nomine S. Joannis Baptiste benedictam aut consecratam fuisset.

fuisse scribit tomo x. ad annum dccccxviii. his verbis . Joannes Pontifex Romam (e Capua scilicet) rediens , cum Imperator ibi (hoc est Capuæ) adhuc moraretur , contigit primariam Lateranensis Ecclesiæ campanam miræ magnitudinis recens ære fusam super campanile elevari ; quam prius idem Pontifex sacris ritibus Deo consecravit , atque Joannis nomine (puto Baptistæ) cujus Ecclesiæ esset usui , nuncupavit . Qui sacer ritus in Ecclesia perseveravit , ut eo modo quo ipse usus est , campanæ in Ecclesiis collocandæ , Deo primum imposito eis nomine dicarentur . Quod testantur veteres Codices rituales . Ita Baronius , cujus postrema verba perperam Pagius sugillavit , auctoritate Edmundi Martene agentis veteres ritualium libros nullam impositi campanæ nominis facere mentionem , quasi is scriptor alias eruditus cunctos Urbis , & Orbis ejusmodi Codices perlegerit .

Hæretici vero Magdeburgenses centuria x. capite vi. columna cclxxxiv. inter alia probra , quibus Romanos Pontifices afficiunt , Joannem XIII. horrendi erroris , & sacrilegii accusant ; quippe qui contra Christi institutionem coeperit baptizare campanas ; quod etiam frequenter alii hæretici nobis objiciunt . Mirum equidem est , cur non etiam dicant campanas a nobis antea catechizari , & instrui , ut possint fidei symbolum resonare . Sed quid quæso ipsi reprehendunt ipsam rem , an vero nomen baptismi æris campani ? Si rem , aperte decipiuntur , vel mentiuntur , (inquit Eminentiſſimus Bellarminus libro iv. *De Summo Pontifice* cap. xiii. num. xix.) Non enim campanæ revera baptizantur , sed solum benedicuntur , & cultui divino , eo modo quo templa , altaria , calices , & alia sacra vasa , consecrantur , ut patet ex Pontificali Romano , ubi habetur benedictio campanæ , & nulla sit mentio usquam baptismi ;

ptismi; neque dicitur, *Ego te baptizo in nomine Patris, & Filii, & Spiritus Sancti*; sed solum funduntur preces ad Deum, ut in aliis benedictionibus. Si nomen reprehendunt, sciant baptismi nomen non a Pontificibus, sed a vulgo, & quidem metaphorice accommodatum campanarum benedictioni; quia nimirum vident campanas aqua benedicta aspergi, & eis nomina interdum imponi, ut distinguantur aliæ ab aliis; imo in Hispaniis dum campanæ consecrantur, vel ut improprie ajunt baptizantur, vir, & mulier ex hominibus loci primariis tamquam compadres admittuntur; quamobrem codex ritualis proprius adhibetur, in quo præter alia, quæ in Pontificali Romano extant, compadres etiam commemorantur.

At vero ut ritum a Romano Pontificali præscriptum prosequamur, campana antequam in turrin campanariam ut dicunt collocetur, consecrari solet hoc modo. Prius enim tota intus, & extra cum aqua benedicta ab Episcopo una cum ministris lavatur, deinde mundo linteo extergitur, interim aliquot Psalmi recitantur; Quibus finitis Episcopus cum pollice dexteræ manus, de oleo sancto infirmorum signum Crucis facit extra, & supra campanam. Deinde oratione ad ipsam pertinente recitata; cum linteo mundo signum Crucis factum ab ipso Episcopo extergitur; & Antiphona cum Psalmo item pronuntiata, Episcopus cum pollice dexteræ manus, de oleo sancto infirmorum septem facit Cruces exterius super campanam, intus vero cum chrismate quatuor sic dicens: *Sancti ✠ ficetur, & conse ✠ cretur, Domine, signum istud, In nomine Pa ✠ tris, & Fi ✠ lii, & Spi ✠ ritus ✠ Sancti. In honorem Sancti N. Pax tibi.* His peractis, atque oratione pro effectibus campanæ consecratæ mirabilibus impetrandis recitata; nec non thymiamate, thure, ac myrrha thuribulo impositis; thuribu-

erudentium ferventur: ut procul pellantur hostiles exercitus, & omnes insidiæ inimici, fragor grandinum, procella turbinum, impetus tempestatum, & fulgurum temperentur infesta tonitrua, & ventorum flamina suspendantur, spiritus procellarum, & aereæ potestates prosternantur: breviter ut audientes fugiant ad Sanctæ Matris Ecclesiæ gremium, & ante S. Crucis vexillum, cui flectitur omne genu; quemadmodum hæc in solenni benedictione campanæ reperies. Hæc ad verbum ex laudato Concilio Coloniensi; quæ item omnia in Ordine Romano; atque etiam in Pontificali pariter Romano, in ipsa campanæ benedictione sive consecratione leguntur. Plura de origine campanarum, usu, effectibus, ac aliis scitu dignis edisserit Angelus Rocca doctissimo commentario *De campanis*.

Illud ego minime prætermittam, quod etiam tradit præfatus Auctor, pulsare campanas, quod hodie passim laici ac viliores homines usurpant, pertinuisse olim ad Sacerdotes. Amalarius Fortunat. lib. III. *De Ecclesiast. offic.* cap. I. postquam sacras campanas originem a tubis veteris Testamenti traxisse dixisset, illasque ora prædicatorum, novi Testamenti significare docuisset, statim subdit: *Ne despiciat Presbyter hoc opus agere, ut in ipso sit imitator filiorum Aaron*. Sane præcepit olim Deus, ut filii Aaron Sacerdotes tubis clangerent ad convocandam multitudinem. Quem ritum ad novi Testamenti Sacerdotes transisse, atque in Ecclesia diu perdurasse constat etiam ex Capitulari Caroli Magni lib. VI. cap. CLXVII. ubi statuitur ut Sacerdotes signa tangant horis canonicis. Idcirco Ordo Romanus, & antiqua Ritualia, itemque Concilium IV. Carthaginense materiam Ostiariatus in sola clavium traditione constituunt, nulla habita mentione pulsationis campanæ, quia hoc ad ejus officium non pertinebat. *Neque sine ratione* (inquit Eruditissimus

Cardinalis Bona libro I. Rerum liturgicarum capite, xxxi.) *Majores nostri decreverunt a Deo sacratis viris signa tangi, quia & sacra res est fidelem populum ad divinum officium, ad Missam, ad communionem, ad audiendum verbum Dei coadunare: & ipsa campana Episcopali benedictione, sanctique olei unctione consecrata sunt, & inter sacra Ecclesiae vasa connumerantur. Hodie officium Ostiarii est campanas pulsare, quem decet superpelliceo indutum esse, dum signa pulsat, quia munus sui ordinis exercet. Eos vera (verba sunt Stephani Duranti lib. I. De Ecclesiae ritibus cap. xxxi.) qui campanas pulsent congruit superpelliceis indui. Hanc autem congruentiam ex Concilio item Colonienſi desumptam esse innuit. Quae profecto cum ita sese habeant, campanae nullo modo a laicis, nec sine superpelliceo ab Ecclesiasticis viris pulsari debent, ut recte docet numquam satis laudatus Angelus Rocca commentario De campanis cap. xlii.*

Evangelii usus in exorcismis ad Demones ab Energumenis expellendos.

C A P U T IX.

Quemadmodum vetus Judaeorum populus certant, & praescriptam formam habuit expellendi Demones e corporibus hominum, iique qui id officii obibant exorcistae nuncupabantur, ut habetur Actorum cap. xix. ita Redemptor noster Christus Dominus in novo Testamento Apostolis, & Discipulis potestatem liberandi energumenos a maligno spiritu elargitus est. Modus, & forma constituendi exorcistas in IV. Carthagenſi Concilio circa annum cccclxxxviii. Can. vii. ita praescribitur: *Exorcista cum ordinatur accipit de manu Episcopi libellum, in quo scripti sunt exorcismi, dicente sibi*

sibi Episcopo: Accipe, & commenda memoriæ, & habeto potestatem imponendi manus super energumenum, sive baptizatum, sive catechumenum. Exorcismus, ut refert Isidorus Hispalensis libro II. *De Ecclesiasticis officiis* cap. xx. *est sermo increpationis contra immundum spiritum, in Energumenis sive cateshumenis factus, per quem ab illis diaboli nequissima virtus, & inveterata malitia, vel violenta incurfus expulsa fugetur; quod significabat lunaticus ille, quem increpavit Dominus Jesus, & exiit ab illo Dæmonium.* S. Cyrillus Hierosolymitanus in præfatione suarum catecheseon exorcismos salutares, & divinos vocat, atque e sacrarum literarum fontibus emanasse asserit. Et sane Josephus ait lib. viii. *Antiquitatum*, Deum communicasse Salomoni exorcismos; quorum liberum ad sua usque tempora conservatum fuisse testatur Origenes in Matthæum cap. xxxvi. Tertullianus *De corona militis* cap. xi. & *De spectaculis* cap. xxvi. ostendit exorcismis a primitivæ Ecclesiæ Christianis pronuntiatis Dæmones fuisse fugatos. S. Cyprianus epistola ad Demetrianum ait voce humana per exorcistas, & potestate divina flagellari, uri, & torqueri Diabolum. Verba quæ in exorcismis adhibebantur edicit Prudentius in *Apotheosi contra Judæos* his versibus.

Intonat Antistes Domini: fuge callide serpens;

Exue te membris, & spiras solve latentes.

Mancipium Christi fur corruptissime vexas;

Desine, Christus adest humani corporis ultor.

Non licet ut spoliū rapias, cui Christus inhaesit.

Pulsus abi ventose liquor, Christus jubet, exi.

Placuit egregias tot Patrum, qui fuere Ecclesiæ lumina, proferre sententias; quibus cæca Joannis Calvinii impudentia refelli queat ita garrientis lib. iv. *Institutionum*, cap. xix. *Exorcistas vero in quem tandem, finem consecrarent? Audio Judæis suos fuisse exorcistas;*
sed

sed ab exorcismis dictos video, quos exercebant. De ementitis istis exorcistis quis unquam fando audivit, quod specimen unum suæ professionis ediderint? Fingitur istis potestas data imponendi manus super energumenos, & catechumenos, & demoniacos; sed ipsi se potestate præditos demonibus persuadere non possunt. Isthæc Calvinii est blasphemia; sed quid denotant S. Cypriani verba loco allegato? Voce, inquit, humana per exorcistas, & potestate divina flagellatur, uritur, & torquetur Diabolus.

Quod vero ad ritum attinet legendi in exorcismis Evangelium Energumeno; res est antiquissima, atque laudabilis; nam ut recte notat Gulielmus Durandus in suo *Rationali* lib. iv. cap. xxiv. num. xxi. *Contra Diabolum legitur Evangelium, ut illum sua virtute expellat; quoniam diabolus nihil tantum odit, quantum Evangelium.* Quocirca Rituale Romanum Titulo *De exorcizandis obsessis a Dæmonio* sapienter præscripsit, ut hæc Evangelia, unum scilicet vel alterum energumeno legentur. Primum est S. Joannis. *In principio erat Verbum &c.* Quod Dei ineffabilem essentiam, ejusque miram incarnationem ostendit. Secundum est S. Marci narrantis signa credentium, inter quæ illud est, quod in Nomine Jesu dæmonia ejicient. Tertium est S. Lucæ, & continet potestatem datam Apostolis calcandi supra serpentes, & scorpiones. Quartum pariter est S. Lucæ qui historiam narrat dæmonii muti a Christo ejecti: Mirabiles hujus ritus effectus passim leguntur apud Surium, atque Bollandianos in vitis Sanctorum, qui sola Evangelii lectione sæpenumero e corporibus hominum dæmones expulerunt.

Hætor Boethius Scotorum res describens libro viii. testatur in Marrea regione se ab iis qui conspexerant accepisse, quod ejus verbis adscribam: Puella natalibus altis, forma conspicua, complurium nobilium aver-

aversata connubium, in infandam cum cacodæmone incidit consuetudinem; quæ cum uterum ferret, parentum rigore coacta edere stupratorem, adolescentem mira pulchritudine, frequentius secum noctu, interdiu nonnumquam convenisse; unde venisset, quove abiisset nescire se respondit. Parentes tametsi filiæ parum crederent, accuratius rem advertentes, consilio quis esset qui gnata expugnasset pudicitiam explorandi: cognito tertio post die, indice ancilla stupratorem adesse, reclusis foribus, accenso tædarum ingenti numero cubiculum ingressi, horrendum monstrum figura supra humanam existimationem terribili in filiæ amplexibus sunt conspicati. Cucurrere ocyus complures ad fœdum excitati spectaculum. Inter eos Sacerdos probatæ vitæ, sacre disciplinæ non ignarus, cæteris aut trepide abeuntibus, aut pavore terræ illius, cum Christi Apostoli Joannis Evangelii initium recitare orsus, ad eum locum, *Verbum caro factum est* perduxisset; malus Dæmon horrendo sublato clamore, cubiculi tectum secum adsportans, omni supellectili incensa abiit. Fœmina periculo servata, enixa est monstrum undequaque fœdum aspectu, quale nusquam antea, ut ferunt, inter nostrates visum. Id obstetrices, ne observatum contumeliæ esset familiæ, accensa ingenti pyra citissime concremarunt.

In Conciliis tum Generalibus, tum particularibus Sacri Evangelii codex in præcipuo, atque honorificentissimo collocatus Throno.

C A P U T X.

QUoniam Ecclesiæ Patribus persuasum semper fuit Sacris Conciliis Christum præesse, ideo in ejus rei argumentum in augustiori loco supra Patrum, sub-

subsellia Evangelium poni consuevit, pendentibus hinc inde aulæis, aliisque ornamentis ad cultus ac maximæ venerationis signum appositis, liber enim Evangeliorum Christi reparatoris nostri loquentis typum gerit, ut ait S. Cyrillus in Epistola Apologetica ad Theodosium: ideoque in Synodo Ephesina supra Thronum locatum fuisse testatur his verbis: *Sancta Synodus in S. Ecclesia, quæ Maria dicitur, congregata Christum veluti caput constituit, venerandum enim Evangelium in sacro Throno collocatum erat, illud tantum sanctorum Sacerdotum auri- bus insinuans: Justum iudicium iudicate.* Item in Concilio Chalcedonenſi Generali IV. actione prima, secunda, tertia, quarta, ac reliquis semper residentibus Episcopis, & Patribus in medio sacrosancta Evangelia posita esse memorantur: quod de auctoritate Conciliorum loquens manifestat etiam Julianus Coensis Episcopus Legatus Leonis I. in epistola ad Leonem I. Imperatorem, apud eruditissimum Soc. Jesu scriptorem Philippum Labbæum Tom. IV. Concil. editionis Parisiensis fol. CCCCLXXIII. Ubi, inquit, *tantorum fuit congregata multitudo Pontificum, & sanctorum præsentia Evangeliorum, & frequens simul oratio, illic creaturæ totius opificem invisibili virtute credimus fuisse præsentem.* Idem & in Concilio Generali VI. Constantinopolitano III. in Trullo celebrato actione prima memoratur factum. Ritus ipsum in VII. Generali Synodo, quæ altera Nyce- na fuit, servatum fuisse Tharastius Constantinopolitanus Antistes prodit his verbis: *Facebat autem in sacro Throno Evangelium sanctum, quod omnibus qui convenerant, Justum iudicium iudicate, justitiam pro sancta Dei Ecclesia administrate proclamabat.* In Concilio Generali VIII. additæ sunt Sanctæ Crucis reliquæ; legimus enim in ejusdem actis: *Propositis pretiosis, & vivificis lignis, & intemeratis salutis nostræ Evangeliiis &c.*

Quod

Quod vero apud Græcos factum liquet, etiam in Ecclesia Occidentali servatum fuisse constat ex Concilio Lateranensi I. Martino I. Summo Pontifice, ubi initio consultationis primæ sic legitur : *Præsidente sancto ac Beatissimo Martino Papa Sanctæ Sedis Apostolicæ Urbis Romæ, propositis sacrosanctis, & venerabilibus Evangeliiis in Ecclesia Dei, & Domini nostri Jesu Christi, quæ vocatur Constantiniana &c.* Quæ verba semper initio omnium reliquarum consultationum repetuntur. Quanta autem magnificentia fuerit ejusmodi ritus in Concilio Ferrariensi servatus, scilicet antequam Florentiam translatus esset, docent quæ in principio ejusdem Concilii habentur apud Labbæum tomo XIII. fol. XVIII. *In medio Templi, atque inter duos Cleros ante sacrum Altare solium pulcherrimum posuere perquam ornatum, apparatusque aureo velamento, in quo sedit Judex magnus, & justus Dominus noster Jesus Christus, hoc est Sanctum Evangelium, appositis hinc inde Sanctorum Apostolorum Petri, & Pauli capitibus, cereisque ante illa accensis.* Sed nec in Œcumenicis tantum, verum etiam in Provincialibus Synodis id fieri consuevisse, ut scilicet in medio sacri confessus Evangelii codex locaretur, Concilium Valentinum in Galliis habitum Lothario Imperatore, in præfatione testatur. Quod etiam confirmatur ex abjuratone Berengarii sub Nicolao Papa II. in Concilio Romano, anno M. LXXXIX. ubi per sacra Evangelia, quæ in medio posita erant. jurasse dicitur. Quid tandem Patres eoritu exprimere voluissent, jam supra dictum est; additque Filescus *De sacra Episcoporum auctoritate* cap. XIII. §. II. id quod Servator dixit; *Ubi sunt duo vel tres congregati in nomine meo, ibi sum in medio eorum.* Matthæi cap. XVIII.

*Evangelium in Judiciis profanis
pro Tribunali positum.*

CAPUT XI.

Quod in Œcumenicis Catholicæ Ecclesiæ Conciliis factitatum vidimus, idem quoque in quibusvis judiciis faciendum constituit Imperator Justinianus, nimirum ut sacrorum Evangeliorum Scripturæ terribiles ante sedem judicalem deponantur, ibique ab initio litium ad finem usque permaneant, nec amoveantur nisi sententia recitata, quo totius consistorii latitudo, Dei ipsius repleta præsentia, omnibus ad sacrosanctas scripturas metum incutiant, & reverentiam, & ab inquisitione veritatis omnis iniquitas propulsetur. Verba legis *Rem non novam* Cod. *De judiciis* hæc sunt, „Sanctimus omnes Judices, sive majores, sive minores, qui in administrationibus positi sunt, vel in hac Regia Civitate, vel in Orbe Ferrarum, qui nostris gubernaculis regitur, sive eos quibus nos audentiam committimus, vel qui a majoribus Judicibus dantur, vel qui ex jurisdictione sua judicandi habent facultatem, vel qui ex recepto, idest compromisso, quod judicium imitatur, causas dirimendas suscipiunt, vel qui arbitrium peragunt, vel ex auctoritate sententiarum, & partium consensu electi sunt, & generaliter omnes omnino Judices Romani juris disceptatores non aliter litium primordium accipere, nisi prius ante sedem judicalem sacrosanctæ deponantur Scripturæ, & hæc permaneant non solum in principio litis, sed etiam in omnibus cognitionibus, usque ad ipsum terminum, & definitiva sententiæ recitationem. Sic etenim attendentes ad sacrosanctas Scripturas, & Dei præsentia consecrati, ex majore præsidio lites diriment, scituri quod non magis alios judicant, quam ipsi

ipsi judicantur, cum etiam ipsis magis, quam partibus terribile iudicium est; siquidem litigatores sub hominibus, ipsi autem a Deo inspectore adhibito causas proferunt trutinandas. Ita Justinianus.

Ritum ponendi pro Tribunali Euangelium in profanis judiciis luculenter illustravit Pancirolus, figuramque etiam expressit in historia Imperii Orientalis, & Occidentalis; ex eoque Ciampinus in libro veterum monumentorum parte I. cap. xvi. ubi aliam figuram exhibet, in qua mensæ seu parvo folio superpositus est liber Evangeliorum oclusus, in cujus tegmine exteriori imago visitur Jesu Christi, seu Evangelii scriptoris, & forte Joannis, quum juvenilem ætatem præferat, qualem illi vulgo Pictores affingunt. Duo deinde a dextris, totidemque a sinistris cerei fulgent, infixi candelabris, quibus alterum longe majus adstat extra, sed pone mensam formæ quamaximæ, variisque figurarum capitibus cælatum, super quod lucernam, non cereum imponi olim consuevisse verosimilius putat memoratus Ciampinus.

Sacri Evangelii usus in purgatione Canonica.

C A P U T XII.

Purgatio canonica Auctore Silvestro *In summa* dicitur offensio innocentie de objecto crimine juxta Sacrorum Canonum decretum facta. Siquis igitur Episcopus, siquis Presbyter, siquis etiam laicus vulgi rumore, criminis insimulabatur, mos olim fuit, ut licet nec testibus, nec facti ipsius evidentia convinci potuisset, purgare se tamen ex præscripto Canonum teneretur. Vocatur autem hæc purgatio Canonica, quod a sacris Canonibus invec̃ta sit, atque præscripta: fit autem per juramentum, quod pluribus modis antiquitus præsta-

præstatur, ad Evangelia scilicet, ad Sacrosanctam Eucharistiam, ad Reliquias Martyrum, ad Crucem. Varia ejus exempla adducit in suo decreto Gratianus; causa II. quæst. iv. & inter alia illud Tridentini Episcopi, qui simoniæ infirmatus, communi sententia in Concilio jussus est, ut tertia manu sui Ordinis, & quatuor Abbatum, & Religiosorum Sacerdotum de ea signonia se purgaret in præsentia Aquilejensis Patriarchæ. Formâ autem purgationis ipsius, & sociorum ita præscribitur. *Idem Episcopus supra sancta Evangelia primum jurabit, quod pro Ecclesia S. Petri de Pado Presbytero Paulo danda, neque ipse per se, vel per summam personam, neque alius pro eo se sciente pretium receperit; deinde expurgatores super sancta Dei Evangelia jurabunt, scilicet quod sicut ipsi credunt, verum juravit.* Hæc apud Gratianum; ubi etiam Can. Omnibus loco citato habetur, quod si Sacerdos suspiciosus, aut incredibilis suo Episcopo, aut reliquis suis consacerdotibus sive bonis, & iustis de suo populo, vel sua plebe hominibus fuerit, ne in crimine, aut in prædicta suspicione remaneat, cum tribus, aut cum quinque vel septem bonis aut vicinis Sacerdotibus, exemplo Leonis Papæ qui duodecim Episcopos in sua purgatione habuit, vel eo amplius, si suo Episcopo visum fuerit; aut necesse esse propter tumultum populi perspexerit, & cum aliis bonis, & iustis hominibus se Sacramento coram populo super quatuor Evangelia dato purgatum Ecclesiæ reddat.

At non solum Presbyteri, & Episcopi, sed etiam ipsi Summi Pontifices Evangeliiis olim purgare se consuevere. Præclarum est Pelagii exemplum, qui ductus in suspicionem procuratæ mortis Vigilio Papæ, facta processione cum litanis ab Ecclesia S. Pancratii ad Basilicam S. Petri, præsentem Narsete duce, ac universo populo, & clero tenens Evangelium, & Crucem super caput

put suum ab eo crimine se purgavit; teste Anastasio in ejus vita. Item cum Summo Pontifici Leoni III. multa ab adversariis crimina objecta essent, nullusque ea probaret, refert Monachus Sangallensis in vita Caroli Magni, quod intemeratus Pater Leo assumens Evangelium Domini nostri Jesu Christi posuit super caput suum, & in conspectu Caroli (Magni) ejusque militum, assistentibus etiam persecutoribus suis in hæc verba juravit: *Sic in die magni judicii sim particeps Evangelii, sicut immunis sum criminis falso mihi ab istis objecti*. Olim quidem solus putatus Reus jurabat se esse innocentem, sed invaluit alios etiam adhiberi probatæ fidei, ac probitatis viros, qui eodem modo jurarent se eum innocentem credere, ideoque compurgatores dicebantur; unde se purgare quarta, septima, aut duodecima manu, idest tot adhibere ad purgationem illam, quot judex jussisset, ut recte observat Franciscus de Roye Antecessor Andegavensis *Institutionum Canonicarum* lib. III. Tit. xiv.

Quoniam vero de purgatione canonica agimus, illud quoque prætermitti non debet, fuisse nimirum aliam in Monasteriis consuetudinem; nam si contigisset furtum in eis committi, & furem ignorari, Missa celebrabatur ab Abbate, vel alio præsentibus fratribus; quæ expleta omnes communicabant in hæc verba: *Corpus Domini sit mihi ad probationem hodie*. Can. *Sape* II. quæst. iv. Erat olim quoque in usu alia purgatio quæ dicitur vulgaris vulgi moribus introducta: fieri hæc cœpit primo per singulare certamen. II. Per ferrum candens aut ignitum, quod reus nudis manibus attingebat. III. Per aquam calidam seu bullientem, in quam manus immittebat. IIII. Per aquam frigidam, ut manibus, & pedibus ligatis in magnum vas ea plenum conjiceretur, & supernataret innocens, aut mergeretur reus. Hæc deficiente legitima probatione eruendæ veritatis media habebat.

habebantur. Qui duello vicerat, qui igne non læsus, qui aqua non offensus, innocens credebatur; existimabant veteres Deum semper ita favere innocenti, ut semper victor, aut illæsus esset; sed sacri Canones perpetuo ejusmodi purgationem improbarunt, quasi per eam tentaretur Deus, & ab eo miracula demum exigenterentur; Can. *Consuluisse*. Can. *Monomachiam*. II. quæst. IV. adeo tamen vulgus eam probabat, ut etiam occurrant Ecclesiasticæ preces, quibus benedicerentur pugiles, sicut & ipsamet aqua apud Delrium in tractatu Disquisitionum, magicarum, & alios Scriptores Ecclesiasticos.

Ad Evangelium juramenta edita, eodemque res gravissima confirmata. Pœna a legibus in perjuros constituta.

CAPUT XIII.

Satis antiquus, & usitatus fuit mos ille jurandi super sacrum Christi Evangelium, atque in eo Deum præsentem agnoscere: qui ritus originem suam trahere videtur a jurejurando Gentilium, qui aram tenendo jurabant. Ex constitutione Leonis Imperatoris nemo militabat qui non apud acta esset testificatus propositis Sacrosanctis Evangeliiis se esse Christianum Orthodoxum L. *Nemo xx. Cod. De Episcopali audientia*. In judiciis secularibus juramentum super Evangelia exigebant Judices Cæsarei L. *In omnibus Cod. De jurejurando propter calumniam*: quod tamen postea Ecclesia sibi reservavit; cum ad ipsam Evangelium pertineat, ejusque solius sit Evangelium tradere ad quodcumque opus religiosum; unde & ipsi Præsides in manibus Episcoporum jurare jussi sunt *Novella VIII. in appendice*, hac forma: *Juro ego per Deum*

Deum Omnipotentem, & Filium ejus Unigenitum Dominum nostrum Jesum Christum, & Spiritum Sanctum, & per Sanctam Gloriosam Dei Genitricem, & per quatuor Evangelia quæ in manibus meis teneo &c. Olim quoque Sacra Evangelia Clericos jurantibus porrigere consuevisse constat ex antiquo Auctore inter opera S. Joannis Chrysostomi homilia xli. in cap. v. S. Matthæi: *Audite, inquit, Vos Clerici qui jurantibus Evangelia Sancta porrigitis, alibi, portatis.*

Quanta Majorum nostrorum esset pietas in jurando super sancta Dei Evangelia, necesse non est ut pluribus explicemus; tantum enimvero Sacro Codici cultum, & reverentiam exhibuerunt, ut facinus prope nefarium existimarent id omittere, quod vel insomnis, tactis Evangeliiis fuissent polliciti. Exempla ejus rei profert Nicephorus lib. xi. *Historiæ Ecclesiasticæ* cap. xlii. Non defuere tamen viri impii, qui passim in Tribunalibus super Evangelia pejerare non vererentur; quosque justo dolore incensus Theophanes ita acriter insectatus est homilia xli. *Me quidem horror, & tremor invadit considerantem quam crebra in Tribunalibus juramenta fiant, & quo pacto Evangelium omni veneratione dignum in pestilentia cathedra parvipendatur; hoc enim præcipit non jurare omnino; at vero illud adjumentum suæ avaritiæ fares assumunt; ita multo deteriores sunt fidei expertibus. Clinias quidem græcus homo trium talentorum damnum ferre, quam jurare maluit, & talenta dedit accusatori, nec juravit; quodque majus est, cum non esset pejeraturus. An non igitur sumus gentilibus nequiores? Sic ille. Qua autem pœna hujusmodi sacrilegi punirentur, docet Harmenopolus lib. i. Titulo vii. his verbis: *Qui in Ecclesia intemperata contrectans Evangelia, postmodum vero pejerare deprehensus fuerit, ei lingua præcidatur.**

In

*In electionibus Episcoporum, Abbatum, &
Regum Euangelium adhibitum.*

C A P U T XIV.

PRæter illum Euangelii ritum in consecratione Episcoporum usurpati, alter erat etiam ejusdem usus in eorum electione, Justiniani Imperatoris ævo institutus; cujus novella constitutio cxxiii. cap. I. sic ait: *Sancimus igitur, quoties opus fuerit Episcopum ordinari Clericos, & primates Civitatis, cujus futurus est Episcopus ordinari, mox in tribus personis decreta facere, & propositis eis sacrosanctis Euangeliiis periculo suarum animarum dicentes in ipsis decretis: quia neque propter aliquam donationem, neque propter aliquam promissionem, aut amicitiam, aut aliam quamlibet causam, sed scientes eos rectæ, & catholicæ fidei, & honestæ esse vitæ, & literas nosse, hos elegerunt, &c.* Idem pariter Imperator jubet ut in Monasterio, mortuo Præfecto, is quem vita, & honesti mores commendant propositis sacris Euangeliiis ad præfecturam vocetur L. *Sacris* xlvii. Cod. *De Episcopis, & Clericis.* Quod autem spectat ad electionem Regis Romanorum, hæc statuit aurea bulla Caroli IV. Imperatoris cap. II., Peracta Missa hujusmodi (de Spiritu Sancto) omnes illi Electores seu Nuncii accedant ad Altare, in quo Missa eadem extitit celebrata, ubi Principes Electores Ecclesiastici coram Euangelio B. Joannis: *In principio erat Verbum*: quod illic ante ipsos poni debet, manus suas pectori cum reverentia superponant. Sæculares vero Principes Electores dictum Euangelium corporaliter manibus suis tangant, qui omnes cum tota sua familia tunc ibi debebunt inermes assistere. Et Archiepiscopus Moguntinensis formam juramenti eis dabit, & una cum ipsis, & ipsi, vel absen-

absentium Nuncii una cum eo iuramentum præstabunt vulgariter in hunc modum: Ego N. Archiepiscopus Moguntinensis Sacri Imperii per Germaniam Archicancellarius, ac Princeps Elector juro ad Sancta Dei Evangelia hic præsentialiter coram me posita, quod Ego per fidem qua Deo, & Sacro Romano Imperio sum adstrictus eligam secundum omnem discretionem, & intellectum meum cum Dei adjutorio eligere volo temporale Caput populo Christiano, idest Regem Romanorum in Cæsarem promovendum, qui ad hoc existat idoneus, in quantum discretio, & sensus mei me dirigunt, & secundum fidem prædictam, vocemque meam, & votum, seu electionem præfatam, dabo absque omni pacto, stipendio, pretio, vel promisso, seu quocumque modo talia valeant appellari: Sic me Deus adjuvet, & Omnes Sancti.

*Codex Evangelii supra Caput Episcopi
consecrandi impositus, & cur?*

C A P U T XV.

Satis mirari nequeo cur Amalarius Fortunatus tam libere asseveret hunc ritum neque Apostolica traditione, neque auctoritate canonica in Ecclesiam irrepsisse. Hæc ejus verba libro II. *De officiis* cap. xiv. *Dicit Libellus, secundum cujus ordinem celebratur ordinatio apud quosdam, ut duo Episcopi teneant Evangelium super caput ejus quod neque vetus auctoritas intimat, neque Apostolica traditio, neque canonica auctoritas.* Id ipsum asserit creditus Alcuinus cap. *Qualiter Episcopus ordinetur &c.* Sed quam gravissime ambo labantur, satis demonstrant antiquissima SS. Patrum testimonia, qui ejus ritus imponendi supra caput Episcopi consecrandi Evangelium frequenter meminerunt; ac primum S. Dionysius

Areopagita sic ait *De Ecclesiastica Hierarchia* cap. v. Pontifex ad Hierarchicam ordinationem adductus, pedes ambos inflectens ad Altare, supra caput accipit a Deo tradita oracula, & manum Pontificiam. Utrumque scilicet conjunxit, & librum Evangelii, & consecrantis manum. Sic & Pachimeræ eundem in locum paraphrasis: *Supra caput accipit divina, & sacra Evangelia*. Item S. Clemens, seu vetustissimus Auctor constitutionum Apostolicarum præfati ritus testis est luculentissimus ita iniquens: *Unus ex primis Episcopis una cum duobus aliis prope altare stans reliquis Episcopis, & Presbyteris tacito precantibus: Diaconis autem divina Evangelia supra ordinati caput aperta tenentibus, dicat ad Deum: Domine Deus &c.* Tandem S. Joannes Chrysostomus in quadam, *De laude Evangelii* homilia, & ritus meminit, & mysterium explicavit: his verbis: *Dum ordinantur Sacerdotes, Evangelium capiti imponitur, quo discat ordinatus veram se accipere Evangelii thauram; discat etiam tametsi omnium sit caput, se tamen esse sub legibus, & cum omnibus dominetur, legis imperio subjici, cumque omnibus legem ponat, a lege gubernari.* Verior tamen ejus ritus causa illa videtur, quam attexit S. Dionysius *in theoria*, nimirum Evangelii intelligentiam, meditationem, & promulgationem: Unde non immerito Ecclesiæ Romanæ Ordo simul cum Evangeliorum impositione hæc verba, quæ formæ locum tenent, ore consecrantium Episcoporum pronuntiat: *Accipe Spiritum Sanctum*: Et postea dum Evangelium ipsum in manus ei traditur: *Accipe Evangelium, vade, prædica populo tibi commissum*, adeo ut Evangelii supra cervicem impositio materiæ respondeat. Nec enim desunt Canonistæ iidemque insignes, inter quos doctissimus Prosper Fagnanus, qui Episcopatum ordinem proprie dictum esse affirmant, ac robustissimis argumentis comprobent.

*Euangelium aureis literis conscriptum, ac
gemmis pretiosissimis exornatum.*

CAPUT XVI.

LEgem aureis literis aliquando scriptam indicat Aristæas in historia de LXX. Interpretibus. *Hi postea quam cum muneribus, & diversis pellibus, in quibus divina lex aureis literis hebraico sermone conscripta erat &c.* Alia ab aliis, literis aureis conscribi non est, quod vocetur in dubium. Tanta vero fuit olim veterum Christianorum erga Euangelium reverentia, amor, & venerationis, ut illud aureis literis conscribendum, ac pretiosissimis tegumentis exornandum quammaxime curarent. Exemplo est magnus Theodosius Orbis terræ imperio dignissimus, qui teste Nicephoro Callixto libro XIV. *Historiæ* cap. XLII. Euangelium *id est* propria manu literis aureis exquisite elaboratis descripsit, nec interdiu modo, verum etiam bona noctis parte quotidie lectitabat; præstabat enim non solum animi pietate, sed & pingendi artificio pollebat. S. Bonifacium Episcopum, ac Martyrem præstantissimum propriis manibus Euangelium literis aureis descripsisse testatur Nicolaus Ferrarius in historia Moguntina, adnotatione XLVIII. post vitam S. Bonifacii Episcopi, & Martyris. Euangelii etiam auro scripti, capsæque argentea tecti, gemmis, & lapidibus fabricata meminit in Chronico Centul. Hariulphus lib. III. cap. III. Sed quid hic Christianorum exempla memoro, quum ipsi Platonici ejusmodi honorem, Euangelio tribuendum affirmarent, ut tradit S. Augustinus libro x. *De Civitate Dei* cap. XXIX. *Initium*, inquit, *S. Evangelii, cui nomen est secundum Joannem, quidam platonici, sicut a S. fene Simpliciano, qui postea Mediolanensi Ecclesiæ sedit Episcopus, solebamus audire,*

aureis literis conscribendum, & per omnes Ecclesias in locis eminentissimis proponendum esse dicebat.

De pretiosissimis Euangeliorum tegumentis innumera prope extant apud Ecclesiasticæ historiæ scriptores monumenta. Constantinum Magnum Imperatorem Euangeliorum volumina auro tecta, unionibusque, ac pretiosis ornata lapidibus in magno Templo collocasse narrat Cedrenus in compendio historiarum ad annum xxi. Constantini. Zenonem Imperatorem Euangelium reperit cum corpore S. Barnabæ Apostoli, ipsius Apostoli manu descriptum auro exornatum in æde S. Stephani, digniorique loco sui palatii, cui *Daphra* nomen erat, posuisse, idem prodit Cedrenus in Zenone, & alii. Narrat Anastasius Bibliothecarius in vita Gregorii Papæ III. fecisse eum Euangelia aurea pensantia libris quindecim. Testatur Zonaras, quum Belisarius Gelimerum Vandalum, qui Africæ dominatu potiebatur, clara victoria superavisset, in præda fuisse divinatorum Euangeliorum libros, undique auro fulgentes, & omnis generis lapillis distinctos. Scribit Gregorius Turonensis libro III. *Historia Francorum* cap. x. Childebertum & spoliis Amalarici inter alia magnificentissima ornamenta retulisse viginti Euangeliorum capsas auro puro, & gemmis pretiosis ornatas. Leo Ostiensis libro III. *Chronici Casinensis* cap. xx. & lxxiv. inter ornamenta Casinensi Ecclesiæ acquisita, & relicta a Desiderio Abbate, qui postea Victor III. Romanus Pontifex fuit, numerat libros Epistolarum, & Euangeliorum, ac Sacramentorum cum tabulis aureis, & argenteis. Tandem Pessina in opere, cui titulus, *Phosphorus Septicornis, De gloria, & maiestate Ecclesiæ Pragensis* Radio IV. ad diem xxv. Aprilis sic scribit: *Asservatur in Cathedrali Pragensi posterior pars libri Euangeliorum S. Marci, quem idem propria manu conscripserat latinis literis. Librum hunc Carolus IV.*
ma-

magnis precibus obtinuit a fratre suo Nicolao Patriarcha Aquilejensi anno mcccclv. & auro, ac gemmis ornatum donavit Ecclesie Pragensi. Ex quo, die festo Pasche, atque iterum Ascensionis Domini ad Missarum solennia legitur Euangelium.

Cur autem tam splendidis tegumentis Euangelia exornarentur, docet Rupertus Abbas Tuitienlis qui floruit anno mcccxv. libro II. *De divinis officiis cap. xxiii. Codices quoque Evangelici auro, & argento, lapidibusque pretiosis non immerito decorantur, in quibus rutilat aurum cœlestis sapientiæ, nitet argentum fidei eloquentiæ, fulgent miraculorum pretiosi lapides, quæ manus Christi tornatiles, aureæ, plenæ hyacinthis operatæ sunt.* Consonat S. Germanus Patriarcha Constantinopolitanus, oratione *De Imaginibus* vocans Euangeliorum volumen thesaurum æternorum bonorum. Quamobrem non immerito exornantur: nam si Artoni populi oracula sua, testis alioquin inscripta, aureis involucris cum aliarum gentium commendatione servabant, ut prodit Nicolaus Damascenus; quanto magis Christianos decuit æternæ sapientiæ oracula splendidissimis, ac pretiosissimis tegumentis completi?

Euangelii liber auro gemmisque ornatus a Viris Principibus dono missus Pontificibus Maximis, vel Episcopis. Parte item Euangelii pretiosis inclusa thecis a Summis Pontificibus donati Viri Principes.

C A P U T XVII.

Non unum hujus quoque generis, & ritus exemplum Ecclesiastica nobis suppeditat historia: Constantinus

tinus Magnus S. Nicolao Episcopo Myrensi, vitæ sanctimonia, atque miraculis longe lateque conspicuo, dono misit librum Evangeliorum auro, & lapidibus pretiosis ornatum, ut prodit Auctor ejus vitæ. In actis S. Geminiani Episcopi Mutinensis legitur; *Postquam idem vir sanctus filiam a dæmone obsessam liberasset, ei Jovinianum Imperatorem Patrem Evangeliorum textum nobiliter exornatum donasse.* Testatur Anastasius Bibliothecarius Evangelia cum tabulis aureis, gemmisque pretiosis ad Hormisdam Romanum Pontificem missa dono e Græcia fuisse. Constans Imperator, ut idem prodit Auctor, ad Vitalianum Papam sacrosanctum Evangeliorum librum misit gemmis albis miræ magnitudinis in circuitu ornatum, Beati Petri Apostoli Basilicæ offerendum. Ipse quoque Anastasius memorat Michaellem Imperatorem, ejus nominis tertium, Benedicto III. Papæ misisse Evangelium auro purissimo textum, cum diversis lapidibus pretiosis. Solebant enimvero, ut scite animadvertit Cresolius, potentissimi Reges, ac Principes ejusmodi munus ad Pontifices mittere, ut religionem in Christi doctrinam, atque Evangelium prædicarent, testatamque redderent; tum etiam in argumentum catholicæ cum Ecclesia Romana communionis; tum denique ut Apostolorum Principem Patronum haberent, ejus Romanus Pontifex est Successor. Hinc Imperatores Orientis epistola ad Ludovicum Pium Occidentis Imperatorem, quam refert Petrus Dellande Ricomagensis. In *supplemento antiquorum Conciliarum Gallie* pagina cxi l. ita ajunt: *Honorem Ecclesiæ Christi quærentes fecimus literas ad Sanctissimum Papam antiquæ Romæ, & eas misimus per prædictos Missos nostros ad eum, dantes eis Evangelium aureum ex lapidibus pretiosis ornatum, similiter & patenam auream, & calicem simili modo ornatum, ambobus inscripta imperii nostri nomi-*

nomina, ut Deo iubente illuc pervenientes, offerant eas ad Templum Sanctissimum, & Beatissimi Apostolorum Principis Petri, qui intercedat pro nobis, & vobis.

Notationem quoque meretur præcipuam a Pontificibus Maximis quandoque parte S. Evangelii thecis aureis, vel argenteis inclusa viros Principes donari consuevisse, quorum testatissimum erat Orthodoxæ Religionis studium. S. Gregorius Papa, *Excellentissimo*, inquit lib. xii. epistola vii. *Filio nostro Adalvaldo Regi transmittere phylacteria curavimus, idest Crucem cum ligno S. Crucis Domini, & lectionem Sancti Evangelii theca perſica inclusam.*

*Euangelium lotis manibus attrectatum,
aperto capite, stando, ac lumine
adhibito lectum.*

C A P U T XVIII.

T Radit Plutarchus oratione II. *De esu carnium.* Gentiles olim libros sacros illotis manibus contingere piaculum existimasse: *Et nos, inquit, fortasse peccamus, quia huiusmodi libros attingimus non lustratis manibus, oculis, pedibus, auribus.* Judæi quoque tanta veneratione Prophetarum libros proſequiebantur, ut eos manu contingere non auderent, linteumque substernerent, ne divinum volumen rem ullam profanam contingeret: quod non obscure videtur indicare S. Hilarius in Psalmum cxxxii: *Quid igitur Christiani? Nemo audebat Euangelium attingere quin prius manus lavisset, deinde pudens, & horrifico metu abjectus, ac reverens accedebat.* *Si Euangelium, inquit S. Joannes Chrysostomus homilia vii. ad populum, capere oporteat, manibus lotis cum multa reverentia, & religione, horrore plenus, ac*
timens

timens sumit. Quem ritum Moschovitæ adeo observant, ut Evangelium tangere minime audeant, nisi prius laverint manus, seque signo Crucis munierint. Quorum tamen Schismaticorum reverentiam par esset omnes Orthodoxos imitari. Utinam & nostris oculis non cerneremus Sacrum Evangeliorum Codicem passim a pueris, aut vilioribus hominibus habitu sordido, manibus allium, cepam, caseum, ac similia maleolentibus, sine ullo pietatis sensu, aut cordis affectu contrectari, dum ad Sacrum, & tremendum Missæ ministerium, nimia præsectorum rei sacræ oscitantia admittuntur.

Tantum quoque honoris veteres Christiani sacris Codicibus detulerunt, ut non solum manus lavarent, sed etiam summa reverentia aperto capite legerent viri, velato vero mulieres; qua de re sic scribit S. Joannes Chrysostomus homilia LII. in Joannem: *Manus lavamus cum libram accipimus: vides quanta ante lectionem, reverentia moveamur? Quod si diligenter accedamus, magna inde proveniet utilitas. Non enim nisi reverens anima manus laverit; & uxor si detectum caput habuerit, quamprimum tegit; interioris reverentiæ proferens indicium; vir autem tectum caput deteget*. Hæc de veterum Christianorum religione ac pietate S. Joannes Chrysostomus; ubi vides mulieres in reverentiæ signum, juxta Apostoli præceptum caput operuisse, aperuisse viros. Sed nec solum ejusmodi honoris indicio præsci fideles divinum librum venerabantur, verum etiam stando lectitabant, & aliquando lumine adhibito. Cujus rei exemplum præstantissimum habemus in historia Patriarcharum Alexandriæ ab Echellensi edita; ubi de S. Alexandro XIX. Patriarcha sic legitur: *Affirmat Athanasius Discipulus hujus Patris Patriarchæ dicens: Pater meus Alexander, quoties Evangelium in sua cella legebat, id stans præstabat, ac lampade accensa*. Sic enim existima-

bant

bant præsentem in Euangelio Christum adesse, & alloqui unumquemque, nec videri satis religiosum, qui non, Summo Dei Unigenito meritum honorem detulisset. Quæ sacris codicibus veneratio ab Hebræis exhibeatur docet sacrarum literarum interpres excellentissimus Nicolaus de Lyra, in Lucam capite iv. *Hanc, inquit, reverentiam faciunt libris veteris Testamenti, quod nullo modo sedeant juxta illos; ex quo patet quod illi Christiani sunt valde reprehendendi, qui non solum libros veteris Testamenti, sed etiam Novi, etiam sacra Euangelia ita irreverenter tractant.*

*Euangelico scribendo Codici homines delecti.
Idem vetustate detritus in sacrarium
conditur.*

C A P U T XIX.

ANtequam circiter medium xv. sæculum opera duorum Germanorum Typographia in Italia inciperet, cunctis notum est fuisse in usu ut libri omnes manu describerentur; cui muneri qui insistebant, antiquarii dicebantur. *Qui videt literas, (ait S. Augustinus) in codice optime scripto, & non novit legere, laudat quidem antiquarii manum; consentit S. Hieronymus, qui antiquariam artem transcriptoris professionem appellavit.* Huic autem labori suam Monachos ut plurimum navasse operam, testatur S. Joannes Chrysostomus, qui de eisdem loquens: *Post completum, inquit, orationis officium scribendis libris operam dabant.* Item S. Hieronymus in epistola ad Rusticum his verbis: *Scribebantur libri, ut manus operarentur cibum, & animus lectione saturaretur.* Quantum vero in hac arte Monachi Bene-

diſtinae familiae laboraverint, pluribus probat eruditiffimus Haeſtenus *Monaflicarum diſquiſit.* tractatu ſecundo, diſquiſitione IV. Sed cum aliquando, fortaffe lucri cauſſa homines parum idonei libros deſcriberent, factum eſt ut etiam ſacri codices variis erroribus ſcaterent; cui malo volens Carolus Magnus occurrere, aperte cavit ne promiſcuae omnibus ejuſmodi provincia demandaretur, ſed ut a viris tantum probis ſelectiſque divina volumina deſcribi deberent: Sic enim de re ipſa legitur in Capitulari Aquisgranenſi. *Si opus eſt Evangelium, vel Pſalterium, & Miſſale ſcribere, perfectae etatis homines ſcribant cum omni diligentia.*

Quid autem olim fieret de Codice S. Evangelii ſi prae vetuſtate uſui Eccleſiae amplius eſſe non poſſet; puto quod primum igne abſumeretur, ac deinde cineres in quibuſdam ſacris locis occultarentur; ſic enim de reliqua Eccleſiae inutili ſupelleſtile ſacri Canones ſtatu-erunt: *Altaris palla, cathedra, candelabrum, & velum ſi fuerint vetuſtate conſumpta, incendio dentur, quia non licet ea quae in ſacrario fuerint male tractari; ſed incendio univerſa tradantur; cineres quoque eorum in baptiſterio inferantur, ubi nullus tranſitum habeat, aut in pariete, aut in ſoſſis pavimentorum jaſcentur, ne introeuntium pedibus coinquantur.* Can. *Altaris* xxxvi i. De conſecratione diſt. I. S. Carolus in Concil. Prov. II. titulo II. decreto xxi. expreſſe cavit ne libri ſacri veteris, & novi Teſtamenti, volumina item SS. PP. noſtrae fidei interpretum, tum ſcripta etiam Eccleſiaſtica, quibus, & res, & verba divina conſignata ſunt, etſi temporis vetuſtate omnino conſumpta, ad rerum tamen vilium, ad ſordidarum uſum ullo pacto converterentur, ſed in ignem potius conjicerentur. Sane liber legis qui in Synagoga aſſervatur, ubi aſſumptus fuerit, & vetuſtate detritus, ut legi vix poſſit, & prae diuturnitate de-

deservire nequeat, tradit Novarinus lib. II. Schediasmatum, illum Hebræos terreo vasi includere juxta aliquem doctum virum, qui diem suum obierit. Quamobrem culpanda videtur quorundam Christifidelium impietas, qui sacris paginis ad rem profanam abuti non erubescunt. Quæ sacris literis reverentia a Moscovitis exhibeatur, hæc apud illos lex significat, quam ex quodam Cyrillo refert Sigismundus apud doctissimum Novarinum loco citato: *Si forte lacerata papyrus, quæ aliquid sacramentorum literarum continebat in terram projecta fuerit, non liceat in eodem loco deambulare*. Quis igitur, (recte ait Lucas Tudenſis, lib. II. de altera vita cap. XXI.) tanta infania ducitur, ut sacram videns scripturam non simpliciter veneretur, & Evangelium Dei non adoret, & osculetur? Præclarum est exemplum S. Francisci, qui, ut ipsius acta testantur apud memoratum scriptorem, *si quando in terra aliquam reperiebat scripturam, humiliter elevans venerabatur eam, & in loco mundo ponebat, eo quod fortassis contineret scriptum nomen sanctum*.

Reliquum est ut abusum illum perstringamus, qui alicubi non sine piorum hominum animi sensu in quibusdam Ecclesiis cernitur, ubi gravi Præpositorum oscitantia, sædave avaritia quærentium quæ sua sunt, non quæ Jesu Christi, sacri codices quamvis ita vetustate detriti sunt, ut vix legi possint, adhuc tamen in divino ministerio usurpantur. Huc spectare videtur, quod suo tempore uberrimis lacrymnis deplorabat Cardinalis Religiosissimus Bellarminus, qui aureo opusculo *De gemita columba* lib. II. cap. v. inter alia scribit: „Omitto quod alicubi vasa sacra, & vestes, quibus mysteria celebrantur, vilia, & sordida inveniantur, indigna prorsus quæ ad tremenda mysteria adhibeantur. At forte qui hæc adhibent pauperes sunt. Id quidem fieri potest, sed si pretiosa non possunt, saltem munda, & nitida procurarent.

rarent. Ego tamen (verba sunt ejusdem sapientissimi Cardinalis) cum aliquando ex itinere apud Episcopum nobilem, & prædivitem hospitarer, vidi aulam vasis argenteis splendidam, & mensam omni genere præstantium ciborum refertam; mappas quoque, & reliqua omnia nitida; & odorem suavem spirantia. Sed cum die sequenti summo mane ad Ecclesiam Palatio contiguam descendissem, ut sacris operarer inveni omnia contraria, idest vilia, & sordida, ut vix auderem in tali loco, & cum tali apparatu divina mysteria celebrare. Scio non deesse in Ecclesia Dei multos optimos, & religiosissimos Sacerdotes, qui corde mundo, & nitidissimo apparatu divina mysteria celebrant, pro quibus gratiæ Deo ab omnibus agenda sunt: sed simul etiam fontibus lacrymarum plangendi sunt non pauciores qui exteriore turpitudine, & sordibus, animi sui impuritatem sordesque testantur.

Euangelium præcipua Clericorum supellex, a plerisque tamen neglectum.

C A P U T XX.

SI ad prisca Ecclesiæ tempora oculos conjiciamus, nullus fere clericus absque Evangelii codice reperietur. Si enim ceteri Christifideles quocumque in loco essent, Evangelii codicem secum gestabant, quanto magis Sacerdotes, & Episcopi, quorum est Christi legem prædicare, ac de illa perpetuo meditari? *Attende lectioni, exhortationi, & doctrinæ*, ait Apostolus in Timotheo clericos omnes informans. Hinc S. Epiphanius notæ sanctimonie Præsul semper in manu, sinuque illum ferebat; de quo scriptor ejus vitæ hæc habet: *Mos erat S. Epi-*

S. Epiphanii habere in manibus sancta Evangelia. Germanorum Apostolus S. Bonifacius Christi legem in Germania propagans, jugiter sacrum Evangelii codicem secum deferbat, adeo ut cum nec in martyrio dimitteret; quin cum in ejus caput Frisones enses vibrarent, hunc codicem quasi spiritualem clypeum objecit; & illustri miraculo, licet ense acuto per medium sectus sit liber, nulla tamen litera ea sectione abolita fuit. S. Hilarionis hereditas erat sanctum Evangelium propria manu scriptum, quod proinde moriens legavit Hefychio discipulo: *Ostogesimo ætatis sue anno* (ait S. Hieronymus in ejus vita) *cum absens esset Hefychius, quasi testamenti vice brevem manu propria scripsit epistolam, omnes divitias suas ei derelinquens; Evangelium scilicet, sacrum, cucullam, & palliolum.* De Mila sanctissimo in Perside Episcopo refert Nicephorus libro VIII. *Historia* cap. XXXVII. quod quum ei Civitati præesset, ubi quotidianis laboribus suis nihil proficere potuisset, inde alio migraturus, relicta cætera supellectili solam peram extulit, in qua sacrum Evangeliorum librum servabat. S. Dominicum Prædicatorum Ordinis Fundatorem Evangelium S. Matthæi perpetuum habuisse comitem, atque ita lectitasse ut pene totum memoriter nosset, ejus vitæ prodit historia; cujus illud etiam celebratur effatum: *Sine sacra scriptura prædicator esse non potest.*

Sed ut hætenus dicta recentibus etiam exemplis illustremus; Primi Clerici Regulares, quos Theatinos vocant, quotidie sacrum Evangeliorum codicem legere consueverunt, secumque gerebant; ut assidue ante oculos, & præ manibus haberent, altiusque divina verba ipsorum cordibus insiderent. Hinc tanta parvorum sanctorum Evangelii voluminum copia hodieque in ipsorum domibus Venetiis; Neapoli; & Romæ occurrunt: teste Antonio Caracciolo ejusdem instituti viro religiosissimo, atque

atque doctissimo in libro II. De vita Pauli IV. Pontificis Maximi, quæ scripta, propriaque Auctoris manu emendata, & aucta prostat apud eximium virum, amicū nostrum Abbatem Petrum Pollidorum, nunquam sine elogio memorandum.

Alieni certe ab his exemplis sunt non pauci Sacerdotes, quos profanorum librorum copia delectari, & ut non sine lacrymis in epistola ad Damasum scribit S. Hieronymus agens de filio prodigo, *omissis Evangeliiis, & Prophetiis videmus comedias legere, amatoria; bucolicorum versuum verba canere, tenere Virgilium, & id quod in pueris necessitatis est, crimen in se facere voluptatis*. Paulo ante vero non sine præcipuo animi sensu pronuntiaverat: *Dæmonum cibus est carmina poetarum, secularis sapientia, rhetoricorum pompa verborum: hæc sua omnes suavitate delectant; & dum aures versibus dulci modulatione currentibus capiunt, animum quoque penetrant, & pectoris interna devinciant; verum ubi cum summo studio fuerint, ac labore perlecta, nihil aliud, nisi inanem sonum, & sermonum strepitum suis lectoribus tribuunt: nulla ibi saturitas veritatis, nulla refectio justitiæ reperitur. Studiosi earum in fame veri, & virtutum penuria perseverant*. Hæc quidem Doctor sanctissimus.

Illud ego etiam non possum non dolere, quod quum multi ad omne genus vanitatis ornamenta sibi comparantes satis superque lasciviant, de sacris nihilominus habendis codicibus curam nullam habent; & tamen illis carendo, maxima, ac saluberrima ad bene vivendum præsidia, & incitamenta amittunt. Explicari certe nequit quam alacriter ad virtutem sectandam eo adspectu inflammarentur, quanto studio, atque conatu prava fugerent, quam tutam salutis viam divinis documentis, atque doctrinis sibi sternerent; ac ne videamur de nostro loqui, lubet hic aurea Sancti Joannis Chry-

Chrysoſtomi referre verba: *Iſſe etiam*, inquit in concione III. de Lazaro, *librorum adſpectus ſegniores nos reddit ad peccandum; quod ſi peccaverimus, reverſi domum, conſpectiſque libris, acrius nos condemnat conſcientia, reddimurque remiſſores ad eadem repetenda. Si in ſanctimonia perſiſterimus, ex libris reddimur tutiores, firmioresque. Nam ſimulatque tetigit aliquis Evangelium, mox compoſuit ſuam ipſius mentem, & a rebus mundanis abduxit; idque ex ipſo ſolo adſpectu; quod ſi acceſſerit diligens lectio, non aliter quam in ſacris aditis, divinis vacans anima ſic repurgatur, meliorque redditur, Deo cum ipſo per ipſas Scripturas colloquente. Hæc ille. Quare jure ac merito quosdam vanos ſui temporis clericos reprehendit S. Ambroſius lib. I. De officiis cap. xx. qui mulierum familiaritatibus implicati, tempus quod a divinis ſuperfuerat miniſteriis, & officiis, verbi Dei lectioni non impendebant. *Cur non illa tempora, quibus ab Eccleſia vacas, lectioni impendas? Cur non Chriſtum reviſas? Chriſtum alloquaris, Chriſtum audias? Illum alloquimur cum oramus, illum audimus cum divina legimus oracula; quid nobis cum alienis domibus?* Sic Ambroſius. Nos infeliciffimis hiſce temporibus quid aliud agere multos Sacerdotes conſpicimus, quam de domo in domum tranſire, docentes quæ non oportet turpis lucri gratia?*

Euangelium Domi ſervatum diabolus arcet.

*Ejus lectio utilis omnibus, ac neceſſaria;
a pueritia olim uſitata.*

CAPUT XXI.

NON ſolum homines, ſed domus etiam a Dæmoniis infeſtari res eſt certiffima, quam divinæ literæ, San-

Sancti Patres, & Ecclesiastica historia passim testantur. Hinc prisca fideles Sacrum Evangelium in domibus suis habere studebant, ne illas scilicet malus dæmon infestare auderet, & vel solo adpectu arceretur. Id aperte docet S. Joannes Chrysostomus, ex eoque evincit quam salutare sit, si illud sedulo Christiani fideles lectitent, fideque ac religiosissime servant: *Si in quacunque domo*, inquit homilia xxxi. in Joannem, *Evangelium est, illuc Diabolus ingredi non audeat: quanto minus assiduæ lectionibus familiarem neque Dæmon, neque peccatum attinget? Sanctifica igitur animum, sanctifica corpus, hoc contineat, si Evangelium semper, & animo habueris, & lingua. Quod si lingua obscurnitas animam coinquinat, si Dæmones vocat, perspicuum est spiritali lectione carni sanctificari, & gratiam Spiritus Sancti affatim infundi: Divini cantus sunt scriptura; hinc nobis, & animæ nostræ affectibus remedium petamus, cujus utilitatem si intueremur, incredibili ei attentione vacaremus.*

Quantum autem utilitatis Evangelii lectio omnibus afferat, luculenter expressit S. Ambrosius, quum in Psalmum cxviii. illud fidei doctrinam, morum magisterium, & speculum justæ conversationis appellavit. Longe clarius testatus est S. Bernardus subjecta metaphora: *Evangelium*, ait sermone primo de vii. panibus, *speculum veritatis nemini blanditur, nullum seducit; talem in eo se quisque reperiet, qualis fuerit, ut nec ibi timore trepidet, ubi non est timor, nec lætetur cum male fecerit.* Similia tradunt cæteri Patres frequentissimi in inculcanda Evangelii lectione, quod diligenter percurrendum esse, ut omnium Scripturarum absolutam perfectionem ipsi Apostoli statuerunt apud Auctorem Apostolicarum Constitutionum lib. I. cap. v. *Quamobrem* S. Basilius homilia in verba illa: *In principio erat Verbum*; cum proditam sacris monumentis filii Dei memoriam

riam stupens intueretur, veluti exclamans pronuntiavit: *Omnis Evangeliorum vox reliquis omnibus Spiritus Sancti præceptis, atque doctrinis eminentior esse dignoscitur*. Redditque rationem, quod in aliis per Prophetas servos; in Evangeliiis ipse per se Dominus nos allocutus est. Et quidem, addit Cresolius, nunc loquitur nobis, & unumquemque monet, ac potentissime inflammat ad omne genus honestatis; & quatuor Evangelistarum operibus, ut totidem fulcris sublime sibi suggestum effecit, & honoratam Cathedram, unde sapientiam doceat. Hinc Sacerdos in Græcia divinis mysteriis operans, ut S. Chrysostomus in liturgia prodit, alte Evangelium attollens, magna voce dicebat, *σοφία ἰσθὶ, Sapientia recta*: quæ causa fuit cur S. Cyprianus tractatu *De oratione*, Evangelia nominarit *magisteria divina*; & S. Joannes Chrysostomus homilia 19. ad Colossenses, *Magistros perpetuos*.

Lubet bina exempla describere ex innumeris, quæ ad comprobendam Evangelicæ lectionis utilitatem astruere possent. S. Chrysanthus qui Romam multo suo, & suorum sanguine purpuravit, lectione Evangelii assidua ab idolorum cultu conversus est ad Christum; cum autem & Daria Conjux Christianæ religioni ipsius opera nomen dedisset, innumeros ille viros, hæc mulieres ad fidem, & castitatem allexerunt. Quocirca a Numeriano Imperatore post varia tormentorum genera vivi in terram defossi, & saxis obruti gloriosum martyrium obiere. Alterum exemplum est Bessarionis Abbatis, quem semper Evangelium sub axilla gestasse, ut ex eo quid agendum foret, & qua ratione evangelice vivendum disceret, testatur Palladius in historia Lausiaca. Quid etiam narrat quum Bessarion in quemdam nudum pauperem incidisset, suis se vestibus spoliasse, nudumque vestisse; percontantibus autem, *Quis te nudavit, ostendisse*

disse Euangelium, atque dixisse, *Hoc me exiit*. Rursum quum in alium egenum incidisset, nec aliud haberet, quod tribueret, ipsum Euangelii codicem vendidisse, pretiumque egeno dedisse. Quærenti vero Dulæ ejus discipulo, *Abba ubi tuum est Euangelium*, respondisse: *Ne tristitia afficiaris, nam ut illic (in Cœlo) habeamus fiduciam, vendidi ipsum sermonem, qui mihi semper dicebat: Vende quæ habes, & da pauperibus.*

Profecto adeo mirifice suum Christus dictavit Euangelium, ut cuique hominum ætati, sexui, gradui recte conveniat: quare nil mirum si S. Hieronymus Gaudentium instruens de Pacatulæ infantulæ educatione, puerulis etiam Euangelii lectionem præscribat: *Cum virgunculam, ait, septimus annus exceperit, discat memoriter Psalterium, & Evangelia sui cordis thesaurum faciat*. Porro mos olim fuit a nostrorum temporum iniquitate quammaxime distans, ut parentes filios suos a teneris unguiculis Euangelii lectioni assuefacerent. Legimus enimvero in Menologio Græcorum ad diem xix. Januarii, S. Joannem Calybitam adhuc puerum parentibus supplicasse, ut quando cæteri condiscipuli Evangelia haberent, quæ legerent, sibi quoque turpe esse non habere, curarent etiam sibi eum librum tradi. At vide eximiam pietatem genitorum: *Comparaverunt itaque, inquit Menologium, ei parentes pretiosum Evangeliorum codicem auro, & gemmis margaritisque ornatum, pretio quingentorum aureorum.*

Euangelii initia Catechumenis olim exposita.

C A P U T XXII.

TAntis bonis per Euangelii lectionem assiduam importatis, ne illi, qui Christo erant daturi nomen, frau-

fraudarentur, matureque ad illam inflammarentur, moris fuit antiqui, ut catechizandis, & Christianis moribus imbuendis hominibus quatuor Euangeliorum principia recitarentur. Meminit ejus ritus Beda, Venerabilis II. De tabernaculis cap. xlii. dum ait: *Pulcher in ipsa Ecclesia mos antiquitus inolevit, ut qui catechizandi, & Christianis sunt Sacramentis initiandi quatuor Euangeliorum principia recitentur, ac de figuris, & ordine eorum erudirentur; quo sciant exinde, ac meminere qui, & quot sint libri, quorum verbis maxime in fide veritatis debeant erudiri.* Fufius hunc ritum quammaxime venerandum nos docet quintus Ordinis Romani libellus apud Hittorpium; quem ut brevitati consularum summam proferimus. Ergo finita lectione ex Apostolo ad Colossenses cap. III. *Fratres expoliantes vos veterem hominem &c.* procedebant quatuor Diaconi de sacratio singuli singula Euangeliorum volumina deferentes. Hos præcedebant Acolyti cum duobus candelabris, thuribulo, & thure: positis deinde in singulis Altaris angulis sacris voluminibus, Presbyter catechumenis exponebat, quid Euangelium, ac unde ortum, & cujus in eo verba ponantur, & quare quatuor sint; qui hæc scripserunt; vel qui sint ipsi quatuor, qui divino spiritu annuntiant, a Propheta signati sunt. De quibus omnibus nos primo libro sermonem habuimus. Postea primus Diaconus ab Altaris primo angulo librum Euangeliorum accipiens præcedentibus duobus Ceroferariis, atque Thuriferariis ascendebat ad legendum Euangelium secundum Matthæum; cujus initium est: *Liber generationis Jesu Christi &c.* quo finito Subdiaconus linteo librum excipiens in sacrum deferrebat; & sic ad singula Euangelia. Alter interim Diaconus de secundo Altaris angulo aliud volumen sumebat, legebatque in eodem loco, quo prior, & iisdem caeremoniis

niis initium Sancti Evangelii secundum Marcum; quod ita incipit : *Initium Evangelii Jesu Christi Filii Dei; sicut scriptum est in Isaia Propheta : Ecce mitto Angelum, meum &c.* Tertius item, & Quartus Diaconus, de tertio, & quarto angulo Altaris, unus post alium librum fumebat; & ille initium S. Evangelii secundum Lucam, quod incipit : *Fuit in diebus Herodis Sacerdos &c.* Iste vero secundum Joannem : *In principio erat Verbum &c.* uti priores duo populo & catechumenis alte pronuntiabat. Atque hic erat antiquus ritus, quando scilicet Animarum Pastores summa cum laude muneris sui partes exequiebantur. Hodierni mores non modo sacros hosce ritus ad nostram Religionem pertinentes; sed, quod horrendum est, ac uberrimis lacrymis deplorandum, multi etiam licet senes præcipua fidei mysteria ignorent.

Euangelium sorte apertum, lectumque, vel auditum ad indagandam Dei voluntatem, bonumque futurum, vel malum prænosendum.

C A P U T XXIII.

DIvinam exquirere voluntatem, futuraque prænoscere per Evangelii apertionem mos olim fuit ad nostra fere tempora servatus, non equidem ad eventus alicujus certitudinem, sed ut opportuna aliqua ad bene agendum, pieque vivendum adhortatio, vel consolatio providente Deo obtingeret. Hinc Heraclius Imperator quum adversus Persas bellum gereret, exercitu, ut scribit Cedrenus, per triduum lustrato, & ad omnem, quantum licuit, sanctitatem informato, rogavit Deum ut

ad

ad Sacrorum Euangeliorum refectionem acciperet quo ex Dei voluntate abundum sibi esset, accepitque sibi in Albania hyemandum, quod & fecit. De S. Francisco tradit S. Bonaventura in vita cap. xiii. ex apertione libri Euangeliorum facta ad investigandam divinam voluntatem didicisse vocari se ad Christi Crucifixi expressionem. Similia de aliis Sanctis apud Metaphrasten, Surium, sociosque Bollandianos passim produntur. Quibus non officit S. Augustinus, qui eum usum absolute non rejicit, sed tum quidem si terrenarum rerum causa fiat; ejus verba in epistola exix. quam scripsit ad Januarium hæc sunt: *Qui de paginis Euangelii sortes legunt, etsi optandum est ut hoc potius faciant, quam ut ad demonia consulenda concurrant; tamen etiam ipsi mihi displicet consuetudo ad negotia secularia, & ad hujus vite vanitatem propter aliam vitam loquentia oracula divina velle convertere.* Sic Augustinus, qui certe non improbat sortitionem sententiarum e sacris Euangeliiis, quam potius admittit, cum agitur de rebus piis, sed solum cupit ut sacra sacris dumtaxat inserviant. Atque hoc modo intelligi potest Capitulare Caroli Magni decernentis, *Ut nullus in Psalterio, vel Euangelio, vel in aliis rebus sortiri præsumat, nec divinationes aliquas observare.* Ita pariter accipiendi sunt Sacri Canones, si qui hujusmodi ritui adversari videantur. Porro si a probis passim viris absque scrupulo, quin etiam magno cum fructu fieri id videmus, ut ex aureo Thomæ a Kempis libello, ubicumque fors tulerit aperto sententiam excipiant ad instructionem, & consolationem præsentis animæ statui congruentem, quanto magis ex divino Euangeliorum codice, ubi Christus adeste censetur, & nobiscum loqui dum legitur?

Ad hæc accedit usum divinæ voluntatis exquirendæ ex fortuita Euangelii apertione a Sanctissimis viris non semel

semel fuisse acceptum, potissime in electionibus & consecrationibus Episcoporum, ubi sacro codice referato prima textus verba observabantur, ex quibus faustum, vel infaustum omen prisci Christifideles suscipiebant. Legimus apud Surium die VIII. mensis Septembris. Quum Evortius Aurelianensis Episcopus non ignoraret post suum ex hac vita discessum futuras dissensiones de Successore eligendo, habita ad Clerum & ad quosdam, procures oratione, insinuavit illis nullum sibi munere digniorem videri Aniano Abbate, ac proinde se eos rogatos velle, ut in sede collocare eum dignarentur. Verum Presbyteri quidam natalium splendore inflati, & Laici quoque id benignis haud auribus excipere. Antistes autem comperto hoc dissensionis incendio, rursus Clerum, procuresque convocat; post plura ait: Tres, ut audio, ad hunc dignitatis gradum pertinaci contentione adspirant; sed cum tres, ut nostis, una hac dignitate potiri non queant, reliquum est ut unum ex mente divina hoc munere dignissimum eligatis. Quod ut fiat tres chartulas singulorum nomine inscriptas in altare mittamus, peractisque cras sacrificiis, innocentem puerum, adducamus, qui unam e tribus in medium producat; & si ne id quidem sufficere videtur, Psalteria, & Evangelia pariter proponantur, ut per sortem electio Scripturis confirmetur. Placuit cunctis. Peraguntur vigiliae, vota precesque Deo nuncupantur, Missae celebrantur, innocens adducitur puer, per quem & Dei mens, atque voluntas demonstraretur. Is ad extrahendas chartulas dexteram extendens, unamque digitis comprehendens, tamquam prophetans exclamat: *Anianus, Anianus, Anianus solus dignus est urbis hujus Antistes*. Aperitur deinde Psalterium, statimque offert se versus ille: *Beatus quem elegisti, & assumpsisti Domine, inhabitabit in tabernaculo tuo*. Denique in Evangeliiis hic textus occur-

currit : *Tu es Petrus , & super hanc petram ædificabo Ecclesiam meam*. Quibus evidentissimis admoniti documentis , cuncti Anianum designant Episcopum , eumque amplectuntur , quem divino testimonio comprobatum cernebant .

In ordinatione Athanasii Patriarchæ Constantinopolitani tradit Pachimera lib. II. cap. xv. verba illa occurrisse : *Qui paratus est diabolo , & angelis ejus* ; quod improbis ejusdem Patriarchæ actis vere comprobatum est ; eaque de causâ sede illa depulsus . Contra , in consecratione Lanfranchi Cantuariensis Archiepiscopi apparuerunt verba : *Date eleemosynam , & ecce omnia munda sunt vobis* : qui Præsul in largiendo eleemosynas fuit valde insignis . Item in ejus Successore S. Anselmo , qui collapsæ disciplinæ restituendæ causâ multos Episcopos adversos habuit , quum ordinaretur , occurrere verba : *Vocavit multos &c.* Alia id generis exempla multa Ecclesiastici Scriptores produnt ; ex quibus perperam nonnulli arbitrati sunt ad sortes inquirendas Evangelium in ordinatione Episcoporum adhiberi consuevisse ; quos tamen merito perstringit Bruno Signien- sis Episcopus inquires : *Non ad sortes inquirendas , ut stulti opinantur , Evangeliorum liber ejus qui consecratur humeris imponitur , sed ut per hoc intelligat cui labori , & oneri subjiciatur , & pondus Evangelicæ prædicationis eum circumquaque ferre non pigeat* . Sic ille in libro de vestiment. Episcop. cap. *Cur fiant prognostica in consecratione Episcoporum* .

Quod tandem de fortuita Evangelii apertione , ac lectione dictum est , asserendum & de illius auditione , per quam plerique divinam voluntatem sæpissime præno- verunt . S. Antonius , ut legitur in ejus vita scripta a S. Athanasio , cum de sæculo abjiciendo secum cogita- ret , intravit Ecclesiam , acciditque ut tunc legeretur Euan-

Euangelium, in quo Dominus dicit ad divitem: *Si vis perfectus esse, vade; vende omnia tua quaecumque habes, & da pauperibus, & veni sequere me, & habebis thesaurum in Cælo.* Quo ille audito, quasi divinitus huiusmodi ante memoriam concepisset, & veluti propter se hæc esset scriptura recitata, Dominico est attractus imperio, statimque regressus, possessiones quas habebat vendidit. Erant autem ei trecentæ palmæ uberes, & valde opimæ, quas vicinis largitus est, ne in aliquo aut sibi, aut sorori molestia gigneretur. Cætera vero quæ in mobilibus possidebat, universa vendidit, & aggregato non exiguo pretio, indigentibus dedit; paucis tamen ob sororem reservatis, quæ & sexu, & ætate videbatur infirmior. Rursus autem Ecclesiam ingressus, cum audisset Dominum in Euangelio dicentem: *Nolite cogitare de crastino*, reliquam quoque portionem pauperibus distribuit. Hæc de magno Antonio S. Athanasius. De Babyla vero Mimo ita scribit Joannes Moschus in prato spirituali cap. xxxi. Is ab infami vita ad sanctos mores transiit, cum ingressus Ecclesiam, verba illa ex sacro Euangelio legi audisset, quæ tamquam divinum oraculum accepit: *Pœnitentiam agite, appropinquavit enim Regnum Cælorum.* Sed quid plura commemorem quum in vitis Sanctorum, apud veteres recentisque Scriptores innumera ejus rei extent exempla?

*Per delectum codicis Evangelici in Martyrio
constantia noscitur.*

C A P U T XXIV.

CElebre factum est, dignumque ut hic describamus, quod de S. Marino Martyre narrat Eusebius Cæsareæ

reæ Episcopus libro VII. *Historiæ Ecclesiasticæ* cap. XIV. Iisdem temporibus (anno scilicet cclxii. ut supputat Cardinalis Baronius) cum pax in Ecclesiis ubique vigeret, Marinus unus ex his, qui in exercitu Romano magnum decus, & honorem fuissent consequuti, vir & genere illustris, & divitiis locuples, propter testimonium Christi, Cæsareæ Palæstinæ tali de causâ capite damnatus fuit. Est quidem honos apud Romanos, qui κλημα appellatur; quem qui adipiscuntur eos Centuriones fieri ajunt. Eusebius utitur hac voce κλημα non ut interpretes putavit, quod ejus nominis in militia ordo erat, sed potius, ut sentit Baronius ad annum Christi ccxlii. num. LXXVILL. quod cum κλημα idem sit quod *scala*, seu gradatio; ille sit sensus Eusebii, quod Marinus & tunc fuerit gradu seu ordine in militia collocatus, ut ad Centurionatum illi pateret ascensus. Sed cœptam historiam prosequamur. Cum locus vacaret, ordo postulabat, ut Marinus eo dignitatis gradu potiretur. Marinum igitur ad hunc honorem elatum, alius pro tribunali comparens in crimen vocat, tum quod erat Christianus, tum quod Imperatoribus non immolavit: ac propterea, inquit, ex veterum legum institutis illi non licet eum dignitatis gradum apud Romanos adipisci, sed illud quicquid est muneris, mihi jure impertiri debet. Unde Judex commotus (achivus hic erat genere) primo sciscitatus est cujusnam sententiæ, & religionis esset Marinus. Quem ut animadvertit, constanter se Christianum esse confitentem, trium horarum spatium ei ad deliberandum dat. Hunc e judicio egressum Theotecnus, qui illic erat Episcopus ad se colloquendi causâ invitat, & apprehensa manu, recta deducit in Ecclesiam. Quem cum interius ad ipsum Sanctuarium collocavisset; lavapaululum in alteram partem dimota, gladium quo cingebatur ostendit simulque divinorum Evangeliorum li-

brum afferens ex adverso proponit : Præcepitque ut ex illis duobus , quod magis esset ex animi sententia deligeret. Ubi vero absque cunctatione porrecta manu dextera sacrum librum accepit , Theotecnus sic illum affatur : *Tene & adhaereſce Deo : ſic enim ab illo roboratus , quod in optatis eſt , pro certo aſſequere . Abi in pace .* Illum ſtatim inde redeuntem præco pro tribunali advocat : jam enim tempus illi præſtitutum ad deliberandum erat completum . Siſtit ſe pro tribunali . Qui cum majorem jam quam antea fidei ardorem , ac ſtudium declaraffet , actutum inde , ut erat , ad mortem recta abductus , martyrio exceſſit e vita . Aſterius autem vir e Senatorum Romanorum numero cum Imperatoribus in primis charus , tum omnibus , & nobilitatis , & facultatum gratia conſpicuus in eadem Civitate propter divinam animi propenſionem , quam tam libere erga veram pietatem declaraffet , omnium ſermone celebrabatur : qui cum Martyri ipſo mortis articulo præſto aſſeſſet , ſimulque atque e vita migrarat , cadaver tollit , ſplendida & pretioſa obtegit veſte , atque humeris impoſitum inde deportat , quod cum magnifico , & ſumptuoſo linteo involviſſet , decenti ſepulcro condidit . Hucusque de martyrio , & ſepultura Marini Eusebius .

*Per Evangelici Codicis delectum inter pretioſa
monilia & armillas explorata puella
Virginis futura Sanctitas .*

C A P U T XXV.

Wilhelmus Mabaesburiensis hanc rem speciosissimo exemplo comprobat libro secundo de gestis Regum Anglorum capite xii. Hedberga , inquit , cum tri-

prima esset spectabile futuræ sanctitatis dedit periculum. Explorare volebat Pater, utrum ad Deum an ad sæculum declinata esset puella: posueratque in triclinio diversarum professionum ornamenta; hinc codicem & Evangelia, inde armillas & monilia. Illuc Virguncula, ulnis nutricis blandientis allata, genibus parentis assedit: rogataque utrum vellet, eligeret; torvo aspectu sæcularia respuens promptequè manibus raptans, Evangelia, & Codicem illa puellari adoravit innocentia. Exclamat assidentium coetus. Auspiciis futuræ sanctitatis in puella: quam exosculans pater ipse, arctioribus basiis dignatus sobolem, Vade, inquit, quo te vocat divinitas: sequere fausto pede quem elegisti sponsum. Et profecto & ego, & conjux felices erimus, si a filia religionis victi fuerimus. Ita Sanctimonialium habitu induta cunctas sodales ad amorem suum in urbe Wintonæ sedulitate obsequii invitabat.

Euangelii lectio atque explicatio ad discernendum spiritum aliquando praecepta.

C A P U T XXVI.

INter alia dona cælestia, quibus Christus Dominus Ecclesiam suam locupletavit est discretio spirituum, cujus dono hominum cogitationes, atque actiones cognoscuntur, an scilicet a natura, vel Dæmonis instinctu, an vero a divino Numine proficiantur. Sane multos produnt historiæ, qui vel naturæ viribus, aut Diaboli ope mira patrans, ementita pietate homines etiam sapientissimos sefellere. Hinc cum venerabilis Virgo Francisca de Serrone Septempedana præstantibus virtutibus eniteret, frequentia e Cælo exciperet visa, ac maxima operaretur prodigia; Episcopus Diaboli illu-

sionem metuens, inter cætera experimenta; quibus spiritum virginis exploravit, Euangelium quoque illi legendum, atque explicandum proposuit; quod pia Virgo, quamvis literas numquam didicisset, quippe quæ humili loco nata, labore manuum victitabat; mirum tamen in modum coram hominum selectorum cœtu, cunctis stupentibus, fuit interpretata; quamobrem sublato diabolicæ illusionis timore, cœpit Franciscæ sanctitas tum ab Episcopo, tum ab aliis summopere celebrari. Cujus causam beatificationis, & canonizationis, ut vocant, Septempedanæ Civitatis nomine apud Apostolicam Sedem nunc promovet vir clarissimus, amicus noster Bernardus Gentili Patritius Septempedanus.

*Euangelii codex e lectis Christianorum
suspensus.*

C A P U T XXVII.

Quemadmodum olim Gentiles ad sui custodiam gladios lectulis, in quibus decumbabant appendere consueverunt, ita veteres Christiani contra nocturnas antiqui hostis insidias, & illusiones divina Euangelia suspendebant, quibus longe fortius stratum suum instruendum curabant, quam sapientissimus Salomon, cujus *lectulum*, ut habemus in Canticis canticorum capite III. *Sexaginta fortes ambiebant ex fortissimis Israel, omnes tenentes gladios, & ad bella doctissimi*: Morem Christianorum ita laudat S. Joannes Chrysostomus, ut alia etiam requirat, vitæ scilicet sanctitatem, puritatem & morum innocentiam, aliasque virtutes in Euangelio contentas; alioquin ait nudam Euangelii suspensionem parum utilitatis esse allaturam. Verba Sancti Doctoris homilia xlii. in primam Pauli Epistolam

stolam ad Corinthios sunt hujusmodi : Si *Euangelium* quidem suspenderis ; nihil faciens , non adeo magnam accipies utilitatem . Docet injungendam esse eleemosynam , ac in pauperes beneficentiam : *Hanc autem* , inquit , *habens arculam* , habes arma adversus Diabolum , *preca-tionem reddis alatam* , *sanctam domum construis* , *quæ habet alimenta regis intus recondita* ; ideo & *juxta lectum sit arcula* ; *noxque nusquam perturbabitur visis* , & *in-somniis* . Ita Chrysostomus ; a cujus tamen salutari consilio multum aberrant tot mulierculæ , quidam etiam , pravi homines , qui non *Euangelium* , neque pecuniam pauperibus erogandam lecto apponunt , sed proh scelus ! chartas nominum , ac numerorum ludi sortis , quem *lot-to di Genova* appellant , nummosque periculo exponendos , superstitiose contra jus divinum , & edicta præsertim Regnantis Summi Pontificis , pulvinaribus suis supponunt , ut ita eligendum numerum , nomenque somniantes , summam jam aureorum quantitatem nactos esse certo sperent ; sed audi Regium Prophetam illos iridentem Psalmo lxxv. *Dormierunt somnum suum* , & *nihil invenerunt omnes viri divitiarum in manibus suis* .

Sacra Evangelii pagina e collis Christi-fidelium suspensa .

C A P U T XXVIII.

Accedit ad veteris observantiæ commendationem , quod multi ad collum *Euangelium* suspenderent præsertim pueri ac mulieres ; quod providisse videtur Sapiens qui Proverbiorum capite III. de sacris legibus ita monet : *Circumda eas gutturi tuo* . In Hebræo : *liga eas super collo tuo* ; videlicet ut explicat Cardinalis Cajetanus , ad instar colligantis pendulum aliquod ex utra-
que

que colli parte ante pectus, ut semper habeantur præ oculis. Sane morem Christianorum ferendi suspensum e collo Euangelium Sancti Patres non semel commemorant, quem videbant ad alendam, amplificandamque pietatem plurimum valuisse. Eumque commendare videtur Sanctus Clemens Alexandrinus, dum ita Gentiles alloquitur: *Qui præstigiatoribus fidem adhibent, amuleta & incantationes accipiunt, ut salutes; Vos autem ne ipsum quidem Verbum celeste conciliansque salutem vultis vobis ad collam alligare, & Dei credentes incantationi liberari.* Expressius S. Joannes Chrysostomus homilia, xxxii. in Matthæum. *Multæ hoc tempore mulieres suspensa habent e collo Euangelia.* Isidorus vero Pelusiota in epistola ad Epimachium libro II. epistola cæ. hæc habet: *Scias phylacteria exiguos fuisse libellos, qui legem continebant, quos Judæorum magistri ferebant, quemadmodum nunc uxores parva Euangelia; idest, inquit Cresolius, non totum Euangeliorum librum minutis literis scriptum, sed dumtaxat partem, qualem etiam in muneribus fuisse videmus, quæ Pontifices ad Dynastas, & clarissimos Reges mittebant phylacteriis, sive capsis pretiosis ornata.* S. Gregorius Magnus, Pontifex Maximus libro xii. epistola vii. lectionem Evangelii nominat dum ita scribit: *Adulovaldo Regi transmittere phylacteria curavimus; idest Crucem cum ligno Sanctæ Crucis Domini, & lectionem Sancti Evangelii theca Persica inclusam.*

Neque vero quisquam obijciat morem illum suspendendi ad collum Euangelium reprehensum potius quam commendatum fuisse, potissimum vero a S. Hieronymo, qui in Matthæum xxiii. post inculatos Hebræos phylacteria gerentes, sic anilem, ut ipse dicit, Christianorum superstitionem sugillat: *Hoc apud nos superstitiosa muliercula in parvis Evangeliiis, & in Crucis ligno, &*
istius-

istiusmodi rebus, quæ habent quidem zelum Dei sed non secundum scientiam, usque hodie subsistunt, culicem liquantes, & camelum glutientes. Sed quis non videt laudatos Patres, illos quidem improbare, qui judaica vanitate ad pompam quandam, & inanem gloriam Euangelia, ad colla suspendebant; & cum multis vitiorum sordibus commacularentur, quid Euangelium diceret, non attendebant. Bona per se res est, ut docet Angelicus Doctor II. II. quæst. LXXXVI. art. IV. atque laudabilis, si ex fide & devotione, ac absque omni superstitione, fiat; quinimo ad reverentiam, & honorem Evangelii pertinere manifestum est. Nec video, (ut Joannis Haye verbis utar), cur id factum non possimus in meliorem partem interpretari, non tamquam amuletum ex superstitione a veteribus gestatum, sed tamquam fidei symbolum; quemadmodum si quæ vulgo Rosaria vocant, quibus precari Sacram Virginem Mariam solemus, loco torquis ad collum geras, ut ostendas te non gentilem, sed Christianum; non hæreticum, sed Catholicum, esse; quod hodie multi laudabiliter, & religiose faciunt. Cæterum juvabit hic miraculum adscribere, quod ad rem nostram refert Massæus historiarum Indicarum. Scriptor illustris. Mulier, inquit, propemodum obfessa, spectrisque horrificis agitata, in ultimum venerat vitæ discrimen; evocatus a Marito P. Gaspar nostræ Societatis Presbyter, ut afflicta, & exangui manus imponeret; per occupationes ipse tum quidem adire non potuit; cæterum schedulam inscripto S. Joannis Evangelio pro se misit, quam pesti amovendæ mulier e collo suspenderet; id ubi factum, confestim levata morbo, terroribusque soluta surrexit. Itaque sancta, pia, ac utilis est consuetudo ad collum ferendi Euangelium, nisi aliqua accedente superstitione labefactetur.

*Euangelium a Christianis gestatum Marty-
res facit, a naufragio liberat, Virginita-
tem servat, luxuriam domat.*

C A P U T XXIX.

IN felicissimis illis temporibus, quibus Christiana flo-
rebat Religio, omnes fere viri, ac mulieres Euange-
lium pro comite, fidoque prasidio secum gestabant. Huc
spectant, quæ passim Romæ in coemeteriis præsertim,
& alibi occurrunt picturæ veteres Virginum, ac viro-
rum librum ornatum gemmis gestantium, idest divi-
num Euangelii codicem. Perpetuo illum ferebat Sanctis-
sima Virgo Cæcilia; neque ignis, gladii, aut equulei
extorquere potuerunt; quin per ipsum Virginitatis ac
Martyrii palmam fuerit assequuta; itemque Valerianum
Sponsum, Fratremque Tiburtium, pluresque alios ad
eandem erudierit, atque efformaverit; ut de ea merito
canat Ecclesia: *Cæcilia famula tua Domine quasi apis ti-
bi, argumentosa deservit.* Quid dicam de aliis Christi-
fidelibus, qui secum Euangelium gestantes, mirabiles ejus
virtutes experti sunt? S. Paulinus ait Martianum navi-
gantem habuisse novum Testamentum, cujus vi & veluti
numine a naufragio liberatus fuit. Mirabilius est quod
de S. Virgine ac Martyre Theophila a longe graviore,
castitatis nimirum naufragio liberata narrant ipsius acta
apud Cardinalem Baronium Anno Christi, ccc. num.
xxxiii. his verbis, „ Cum illa esset vultu adeo formosa,
traheretur autem a lictoribus, & jam ad probri, & con-
tumeliæ officinam violenter introduceretur; manus simul
& oculos in Cælum tollens, & miserabiliter aspiciens,
Mi Jesu, dixit, meus amor, mea lux, meus spiritus
meus custos castitatis & vitæ, vide eam quæ est tibi de-
spon-

sponsa . Vide o sponse in quem nulla cadit reprehensio ; & festina ; quoniam non est quidem tempus precandi , ne pactum conventum fallam , ne prodas me bestiis , ne lupi tuam pecudem lanient ; serva sponse sponsam : meam conserva castitatem , fons castitatis , ut tuum quoque nomen nunc maxime glorificetur , quod intelligenter glorificatur ab Angelis .

Hæc illa quidem oravit cum lacrymis : effectum autem Deus reddidit . Sed est adhibendus animus narrationi . Introducitur Virgo ad prostibulum ; illa vero etiam in tali loco , & tempore , non est oblita eorum quæ oportuit ; sed protinus eruens id quod habebat in sinu (id autem erat sacrosanctum Euangelium) aperuit ; & dat operam lectioni . Unus vero ex intemperantibus æstro insano percitus ad eam ingreditur ; qui aliquantisper quidem eam audivit legentem . Cum autem jam prope esset , a maximo metu invaditur , & tremore valde agitur , & humi procumbit mortuus ; & sic jacebat ad pedes Theophilæ non spirans . Multæ horæ præterierant ; & cum aliis visum esset , quoniam non exibat , eum non posse satiari Virgine : ubi alius quoque ingreditur , ipse quoque jam prope stans , lucis quidem quæ verbis exprimi non potest , fulgore illustratur : deinde eum a luce tenebræ excipiunt , & obtutu orbatu ; quærebat obiens non amplius Virginem , sed quemadmodum citra offensionem exiret extra fores . Cum autem multi quidem talia passi essent , & nonnulli etiam magis horribilia : nulli fuit amplius cordi ingredi . Sed & si quis ingrediebatur , non ingrediebatur captus amore , sed solum volens scire ea quæ facta fuerant . Postquam autem ingressi sunt complures , vident ea quæ & ad videndum erant terribilia , & ad dicendum aliis maxime admirabilia : Puellam quidem honeste sedentem , & libro (idest Euangelii) incumbentem : adolescentem au-

tem quendam prope eam stantem luce quidem ineffabili, pulchritudine vero incredibili, veluti quædam tela fulguris emittentem ex oculis. Hæc postquam viderunt, & metu obriguerunt, & vix tandem, *Quis est sicut Christianorum Deus?* exclamaverunt: & simul non ferentes spectaculum, recte secum agi putabant si fugerent, & celeritate maxima domo exibant, omnes quidem obliti libidinis, nonnulli autem etiam ipsa impietate abjurata. Ita S. Theophilæ acta apud laudatum Baronium. Simile alii referunt de Trophima Virgine.

Ex S. Andrea Apostoli actis (si vera sunt quæ refert Auctor nomine Abdæ) videtur Apostolorum avo id usurpatum, ut fideles sacrum Evangelii Codicem, tamquam frænum circumferrent, quod lascivientis carnis motus coerceret, ejusque impuros appetitus reprimeret. Evangelium enim carnis impetum, carnalesque appetitus coercere luculentissime docet S. Petrus Damiani libro vi. epist. xxi. *Per Zachariam dicitur, In die illa erit, quod super frænum equi est, sanctum Domino vocabitur: Frænum equi sanctum est Evangelium, quod ubique carnalis desiderii velut infrænis equi cohibet appetitum.* Hinc de quodam sene tempore S. Andrea Apostoli vivente ita scribit Petrus de Natalibus libro I. cap. viii. Senex quidam Nicolaus venit ad Apostolum Andream, dicens septuaginta annis quibus vixerat, continere se non potuisse, semper luxuriæ deservisse, & quod aliquando ad carnis concupiscentiam retrahendam *Evangelium* super se ferebat; & dum lupanar intrasset, oblitus *Evangelium* deponere, audivit a meretrice quod videbat mirabilia, quæ etiam se ab illo tangi non permisit.

*Euangelium ignem exstinguit, & barbaros
ad Christum convertit.*

C A P U T XXX.

Postquam perspicuis exemplis ostendimus Euangelii virtute frænata fuisse luxuriam, quæ ut ait Beatus Job. cap. xxxi. *ignis est usque ad perditionem devorans, & eradicans omnia genimina*; mirandum nemini videri debet, si materialem ignem sexcenties restinxerit. Refert Nicephorus lib. v. *Historia* cap. xxi. cum jam flamma serpens Ecclesiæ S. Anastasiæ appropinquaret, accepto in manus sacro Euangelii Codice per tegulas in testum conscendisse; precibusque, & lacrymis illasam ab incendio servasse. Item quum Arvernorum Urbs igne conflagraret, teste S. Gregorio Turonensi *De vitis Patrum* cap. vi. S. Gallus Ecclesiam ingressus diutissime ante sacrum Altare Deum exoravit; surgensque apprehenso Euangeliorum Codice, eoque aperto obviam se flammis obtulit; subitoque incendium extinctum est, ut ne favillæ quidem remanerent. Admirabilissimum vero omnium miraculorum, quæ huc referri possunt illud videtur, Euangeliorum librum a Rossis in fornacem projectum, ac servatum illasum iisdem causis extitisse prodigiosæ conversionis ad Christum. Factum sic narrant Cedrenus, & Zonaras. Missus fuerat ad Rossos a Basilio Macedone Orientis Imperatore Episcopus ut eos Christo adduceret; Proceres ejus gentis cum Principe & universo Populo Pontificem in Concilium eorum vocatum interrogant, quidnam eos docturus esset? Profert Episcopus sacrum *Euangelii* librum, & quædam miracula exponit a Christo edita; Ibi Rossus negare se aut suos ipsi fidem ullo modo habituros; nisi aliquid horum, præsertim servatorum in flagranti camino trium-

puerorum simile vidissent . Ad hæc Pontifex : *Tumetsi*, inquit , *Deum tentare fas non sit* , *tamen si animo statueris ad Deum vos conferre* , *postulate quod vultis* . Ii confestim postularunt ; ut codex *Euangelii* in rogum succensum mitteretur , promittentes se eo incolumi manente , Deo quem ipse prædicaret , nomen daturus . Accepta conditione Pontifex orationem ad Deum convertit , orans Jesum ut sui nominis gloriam assereret . Conjicitur liber in caminum ; caminus per multas horas ardens tandem extinguitur ; liber vero incolumis illæsusque reperitur . Quo miraculo permoti barbari , omni dubitatione abjecta ad baptismum confugere .

Euangelium corporis morbos , & animi languores pellit .

C A P U T XXXI.

NEc ille minus pius , religiosusque videri debet ritus , quo olim prisca fideles Euangelium ægri , & in lecto jacentis capiti admovebant . S. Augustinus sacro Euangelii Codici tantam virtutem tribuit , ut non animi tantum , sed & corporis morbos ab eo depelli posse autumet , si cum fide adhibeatur . *Cum caput* ; inquit tractatu VII. in Joannem ; *tibi dolet* , *laudamus si Euangelium ad caput tibi apposueris* . Rationem ejus rei tradit Angelicus Doctor II. II. quæst. LXXXVI. art. IV. quum ait : *Verbum Dei non est minoris efficaciæ , quam Reliquiæ Sanctorum* , *sed Reliquiis utimur ad salutem* , *ergo pari modo imo majori ad eandem licet uti verbo Dei scripto* , *sive Euangelio* . Atque hinc fortasse multi olim Christiani secum gerere Euangelium solebant , ut nimirum ejus præsidio depellerent etiam mala , quæ corpora afficiebant , venena , veneficia , & id genus alia . Sane Evangelii

gelii Codicem ægrotis imponi consuevisse ad sanitatem recuperandam testatur Joannes Saresburienſis libro II. de nugis curialium cap. I. hoc exemplo. *Chuthbertus ſignifer quidem gentis noſtræ in lege Domini Euangelium Joannis ſuperimponebat infirmis, & curabantur.* Initium ejuſdem S. Joannis Euangelii ſuper ægros legi ſolitur, ſicut hodie in Hiſpaniis, ac Neapolitano Regno aliisque locis ex Ritualis Romani præſcripto paſſim uſurpatum, indicant hæc verba Caſarii lib. v. cap. xliv. *Epſam ſicut mihi retulit beata memoria Domina Elizabeth ejuſdem Cænobii Abbatiſſa, ſorores in lecto ſuo ponentes, ac principium Euangelii S. Joannis ſuper eam legentes, mane regyratam invenerunt;* ideſt innixam ſuper cubitum.

Sed longe efficacior, ac certior eſt virtus S. Euangelii contra morbos animi, contra cogitationes malas; aliaque cujuſvis generis peccata; quæ ut docet in Euangelio Chriſtus Dominus Matthæi cap. xv. de corde exeunt; quocirca conſulit S. Auguſtinus ut etiam ad cor Euangelium admoveatur ad peccati vim exhauriendam. Si ergo, inquit tractatu vii. in Joannem, *ad caput ponitur ut quieſcat dolor capitis, ad cor non ponitur ut ſanctetur a peccatis? Fiat ergo. Quid fiat? Ponatur ad cor, ſanctetur cor.* Verum ea eſt cæcitas hominum, ut parum de animi languoribus curantes, nihil intentatum relinquunt, ad recuperandam corporis ſanitatẽ, cum alias melius iis eſſet lecto infirmos decumbere, quam ſanos omni ſclerum genere ſe inquinare. Egregia ſunt in hanc rem verba ejuſdem Sancti Doctoris ſic agentis: Bonum eſt bonum, ut de ſalute corporis non ſatagas, niſi a Deo illam petas. Si ſcit tibi prodeſſe dabit illam. Quam multi ægrotant in lecto innocentes, etſi ſani fuerint procedunt ad ſclera committenda? Quam multis obest ſanitas? Latro qui procedit ad faucem occidere hominẽ, quanto illi melius erat ut ægrotaret? Qui noctu ſurgit ad

ad fodiendum parietem alienum; quanto illi melius erat, si febribus jactaretur? innocentius ægrotaret; scelera te sanus est. Novit ergo Deus quod nobis expediat; id agamus tantum, ut cor nostrum sanum sit a peccatis, & quando forte flagellamur in corpore, illum deprecemur.

*Lectō Patri Evangelio filius cæcus
visum recipit.*

C A P U T XXXII.

INter gratias curationum intercessione Sancti Juventii Martyris ex Mss. Gallicis Casæ Dei celebre. hoc Evangelii miraculum narratur apud Bollandianos ad diem primam mensis Junii. Die XII. Julii anno MDCXLVII. comparuit coram nobis, notus a probitate & fide Nicolaus Maloïsel hujus Parochiæ Casæ Dei subditus; qui modo prædicto juratus asseruit, quod filiulus suus trimulus Thomas, factus fuerit cæcus die XXVI. Junii præcedenti, defluente in ejus oculos humore noxio: quamobrem ad S. Juventium recursu habito, die visitanti Elisabetham Virgini sacro, petierit supra se in persona filii recitari Evangelium S. Martyris. Hoc autem factō domum regressus reperit puerum uno jam oculo videntem. Cumque ab uxore & pluribus, qui isthic opus faciebant mercenariis, quasivisset horam, & modum, quo illuminatus puer eo oculo fuerat; intellexit id eodem momento contigisse, quo Evangelium super se fecerat pronuntiari. Tercio autem die post, cœpit etiam altero oculo videre puer: adeo ut nunc ambobus, sine ullo vel minimo impedimento utatur; in cujus rei fidem ipsē chirographum suum hic apposuit. Alia exempla adtexere supervacaneum puto. Est etenim Evangelium, ex Apostolo ad Romanos scribente, *Virtus in salutem omni credenti*; vel ut docet Sanctus

ctus Joannes Chrysostomus, *Officina Medicinalis*, ubi morbi omnes, & mala cuncta gratis curantur.

Euangelicus codex aquis demersus, nulla litera violatus pulchrior educitur.

C A P U T XXXIII.

QUI S. Cronani Abbatis Roscreenfis in Hibernia fido calamo gesta conscripsit, hujusmodi prodigium enarrat apud Bollandianos ad diem xxviii. Aprilis. Euangelium apertum a S. Cronano in stagnum delapsum est, fuitque in profundo lacus quadraginta diebus, & noctibus, de cujus submersione vir Dei devotus plurimum fuit perturbatus; sed Dei misericordia factum est, ut non multum post temporis Euangelium illud esset inventum, & in nulla litera violatum. Simile miraculum prodit Turgotus libro secundo historię Dunelmensis, ubi describens translationem corporis S. Gutherii in Hiberniam propter immites Danorum incursiones, hæc habet: Dum navis verteretur in latera, cadens ex ea, textus *Euangeliorum* auro gemmisque perornatus in maris ferebatur profunda; & pergentes triduo post ad mare, multo quam consueverat longius recessisse conspiciunt; & tribus, vel eo amplius miliaribus gradientes ipsum *S. Evangelii* codicem reperiunt; qui ita forinsecus gemmis, & auro sui decorem, ita intrinsecus literis & foliis priorem præseferebat pulchritudinem, ac si ab aqua minime tactus fuisset: unde postea maximo cultu, & nitore in Ecclesia Dunelmensi servatus fuit. De codice etiam Evangelii gemmis auroque exornato, quo utebatur S. Margarita Scotiæ Regina, scribit auctor ipsius vitæ, cum aliquando Custodis negligentia in aquas decidisse, & licet per diem ac noctem sub undis

undis jacuisset , extractum tamen nihil læsum inventum flet .

*Evangelium discordias sedat; Tyrannorum
impetus comprimit .*

C A P U T XXXIV.

NUllum arbitror in Ecclesiastica historia ita parum versatum , qui nesciat neminem prope fuisse Christianis imbutum legibus , qui non viso Evangelio , (quod non immerito pacis vocat Apostolus) furentis animi impetum , sacroque perfusus horrore iram mitigaret . Tempore Constantini Summi Pontificis , teste Anastasio in ejus vita , quum Romæ inter Principes domesticum bellum esset exortum , & multi vulneribus confecti concidissent , Pontifex ut communis omnium Pater misisset Sacerdotes cum *Euangelis* , & Crucibus Domini ; ita subito motus illi turbolenti sunt repressi ! Constantinopoli quoque idipsum fieri solitum testatus est Zonaras . Quum enim in ea Urbe seditio non sine plurimorum hominum pernicië suborta esset , & in medium forum prorupisset , ad sedandam illam , ait Auctor Sacerdotes in furentium cuneos penetrasse ferentes sacratissimos *Euangeliorum* Codices . Quis autem Totilam Gothorum Regem crudelissimum , in Romanos sævientem , & in Ecclesiæ perniciem imminentem ad mansuetudinem adduxit , ne illos occideret , nisi Pelagius gestans in manibus *Evangelium* ? Orestem quoque præfectum Alexandriæ furentem audacia , quum vellet Cyrillus Alexandrinus ad lenitatem revocare , ipsum adiit *Evangelium* proferens ; quippe qui , ut ait Socrates lib. VII. *Historiæ* cap. XIII. reveriturum illum existimaret id pignus eximie sanctitatis .

Septem Euangelia a totidem Sacerdotibus apud Græcos recitata in Officio S. Olei, quod pro conferenda ægrotanti extrema unctione domi, vel in Ecclesia celebratur. Codex Euangelii super ungendi caput primum impositus, ipsi deinde osculandus porrigitur.

CAPUT XXXV.

Dicet fortasse quispiam: Domi quidem ægrotantes hac sacra unctione, & relevari, & communiri posse intelligo: in Ecclesiam verò cum soli valentes conferant, qua ratione Sacramentum hoc potest illis conferri? Difficultatem diluit vir doctissimus Jacobus Goar in notis ad hoc Officium: Ægroti, inquit, plerique aliorum manibus, & ope ad Ecclesiam se deferri student, ut sacrorum præsentia, & animo levamen, & corpori miraculi alicujus experimentum in recuperanda salute obveniat, ibique plurium nonnumquam dierum spatium in Catechumenæis jacent, pernoctant, morantur, & sacra tandem unctione sibi remedium exposcunt; quod si Arcudius advertisset, non tam levi causa sanos in Ecclesia, ac ægrotos in domibus hoc se Sacramento communicare solitos asseruisset.

Cur autem ipsi Sacramento conferendo septem Sacerdotes apud Græcos hodie assistunt, totidemque olim apud Latinos, Hugone Menardo in Gregoriani Sacramentarii notis teste adstabant? rationem suggerit Simeon Thessalonicensis; qui licet tres etiam Sacerdotes, ubi modica est eorum copia, a sacris plerisque ternariis numeri petita ratione sufficere arbitretur, ab errore ta-

men gravi nullatenus excusari potest, ubi unum solum, absque aliorum ope, vel societate Sacramentum hoc non posse conferri, impie asserit. Ea namque potestas, ut passim docent Sacri Theologi, in uno solo legitimo Ecclesiæ ministro, ac plebis Christianæ pastore residet, quamvis tanti Sacramenti reverentia, & antiquorum Ecclesiæ morum imitatio plures expetere videantur. Imo & olim adfuisse tum ex S. Gregorii Sacramentario, tum ex aliis vetustissimis ordinibus, Hugonis Menardi opera vulgatis edocemur: id olim religiose sanxit Gregorius III. Pontifex Maximus. *Cum reverentia*, inquit, *deferatur oleum ad infirmos & eos ungant Sacerdotes cum magno honore, & orationum celebritate, quæ ad hoc sunt ordinatæ*. Priscum illum numquam laudatum fatis morem, S. Carolus Borromæus in Concilio Mediolanensi iv. innovavit. Titulo, *Quæ pertinent ad extremam unctionem*.

Ritus quo Græci utuntur in hoc ministrando Sacramento consistit in prolixa recitatione piarum precum, Canticorum, septem Epistolarum, totidemque Evangeliorum, quæ simulatque recitata sunt a singulis Sacerdotibus, *in medium ipsorum*, ait Rituale Græcum, *ingreditur qui extremam unctionem suscipit, & acceptum S. Evangelium ponit super caput ejus Sacerdotum præcipuus, & manus illi Sacerdotes alii imponunt*. His peractis, recitataque pia oratione a Sacerdotum Præsidente, subdit Rituale græcum: *Et osculatur Evangelium*. Ab antiquo Evangelium ægrotis impositum memorat Alphonsus Tostatus questione xxxiv. *Præfatione in Mattheum*: & ejusmodi ritus exemplum in Elisæo baculum ad Sunamitidis filium a mortuis exuscitandum mittente contemplatur: Deumque tum ob astantium fidem firmandam, sive approbandam, vel reverentiam, cultumque verbis suis exhibitum, miracula plura nonnumquam ægro-

agrōtos sanando patrasse asserit . Alia vero ratio ejusdem instituti, ut sapienter advertit laudatus Goar, ex oratione sequenti, a qua semper sacrorum rituum sensus sumendus est, legenti constat . Ut Christus videlicet ; Dei Verbum in Euangelio miranda ejus opera enarrante, manu sua omnipotenti extensa (Sacerdos enim ejus vice manum cum sociis Euangelio superponit) obsecrantis infirmi peccata deleat, veniamque concedat .

Euangelium morientibus lectum .

C A P U T XXXVI.

SI unquam Christiani homines contra generis humani hostis insidias auxilio indigent, id profecto tempore vitæ extremo accidit, cum diabolus habens iram magnam, sciens quia modicum tempus habet, omnes intendit nervos ut in desperationem miseros languentes adigat ; quocirca ut per consolationem Scripturarum spem habeamus, vetus est ac pius a primis Ecclesiæ ad nostra tempora servatus usus legendi morientibus Euangelium . De Sancta Martha sorore Lazari ac Magdalenæ scribit Marulus lib. v. cap. x. quod *Euangelium* Dominicæ Passionis a S. Luca descriptum legi sibi fecerit . Apud Surium in vita S. Amati Abbatis Monasterii Romerici ad diem xiiii. Septembris, sic legitur : *Tandem fratribus congregatis, & Euangelia & Psalmos & Hymnos ad ejus lectulum decantantibus, veniam ab omnibus petens, omnibusque vale dicens migravit ad Dominum anno dclx.* S. Bonaventura describens obitum S. Francisci hæc ait . *Fussit Deo vir charissimus Evangeliorum sibi codicem apportari & Euangelium secundum Joannem, quod incipit ab eo loco : Ante diem festum Paschæ, legi sibi poposcit .*

Fuisse in usu ut potissimum illa Evangelii portio,

quæ Dominicam exhibet Passionem, morientibus legeretur, fidem faciunt Rituale Romanum, atque antiqui Monachorum ritus a doctissimo viro Edmundo Martene editi; ubi statuta Lanfranci ita decernunt: *Si ad sanitatem minime redire, mortique potius appropinquare dignoscitur, ex quo certa in eo mortis signa apparere incæperint, sine duobus fratribus esse non debet, qui diebus, & noctibus quandiu intellectum tenet, legant coram eo Passiones Domini & Evangelia.* Id ipsum testantur manuscriptæ consuetudines Monasterii Cluniacensis, ac Rituale manuscriptum S. Benigni Divionensis, nec non Breviarium manuscriptum S. Germani a Pratis apud memoratum Martene. Breviarium quoque Cassinensis Monasterii tempore Oderisii Abbatis descriptum agens de officio circa morientem, sic ait: *Deinde legantur ante eum Passiones Domini.* Exempli innumera extant tum vetera, tum recentiora in libro quem pius vir Joannes Severanus Sanctoeverinas Congregationis Oratorii presbyter inscripsit: *Pretiosæ mortes Justorum.* De S. Frodoberto Abbate Cellensi ejus vitæ auctor ita testatur: *Universos denique jubet adesse discipulos, dumque ante eum textus Passionis legeretur Dominicæ, sub oculis omnium S. Anima, carnis exuta velamine felici cælestia penetravit.* Qua pietate devotioneque Summus Pontifex S. Pius V. ex hoc mundo ad Coelum profecturus Evangelicam Christi Domini Passionis historiam auscultaverit, auctor est in ipsius vita Cabutius lib. v. cap. xii. *Sibi, inquit, sapius Evangelicam Dominicæ Passionis legi jussit historiam, & ubi Sanctissimum Jesu nomen audiret, ob reverentiam pileolo manum intendebat, quem si per corporis imbecillitatem attingere non valebat, manu pium mentis sensum indicabat.*

*Viri Sancti Evangelii Codicem tenentes ,
eoque fidem profitentes vita functi.*

C A P U T XXXVII.

Ritus est in Ecclesia antiquissimus , ut Christiani homines in extremis vitæ suæ momentis laborantes , præcipue fidei professionem emittant. Rituale Romanum describens modum juvandi morientes de hac re ita cavit : *Deinde hortetur infirmum , & excitet , ut dum mente viget eliciat actus fidei &c.* Apud Sacros Scriptores , plerosque reperies , qui illam describi , sibi que in manu post mortem poni , atque cum ea sepeliri voluerunt . Sic enim de S. Joanne Gualberto scribit Surius ad diem xii. Julii : Cum ad exitum autem appropinquaret fecit hæc in breviculo scribi , & præcepit in sua manu poni post mortem , sibi que consepeliri , nempe : *Ego Joannes credo & confiteor fidem , quam Sancti Apostoli prædicaverunt ; & Sancti Patres in quatuor Conciliis confirmaverunt .* Beatum Joannem Colombinum Jesuatorum Ordinis institutorem , fidem catholicam , quam moriens professus est , in acta publica redigi curavisse , testatur Pheus Belcarius in ipsius vita , cap. lxxvi.

Quod vero propius attingit ritum nostrum , Paulus monachus Anachoreta , decimo ante obitum sibi præcognitum die , summo mane ad lauram festinato descendit (habitabat enim in monte Latro Monachorum Sinaitarum illustri) . signumque cogendis monachis præmature dari jussit , & sacram peragi mystagogiam ; qua absoluta , duobus fratribus , *Properate ,* inquit *ad speluncam , & Evangelii codicem mihi inde afferte ;* quo delato toto cordis affectu complexus est illud , & paulo post levi susarro immurmurans , *In manus tuas Domine commendanda Spiritum meum ,* sanctissimam reddidit Deo animam .

manu. Ex ms. codice græco bibliothecæ Sfortianæ. Missa facio alia ejus rei brevitatis studio exempla; silentio tamen non est prætereundum eximium Beati Bonifacii Episcopi Laufenensis factum, *qui* (ut in ipsius vita legitur apud Bollandianos ad diem xix. Februarii) *cum appropinquaret termino vitæ suæ petiit textum Evangelii secundum Joannem, quem cum teneret manu suâ amplexatus est librum dicens: Hæc didici, in his vixi, denique hæc sunt, in quæ credo, & spero, ac desidero mori. Quod non multo post, ut optaverat, evenit.*

Illud quoque omissum nolim quod de Petro S. Gregorii Papæ Diacono traditur. Is cum Evangelium ferens in ambonem ascendisset, ut inclytam Sanctissimi Pontificis memoriam tueretur, ac libros egregios quos furens populus igne combustos volebat, defenderet; divinum tenens codicem, spiritum Deo reddidit. Rem sic narrat Joannes Diaconus in vita S. Gregorii libro iv. cap. lxxix. Cum calumniarum veterum incentores Gregorium prodigum, dilapidatoremque multiplicis Patriarchatus thesauri streperent, deficiente personali materie, ad comburendos libros ejus cœperunt pariter anhelare. Quorum dum quosdam jam combussissent, & reliquos vellent exurere, Petrus Diaconus familiarissimus ejus, cum quo quatuor dialogorum libros disputaverat, creditur vehementius obstitisse, dicens ad oblitterandam ejus memoriam librorum exustionem nihil proficere, quorum exemplaria diversis petentibus mundi ambitum penetrassent. Subjungens immane sacrilegium esse tanti Patris tot & tales libros exurere, super cujus caput Spiritum Sanctum ipse in similitudinem columbæ tractantis frequentissime perspexisset. Cumque dudum devotum populum Diaconus cerneret occasione temporis cum invidis resultare, in hoc omnium sententiam dicitur provocasse, ut si quod dixerat jure jurando confirmans, mori con-

ri continuo meruisset, ipsi a librorum exustione desisterent: si vero superstes sui testimonii extitisset, ipse quoque combustoribus manus daret. Itaque cum Evangelii in ambonem venerabilis levita Petrus ascendens, mox Gregorianæ Sanctitati testimonium præbuit, inter verba veræ confessionis Spiritum efflavit: & a dolore mortis extraneus, juxta pyrgi basim, sicut hactenus cernitur, confessor veritatis meruit sepeliri.

*Sacer Evangelii liber vita functis
consepultus.*

C A P U T XXXVIII.

EO quoque devenit fidelium religiosa pietas, ut sacrum Jesu Christi Evangelium etiam in sepulcro, medios inter cineres tamquam pignus immortalitatis secum habere cuperent. S. Barnabas cum S. Paulo Gentium Apostolus ad eas profecturus, Evangelium S. Matthæi, propria manu descriptum, quaquaversum circumtulit, ac tandem pro eo Martyr in Cypro occumbens, cum eodem quasi cum testimonio suæ in Deum charitatis numquam intermorituræ sepeliri voluit; quod deinde sub Zenone Imperatore ad pectus ejus appositum, ipsq̃ revelante, ut refert Baronius ad annum cccclxxxv. repertum est. De S. Domnjo, sive Domnione, historia ejus translationis apud Bollandianos die xi. Aprilis, hæc habet. *Reliquiæ S. Martyris integræ inveniuntur, & in pectore liber erat Evangeliorum thecis inclusus, literis Apostolicis antiquo more, ipsiusmet, ut fertur, manibus formatis.* Olim quoque Romæ visebatur in sepulcro S. Petri Evangelium, quod sacris exuviis summi illius Apostolorum Principis erat impositum, idque, ut
in vi-

in vita Hadriani Papæ scribit Anastasius, omnes eo accedentes, magna animi religione osculabantur.

Eum usum ponendi scilicet cum defunctorum corporibus Euangelium, monachus Engolismensis anonymus in vita Caroli Magni apud Pithæum, quo pacto Carolus armis magnus, pietate maximus, Regno christianissimus fuerit sepulturæ mandatus, in hæc verba describit, a Joanne Ferrando *Disquisitionis Reliquiarum* lib. 1. cap. xii. pag. cccxxix. relata: *Corpus ejus aromatizatum est, & in sede aurea sedens positum est in curvatura sepulcri, ense aureo accinctus, Euangelium aureum tenens in manibus & genibus, reclinatis humeris in cathedra, & capite honeste erecto, ligato aurea catena ad diadema, & in diademate lignum Crucis positum est.* Alia multa passim ritus ejus sepeliendi cum Evangelii Codice vita functos exempla occurrunt. Sed hæc carptim relata sufficiant, ut dignoscamus probabile videri, id quoque olim fieri solitum in tumulis aliorum Christianissimum; plurima enim cadavera, seu loculi in pervetustæ Basilicæ Vaticanæ demolitione, cum Sanctis Evangeliiis, teste eruditissimo Joanne Ciampino, *Veterum monumentorum* parte I. cap. xvi. reperta sunt.

Frustra ab Ethnicis Imperatoribus, Sacris Evangelii Codicibus bellum indictum, Christianorum in illis retinendis & oculandis constantia. Traditores qui?

C A P U T XXXIX.

Sævisam omnium persecutionem, quam S. Augustinus libro xvi. *De Civitate Dei* cap. lxi. & Orosius lib. vii. *Historiæ* cap. xxvi. decimam vocant, novis

vis adversus Christianos mense Martio , adventante die Paschatis per universum Imperium Romanum promulgatis edictis concitatum fuisse a Diocletiano , & Maximiano Imperatoribus tradit Eusebius , lib. VIII. *Historia Ecclesiastica* cap. III. Fuerunt autem , ut ait , illa edicta , ut omnes Christianorum Scripturæ igni traderentur , qui honores fuissent adepti deponerentur , cæteri vero libertate privarentur , denique ut omnes ubique Ecclesiarum Præsides conjicerentur in vincula , & quibuscumque adhibitis machinis victimas idolis immolare cogerentur . Hæc de edictis Eusebius . Quod vero pertinet ad præceptum de sacris concremandis Codicibus ; Imperatorum publicato edicto ; cum in omni Provincia Præsides , & in singulis locis Magistratus omni studio , & adhibitis tormentis invigilarent , ut a Christianis Codices traderentur ; qui atrocitate poenarum perterriti , quot apud se haberent , tradiderunt , vocati sunt *Traditores* . Quod & S. Augustinus agens contra Donatistas ita testatur libro VII. *De baptismo* , cap. II. *Post passionem quippe ejus (S. Cypriani) quadraginta , & quod excurrit annis peractis traditio Codicum facta est , unde cæperunt appellari Traditores* . At quis crederet complures Episcopos impio parentes edicto , sacros non solum Codices tradidisse , sed etiam una simul conspirantes adversus pios Christifideles , quos calumniis opprimebant , schisma immortale conlasse ? *In Africa* , inquit Optatus Milevitanus , *duo mala , & pessima admissa esse constat , unum in traditione , alterum in schismate* ; & paulo post : *Quid commemorem laicos , qui tunc in Ecclesia nulla fuerunt dignitate suffulti ? Quid ministros plurimos ? Quid Diaconos in tertio , quid Presbyteros in secundo Sacerdotio constitutos ? Ipsi apices , & Principes omnium , aliqui Episcopi illis temporibus , ut damno æternæ vitæ , istius incertæ lucis moras brevissimas compararent , in-*

strumenta divinæ legis impie tradiderunt. Hæc Optatus; qui licet de universis divinatorum librorum voluminibus loqui videatur; non diffiteor tamen intelligi potissimum de Evangelio debere; quandoquidem persecutio non contra Hebræos, qui alias multa secum veteris Testamenti habebant volumina, sed Christianos excitata fuit, quorum præcipuus Codex erat Evangelium, istudque summo studio prosequabantur; quemadmodum de S. Martyre Mamante legimus, qui licet pascendis ovibus esset intentus, perpetuum tamen comitem Evangelium secum habebat ut refert Haræus *In Historia Sanctorum* ad diem XVI. Augusti.

Hanc sententiam comprobant acta Concilii Cirtensis a Cardinale Baronio relata ad annum ccciii., ubi cum Secundus Episcopus Tigisitanus primæ Cathedræ assidens inter alios Victorem Rufficadiensem Episcopum de sacrorum codicum traditione interrogaret, sic dixit: *Dicitur te tradidisse quatuor Evangelia*: Victor respondit: *Valentinianus curator fuit; ipse me coegit ut mitterem ea in ignem*. Asserto favent acta S. Euplii Martyris Diaconi Catanensis, qui ab exploratoribus inventus legere Evangelia, & docere Christianos, ab illis tentus est, & perductus cum libro proclamavit: *Christianus sum, & pro Christi nomine mori desidero*. Cumque a Calvisiano Consulari interrogaretur cur illa legeret, & non potius juxta Imperatoris edictum igni tradidisset; respondit Euplius: *Quia Christianus sum, & tradere non licebat. In his vita æterna est; qui tradit, vitam æternam perdit; ut eam non perdam, vitam meam do*. Tandem post sæva tormenta, Evangelio ad collum ejus appenso, a Carnifice decollatus est. Alia id genus exempla longum esset recensere. Quamplurimi siquidem fuisse qui sacra Evangelia, ac cæteras divinas scripturas tradere recusantes mortem oppetere maluerunt: quorum

rum omnium memoria die præcipuo reoli consuevit in Romana Ecclesia; in cuius Martyrologio die II. Ianuarii, hodieque legitur: *Romæ commemoratio plurimorum Sanctorum Martyrum, qui spreto Diocletiani Imperatoris edicto, quo tradi sacri Codices iubebantur, potius corpora Carnificibus, quam sancta dare canibus maluerunt.*

Euangelium adulterantes qui? Illius Prædicatores decet quammaxime ut a temporalis quaestu sint immunes.

CAPUT XL.

DOlet Apostolus multos suo ævo extitisse, qui Verbum Dei adulterarent: *Non sumus*, inquit secunda Corinthiorum cap. II. *sicut plurimi adulterantes Verbum Dei.* In Græco pro adulterantes notante Cornelio a Lapide non est *μωχεύοντες*, quod proprie mœchiam, & adulterium significat, sed *καταλύοντες*, idest cauponantes, quibus opponit Paulus sinceros, & sinceritatem. Cauponantur Verbum Dei, qui instar cauponum prædicant Euangelium ad quaestum ex eo colligendum, illudque referunt ad sua lucra. Latinus tamen Interpres recte vertit adulterantes, quia sicuti caupones sæpe vina, & alia quæ vendunt, aliis rebus commiscunt, vitiant, & adulterant pro quaestu: ita & avari pseudopræcones Euangelii sua lucra miscent Euangelio, itaque Euangelicam prædicationem, quæ pura esse debet, pureque referri ad unius Dei gloriam, sua avaritia deturpant, contaminant, & adulterant, dum ea ad quaestum abutuntur: *Cauponari*, inquit S. Gregorius libro XXII. *Moralium* capite XVII. *Verbum Dei, est aut aliter de illo sentire, quam est; aut ex eo non spirituales fructus, sed adulterinos fœtus quaere*

rere laudis humanae. Et S. Chrysostomus homilia v. in II. Corinthiorum: *Hoc enim, ait, est cauponari, cum quis vinum adulterat; cum quis pecunia id vendit, quod gratis dare debebat*. Hoc enim loco, & de quaestu eos lepide perstringere videtur, & rursus id quod dixi significare, nempe quod sua illi divinis admisceant. Quod etiam Isaïas cap. I. in hæc verba objiciebat: *Caupones tui vinum aqua miscent*; nam etsi de vino hoc dictum sit, non tamen aberravit, qui de doctrina hoc quoque intellexerit.

Quantum vero profit Sacrum Concionatorem non ab avaritia solum, sed ab omni etiam licito quaestu alienum prædicare Jesu Christi Evangelium, satis docet exemplum Apostoli, qui non modo munera gratis oblata, sed etiam stipendia jure naturæ, legeque Dei tam veteri, quam nova (ut ipse pluribus in priore ad Corinthios probat) sibi debita repudiavit; imo ibidem denunciavit se potius fame mori malle, quam ea ob labores prædicationis accipere. Nam in primis majores natu Ecclesiæ Ephesiorum, apud quos triennium integrum noctu diuque in Evangelii prædicatione insumpserat, ut est in Actorum Apostolicorum historia cap. xx. ita allocutus est: *Argentum, & aurum, aut vestem nullius concupivi, sicut ipsi scitis, quoniam ad ea quæ mihi opus erant, & his qui mecum sunt, ministraverunt manus istæ*. Et in prima ad Corinthios epistola cap. ix. protestatur se non usum potestate accipiendi stipendium, quantumvis multis nominibus justissima. Et in altera ad eosdem cap. xi. addit se id permittere noluisse, quamvis magna premeretur inopia: *Cum essem, inquit, apud vos & egerem, nulli onerosus fui: nam quod mihi deerat, suppleverunt fratres qui venerunt a Macedonia, & in omnibus sine onere me vobis servavi, & servabo; est veritas Christi in me, quoniam hæc gloriatio non infringetur in me in regionibus*

nibus Achajæ . In priore quoque ad Thessalonicenses scribit cap. II. Memores estis fratres laboris nostri, & fatigationis, nocte ac die operantes, ne quem vestrum gravaremus, prædicavimus in vobis Euangelium Dei. Vos testes estis, & Deus, quam sancte, & iuste, & sine querela vobis qui credidistis fuimus . In alia vero ad eosdem epistola cap. III. Ipsi scitis, quoniam non gratis panem manducavimus ab aliquo, sed in labore, & in fatigatione, nocte, & die operantes ne quem vestrum gravaremus . Si ergo Apostolus, cum Ecclesia summa inopia laboraret, ut neminem gravaret, victum sibi manibus operando comparabat, quanto magis ab omni quæstu alieni esse debent nostris hisce præsertim temporibus sacri homines tot bonis christianorum jam fere paupertate laborantium affluentes ?

Sed expendere libet causas egregii contemptus divitiarum, atque ipsiusmet etiam victus necessarii, quas idem Apostolus designatis in locis multipliciter reddit, quasque in unum pius ac eruditus Joannes Buxæus, in libro quem inscripsit *Panarium vitiorum*, diligenter collegit . Prima est in Actis cap.xx. *Quoniam sic laborantes oportet suscipere infirmos, ac meminisse Verbi Domini Jesu, quoniam ipse dixit: beatius est magis dare, quam accipere* . Secunda est in priore ad Corinthios: *Omnia sustinemus ne quod offendiculum demus in Euangelio Christi*; idest, ait Cornelius a Lapide, ne accipiendo sumptus demus occasionem qua homines tenaces, & indiscreti abutantur, ut remorentur Euangelium, illique obloquantur . Tertia ibidem, ut plures lucrificeret: *Cum liber essem ex omnibus omnium me servum feci, ut plures lucrificerem*; quasi dicat, ad omnia me demisi, etiam ad inopiam, & famem, omnium infirmitatibus me accommodavi, ut cum Corinthios viderem in danda, Apostolis sustentatione tardiores, & parciores, ego no-

luc-

luerim quidquam ab eis in sumptum accipere, ut eorum infirmitati condescenderem, & sic omnes lucrificerem. Quarta est eodem loco, ut particeps fieret mercedis in Evangelio promissæ: *Omnia, inquit, facio propter Evangelium, ut particeps ejus efficiar.* Quinta in altera ad Corinthios epistola; ut pseudoapostolis omnem ansam se calumniandi præriperet: *Quod autem facio, & faciam; ut amputem occasionem eorum, qui volunt occasionem, ut in quo gloriantur, inveniantur sicut & nos;* quasi dicat: gloriantur in prædicatione se esse mihi pares, cum sint inferiores: Ego enim gratis, ipsi lucri causa evangelizant, ita S. Chrysostomus, & Theophilactus. Sexta in utraque ad Thessalonicenses ne quemquam gravaret. Septima ibidem, ut bonum exemplum aliis esset quod imitarentur, *Ut nosmetipsos formam daremus ad imitandum nos.* Causas ipsas idcirco singulatim recensuimus, ut sacri homines perinde atque Apostolus ab accipiendis muneribus pro concionum, confessionum, aliorumque spiritualium operum laboribus retrahantur. Mos enim, hæreticorum est Evangelium lucri causa prædicare, suaque quærere non quæ Jesu Christi.

Adversus Montanum hæresiarcham, & ejus pseudo-prophetissas scribens apud Eusebium Cæsariensem lib.v. hist. xvii. antiquus Ecclesiæ Scriptor Apollonius Ipse est inquit qui pecuniarum exactores constituit, qui oblationum nomine munera accipienda præfixit, qui denique sui verbi prædicatoribus, ut ejusdem verbi doctrina sordido ventris abdomine, & ingluvie roboretur salaria supeditat. An non universa scriptura videtur vetare ut propheta munera, & pecuniam accipiat? Quando ego igitur prophetissam forte video aurum, argentum, & vestes pretiosas cupide accipientem, quid est cur illam prophetissarum numero non excludam? Et infra: Illos qui Montano Prophetæ, & martyres dicuntur, non a divitibus so-

lum,

lum, sed a pauperibus etiam ab orphanis, & viduis pecunias exegisse perspicue offendemus. Hæc ille. Montanus, ait vir doctissimus Christianus Lupus, dissertatione de Simonia, a suis auditoribus, & sequacibus exigebat pecunias, fucabat honesto, & licito ad sobrium cleri victum oblationis nomine; exigebat etiam aurum, & vestes pretiosas; ordinabat similium oblationum præfectos, & exactores, & ex fœdo ipso gazophilacio suis ministris erogabat ac fugebat salaria. Atque ut alios hæreticos omittam, horrendum est, atque turpissimum Joannis Ruggenhaghii Martini Lutheri socii exemplum, qui Danis quos pseudoapostolus seduxerat ad suos rediens, fertur relictam terram e navi spectasse, ac salutasse: *Vale, Dania, habeas tu meum Evangelium, ego tuum aurum*; Ita vir improbus locutus est, quod sibi suis concionibus magnam auri vim collegisset. Longe aliter Sanctus Thadæus Apostolus, de quo apud Edessenos, ipsorumque Regem Abgarum prædicante scribit Eusebius Cæsariensis libro VIII. *Historiæ* cap. XIX. *Abgarus præcepit, ut cives sui in unum convenirent, Thadæum concionantem attente audituri; paulo post auro illum donari mandavit, at ille respuit sic fatus: Si nostra prorsus dereliquimus, quomodo accipiemus aliena?* Caterum quantum profit sacrum Evangelii præconem, gratuito sine quovis stipendio ac populi gravamine ministerium impendere, ex eo liquet quod docet S. Joannes Chrysostomus in secundam Corinthiorum: *Nihil, inquiens, mundanos perinde edificat ut nihil accipere.* Hinc sapienter Innocentius III. Pontifex Maximus in Concilio Lateranensi IV. cap. X. mandavit cunctis amplarum Dioeceseon Episcopis, *Ut viros idoneos ad sanctæ prædicationis officium assumant quibus ipsi cum indiguerint, congrue necessaria subministrant.*

Euangelica historia in Christianorum Templis, ac Cœmeteriis depicta; Inter sacra Ecclesia ornamenta expressa. Abusus in rebus divino ministerio addictis profana insignia collocandi refellitur.

C A P U T XLI.

A Lienum omnino a nostro instituto minime erit etiam de hac re disputare. Quamquam vero hæretici sacrarum ofores Imaginum impudentissime inficiuntur nullum fuisse olim earum in Ecclesia usum primis quingentis annis; tamen ex sacris constat Scriptoribus præclariora Redemptoris nostri symbola ac gesta in *Euangelio* descripta, Ecclesiis, vestibus, altaribus, vasis, cæteraque sacræ suppellectili fuisse collocata. S. Nilus ad Olympiodorum Præfectum, qui eum consuluerat quas imagines ponere posset in Templis, respondet ponendam solam Crucis imaginem in Sacratio; in circuitu vero historias Novi ac Veteris Testamenti. Iis non modo Ecclesiarum absides, sed & ipsos Ecclesiarum parietes fuisse egregie exornatos, S. Paulinus in ix. & x. Natali S. Felicis, elegantissimo carmine testatus est. S. Joannes Damascenus epistola ad Theophilum Imperatorem, *De Sanctis ac venerandis Imaginibus*, sanxisse ait Constantinum Magnum, in Ecclesiis, in tabellis depingi, ac vivis coloribus exarari, in Bethlehem oppido nativitatem, invisentes pastores, Magos munera offerentes, stellæ cursum, Simeonem justum susipientem, Joannem baptizantem, inaudita divinaque miracula, voluntarias perpersiones, eximiam ac vivificam resurrectionem, & quæ deinceps Apostolis patrata prodigia sunt. Sic ille. Idipsum docent

docent in Concilio Nyceno H. Hadriani Papæ Legati, qui respondentes Cosmæ Diacono, Novi, & Veteris Testamenti historiis, hinc inde parietes Templi impleri, doctissimi pictoris opera cupienti, hæc habent: *Tale etiam qui nunc quiescit Constantinus olim fecit. Nam cum Templum Romæ Salvatoris extruxerit, in utroque pariete Templi historiam Veteris, & Novi Testamenti inscripsit. Hinc quidem Adam exeuntem Paradiso; illinc vero Latronem Paradisum ingredientem.*

Ejus rei vestigia in nonnullis Urbis Ecclesiis adhuc non pauca licet agnoscere. Basilicam S. Cæcilie antiquam in novam hanc formam redigeretur ita in quodam suo erudito opusculo ms. amicus noster vir clarissimus, ac notæ doctrinæ Joannes Marangonus describit: Ab utroque latere fulgebant undecim Veteris, ac Novi Testamenti historiæ coloribus expressæ totidem grandioribus figuræ cubicæ speculis. In dextero videlicet respectu ingredientium erant: Primo Creatio Mundi, Cælorum, ac Planetarum, ac divisio lucis a tenebris. II. Creatio animalium. III. Creatio Adam. IV. Eductio Evæ ex latere Adam dormientis. V. Iidem primi Parentes in Paradiso terrestri, cum arbore inter illos, cui hærebat serpens, ex qua pomum mulier carpebat. VI. Occisio Abel. VII. Noe arcam conficiens. VIII. Arca in medio diluvii cum Noe columbam demittente ex fenestra. IX. Sacrificium Abrahæ. X. Quando Abraham tres vidit, & unum adoravit. XI. Isaac benedicens Jacob. Ex alio latere: Primo Christi Domini nativitas. II. Adoratio Magorum. III. Pueri Jesus circumcisio. IV. In Jordane Christus a Joanne baptizatus. V. Nuptiæ Canæ Galilææ. VI. Tentatio Christi in deserto; ejusque elevatio super montem, & super pinnaculum Templi. VII. Transfiguratio ejusdem. VIII. Saturatio quinque millium hominum in deserto. IX. Christus ad

puteum cum Samaritana . X. Resurrectio Lazari . XI. Adulteræ absolutio . Quæ omnia specula variis circumornata lineamentis radiabant a S. Paschali I. Pont. Max.

At vero ut de Cœmeteriis etiam loquamur , docet vir sacræ antiquitatis peritissimus Antonius Bosius lib. IV. *Romæ subterranea* cap. XXIII. in quibusdam ipsorum cubiculis , ac parietibus pictas esse hæc divini Evangelii historias . Paralytici a Christo sanati . Lazari revocati e monumento . Christi Domini Hierosolymam , solemniter ingredientis . In monte sedentis , ac duodecim Apostolos docentis . In figura Pastoris oviculam humeris gestantis . In figura Agni ; & complures alias imagines ex variis Evangelii historiis desumptas . Cujus generis nonnullæ etiam referuntur a viro eruditissimo Marco Antonio Buldetho in egregio opere *De Cœmeteriis* .

Quod hucusque de Ecclesiis , ac Cœmeteriis dictum est , id ipsum factum etiam constat in sacris vestibus ac cætera Ecclesiæ suppellectile . Tertullianus Auctor vetustissimus , quippe qui florebat initio tertii sæculi , in libro *De pudicitia* aperte scribit sacris Calicibus insculptum fuisse Christum in forma Pastoris ovem errantem suis humeris ad ovile reportantis . Eundem morem pie ac religiose servatum sequentibus sæculis , passim testantur Ecclesiasticæ historiæ . Quocirca reprehensione dignus videtur mundanus ac recens Christianorum fastus , qui ut avitæ pietatis recordationem ingerant , gentilitia stemmata Sacræ Ecclesiæ suppellectili apponere non erubescunt . Hunc in abusum acerrime invehitur egregius pietatis Magister Joannes Thaulerus sermone I. in Dominica VIII. post festum Trinitatis ; ac de illis qui stemmata sua vestibus , ornamentis , vasis sacris & Ecclesiasticis adtexi volunt vere ait : *Receperunt mercedem suam* . Inanem porro eorum excusationem esse docet ; qui id unum se querere profitentur , ut pro illis oretur , quod eo-

corum insignia monent. Verum multo eis, inquit, utilior foret eleemosyna aliqua parva, soli Deo in sinum illius oblata, & abscondita prorsus ab omnibus, quam vel celebris Templi extructio, scientibus cunctis, precesque pro eis fundentibus. Facile enim supplebit Deus quicquid omnes orare possent, si tantum bona opera sua illi soli relinquere, eique confidere curent. Sola namque eleemosyna resignata, ac pura, solius divinitatis intentione facta plus orat, quam omnes, ad quorum notitiam perveniret, orare possent. Et post pauca. Ea multorum corruptio est, ut ex his quæ faciunt saltem videri, & sciri velint, & aliquid suum retinere gestiant. Caterum quæcumque hoc affectu opera fiunt, cariosa sunt omnia, etiam si tot sint, ut mundum impleant universum. Multa præterea, his addit, validisque sacrarum literarum auctoritatibus confirmat.

Sed placet hic aliud argumentum describere, quod in rem ipsam tradit alter inclyti Ordinis Prædicatorum Theologus præstantissimus Natalis Alexander *Theologicæ Dogmaticæ & Moralis* libro II. *De Sacramento Eucharistiæ* cap. VII. articulo III. num. VII. his verbis „Qui ea lege ornamenta, vel calices Ecclesiis offerunt, aut Capellas, vel Ecclesias erigunt, ut in iis gentilitia eorum stemmata effulgeant, se ipsos querunt, & Cainum imitantur, qui cum parva, eaque deteriora ex bonis suis Deo munera offerret, se ipsum sibi retinuit: quamobrem eum recte obtulisse, sed non recte divisisse ait Scriptura. Unde S. Ambrosius libro II. de Cain, & Abel cap. VI. Recte, inquit, Cain obtulit, quia oblatio insignis devotionis, & indicium gratiarum est: sed non recte divisit, quia ante omnia Deo debuit deferre primitias, ut a gratia inchoaret Authoris. Etenim divisionis hic ordo est, ut prima secundis, non primis secunda præcurrant, & cælestia terrenis, non terrena cælestibus præferantur.

tur. Terrena autem (verba sunt memorati Auctoris Natalis Alexandri) cælestibus præferunt, & Deo injuriam faciunt cui offerunt munera, viri, & foeminae nobiles, & divites, (adde etiam homines infimæ plebis) cum gentilitia sua stemmata, & insignia in casulis Sacerdotum, ornamentis Altarium, Sacris Calicibus, ipsis Altaribus & Ecclesiis intexi, insculpi, appingi volunt; & ita sunt affecti ut alias Ecclesias vel Altaria non erigerent, nec sacra vasa, vel ornamenta Ecclesiis conferrent. Indignum sane est, nec omnino ferendum, ut sacra supellex iisdem insignibus notetur, ac profana; quæ in eorum abaco ad pompam ostentatur, in mensis ad luxum ministretur: ut eorum insignia quasi auctora-menta servitutis ferant Sacerdotes cum sacris operantur; sicut pedissequi cum famulantur; sicut muli cum sarcinas ferunt: ut eorum stemmata & tituli spectentur in Altaribus, ut in rhedis, & curribus; in Basilicis soli Deo dicatis in memoriam Sanctorum, qui terrenos honores contempserunt, illique jure Christianæ humilitatis sacrificium obtulerunt, ut in ædibus profanis. Si in Regum Palatiis, aulæis, & peristromatibus, vasis aureis, & argenteis, totaque supellestili, qua eorum Majestas utitur, nulla alia insignia, nulli tituli spectantur, nisi Regum, quorum propria sunt; quis æquo animo patitur aliena insignia, imo hostilia, mundi scilicet pompam, & Diaboli superbiam spectantia, in vasis, ornamentis, Altaribus, Ecclesiis Deo dicatis ostentari?

Fortasse laudatos scriptores severioris disciplinae quis accusaverit? Verum, ut alios omittam, magnus Ecclesiæ Mediolanensis Antistes S. Carolus Borromæus in Concilio Dioecesano XL. ita præscripsit: *Sacris indumentis & locis ne insignia, stemmatave familiarum, aliaque profana appingantur, aut sculphantur*. Idipsum jubent constitutiones Clericorum Regularium quos Theatini

tinios vocant. Parte I. cap. III. *Ne permittatur ut in sacris indumentis familiarum ponantur insignia.*

Mulierum abusus, quæ sacras Evangelii historias profanis vestibus intexebant, adpingebantque refellitur.

CAPUT XLII.

QUUM Christus Dominus ubique fere in Euangelio exemplo non minus quam verbo humilitatem, paupertatem, & vanæ gloriæ contemptum nobis commendasset, abusus profecto videtur merito improbandus, ille scilicet quarundam mulierum, quæ eo temeritatis aliquando devenere, ut non contentæ sumptuosas vestes suas variis symbolis miro artificio elaboratis exornare, ipsis etiam sacras Evangelii historias adtexere summo studio, & impensa curabant, adversus quas jure stylum suum exacuit S. Asterius Episcopus Amasææ homilia *De Divite, ac Lazaro* cujus verba quum non sint omnibus obvia, placuit hoc loco describere. Quandoque igitur in publicum prodeunt quasi depicti parietes ab obviis adspiciuntur. Quin etiam pueri circumstant, ridentes inter sese; digitisque picturam in vestibus commonstrantes; & ad multum spatii prosequuntur, nec nisi ægre recedere & avelli possunt. Videre est illic leones, pantheras, ursos, tauros, canes, silvas, saxa, ac venatores, & omnia denique, circa quæ Pictorum industria naturæ æmula versatur. Necesse videlicet erat, ut videtur, parietes non solum atque domos exornari ac depingi, verum etiam tunicas, & pallia iis superjecta. Qui autem, quæve de divitibus illis religiosiores, argumenta textoribus ex historia Evangelica collecta

lecta subministrant : ipsum inquam Christum nostrum, cum Discipulis omnibus, ac miracula quaque, quemadmodum ibi narrantur. Videbis nuptias Galilææ, & hydrias; paralyticum lectum bajulantem; cæcum qui luto curatur; mulierem, quæ sanguinis profluvio laborabat, fimbriam prehendentem; peccatricem ad pedes Jesu accedentem; ac Lazarum e sepulcro redivivum : & hæc dum faciunt, pie sese facere, & vestimenta Deo grata induere arbitrantur. At me quidem si audiant, istis divenditis, vivas Dei imagines colant. Christum ne pingere (satis enim illi, quod semel ad corpoream naturam assumendam causa se nostra sponte demisit) sed mente, & intellectu Verbum incorporeum circumfer : in vestibus paralyticum ne habe, sed hominem infirmum ac projectum require : ne assidue mulierem sanguinis profluvio laborantem spectandam propone, sed viduæ afflictæ miserere : ne peccatricem ad genua Domini prolapsam tam diligenter contuere, sed tuorum aspectu peccatorum contritus lacrymas uberes emitte : pro effigie Lazari resurgentis idoneam in tuæ tempus resurrectionis apologiam para : Cæcum in vestibus depictum circumferre noli, sed cæcum viventem beneficiis solare : posthabitisque reliquiarum cophinis, & hydriis illis Canæ Galilææ, esurientibus cibum, sitientibus potum præbe, & in his quidem nobis illa splendida ac superba divitis vestis profuerit. Ita ille. Atque hæc pio lectori sufficiant de Codice S. Evangelii, atque servatis in ejus lectione & usu vario ritibus, quos ad majorem Dei Filii gloriam, & Christianorum hominum utilitatem brevi temporis spatio descripsimus; quod ideo dixi, ut qui nostro non ignoscit ingenio, pietati saltem parcat & tempori.

F I N I S.

IN-

INDEX RERUM,

Quæ in hoc opere continentur.

A

- A**bbatissarum nonnullarum temeritas legendi publice Evangelium, prædicandi, & benedicendi coercita ab Innoc. III. *Pag.* 41.
- Abusus præbendi Evangelium, ad osculandum Præsidi Virginum in Oppido Romarocomontis Tullen. Diœcesis. 125.
- Abusus gentilitia Stemmata Sacris Vestibus apponendi detestatus. 234.
- Abusus sedendi juxta Sacros Codices. 185.
- Abusus detestatur, quod seminarum gratia Episcopale munus aliqui aucupentur, & Sacri Oratores ipsarum favore suggesta ad Divinum Evangelium nunciandum nobiliora procurent. 42.
- Agape seu Convivium fieri solitum in conventibus Christianorum primævæ Ecclesiæ. 14.
- Alba quod indumenti genus habeatur in Ecclesia? Varia ejus mysteria & usus. 56. 57.
- S. Alexander Patriarcha Alexandriæ quoties Evangelium in sua cella legebat, id stans præstabat, ac lampade accensa. 184.
- Altare nonnisi Sanctorum Reliquiis, & Codice Evangeliorum exornari debet. 136.
- Ambo quid, & qualis locus esset in Ecclesia ad Evangelium legendum destinatus? 43.
- In eo etiam sermones ad populum habebuntur. 44.
- Ejus varii usus in Ecclesia. 45.
- Ambonum usum fere obsoletum restituere studuit S. Carolus Borromæus. 47.
- Amalarii, & Alcuini error notatur. 177.
- Amen cur respondeatur post Evangelium, & Deo gratias. 119.
- Amictus quod genus indumenti sit in Ecclesia, & quid significet? 55.
- Animalia Ezechielis quatuor, Symbola 4. Evangelistarum, eademque Joanni exhibita in Pathmos. 17.
- Antiquarii vocati Scriptores Sacrorum Codicum. 185.
- S. Antonius audita Evangelii lectione patrimonium suum pauperibus distribuit. 200.
- Aqua benedici solita in pervigilio Epiphaniæ tum apud Græcos, tum apud Latinos, ejus mysteria. 155. & seq.
- Aquilæ forma, supra quam legebatur Evangelium, cur Ambonibus

nibus superposita ? 47.

S. Aurea Virgo ab Angelo acriter correctaque collo Diaconi Stolum ereptam sibi apponens publice in Ecclesia Evangelium legere ausa fuerit : ejus **gravis** pœnitentia . 41.

B

Baculus cur a Sacris Canonibus prohibitus Missarum solemniam celebrantibus . 91.

Baculus Crucis Symbolum . 88.

Baculus cur adhibitus in Ecclesiis , ac depositus in Evangelii lectione ? 88. & seq.

Baculus a S. Martino dono datus S. Victurio Cenomanensi Episcopo . 89.

Baculus hodie intermissus , retentus vero à Cantoribus in quibusdam Ecclesiis . 90.

Baculus in Episcopo est insignis auctoritatis . 91.

Barbarorum mira conversio . 212.

S. Barnabæ corporis inventio in Cypro sub Zenone Imperatore cum Evangelio S. Matthæi . 223.

Beda Ven. commentarium in Joannis Evangelium absolvens moritur . 22.

Benedictus XIII. Sacrorum Rituum assertor studiosissimus , capite detecto semper auscultabat Evangelium . 117.

Benedictiones varæ usurpatæ a celebrante erga Diaconum re-

citaturum Evangelium in Missa , & cur dentur ? 67.

S. Bonifacius Ep. & M. Codicem Evangelii semper secum comitem adhibet . 189.

S. Bonifacius Episcopus Laufensis Evangelium tenens , eoque fidem profitens moritur . 222.

Bosius Antonius laudatus . 234.

Braschi Joannes Baptista Archiepiscopus Nisibenus laudatur . 124.

Brentii , & aliorum Hæreticorum error circa Etymon Evangelii . 4.

Buldehus Marcus Antonius laudatus . 234.

C

S. Cæcilia perpetuo Evangelium gerebat . 108.

S. Cæciliæ Urbis Ecclesiæ parietes a S. Paschali I. Papa historiis utriusque Testamenti exornati . 233.

Calices Sacris Imaginibus insculpti . 234.

Calvini impudentia refellitur . 51. & 165.

Campanæ consecrandi usus , & origo . 159. Quis primo ritum tradiderit ? 160.

Campanæ non baptizantur , sed benedicuntur , & cur ? 160.

Cur in ipsarum benedictione legatur Evangelium ? 161.

Campanas pulsare olim ad Sacerdotes spectabat . 163.

Canonistæ insignes docent Episcopatum esse ordinem . 178. Can.

Cantica tria ex Euangelio desumpta, capite detecto recitanda, & audienda in officio.

106.

Cantores, seu Præcentores ac Decani quarundam Ecclesiarum Baculi usum in Dignitatis argumentum retinent. 90.

Cantus antiquitus promiscue fiebat a Clero, & Populo in Ecclesia. 85.

Caput aperiendum esse ad lectionem Euangelii. 110. & sequentibus.

Auctoritates Doctorum. 114.

Hujus ritus Causæ. 118.

Carolus Magnus sepultus est Euangelium aureum manibus tenens. 224.

Carolus Magnus Imp. coronatus a Pontifice in Basilica Vaticana, relatus inter ejusdem Canonicos. 39.

Carolus IV. Imp. in Missa tenens evaginatum gladium in manu, legit Euangelium. 38. 93.

Carolus V. Imperator in die Nativitatis Domini inter Missarum solemnias a Clemente VII. celebrata Euangelium legit. 38

Causæ peculiare cujusque Euangelii scribendi. 12.

Cereorum usus in Ecclesia non improbat a Lactantio, & Hieronymo, sed commendatur. 72.

Ab Acolythis deferendi ante Diaconum quando legendum est Euang. in Ecclesia. 74.

A septem Acolythis totidem Cerei accensi deferuntur ante

Diaconum recitatum Euangelium in Missa solemni Pontificis. 74.

Cur Cerei, ac Thus adhibeantur in lectione Euangelii in Missa? ibi.

Christiani plurimi Codices Sacros tradere recusantes Martyrio coronati. 227.

Christiani Euangelium ferebant ut ejus præsidio etiam mala, quæ corpora affligunt, depellerent. 212.

S. Chrysostomus lectione Euangelii ab Idolorum cultu conversus. 193.

Cinguli usus ejusque significatio. 58.

Clericorum Reg. Theatinorum studium circa Codicem Evangeliorum. 189.

Codex Euangelii. Vide Euangelii Codex.

Codicum Traditores qui?

Compagnonus Pompeus laudatur. 155.

Concionandi munus quandoque ex Causa concessum Diaconis. 131.

Proprium est Episcoporum. 135.

Concionatores excepta Urbe in aliis locis stolam deferre debent. 64. & etiam Diaconi si ex facultate id agerent, stola in transversum ducta. 64.

Concionatores nonnulli in Gallis nobiliorum Matronarum gratia suggestum ad Euangelium nuntiandum sibi procurant. 42.

H h

Con-

Conciones cur habitæ post Euangelii lectionem . 128.

Concordia Evangelistarum certitudinem de rebus scriptis reddit . 11.

Concordiæ Evangeliorum Authores varii . 21.

Constans Imperator ad Vitalianum Papam Euangelium mittit gemmis ornatum . 182.

S. Cronani Euangelium aquis demersum nulla littera violatum reperitur . 215.

Crux cur a Diacono efformetur supra librum Euangelii, suoque in fronte, ore, & pectore dum legit in Ecclesia Euangelium ? 83.

Cur fiat à populo similiter? 86.

Crux defertur ad Euangelii lectionem quibuscumque in Ecclesiis . 75.

Crux a fidelibus cur adhibetur singulis rebus, & actibus? 87.

Abusus sculpendi Crucem in pavimento tollendus . 87.

Cruci Christi & Codici Euangelii æqualis honor . 235.

Tiberius II. Imp. ob reverentiam Cruci præstitam thesaurum reperit . 87.

Crucis signo cur se muniunt fideles perlecto Euangelio? 120.

Crucis signum a fidelibus usitatum a primis Ecclesiæ temporibus . 87.

D

Demonstratio quantum horrent ca verba Euangelii. Ver-

bum caro factum est . 105.

Dalmatica proprium Diaconi indumentum unde dicta? Usus a S. Silvestro primum Romanæ Ecclesiæ assignatus . 65.

Ejus significatio . 66.

Deo gratias post Euangelii lectionem . 120.

Diaconi in Missa solemnè ad legendum Euangelium constituti ab ipsis Ecclesiæ primordiis . 34.

Cur Diaconis id incumbat? 36.

Cur in eorum Ordinatione tradatur Diaconis Euangelii Codex? 36.

Stola seu Orarium proprium Indumentum Diaconi . 62.

Ut & Dalmatica . 65.

Cur planetis plicatis in diebus Jejuniorum utantur? 65.

Diaconi Regionarii Euangelium cantabant in Stationibus . 150.

Diaconi Græci Albam variorum colorum induunt . 57.

Diaconus cur ante Euangelium in Missa solemnè dicat *Munda cor meum &c.* 67.

Ritus varii in ordine ad Codicem Euangelii servati olim à Diacono in Missa . ibi.

Diaconus cur Euangelium legendum in Missa olim verteret se ad Meridiem, modo autem ad Aquilonem? 49.

Diaconus quodam in Castro in Die Epiphaniæ canit Euangelium capite galea testò, manique evaginatum ensẽ tenens . 93.

S.Do-

S. Dominicus Prædicatorum Institutum Matthæi Evangelium semper detulit secum. 189.

Dominus vobiscum salutatio ab Apostolis tradita, facienda ab Episcopis, & Presbyteris ad populum. 81.

A Diacono quando usurpetur? 82.

Liber hoc titulo *Dominus vobiscum* a S. Petro Damiano editus. 83.

Domnus, non Dominus appellandus Pontifex; & Sacerdos celebrans à Diacono, cur? 68.

E

Ecclesiæ Catholicæ tantum est decernere qui sint libri Canonici. 8.

Ecclesiæ fabricæ super 4. Evangelia quasi sub totidem Columnas constituta. 16.

In Ecclesia quanta cum reverentia versandum. 80.

Diaconi circumcumbentes cavebant ne quis immodeste sacrum locum violaret. 80.

Edicta, & Censuræ Episcoporum, & monita in Ambone legebantur in Ecclesia. 45.

Electores Imperatoris super Evangelia jurant. 176.

Enses deponerentur olim a fidelibus ad Evangelii lectionem: eosque stringebant Equestris ordinis Viri. 93.

Ensis qua cæremonia adhibitus à Carolo V. Imperatore in Missa coram Pontifice? 94.

Episcopi Græci omnes Pallio per abusum utuntur. 100.

Episcopi olim indefinenter stollam gestabant. 64.

Solemniter celebraturi magna pompa Evangelii Codicem ad Altare deferrebant. 66.

Episcopi assurgere debent dum legitur Evangelium. 95.

Mitram quoque deponere. 100.

Episcopi munus proprium est prædicandi. 133.

In hoc studium præcipuum SS. Episcoporum. 161.

Episcopus cur in Evangelii lectione inter Missarum solemniam Baculum inter ambas manus retineat? 91.

Et cum spiritu tuo cur à populo respondeatur Diacono Evangelium cantaturo? 84.

Evangelia qua lingua scripta fuerint? 13.

Evangelia quibus temporibus & locis sunt exarata? 15.

Evangelia quæ Canonica, & quæ apocrypha? 6.

Evangelia cur quatuor tantum germana? 6.

Evangelia sunt quatuor columnarum quibus innititur Ecclesiæ fabrica. 17.

Evangelia qua lingua legenda in Missa? 31.

Evangelia Dominicarum diebus affixa numquam legi prætermittuntur, nisi in Missis Votis: in quibus tamen præter morem aliter fuit servatum ab Alexandro VII. 29.

Evangelia in conferenda extrema

ma unctione adhibita . 217.
 Euangelia in exorcismis legenda . 166.
 Euangelii Etymologia , ac definitio . 3.
 Euangelii bona quæ sint ex *S. Joanne Chrysoſtomo* ? 4.
 Euangelii vox multiplici ſenſu accipienda . 5.
 Euangelii uſus in *exorcismis* . 164.
 Euangelii verba in ordinatione Episcoporum obſervantur . 199.
 Euangelii virtus contra animi morbos . 213.
 Euangelii initia catechumenis olim expoſita 194. & ſeq.
 Euangelii textus cum Chriſti Corpore aſſervatus in ſepulcro hebdomadæ ſanctæ . 140.
 Euangelii lectio a pueritia uſitata . 194.
 Euangelii lectio ſaluberrima , præſertim Eccleſiaſticis viris neceſſaria . 190. 192.
 Euangelii lectio atque explicatio ad diſcernendum ſpiritum præcepta . 203.
 Euangelii lectio cur a ſtantibus attente audienda ? 104.
 Dum ea fit , ſedere quam indecens . 105.
 Euangelii Codex magna pompa ab Episcopis in Eccleſiam delatus . 66.
 Codex Euangelii in Conciliis Generalibus atque etiam Provincialibus honorifice appoſitus . 168.
 In Judiciis profanis pro Tribunali adhibitus . 170.

In Purgatione Canonica . 172.
 Adhibitus in Juramentis . 175. & ſeq.
 Euangelii Codex e lectis Chriſtianorum ſuſpenſus . 205.
 Euangelii Codex domi ſervatus Diabolum arcet . 191.
 Priſcorum fidelium in hoc præclarum ſtudium . 192.
 Euangelii Codex ſupra caput conſecrandi Episcopi impoſitus . 177.
 Euangelii codex æquo honore habendus ac Chriſti Crux . 136.
 Euangelii codex ab Iconoclaſtis etiam in veneratione habitus . 136.
 Euangelii codex ſigillo munitus . 126.
 Euangelii codex muſivo opere expreſſus in Eccleſiis . 126.
 Euangelii codex geſtatus in manibus inter concionandum . 130.
 Euangelii codex eſt proprius Episcopi . 133.
 Euangelii codex vita ſunctis conſepultus . 223.
 Euangelii codex vetuſtate attritus igne comburendus , & cineres in ſacrario condendi . 186.
 Euangelii codex auro gemmiſque ornatus a viris Principibus dono miſſus Pontificibus maximis , vel Episcopis . Parte item Euangelii pretioſis incluſa theſis a ſummis Pontificibus donati viri Principes . 181. & ſeq.

Euan-

Euangelii codex a Rossis in fornacem projectus, ac servatus illæsus iisdem causis est conversionis ad Christum. 211.

Euangelii codex tamquam frænum carnales appetitus cohibet. 210.

Euangelii codex aquis demersus pulchrior educitur. 215.

Euangelii codex cur adoleatur thure ante lectionem in Missa? 75.

Euangelii codicem tenentes, eoque fidem profitentes viri sancti vita functi. 221.

Euangelio Patri lecto filius cæcus visum recipit. 214.

Euangeliorum plures sunt libri, sed unum Euangelium sunt. 11.

Euangeliorum traditores qui? 224.

Euangeliorum præminetia supra cæteros libros sacros. 20.

Euangeliorum Auctores qui, & quo spiritu ea scripserunt? 7.

Euangelium Græce, & Latine in Missa recitatur. 32.

Hebraice item. 33.

A quibus olim in Missa legere-
tur? 34 & 36.

Euangelium triplex cantari so-
litum quibusdam in Ecclesiis
in die Epiphaniæ. 158.

Euangelium in qua olim Eccle-
siæ parte legeretur? 42.

Euangelium aureis literis con-
scriptum, & gemmis pretio-
sissimis exornatum. 179. Cur? 181.

Euangelium ægrotis impositum
ad recuperandam sanitatem. 213.

Euangelium cantatum in Missa
ab Imperatoribus Carolo IV.
& Carolo V. 93.

Euangelium dum auditur in Ec-
clesia nec genuflectere, nec
orare debent fideles. 103.

Euangelium tangere non audent
Moschovitæ nisi prius lave-
rint manus, seque Crucis si-
gno munierint. 184.

Euangelium quo primum tem-
pore in Missa legi cæptum. 23. & seq.

Euangelium delatum in Proce-
sionibus cum Sanctorum Re-
liquiis. 137. & seq.

In die Paschatis. 147.

Euangelium osculandum datur
semper majori, aut digniori
omnium in Missa. 124.

Euangelium Episcopo celebra-
te neque Principi neque Car-
dinali osculandum præberi de-
bet. 124.

Euangelium legi solitum in
Mandato idest ante lotionem
pedum scr. v. in Cæna Domi-
ni. 144.

Euangelium forte apertum le-
ctumque, vel auditum ad inda-
gandam Dei voluntatem, bo-
numque futurum vel malum
prænosendum. 196. & seq.

Euangelium Romæ olim viseba-
tur in sepulcro S. Petri quod
corpori ejus erat impositum. 223.

Euangelium est virtus in salutem
omni

omni credenti . 214.
 Euangelium cur non scripserit
 ipse Christus Dominus ? 9.
 Euangelium cur in altiori loco
 legatur in Ecclesia ? 43.
 Euangelium recitari solitum in
 Litanis Rogationum . 154.
 Euangelium ad portas Civitatis
 Florentiæ lectum . 155.
 Euangelium ignem extinguit, &
 barbaros ad fidem convertit .
 211.
 Euangelium adulterantes qui ef-
 sent ? 227. *Cauponarii* cur nun-
 cupati ? *ibi*.
 Euangelium osculari solitum,
 apud Græcos in die solemnī
 Paschæ . 150.
 Euangelium, corporis morbos,
 & animi pellit languores .
 112. & *seq.*
 Euangelium discordias sedat. Ty-
 rannorum impetus compri-
 mit . 216.
 Euangelium Corpori Christi
 exæquatum a Patribus . 111.
 In eo Christus adest, & ser-
 mocinatur . 112.
 Euangelium tenens eoque fidem
 profitens moritur S. Bonifa-
 cius Episcopus Laufenensis .
 222.
 Euangelium propria Clericorum
 supellex . 188.
 Euangelium lotis manibus at-
 tractatum, aperto capite,
 stando, ac lumine adhibito
 lectum . 183.
 Euangelium morientibus le-
 ctum . 219.
 Euangelium Joannis cur cæteris

præcellat ? 18.
 S. Pius V. Initium ejus tam-
 quam fidei breviarium in fine
 Missæ legendum præcepit . 19.
 Evangelistis fides adhibenda tan-
 quam si Christus ipse Euan-
 gelia scripsisset . 10.
 Cur quatuor fuerint Euan-
 gelistæ & non potius unus ? *ibi*.
 Eorum Ordo . 16.
 Symbola Evangelistarum quæ ?
 17.

Eucharistia delata in Processio-
 ne Palmarum . 140.
 Ritus varii eam recondendi in
 sepulcro serię v. in Cœna Do-
 mini . 142. & *seq.*
 S. Euplius legens Euangelium ca-
 ptus a persecutoribus, eodem-
 que ad collum alligato mar-
 tyrium subit . 226.
 Eusebii Monachi admiranda pœ-
 nitentia . 104.
 Exorcismus quid . 165.
 Exorcismi antiquitas in Eccle-
 sia . 165.
 Exorcismi origo a veteri Testa-
 mento . 165.
 Exorcistatus materia & forma .
 164. & *seq.*

F

Fidei mysteria multi hodie
 quamquam senes ignorant .
 196.
 Fidem, quam propria manu de-
 scribit, secum conspeliari ju-
 bet S. Joannes Gualbertus .
 221.

Fidem quam moriens profitefur
 S. Jo-

S. Joannēs Colombinus in
acta publica redigi curat. 221.
Fœminis legere Euangelium pu-
blice in Missa vetitum. 39.
Item prædicare, benedicere &
Confessiones excipere. 41.
Fontes, & Fluvii Orientales olim
benedici consueverunt. 157.
In vinum conversi in die Epi-
phanix. 157.

Francisca de Serrone Virgo Se-
ptempedana. 204.

S. Franciscus ex apertione libri
Euangeliorum didicit se vo-
cari ad Christi crucifixi ex-
pressionem. 197.

G

Gentili Bernardus laudatur.
104.

B. Gerardefca Pisana Tertii Or-
dinis Camaldulensis Cœlites
videt coronis depositis stan-
tes ad lectionem Euangelii.
118.

Gloria tibi Domine cur respon-
deatur a Populo ad lectionem
Euangelii in Missa? 86.

Græcæ linguæ usus olim Romæ
communis. 14.

Græca, & Latina lingua Euan-
gelium canitur in Missa Pa-
pali. 32.

Idem usurpatur in *Constanti-*
nopolitana Ecclesia. *Ibid.*

Idem observatur in Ecclesia
Neritina & alibi in Regno
Neapolitano. 33.

Græci quos honores præ cæ-
teris exhiberent Euangelicæ

lectioni? 96.
Græcorum ritus deferendi Euan-
gelium in Processione Palma-
rum. 138.
In lotionem pedum fer. v. in Cœ-
na Domini. 146.

H

Hæretici ex prava sua Euan-
gelii expositione turpe
lucrum metentes. 231. & seq.
Hæreticorum recentium impu-
dentia in corruptione Textus
Euangelici. 177.

Heraclius Imperator ad refera-
tionem libri Euangeliorum
intelligit quo abeundum sibi
esset. 197.

I

Imperator Græcorum in die
solemni Paschæ ad osculan-
dum Euangelium lampadem
manu gestans. 150.

Imperator in Matutino Nativi-
tatis Domini superpellico
indutus, gladio cinctus, &
pluviali albo contectus, præ-
sente Pontifice legit Euan-
gelium *Exiit editum à Casare*
Augusto ante 9. lectionem.
38.

Imperatores, & Reges causa Co-
ronationis. Romam venien-
tes, & coronati in Basilica
Vaticana, ejusdem inter Eccle-
siæ Canonicos relati. 39.

Imperatoribus quandoq; in Mis-
sa Euangelium canere concessum.

sum. 37. 38.
 Imperatores Orientis Euangelium aureum ad Templum S. Petri Romam, cum aliis donis mittunt. 182.
 Imperatores detesto capite audire debent Euangelii lectionem. 117.
 Indulgentiæ concessæ à Benedicto XIII. iis qui intersunt Benedictioni aquæ in pervigilio Epiphaniæ. 158.
 Introitus Euangelii apud Græcos quid sit? 69.
 S. Joannis Evangelii supra aliorum præcellentia. 18.
 Ejus initium quanti fieri debere. 19.
 S. Joannes qua ex Causa scripsit Euangelium? 13.
 Quomodo initium sui Evangelii cœlitus didicerit? 15.
 Quanti hoc initium factum est? 19.
 S. Joannes Calybita adhuc puer a parentibus petit sibi tradi Euangelium. 194.
 S. Joannes Chrysostomus vita functus *Pax vobis* ad Populum dixisse fertur. 82.
 B. Joannes Colombinus fidem, quam moriens profitetur, in æsta publicare digi curat. 221.
 S. Joannes Gualbertus fidei professionem quam propria manu describit secum conspeliari jubet. 221.
 Joannes XIII. Pontifex Campanam miræ magnitudinis benedicit, & in Turrin Lateranensis Ecclesiæ elevari cu-

rat. 160.
 Judices in Causis dirimendis habere debent ante Sedem Sacros Codices, & cur? 170.
 Juramentum fieri consuetum super Sacrum Jesu Christi Evangelium. 174.
 Ab initiandis Militia adhibebatur. 174.
 In judiciis secularibus. 174.
 A Testibus in promotione Episcoporum, & Abbatum. 176.

L

L Ampade accensa legebat in sua cella Euangelium Sanctus Alexander Patriarcha Alexandriæ. 184.
Laus tibi Christe cur respondeatur post Euangelium in Missa, & omittatur in Parasceve? 120.
 Lectio Euangelii olim a pueritia usitata. 194.
 Lectores aliquando in Missa Vice Diaconorum Euangelium recitabant. 34.
 Cur autem ad hoc non sint deputati ex officio? 35.
 Legilia lignea loco pulvinarium adhibere ad sustentationem Sacri Codicis in Missa abusus est ab antiquitate alienus. 76.
 Leo III. Papa tenens Evangelia ab objecto crimine se purgat. 173.
 Lex & Prophetæ typus & Umbra Evangelii fuerunt. 20.
 Linostima Palla, Stola, & Orarium idem apud Græcos, & La-

Latinos Patres . 60.
 Litaniarum usus, origo, & varia forma . 152.
 Majoris, & Minoris Litaniarum differentia, & a quibus instituta . 153.
 S. Lucas qua occasione scripserit Evangelium . 12.
 Lumina ac Thus adhibita in Divinis Officiis, ab Apostolis, & priscis Patribus . 71.
 In Recitatione Evangelii in Missa . 73.
 Luxuria est ignis usque ad perditionem devorans . 211.

M

S. Mamas pastor ovium Coedicem Evangelii perpetuo secum defererebat . 216.
S. Mamertus Episcopus Arvernensis litaniarum restitutor, non auctor fuit . 153.
 Mandatum, id est lotio pedum a Christo institutum, & in Ecclesia primitus observatum . 144.
 Ejus Mysteria . 145.
 Manipulus antiquitus erat Mapula, seu Sudarium brachio sinistro alligatum: quando immutatum, ejusque usus & significatio . 58. seq.
 S. Marcus qua ex Causa scripserit Evangelium? 12.
 Scripsit illud Græce . 14.
 Publicè olim legebatur in Ecclesia . 25.
 Marangonus Joannes laudatus . 233.
 Mariæ Virgini Deiparæ primò

manifestatus est Jesus post Resurrectionem . 148.
 Cur id non prius cæteris manifestasse tradatur in Evangelio . 149.
 Marini martyrium . 200.
 S. Martha legi sibi facit Domini cæ Passionis historiam . 219.
 S. Matthæus qua ex Causa scripserit Evangelium? 12.
 Scripsit illud Hebraice . 13.
 Michael III. Imperator Benedicto III. Pontifici Max. mittit Evangelium auro purissimo tectum cum diversis lapidibus pretiosis . 182.
 S. Milas Episcopus semper deferret secum Evangelium . 189.
 Missæ seu Liturgiæ ritus ab Apostolis brevissimus observatus, auctus subinde precibus, & cæremoniis variis . 25.
 Missæ, & Officia Divina Slavonica lingua celebrare Moravia concessum a Jo. VIII. Rom. Pont. 31. 34.
 Id negatum Bohemiæ Duci a S. Greg. VII. ibi.
 Evangelium cur in Missa legatur post Apostolum? 27.
 Missæ, & Dalmatis, & Croaticis lingua Slavonica celebrare vetitum, sed tantum Latina, & Græca . 32.
 In Missa Sacerdos pro populo, populus pro Sacerdote vota facit . 85.
 Mitre Episcopalis usus antiquissimus in Ecclesia . 101.
 Monachi antiquitus Sacris Codicibus scribendis operam dabant .

bant. 183.

Moschovitæ quantam exhibeant
Sacris Codicibus reveren-
tiam. 187.

Moschovitæ Evangelium non
audent tangere nisi prius la-
verint manus, seque Crucis si-
gno munierint. 184.

Mulieres etiam in auditione
Evangelii stare debent. 103.

N

S. Nicolaum Evangelio donat
Constantinus Magnus Imper-
ator. 182.

O

Officia Divina, ac Missæ
antiquitus prolixiora, &
qua ex causa. 89.

Omophorion. Vide Pallium.
Differentia Pallii Latinorum,
& Omophorium Græcorum.
99.

Orarium idem ac Stola, & pal-
la linostima. 60.

Etymon, ejus Origo, & Usus.
61.

Diaconis proprium, 62.

Orario tum Presbyteri tum Dia-
coni utebantur extra Eccle-
siam. 62. 64.

Pro veste talari sumptum. 166.

Oratio non sedendo, sed stan-
do persolvenda. 197.

Ordo Sacrorum quæ in prime-
va Ecclesia fieri solebant in
Christianorum conventibus.

24

Ordo Evangeliorum, Lectio-
num, atque Epistolarum in
Missæ sacrificio singulis die-
bus præfixus antiquissimus.

17.

In Ecclesia Romana is servatus
jussu Damasi Papæ quem præ-
scripsit S. Hieronymus. 28.

In Ecclesia Orientali Ordo di-
versus servatus. 28.

Osculum pacis & charitatis Si-
gnum inter antiquos Chri-
stianos. 150.

Non promiscue inter mares,
& fœminas, & cur mutatus in
osculum Tabellæ in Missa?

151.

Osculum cur datur libro Euan-
gelii post ejus lectionem in
Missâ? 121.

Antiquitus id fiebat etiam a
laicis. 122.

Cur Presbyter coram Ponti-
fice, & Episcopo, abstineat
ab osculo Evangelii? 123.

Ostiariatus materia: in quo con-
sistat? 163.

Ostiarii officium est hodie pul-
sare Campanas. 164.

P

Pallium, seu Omophorium
deponere solebant Episco-
pi Græci in lectione Euan-
gelii. 96.

Quid sit, & significet ejus
origo & usus. 97. & seq.

Ex qua materia seu lana con-
ficiatur. 98.

Archiepiscopis, & Episcopis
cer-

certis diebus tantum ac locis usus pallii concessus . 99.
 Differentia inter pallium , & Omophorion . 99.
 Palmarum solemnitas apud Græcos . 139.
 Ejus origo in Ecclesia Latina . 161.
 Passionis Dominicæ historiam Sancti morientes legi sibi curant . 220. est ritus a Romano aliisque antiquis Ritualibus præscriptus . *ibid.*
Pax vobis , seu *Omnibus* , ritus salutandi Populum ab Episcopis in Orientali Ecclesia . 81.
 Pelagius Papa Evangelium portans coram populo ab objectis criminibus se purgat . 45. & 172.
 S. Petri Damiani laus ejusque peritia Ecclesiasticæ Disciplinæ . 109.
 Petrus Diaconus tuetur famam S. Gregorii , ejus libros ab incendio servat : Evangelium tenens moritur . 222.
 Perjuri præfione linguæ puniendi . 175.
 Persecutio Ecclesiæ decima omnium crudelissima . 224. & *seq.*
 Phylacteria quid ? 206. *in seq.*
 Picturæ veteris & novi Testamenti in Templis , Cœmeteriis , ac sacris Ecclesiæ ornamentis . 232. & *seq.*
 Pileoli delatio ab Innoc. IV. PP. concessa Cantuariensibus Monachis ob infirmitatem præter quam vero in lectione

Evangelii , & elevatione Corporis Christi . 113.
 S. Pius V. moriens sibi legi jubet Evangelicam Dominicæ Passionis historiam . 220.
 Planeta S. Petri religiose collocata in Templo S. Genovefæ . 51.
 Planeta plicata cur Diaconi utantur in Missa diebus jejuniorum . 65.
 Platonius quidam Evangelium literis aureis conscribendum , & in locis eminentissimis per omnes Ecclesias proponendum esse dictabat . 180.
 Poetarum profanorum libris delectari , crimen in Sacerdotibus . 190.
 Pollidorus Petrus laudatus . 33. & 190.
 Pontifex temporibus Adventus , & Quadragesimæ Pluviali rubro utitur & quare . 57.
 Pontifex Romanus semper utitur Pallio . 98.
 Pontifex Romanus solus , ob præstantiam dignitatis stola decoratus incedit . 64.
 Pontifices , & Episcopi purificatione Canonica uti . 172.
 S. Porphyrius Gazensium Episcopus Evangelii Codicem deferret in Processione . 137.
 Prædicatores Evangelium Christi ut gratis exponant decet quammaxime . 227.
 Causa cur Prædicatores ab omni lucro & quæstu abstinere debeant . 229.
 Præfatus Evangelio quale Officium

ficiū in Ecclesia Constanti-
nopolitana . 138.

Presbyteri Romanæ Ecclesiæ se-
dentes dum Diaconi Euange-
lium canerent, ab Anastasio
Papa emendantur . 95.

Principes personæ non sacro
inunctæ oleo vetitæ ne Evan-
gelium oscularentur ab Ho-
norio III. Dispensatum a Pau-
lo III. cum Regina Poloniæ .
123.

Processio in Dominica Palma-
rum: varii ejus ritus tum apud
Latinos tum apud Græcos .
137. & seq.

In die Paschatis ejusque my-
steria . 147.

Pulvinar a subdiacono portaba-
tur quod Evangelio legendo
supponeret . 75.

Abulus pulvinaria Missalium
usui addicta genibus, cubitif-
ve supponendi *detestatur* . 76.

Pulvinaria quid erant apud
Gentiles . 76.

Irreligiosa prope levitas Ma-
tronarum holoserica auro te-
xta pulvinaria adhibentium
in Ecclesiis . 76.

Purgatio Canonica quid sit? 171.
Quot modis peragi solita. 172.
& seq.

Compurgatores qui essent .
173.

Quæ Purgationes inhibitiæ à
sacris Canonibus . 174. Vide
Pontifices .

Purgatio de objectis criminibus
delato Evangelio super Am-
bonem fit à Pelagio Papa. 45.

R

Reges Franciæ, & Siciliæ in
Missâ Papali canunt, seu
legunt Epistolam . 37.

Reges Gallorum in multis Re-
gni sui Templis Canonicorum
numero adscripti . 39.

Ritus varii à Diacono olim ob-
servati ante recitationem
Evangelii in Missâ . 69. 70.

Ritus ab Episcopo servati in
Concionando . 130.

Ritus standi ad tria Evangelii
Cantica, ac toto Divini Of-
fici tempore juxta veterem
Ecclesiæ morem . 106.

Aperiendi Caput dum legitur
Evangelium . 110.

Ritus varii condendi Corpus
Christi Dom. in sepulcro. 142.

Ritus benedicendi campanas .
161.

Ritus standi quo tempore Euan-
gelium nuntiatur . 94.

Ritus varii in Ecclesia Latina,
& Orientali in Ecclesiasticis
Officiis celebrandis . 92.

Ritus benedicendi Aquam in
pervigilio Epiphaniæ obsole-
tus restitutus à Benedicto PP.
XIII. 155.

S

Sacerdotes septem adhibiti
apud Græcos in ministran-
da extrema unctione . 217.

Sacra omnia vasa, vestes, & Mis-
salia fordida, vetustate attri-
ta, & obsoleta, quam indi-
gne

gné adhibeantur in Ecclesiis .
187.

Sandaliorum usus penes Eccle-
siæ Ministros & eorum forma
describitur . 54.

Sanitas obest multis . 213.

Scripturæ Divinæ non quavis
lingua legendæ , & cur ? 32.

Sebastianus Pauli Cleric. Ma-
tris Dei laudatur . 33. 92. 158.

Sedere dum nuntiatur Euange-
lium omnibus vetitum . 95.

Sedere dum Divina Officia per-
solvuntur incongruum . 106.

Multo minus Laicis convenit .
108.

Sepulcri Dominici memoria cur
ab Ecclesia peragatur feria V.
Cenæ Domini . 140.

Sigillo Codex Evangelii munie-
batur . 125.

Et cur ? 126.

Sigismundus Imp. in habitu Dia-
coni Evangelium legit in Mis-
sa Papali . 38.

Silentium indistum in lectione
legis apud Hebræos per Le-
vitas , atque per Diaconos in
Ecclesia ante Evangelii recita-
tionem . 77.

Perpetuo servandum in Eccle-
sia . 78. & seq.

Simeonis Thessalonicensis error
notatur . 218.

Statio ad S. Mariam Majorem
in Urbe cur in die Paschæ ce-
lebretrur ? 149.

In Stationibus Evangelium
cantabatur a Diaconis Re-
gionariis . 150.

Stola Sacerdotalis in quo disse-

rat ab Orario Diaconorum :
62.

Stolæ forma , & varius usus in
Diaconis . 59. & 60.

Subdiaconi aliquando in Missa
Evangelium legebant loco
Diaconi . 34.

Supellex sacra profanis insigni-
bus non exornanda . 235. &
seq.

Superstitiones nonnullæ pravo-
rum hominum malitia in
Evangelii S. Joannis lectione
quotidiana excogitata . 20.

T

S. Thadæus Apostolus aurum
a Rege oblatum respuit .
231.

Theodosius magnus Imperator
Evangelium literis aureis pro-
pria manu descriptum quoti-
die lætabat . 179.

S. Theophila Evangelii virtute
a castitatis naufragio libera-
ta . 308.

Thomæ a Kempis libellus au-
reus . 197.

Thuris usus in Ecclesia reproba-
tus ab hæreticis : approbatur
a sacris Scripturis , & Patri-
bus . 72.

Cur etiam populus thure ado-
latur ? 75.

Tituli Evangelii a quibus præ-
fixi . 8.

Totilam crudelissimum Pelagius
Evangelii codice ad mansue-
tudinem adducit . 216.

Traditores appellati qui sacros
Co-

Codicēs ethnicis Magistrati-
bus deferabant . 225.

V

Verbum caro factum est, dum
legitur in Missa genufle-
ctendum, & cur ? 105.

Monachus genuflectere omit-
tens, dum in Missa legitur,
Verbum Caro factum est, a
diabolo post alapæ percussio-
nem increpatus est. *ibi*.

Vestem talarem sine intermissio-
ne deferre tenentur Sacerdo-
tes. 62.

Vestes sacræ in divino ministe-
rio perperam ab hæreticis
improbatae. 50.

Vestibus sacris ut Sacerdotes &
Diaconi numquam nisi in Ec-
clesia uterentur constituit S.
Stephanus Papa. 52.

Vestibus sacris usi sunt Apostoli
in divinis officiis. 51.

Vestes sacræ ab initio Ecclesiæ
adhibitæ in ministerio Eccle-
siæ. 51. 52.

Vestes sacræ historis veteris
novique Testamenti exorna-
tæ. 234.

Vestes profanæ mulierum per
summum abusum sacris ima-

ginibus intextæ dantantur ;

237.

Vestis S. Joannis Evangelistæ
S. Gregorio PP. dono trans-
missa. 52.

Veteris ac novi Testamenti hi-
storix Ecclesiis olim ac Cœ-
meteriis pictæ. 232. & seq.

Victor Episcopus Africanus Tra-
ditor Codicis Evangeliorum .
226.

Virginitas Evangelio servata .
208.

Vitalianus Papa a Constante Im-
peratore Evangeliorum li-
bro donatus, gemmis albis
miræ magnitudinis in circui-
tu exornato. 182.

Ufus segregandi in Ecclesia Vi-
ros a Mulieribus antiquissi-
mus, atque laudatissimus. 47.

Restitutus a Ven. Card. Toma-
sio in suo Titulo Equitii. Mox
post ejus mortem sublatu-
s. 49.

Z

Zenone Imperatore reper-
tum est corpus S. Barnabæ
Apostoli cum Evangelio ad
pectus ejus apposito. 223.
Zona. Vide Cingulum.











